


UTL AT DOWNSVIEW




D RANGE BAY SHLF POS ITEM C  
39 13 30 10 01 021 7

DG  
864  
A76  
1922  
C.1  
ROBA







Digitized by the Internet Archive  
in 2010 with funding from  
University of Toronto



# صقلیة

---

سیسیلیا فاطره سی

SICILIA

محرری

صمعی

---

برنجی طبعی ۱۹۲۲


هر حقى محفوظدر .

---

مطبعة امیریه سندیه مصریه








081770005





پالرمو — اصمعی — ۱۹۲۱



دولتو عصمتلو امیره سمیحه طاهر حضرت تلمینه

تقدمه عاجزیدر - ۱۹۲۲

اصمعی



۱۴۵  
تصنیف خط میر محمد علی بن ابی حمزہ محمد بن ابی حمزہ  
نصیحی

# صقلیہ

Autograph of  
The author - میرزا فاضل -

RARE SICILIA

محمّدی

صحنی

برنجی طبعی ۱۹۲۲

مطبع امین حسینی بمبئی



## ناپولی — ۱۵ کانون تانی ۱۹۲۰

اون بش کوندر ناپولیده یز . رومادن کلداک . نازل اولدیغمز اوتل دکز کنارنده برنجی درجه دن معدوددر . آدینه ده « اکسلسیور » دیشلر . طعاملری هیچ ده درجه سیله مناسب دکلدر . اوطه و طعاملرینک فیاتنی سویله مم . سویلر سه م احتمال که بر آ . صداسیله کوزل ناپولی یی زیارت فکرندن واز کچر سکز .

حقیقت ! ناپولی و اطرافی ، اطهرلیله برابر پک کوزلدر . شایان تماشا اثار . قدیمه و جدیده سی دخی واردر . دیلنجیلرله طولاندر یجیلری ده وارها ! بوراده انسان کوزلرینی درت آچمیلدر . دیلنجیلری « عنایت اوله » یی اکلار طاقیدن ده دکلدر . اوتل قبولری کایسا قبولری کبی دیلنجیلره تستلکاه اولمقدن اصلا قورتوله مامشدر .

بنجه ناپولی یی یوکسک بریرندن سیرایتمکک طویلماز . « وه زه ویو » نامی ویردکاری یانار طاغمتک کوندوز وکیجه



منظره لری بشقه بشقه در . کوندوزین دومانلر وکیجه لین  
آلور صاوران ایتالیان شاعری « دانقی الحیه ری » نک  
جهنمه نمونه اولمدر .

عوام نامی پک کیرلیدر . هم ده زیاده سیله غوغاجی  
و کورولتیجیدرلر . بی لزوم چوق سویلرلر . سوزلری ایسه  
ال ، کوز و قاشلرینک درلو حرکاتیه تکمل ایدیلور .

تحف ! تکمیل ایتالیاده بیوک کچوک اثئی مکمله ده ال  
ویوزلرینی آز چوق حرکت ایتدریلورلر . انجق ناپولیده بو  
حرکت ، مکمله نک درتده اوچنی اکمال درجه سنده اجرا  
ایدیلور . ایکی ناپولیمینک مکمله سنی اوزاقدن سیر ایدن بر  
اجنبی بونلری دیلسز ، صاغیر آدملردن ظن ایدر .

عوامی سر خوشدرلده . قولایجه زنکین اولمق قورونتوسیه  
« تومبول » قارینی سورلر . ارتق باقی حاللرک ، اخلاقسز انک  
عموم اراسنده همه حال موجودیتنه شبهه قالماز دکللی ؟

چارشو خلقنک متاعلرینی مدحده اصلا سوزلرینه اعتماد  
یوقدر . مقصد مشتریسنک کیسه سنی بوشالتمدر . یمینلرله  
ویردیکی سوزلریله ایشلرینک اراسنده مناسبت آراماملی .

« پوزیله یو » « Posilepo » نام ساحلده اک معروف  
برقهوده ویمکخانه واردر . اوتلک طعاملرندن شکوا ایلدی کمزایچون  
بورایه جمله مزی براو کله طعامنه اک بیوکمز دعوت ایللمشردی .

حتی بر کون مقدمی اورایه قدرده کیدیله رک طعماک انواعی  
ترتیب اولمش و قیمته باقیمه رق طبخنده دقت ایتمسی ایچون  
صاحبنه صیقی تنبیه دخی ایدلشیدی . تنبیهی کیم دیکار ؟  
حریفلر ، ینه بیلد کلرینی یابدیلر ! ...

فرداسی کون وقت ظهرده اورایه واردق . براز صبرایتمه .  
مزی توصیه ده بولندیلر . نه دن صوکره سفره دیه ترتیب  
ایتمش اولدقلری اوزون براغاج ماصه نک اطرافنی قوشاتدق .  
کیرلی پاعلی پشکیر ، چتال و بیچا قلری قارشو مزده بولدق .  
اشتها آحمق ایچون کتوردکلری ایلك صحن یشیل  
زیتون ، خیار و بوبر ترشیمی ایله صاردا لیا ایدی . یگونمزیدی  
کیشی ایدک . ایکی کیشیمز بونلردن طببا قلرینه آلدیلر ایسه  
ده پک طوزلی بولدیله ، ییمدیله . آرقه سندن مقارنه کلدی .  
هممز طببا قلمزی طولدردق . مکر زیتون یاغیله یاپلمش ایمش .  
رنکی دخی اسمر اولدقدن بشقه پشمامشدرده . حیرتله بری  
بریمزک یوزینه باققدن مقارنه نک یوزینه باقغی اهمال ایدک .  
ارقه سندن بالیق واوختاپوت قزارتمه سی کتوردیلر . هپ  
زیتون یاغیله یاپلمشیدی . بوندن صوکره ده قاینا نمش طاق  
تقدیم ایدیلر . بیچا قلرینه و دیشلرینه اعتمادی اولانلر  
بیورسون دیدم . صالاته سی دخی اجی زیتون یاغیله  
یاپلمشیدی . پینیر و میوه دن صوکره حساب پوصله سی کلدی .

تمام اوچ يوز ايتاليان ليراسنى سوكلدك . بركت ورسون كه :  
 مصر پاره سنك ايتاليان ليراسيله تبدیل فرقی بزی براز تسلی  
 ایده بیلدی . بوكون بر ايتاليان ليراسی بزم مصرك برغروشنه  
 تقریباً مساوی ایدی . ناپولی ده يوللارك تعمیر ونظافتنه ده  
 کرکی کبی باقلمیور . سوقاقلری پك کیرلیدر . قالدرملری  
 بوزو قدر . عجا حرب کیر مناسبتیه اهملی ایدلیدی سئواله  
 خایر دیدیلر . بلدیسه سی بلکه فقیردر دیدم . بالعکس پك  
 زنکیندر . ایرادك يوزده سکسانى معاش وباقی یکر میسنی ده تعمیرات  
 وتنظیفات ایچون ویردیکندن ناپولی شوکور دیکمز حال  
 وقیافتی آمشدر دیدیلر .

بوشهر ده کبار وکبرا عائله لر پك چوقدر . شوراسنی ده .  
 بیللمی که اشبو ذوات محترمه عوام خلک بو سبتون بیا —  
 بحیسیدرلر . وقتیه قوجه بر قیر اللغه پایتختلك ایتمش اولدیغندن  
 پك چوق « قونت وقونتس » لری و « دوق و دوقس »  
 لری ده وار . مسموعمه کوره ناپولیده حشمتلو ایتالیا قیرالنك  
 رسمی کونلرده دعوتنه چاغیریلان اصیل وزادكانك عددی  
 طقوز یوزه قدر بالغ اولیور ایش . بو کبار لردن بر قاجیه  
 کور یشمش ایدم . مکمل وپك تربیه لی انسانلردر . بونلرك  
 نه ادا لری نه صداری ناپولی اولدقرینی اکدرماز .  
 ناپولی یه نه قار یاغیور نه ده صولری طوکیور . ایلیق بر



هواسی وار . فقط یا غموری هم ده ایری دانه لی یا غموری پک  
برکتیدر . سوقاغه چیققدیغنده یا غمورلغی و یا شمسیه یی او طه  
ده اونو تمغه کلزها ! صیر صیقلام ایصالیق هیجدر . کوندوزین  
یا غمور دیکدکدن صوکره الدیغی الاچه کونشلی منظره سی پک  
شاعرانه اولیور . « برتولینی » نام او تلک « تراسینا » دیککاری  
چیقمه سندن او یله بر حالدہ ناپولی نک تماشا سنه طویلماز .  
قارشو یاقه ده کورونن « سوررانتو » طاغری نہایتنه قدر لیماہ  
عظیم برسد حالی آمش ، « قاری » اطہ سی ده لیمانک مدخلی  
ترین ایتمش اولدیغندن استانبولک اطہ لر یله برابر « مودہ »  
دن اسکدارہ قدر و « سان استفانو » دن سرای برونہ قدر  
اولان او کوزلم منظر سنی در خاطر ایتدیور .

ناپولینک سیار موزیقہ جیلری اقشاملین اوتلرک جوار  
لرندن کسلمیورلر . « تارانتلا » نام مشہور رقصنی ده  
اقشاملری اوتل سالونلرنده اجرا یلہ مسافرلری اکلندریورلر .  
ہلہ ناپولی اغزی تغنیلری اجنبی سیاحلر ایچون غریب  
عدا یدریورلر . یا دیلری ! ایتالیا برج بابلندہ ناپولینک حصہ  
سنہ دوشن لہجہ یی واصطلاحاتی تماماً اکلامق ایچون  
مطلقا اورادہ طوغمش ویومش اولمق لازمدر دیرم .

پ حرفنی عربلرکی ب دیہ تلفظ ایدرلر . ل حرفنی ایسہ  
انکلینز لرکی سویلرلر . ناپولی اغزیلہ انتشار ایدن بر قاج

اگلنجه غزته لری واردر که : بلکه اکلایه بیلیرم دیه الدیغم  
ومطالعه ایلدیکم حالد یاریدن زیاده سنی کندیلرینه مخصوص  
کلمات واصطلاحات بولندیغی ایچون احرک یاردیمله بیله  
کوج اکلایور ایدم .

ناپولی عوامنک سب و شتم ایچون استعمال ایلدکاری  
سوزلرک صوکی یوق دینه جک قدر چوقدر . احبا ارا سنده  
کی قبا شاقه لری بیله بک چیرکین سوزلردر .

فقر و ضرورت خلقی کسب معیشت ایچون قوشدر  
دیغندن تحصیل علم ومعارفده خیالیدن خیلی کرولشدرلر .  
بر اختیار بیلدیکم دیمشیدی که : ناپولی ولایتده یاپیلان بر  
احصای رسمیده اهاالینک یوزده سکسان بشی امی بولندیغی تبیین  
ایتمش ایمش . نه ایسه ، اکثر دار و دیار ده اولدیغی کبی  
ناپولینک ده هم فضائل همده رزائی واردردیه رک عادات ، اخلاق  
وفساد خلقی بیلیمک ایستینلره « ایل جیورنو » صباح  
غزته سنک صاحبه سی مادام « ماتیلدا سراو » نام محرره نک  
« قوقان یی دی پائیزی » یعنی « مملکتک برکتی » ادلی کتابی  
توصیه ایدرم .

ناپولینک کوره جک یرلری چوقدر . یانار طاغنک  
اوزاقدن تماشا سنه قانماز ایسه کز باجه مقامنده اولان اغزی  
جوارینه قدر راحتجه کیده بیلیرسکز . « پومیه ی » شهری

خرا به سنه قدر ده برکوندوز ده کيدر وزيارتله عودت ايدر  
سکيز . ملت جاده سنده کي عمومي اتتيقه خانه سي دخي  
پازار دن ما عدا کونلر ده آچيقدر . قرال باغچه سي نام  
عمومي باغچه ده کي « حيوانات مائيه » مشهري ايسه پک  
فائده لي وا کلنجه ليدر .

« پوزيله پو » يه قدر اوتوموبيل ويا ارا به ايله کيزينتي  
ايديليور . قارشو ياقه ده « قاستلوماري » دن تا « سوررتو »  
يه قدر وارقه ساحلده بولنان « آماقي » يه قدر واطه لرندن  
« قاپري » يه قدر پک اي کيزينتيلر يا پلير .

اون بش کوندر ناپوليده يز ديمش ايدم . بوندن اون  
برکونز پک قيمتلي يولجيارمزي سلاملامق ايچون کچدي .  
ربم سلامتير ورسون . کانون اولک اون اوچنجي جمعه  
ايرتسي اقشامي ساعت اون برده را کب اولدقلى واپورلى  
اسکندريه يه حرکت ايتمشيدى . قالان کونلر يمزده ايسه کويا  
اکسيکميزى ، سکديکميزى طولدرمقلا مشغول اولدق .  
نيميز ، سيچيليا ديدکلى « صقليه » جزيره سنه کوچه رک  
قيشي « پالرمو » ده کچيرمکدي . موقعنک لطافتى ، هوا سنک  
اعتدالى هله « پالرمو » نك جمال ونظافتى سياحلى اراسنده  
پک مشهوردر .

ناپوليده بشقه براشي يوق دينه جک قدر معروف بولنان

برکتابچی یی زیارته باشلادق . « سیچیلیا » اطه سنک یدی  
 قطعه دن مرکب کوزل بر خریطه سنی کوردم آلم . ایتالیا  
 سیاحین جمعیتی طرفندن طبع ونشر ایتدرلمشدر . اولدقجه  
 مفصلدر . یدیسی بریده آچلوب سرینجه اطه یی یوللریله  
 وشهر وکولریله هب ارئه ایدیور . « پالرم وسیراقوز »  
 نامنده اطه نک قدیم وجدید اثار ومبانیسنی ارئه ایدر  
 وبرازده تعریف ایلر فرانسزجه ، رسملی برکتاب بولدم  
 آلم . رسملی ایتالیا شهرلری نامنده ایتالیا نجه کوزل برده  
 آلبوم آلم . « پالرمو وجواری » نامنده انکلیزجه بر رهبردخی  
 صاتون آلم .

ارتق کیجه لری اوطه مده خریطه می درس وکتابلری می  
 مطالعه ایتمهکله وقت کچیرمکه باشلادم .

معلومات ! چوراب اورکومی کی اورلدکجه شکانی اظهار  
 ایلر . خریطه یی دقتلی مطالعه و رسملی کتابلری معاینه  
 ورهبرمی قرائت شوقمی تزید ایلدیکی کی تکمیل اطه دن  
 وخصوصاً « پالرمو » ده موجود اولان اثار ومبانی اسلامیه  
 رسملری کورمکله ده برکون اول بونلری زیارته هو سمی  
 ارتیردقجه ارتیرور ایدی . سیچیلیانک دور اسلامه عائد  
 تاریخی ایدنک فکر م اویاندی .

اونلردن ده بولدم . عجبا عربجه وترکجه « حقلیه » ایچون



نه لریازلمشدر دیه ارامغه و صورمغه باشلادم . برابرمدہ بولنان  
کتابلر جمله سندن ایکی عدد خط دست ترکیه تاریخده دخی  
سیچیلیاده حکومت ایدن اسلام امارتلرینه دائر معلومات بولدم.  
شویله بویله بو کتابلر ده « صقلیه » اوزرینه خیلی معلومات  
یازلمشیدی . ممنون اولدم . سیچیلیانک ایتالیا نجه مختصر برده  
تاریخی بولدم آلدیم . عربجه ده ایسه « صقلیه » اوزرینه نیجه  
مهم کتابلر بولندیغنی اوکرندم . بر خبره کوره ده « پالمو »  
شهرنده کی « کتبخانه ملی » ده مع زیاده کتب عربیه  
موجود ایمش . ایلروسی ده اوراده اکمال ایلمک امایله  
تحقیقات و تدقیقات تاریخیه سنی پالمویه مواصاत्मزه تعلیق  
ایلدم .

ناپولیدن هانکی طریقه پالمویه عزیمتک ده اراحت اوله  
جغنی صوردق . قاره طریقمنک پک اوزون و اوچ یرده  
دمیریولی قطاری دیکشدرمک زحمتی بولندیغنی اوکرنک .  
ناپولیدن دمیریولی قطاریله « مسینا » نک قارشوسنه قدر  
کیدیلیور . اورادن ده اوزرلری دمیرشریتلی بیوک دوبارله  
واغونلر « مسینا » یه کچیریلیور . بوندن سوکره اطه نک صاغ  
ساحلی پوینیجه قطار تا « پالمو » یه قدر واصل اولیور .  
بو وجهله قاره یولجیلغنی یکرمی بر ساعت دوام ایدیور که  
« صونی بارد اقدہ ، کمی بی دیوار ده کورملی » دین وهام



عصبیلر ایچون بیله زیاده یورغونلقدیر .

ناپولیدن «پالمو» به بحرًا عزیمت اڭ قیمه و راحت اولوب  
هله دکز ساکن بر حالدہ بولنورسه بوايکی شهر اراسنده کی مسافه  
بی پوسته واپورلری یالکیز اون بر ساعتده قطع ایلرلر ایش .  
دهاسی وار . ناپولیدن هر کون بعد الظهر ساعت یدی بچوقده  
پالمویه بر پوسته واپوری قیام ایدیور و فرداسی صباحین  
کونشله پالمو لیماننه واصل اولیور . دیمک که یولک قسم  
اعظمی ده اویقوده کچیریلیور . ایشته بوا علا دیدک و یارینکی  
پنجشنبه کونی اقشامک ساعت یدی بچوغنده قیام و حرکت  
ایده جک « ترسته شهری » نام واپور ده یرلرمزی ،  
یا ناقولرمزی طوتدق .

اقشام طعامنده هب یارینکی عزیمت ترتیبلری و تدبیرلری  
ایچون مکالمه لرایلدی . ها ! آزاله اونوده جقدم . پالمونک  
برنجی درجه اولترینک اڭ ممتازی بولنان «Villa Igiea»  
« ویلا ایجی آ » نک مدیرندن تلفرافله اوطه لر ایستمش  
ویوم موعودده واپورک یاننه اوتوموبل وارا به کوندرمسنی رجا  
ایلمشیدک . غیرتلی اوتل مدیری امرمک حرفیاً اجرا ایدیله  
جکی جوابیله بزى تأمین ایلدی .

سیاحت ایدنلرک واصل اوله جقلری شهر وکویلرده  
حاضر ایدمش اوطه لرینه راحتله کیره بیلرلی ایچون اڭ

اسلم چاره بزم دایما یاپدیغمز کی اولجه بیلدیکی ویا اسمنی  
اوکرندیکی اوتلک مدیرینه بر تلغراف ویرمک و قبول جوابنی  
آلمقدر . یوقسه وای حالنه ! وای باشنه ! بردفعه میلانو  
شهرنده بنم باشمه کلدیکی کی قوقیو اوتلیری طولاشیر واک  
صوکره پک یوکسک فیأتله برکیجه یاته جق کومس قدر بر او طه  
یی کوچ بلا بولدیغمکز دن طولایی تیکری یه بیکرله شکر لر  
ایلر سکز .

سیاحتده راحت ایدهیم دینلر ممکن مقداری یوکلرینی  
ده آز آلمیدر لر . تک باشمه سیاحت ایلدیکم زمانلر لزومنده  
اشیامی کئندم طاشیه بیله جک قدر خفیف آیرم . هله ایتالیاده  
ایسه اک خیرلی یولجیلق غایت کچوک برال چانطه سیله کزم مکدر .  
بو مملکتده حالا قاره کمرکاری قالدیرلماش اولدیغندن آدمک  
چانطه لرینی قارمه قاریش ایتمدکجه استاسیونلر دن طیشاری  
یه صالیور میور لر . مکرکه انسان ، دیکردرلو چاره لری ده  
اولدیغنی بیلهلی و بوللی ایمش ! . . . او یله سی ده باشمزه  
کلمدی دکدر .



## ناپولی ودکز ۱۶ کانون اول ۱۹۲۰

بوصباح ارکنجه قالقدق . اوکله طعامندن صوکره اوتلی  
 ترک ایده جکزی مدیرینه اعلان ایلدک . بعد الظهر اوتلک  
 حسابی ایستدک . بزه تقدیم ایلدیکی طعاملرندن زیاده یاغلی  
 بر حساب ویردی . لامسز ، جیمسز پاره لری سوکلدک .  
 جان صیقیدسیله اوتلجی یه بیله وداع ایتمیهرک طیشاری یه فیرلادق .  
 نه یاملی ؟ تجربه کار اوروپا و امریکا سیاحلری کبی اوطه نک  
 فیثاتی قرارلاشدردمقجه چانطه سنی یره قوماز طاقدن  
 اوله مایزکه : سرده بکلک وار! قوجه بر مصر سلطانک کریمه  
 سی وائار قلمیه سیله مشهور بولنان امیره قدریه حسین  
 خامک معیتیز .

اورتالق یاغمور ، چامور ، هوا ایسه آجی سرت اسیور  
 ایدی . « غالارییا اومبرتو » دیدکاری مشهور بدستانده کی  
 قهوه لک برنده ایکندی چایی ایچدک . ینه بورا ده موجود



مرجانجی دکانلارینی ده وقت کچیرمک ایچون زیارت ایلدک .  
 مصره تلغراف ویردک . پوسته یه مکتوبلر براقیق . نهایت  
 ساعت التیدن صوکره کمرک دأره سی داخنده کی خصوصی  
 ریختیمنده باغلی طوران واپورمزه کیتدک . قماره لرمزه  
 کیردک . امیره حضر تلرینک خدمتکاری تکمیل اشیایی اولجه  
 کتور مشیدی . خدمتچی قیزی ده هر شیئنی حاضر لامشیدی .  
 اقشام طعامی واپورک قیامی عقبنده ایدیله جکی ایچون  
 بزیمکدن الارمزی بیقا مشیدک .

تمام یدی بچوقده واپورک اوسقور کومبورتیسنی قوللا  
 قلمز ایشتمک باشلادی . دهاتمامیله آچیغه چیقماش اولدیغمز  
 حالده ایاقده طوتونه رق کزیننلر کورلدی . بن قماره مدن  
 طیشاری چیقمغه هوس ایلمدم . نصل اولسه بأذن الله  
 یارین صباح پالرمولیماننه واصل اوله جغز دیه واپورک  
 ایجادندنبرو دکز یولجیلغنک امین بولندیغنی ، هیجده اجداد  
 مزک دکز سباحترلنده چکدکلی زحمتلری چکمه جکیزی  
 دوشونیور ایدم .

واپورمز ساعت طقوزه طوغرو ارتق شدتلیجه یالپا  
 لانیوردی . اقبال بویا ! مکر بنم یاتاغم واپورک طولنه دکل  
 عرضه موضوع ایش ! یاتدیغمده ایاغه قالقیور وکاه تمه مک  
 اوستنه دیکلیورم کی صاللانغه باشلادم . مدد الله ! اویقو

يوق . اللهم عنايتيه يارين صباح هر حالده پالرمو ده يزديه ينه  
قوت قلبه متسلى اوليوردم .

دكيزك شوحالى مناسبتيه قارئلريره « رحلة الكفاني » نام  
بر سياحتنامه دن بر ايكي صحيفه اوقويه بم . شويلاه كه :  
اندلسك « بلنسيه » نام شهرندن « محمد بن جبير الكفاني »  
نام سياحك اسمنى سويديكم كتابنك اوننجى بابندن ايكنجى  
فصلنى ايسته اوقويورم . « سردانيه » اطه سندن « صقليه »  
اطه سنه بر يلكن كيسيلاه كليركن « مسينا » اوكنده كيلىرىنك  
ودها طوغروسي كنديلرينك باشنه كلن وقعه يي حكايه بابنده  
دييور كه :

— هجرتك ۵۷۸ سنه سى رمضانك برنجى كوني جمعه  
ايدى كه « دجنبر » آينك يديسنه مصادف بولنيور ايدى<sup>(۱)</sup>.

(۱) سنه هجريه يي سنه ميلاديه ايله مقارنه ايدن  
« توقيفات الهاميه » نام كتابه مراجعتله كوردم كه سياح ابن  
جبيرك ۵۷۸ سنه سى رمضانك برينه « دجنبر » ك يديسى  
مصادف بولندي ديدىكي طوغرو دكلدر . احتمال كه نساخ  
يا كلشيدر . طوغريسي شويلاه در . رمضانك ايلك كوني جمعه  
اولوب دجنبرك « كانون اول » يديسنه مصادف اولان هجرتك  
۵۷۷ سنه سيدر كه ميلادك ۱۱۸۲ سنه سنه مصادفدر .

خفیف پر شرق روزکاری چیقہرق را کب اولدینمز سفینه یی  
سوق ایلموردی . صاغ طرفزدن قاره یی کوردک . نہایت  
باغ ، باغچه ومعموردلرک حذارینہ کلدک . بوراسنک  
«قلوریہ» اولدیغنی (قالایدمک ایستیور) خبرویردیلمر. اورالری  
ہب «صقلیہ» صاحبنک ملکی اولوب ارض کیرہ متصلدرکہ  
طولی ایکی آیلق یولدر .

اتمک وصویمز مک آز قالمشیدی . زیرا بوکمی یہ را کب  
اولدینمزده محل مقصودمزه اون کونده ونہایت اون بش  
کونده واصل اولہ جغمزی تخمین ایلمش واک دوراندیشمز پر  
آیلق اتمک وصو آلمش ایدی . حالبوکہ روزکارسنزلقدن  
بزکمدہ رجب وشعبان ورمضان آیلرینک ہالانی کورمشیدک .  
اولہ پر حالہ کلدک کہ : یوز الی درهم اتمکی پر کونده  
درت کیشی یہ تقسیم ایدیور وصوی دہ اوکا کورہ  
ایچیور ایدک .

صباحلین قارشومزده «صقلیہ» نک «جبل برکانی» یعنی  
یانار طاغنی کوردک . جدّاً مسرور اولدق . فرداسی جمعہ  
ایرتسی کونی اقشامہ طوغری روزکار کسب شدت ایدی .  
سفینہ مز سرعتی آرتیردی وصالانمغہ باشلادی . قرانلق  
ایمیجہ باصدینغندہ بوغازک اغزینہ کلشیدک . بوراسی ارض کیر  
ایلہ «صقلیہ» جزیرہ سنک اک طارکچیدی اولوب ککیش محندن



التي ميل ، طار يرنندن ده اوج ميل مسافه در<sup>(۱)</sup> . بو بوغاز ده  
دکز دائمی جریان اوزره بولنوب طار لغی مناسبتيه ده قانياور  
وکوکلر صاوير يور اولديغی کوريلير .

جنوبدن کلن برشدتی روزکار سفینه مزی ده ا زیاده  
سرعتله سوق ایدیوردی . صاعمز ارض کبر « اوروبا »  
وصولمز « صقلیه » جزیره سیدر . رمضانک اوچنجی  
کونی بازار ایدی . ککیجه یاریسنه طوغرو تمام  
« مسینه » « Messina » شهرنک حذاسنه کلدی کمزده  
شدت روزکاردن سفینه نک یان یاتمغه باشلادیغی اعلان  
بابنده طائفه لر باغیروب ، چاغیرمغه باشلادیلر . سفینه رئیسی  
در حال یلکنلرک ایندرلمسنی امر ایدی . « اردمون » تسمیه  
ایدیلن دیرکک یلکننی بردرلو ایندره مدکلرندن رئیس همان  
بیچاقلا یه رق یلکنی پارچه پارچه کسدی . نه فائده ! شدت  
روزکار سفینه مزی نهایت بر صیغه چکمکه باشلادی . ایشته بو زمان  
کمیده بولنان یولجیلر آرا سنده بر قیامتدر قویدی . اسلام  
وخرستیان یولجیلرک اغلامق و تقدیر خدایه تسلیم اولمقدن  
بشقه چاره لری قالمامشیدی . رئیس ، کینک لنگرینی آتدی .

(۱) ایتالیا نجه سیچلیا اطه می نام جغرافیا کتانبنده  
« مسینه » ده کی بوغازک طار محلی ۳۲۰۰ متر و در دیه یازیلیدر .

زنجیری قیرلدى . كى دخى طالغه لك شدتدن قاره به طوغرو  
سوروكنىمكه باشلادى .

يولچىلردن خرىستان قادين وچو قىلر هب بردن امداد ديه  
باغريور و آوازلى چىقه بىلدىكى قدر يوكسك سسله اغلايورلر  
ايدى . جمه مز اياق اوزرنده ، ياصباحى بولور واحتمال كه  
قورتولور ويا تكميل درياه دو كولور و بلكه ده اولومزده قايوشيرز  
ديه خايجانلرله طور يور وقارشومزده كي « مسينه » به حسرتلرله  
باقيور ايدك . عجب اكندىمى دكيزه مى آتسه ق يوقسه عنايت  
الهي يىمى كوزتسه ك خير ليدر ؟ دييوردق

طائفه لرسفينه نك قايقلىرى بىك مشكلاته دكيزه ايندره  
بىلدىلر . اولاقادين وارلك يولچىلر ك مهم اولانلرىنى آلدىلر و  
قاره به چىقار دىلر ايسه ده تكرار سفينه به بردر لو غودت  
اپده دىلر . چونكه طالغه لك شدى قايقلىرى قاره به چارپه  
رق پاره پارچه ايلمشيدى . بو حاللرى كورن كوزلر ايسه  
ارتق بوسبتون ياشلرله طولش قالمشيدى .

دپر كن عنايت خدا اياه اورتالق آچلدى . صباح اولدى .  
تمام « مسينه » شهرينك اوكنده بولمى نور ايدك .

ليمانك تكميل قايقچىلرى قايقلىرله امداد مزه قوشدىلر .  
مكر سفينه مز ايچون شهرده دلاللر چاغيرمش اولديغندن  
« صقليه » نك صاحبي بولنان قيرال « غلام » بيله برچوق

معیلله خبرمزی المغه گلش ، امدادمز ایچون امرلر ویرمش  
وحتی کیمده بولنان فقرای مسالمینک قایقجیلرک طلب  
ایلدکلری پاره‌نی ویره مدکلرینی ایشیده‌رک کندی کیسه سندن  
یوزعدد صقلیه نك رباعی دینلن اقجه سندن احسان  
ایلمیشیدی . ارتق تکمیل یولجیلر مسینایه چیقارلدی . برکون  
صوکرده ده کیممز چارپنه چارپنه یوق اولدی کیتدی . خدایه  
بیکلرله حمد و ثناله ایلدک که سفینه‌مز بووجه‌ایله قیرالک بولندیغی  
شهره دوشدی و بزده دکنه غرق اولمقدن قورتولدی .

یادیکر بر ساحلده بو حاللر باشمزه کلهیدی . پک احتمال  
ایدی که : هیمزی اسیرایدلر واسارت ایچنده محو و نابود  
اولور و تکمیل اموالمر دخی یغما ایدیلیرایدی . نه یاپارسک ؟  
زمانک عادتی بویله در . »

نصل ؟ بزم ابن جیبرک باشنه کلنلری کوردیکزمی ؟ دکن  
سیاحتی بویله یلکن کیلریله اجرا ایدلکی زمانلرده « دکن  
بر پادشاهدر اصلا سوز دیکله‌مز » دیزلرایدی .

دها استانبولده ایکن اسقاطنی وصیتنی تماماً یامدقجه  
هیج بر کیسه حجه نیت ایلمز وکمی یه بینمز ایدی دیه  
مشهوردر . استانبولدن قیام ایده جک حاجی کیلری موسم  
حجدن دوت آی مقدمی حاجیلرینی آلیرایدی . یاجج  
ایچون کمی یه بینه رک اسکندریه یه کلیرکن کرید جزیره سی



اوکندن ترس بر روزکاره تصادف ایله مالطه اچیققلرنده اسیر  
ایدیلن حاجیلرمزك حاللرینی تاریخ کتابلرمزده ازمی اوقو-  
دق . زمان صلحه قرون وسطی قورصالغی شمیدیلرده  
اولدینگی کبی واپرلرک ایجادیه ده فورتنه لک بر حکمی  
قالمدی . اکر فورتنه لی زمانلرده واپورک صالانامسی  
ایچون ده برچاره بولورلرسه ایشته انسان اوغلی اوزمان  
دکزله حکم ایلیمور دینیر .

موسم مناسبتیه بالایی ایچون سیاحتیه چیقانلرک  
پروغراملرنده « پالمو » ده موجود اولدیغندن بزم را کب  
اولدیغمز واپورده دخی تازه کلین کویکی نسخه لری  
وارامش . امیم که بویکی عاشقلرک باللری بویکیجه سیرکویه  
تحول ایلمشدر .

واپورمز صباحک ساعت طقوزنده « پالمو » نک  
ککیش مدخلندن آهسته آهسته کیرهک ریختمنه یاناشدی .  
هوامز ایسه لاجه کونشلی ایدی .




## پالرمو ۱۷ کانون اول سنه ۹۲۰

ك س-هولتله قاره يه چيقيقه رق اوتلك بزي بكيلىن  
اوتومويللريله « ويللا ايجي آ » يه كلك . ايلك قاتده حاضر  
لائمش اولان اوطه لرمزه كيردك .


اوتلك موقعي ك لطيفدر . واپرلر پالرموليمانته كيرمك  
ايچون ككيش مدخلندن كچدكلري ائناده يولجيلري ،  
صاغ ساحل اوزرنده واسع بر باغچه ايچنده ييوك بر بنادن  
عبارت اولان بواوتلي كوررلر .

رسمده ك اعلا بللي اولديغي وجه ايله صاغده كي ييوك  
بنا « ويللا ايجي آ » اوتليدر . هم تميزهم مفروشاتي كوزل  
وقيمتليدر . طعاملري دخي ينيلىر ديه بيليرم . خصوصاً يك  
فهرستني بزه اولجه ارائه ايلدكلرندن ايستديكمز طعاملري ده  
علاوه ايده ييلور ايدك .

بواوتلك ايكي يوز اوطه سي وارايمش . كوزل اپارتمانلري



دکتردن بالر موبه کیر کن تام مدخله کی صاغ برونده واک اوجده کی بیوک بنا  
« وپلا ایجی آ » اوتایدر . « ۲۲ »





دخی موجود در. امیره حضر تلی ایچون احضار ایدیلن ابارئمان  
بر سالون بر یاتاق او طه سی ایله حمام و سائره سندن بشقه برده  
خدمتچی قیزك او طه سندن مرکب بولینوردی. اوتلك بر عیبه  
وارسه اوده هر او طه ده موصلقی دائمی صغوق وصیجاق  
صولی بر تمامسی و هر او طه ده تلفونی اولماسیدر. خدمتچیلره  
ویريله جك امر لر تلفونه اولنجه خدمتچیلر ك ابتدا یوزلری  
کورملیور و او طه دن چیقمدن هر طرف ایله مکلمه دخی  
ایدیلیور. طرز معاریسی و باغچه سنده کی خرما و لیمون  
هنداینجری و سائره کی بلاد حاره اشجار و نباتاتی هب بزم  
مملکتلری و خصوصاً بلاد عربی اکدریور دیرم. او طه لرینك  
شکلی و طاوانلرینك کمرلی و یاقبه لی بولنسی سوریه و برازده  
مصر طرز معاریسی در خاطر ایتدریور. امویلر ك تا اندلسه  
قدر کورتور دکلی بنا و رسملر بوراده هب کوریلیور. ایشه او  
اسلاف ایدی که: اسلامی یکی یکی وطن صاحبلی ایتمک  
ایچون جانلرینی ویرمکی، قانلرینی آقیمغی نفسلرینه وظیفه  
یامشلایدی. خلقلری ایسه یشامق ایچون قیمتی وطنلرینی  
اغیاره بخش ایلمکی خوش کورمشلردر.

بتون کون اوتلده قالدیم. اشیامی آچدم. دوزلتم. موجود  
کتابلیمی تربیزه دن بوزمه یازی خانه مک اوزرینه ترتیب  
ایلدیم. روزنامه می یازدم. باقی بوش و قتلیمی ده هب

« صقلیه » جزیره سنه عاثریکی واسکی معلومات طو لایه جنم دیه کچیردم .

بوکونده ایتالیا نلرک « سیچیلیا » « Sicilia » دیدکاری اطه نک نامی ، تاریخک تعیین ایده مدیکی برزمانده کلش اولان « سیقانی ویاخود سیقولی » « Sicani, Siculi » نامنده کی قوملرک اسمندن آلمشدر .

« اوقسفورد دار الفنون » تاریخ خواجه لرندن « فریمن » « Sicily » نام کتابنده بویله دیور . ترکیه « تاریخ اقالیم » نام غیر مطبوع برکتابده « سیقانی » نی « سیقولی » دن تفریق ایدرک « سیقولی » قومی « قلابریا » دن بواطه یه کچمشدر دیور . بوکتابده سیچیلیا املاسی « سیچیلیا » دیه قید ایدلمشدر . سیچیلیا یه عربلر « صقلیه » نامی ویرمشلردر که : بو حالده « سیقولی » اسمندن تعریب ایتمشلردر ظن ایدرم . آق دکرده کی موقعی ایسه هر زمان ک مهم بولمشدر . اطه نک شکلی شرقدن غربه سرلمش اولک ایاقلری کسیک برقیون دریسنی ا کدریور . تقریباً برمشلدر . شرقاً ایتالیا دن « مسینا » بوغازیله آیرلمشدر . بو بوغازک اک طارمحل ۳۲۰۰ مترودر . غرباً ایسه « تونس » قدر ۱۴۰ کیلومترودر . بحر ابیض متوسطک جهات اربعه دن اک مهم بر نقطه ارتکازیدر . قدیمده « فنیکه لیلره ، یونانلره ورومالیلره بواطه بر » اتلامه


طاشی « اولشیدی . ایاقلرینی اولا « صقلیه » جزیره سنده  
برکیشدرمدکجه غربه ، شرقه ، شماله وجنوبه صیچراماز  
لرایدی . عربلرده « صقلیه » یی استانبولدن ، بیزانس ایمپراتور  
لغندن قوپاروب المادقجه ارض ککیر تسمیه ایلدکلی  
ایتالیا یه کچمه مشلدر . « صقلیه » مسلمانلری آراسنه تفرقه  
کیره رک ضعیفلندکلی کورن بر آویج نورمانلر بو اطه یه  
یرلشدکن صوکره صلیبیون ، شرقک ، بلاد اسلامک مصیبتی  
اولمش وامت محمدک باشنه کتیر مدکلرینی بیراقماشلردر .

کندی کتابخانه مده بولنان و مؤلفنک اسمنی بیلمدیکم  
خط دست وناقص بر جلد طوائف ملوک تاریخنده « سیچیلیا » یی  
« چچلیه » دیه ضبط ایتمشدر .

« پالمو » شهرینک فنیکه لیلر زماننده اسمی « پانوموس »  
« Panomos » ایمش . عربلرک بعض کتابنده « بلم »  
یازلمش ایسه نه اکثر تاریخلرنده « بلم » دیه ضبط ایدلمشدر .  
« پالمو » یه عسا کر اسلام هجرتک ایکی یوز اون  
التمنجی سنه سی ماه رجبنده کیرمشدر .

پالمونک اسلام زماننده کی احوالی حکایه یی ایلرویه  
تعلیق ایدرک دیرم که : اوتل عالنده ذوقه ، خوشمه کلین  
شیلدن بریسی ده اکثر اوطه لرینک اوچر قپولی بولنمیدر .  
لزو منده عائله جه اقامتی تسهیل بابنده بری برلرینه کچمک

ایچون صاغلی صوللی تکمیل اوپه لړک مدخلدن بشقه ایکی  
 عدد قبولی واردر . بویله اولمسندده احتمال که اوتاچیلرک  
 کاری وار . خوشلانما مقده ایسه عقلمجه بتمده حقم واردر .  
 اوپه مک ایچنده کی صاغ جهت قپو ، امیره مزک سالوننه  
 آچلیور . ایشته بو ایی لکن صول طرفده کی قپو هیج  
 بیلمدیم ، طانیمدیغم ویرکیجه یاتوب فرداسی غیب اوله حق  
 عجائب عجائب مسافر لره تخصیص ایدلمسنی طوغروسی ایستتم .  
 کیجه راحتسز قاله جغمه دها شمیدین بر علامت اولمق  
 اوزره صول طرف اوپه ده اسکان ایدن کیمسه نک یوکسک  
 سسله اقصیروب اوکسورمسی بنی دوشوندرمکه باشلادی .  
 اوپه لړک بویله آرا قبولی هر چشید سسلری برندن دیکرینه  
 سهولته نقل ایدرلر . حقیقه ده اوپله اولدی یا ! زوالی آدمک  
 بتون کیجه اوکسورکی کسلمدی . زوجه سنه امان ! علاجی  
 کتور . براز صو ویرمکی ده اونوته دپه ایلدیکی رجاری هب  
 ایشید یور ایدم . نه ایسه واپور یور غوناغی وسائره یاردیمیله  
 ینه اویقومی کرکی کبی کسدردم دپه بیلیرم .





## ۱۸ کانون اول سنه ۹۲۰

نیجه سنه لردنبرو صباحلری ارکن اویانق و اویانیر  
اویانمازده همان قالمق عادتدر . صباحك ساعت یدیسنده  
کینمش ، قوشانمش اولدینغم حالده اوتلك باغچه سنی اشاغی  
یوقاری کزبور ، لیمانه کیرمکه کلن واپورلرک باغچه نك  
اوکندن کچمه لرینی سیرایدیوردم . ساعت سکزده قهوه الیممی  
کمال اشتها ایله تناول ایلدم .

ساعت طقوزده اوتلدن طیشاری چیقارکن اوتلك مدیرینه  
راست کلدیم . لك ای او یومش اولدینغمی امیدایلدیکنی  
سویلدی . ایکی یانلرندن دیکر اوطه لره آچلان قپولری  
اولماسهیدی دهایی او یویه جقدم مقدمه سیله باری صاغ ساجم  
مسافرله ویرسه کز دیدم . حق کز وار افندم . بعد ما  
بوجهتنه دقت ایتمک بورجم اولسون دیه خاطریمی آلدی .  
اولا لیمان دائره سنده بولمان پولیس مرکزینه کیدرک

باسپورتلرمزى ارائه واميره قدريه نامنه برابرمدە كى  
 «Laisser - Passer» دىنلان مرور رخصتنامه سنى ارائه  
 ايدلم . طوغر وسى پوليس مأمورلىرى حقمزده پك كىبار  
 طاورانديلر . حتى اميره حضر تلى ومعتلىرى بزم مسافرلىر  
 مزدور لزو منده خدمتكنزه آماده يزديهده نازكلك كوسترديلر .  
 ديركن برارابه آلهرق ارتق شهره كيتدم . اولاروما جاده  
 سنده بر كىتابجى يه كيردم . « سىچىليا دىلى وپالرمو ولايتى  
 جغرافياسى وسىچىليا تارىخى » وسائره ديه توسيع معلوماتم  
 ايچون اولان كىتابلىر آلدلم . راست كله جاده وسوقاقلرنده ايكي  
 طرفه باقهرق برازده كزدم . شهر كى ايكي اولان قسمنده كى بنا  
 لرم واسع هم تميزدر . بوكون كوره بيلديكم اسكى سوقاق  
 وخانهلىر ايسه طاروكىرليدر . اكرى بوكرى سوقاقلرى ده  
 پك چوقدر . مبانى تكميل طاشدندر .

بىم كى بومملكته هنوز كىلدىكى ايچون عادت بلديه كوزى  
 آلهشامش اولانلرك ، ظنمجه خوشلرينه كىتميه جلك شيلردن  
 ريسى ده بو طار سوقاقلرده كى خانهلرده يىقامش اولدقلىرى  
 چماشىرلى قور وىق ايچون بالقوندىن بالقونه كرىلن ايلره  
 سىرملرليدر . هر درلو چماشىرلر قىدنده قادىنلرك كوملك وطون  
 وسائره كى اك خصوصى چماشىرلى ده داخلدر . بعض خانه  
 لرك پنجره ويا بالقونلرنده بوكى چماشىرلر اوتوجى دىكنكلىرى

کبی شیلره ده طاقلمش وهواندن شیشمش قابرمش برحاله  
کور یلیورایدی . شاید ظرف مظاروفی نخطر ایتدره مزسه  
بأس یوقدر اما بو حالی خوش کورمک ایچون ده براز کوز  
الیشملیدر .

امان بکانه ! شرقک ویا بدویلکک قیصقا نجلیق دینلن  
حالرینی پالموده خاطریه می کتیره جکم ؟ عیب دینلن شی  
خلاف معتادی اجرا دیمکدر . امور عادیه صره سنه کچمش  
برشیده عیب مایب قالماز .


« مارینا » میدانی دینلن یردن اوتلمزه قدر برتراموای  
خطی موجوددر . ریم تراموای ایلسون . ارا بهلری زیاده سیله  
کهنه مشدر . سوروجیسی ده بیلتجیسی ده سپا وکسوه ده  
بو حاله مناسب اولق اوزره سچمه شیلردر . اوتله قدر بو  
ترموایله عودت ایلدم .



## ۱۹ کانون اول سنه ۹۲۰

صباحك ساعت طقوزنده اوتل جوارنده بولنان  
 تراموايه كدم ، بېندم . مارينا ميدانته قدر ايكي طرفي  
 وخلق سيرايدم . بېرادن ارتق پالموي درت قسمه آيران  
 صليب شكنده كي مشهور ايكي جاده دن بريسي اولان  
 « ويتويو آمانوئل » نام جاده يه كيردم . بوجاده يي تقريباً  
 اورته سندن قطع ايله صليب حالته قويان ديكر برجاده نك  
 اسمي ايسه « وينا ماكوئيدا » « Via Maquéda » در .  
 بوراده درت گوشه تسميه ايديلن ميدانجغه يعنى درت يول  
 اغزينه گلزدن اول صاعده كي « وياروما » يه كيردم .  
 بويولاك صاعنده تصادف ايلديكم « سانتو دومانيكو » نام كليسا  
 حذاسنه كلديكمده آري قوانندن بوشاير كي خالقك كليسا  
 قپوسندن چيتمقده اولديغني كوردم . ذاتاً آرزوم اهالينك  
 طوبى اوله رق يوزلريني كورمك وهر درلو خالقك





دورت گوشه نام میدانن ما قوئیدا جاده سی



پازار مناسبتيله كينمىش اولدقلرى اڭ كوزل واڭ تميز كسره  
لرينه باقمق ايدى . هر كس منسوب بولنديغى ملتته مخصوص  
بر سيما ايله تميز ايدر . سياحتده حدودلرى كچدكجه خاقلق  
هرشيدن اول يوز لر ينك دكيشديكى كوريلير دكلى ؟ قياقتلر  
دخى بويله اولوب مملكتك ثروتى ارائه ايلر .

هرقاعده نك بر شاذى اولورديرلر . سيما و كسوه  
قاعده سى ده پالرمو ده شاذدر . « پالرمو » يه حقى بتون  
« سيچيليا » اطه سنه مخصوص بر چهره يوقدر . ياريم ساعت  
قدر « سانتو دومانيقو » كليساسنك قيرسى اوكنده طوره  
رق اڭ آزدن ايكي بيك تخمين ايلديكم ارلك وقادينك يوز  
لرينه پك دقتله نظرايلدم . بنجه بوراده اغليت عربك مختلف  
سيما لر ينى ارائه ايلدكدن بشقه يتمش ايكي ملتك ده يوزلر ينى  
كوستريور . اسپانيول ، نورمان ، رومان ويونان چهرلرى  
هپ بوراده كوريليور . ديهلم كه « سيچيليا » نك قدبم يرلى  
بر قومي اولنديغى كچي كندينه مخصوص اسكى برلساني ده  
يوقدر . بر نك ايچوندر كه هانكى ملت بو اطه يه كلوبده  
چادير ينى قورمش ايسه اطه ده كي خلق ده همان اونك قصيده  
برده سنى اوقومغه باشلامشدر .

فنيكه ليلر كلمش ، صوكره يونانيلر آلمش دهاصوكره  
قارطاجنه ليله مال اولمش . ديركن زمان زمان بونلرك

لسانلری سویانمش ودرجه لرینه کوره مدنیتلری قالمش ونهایت رومالیرلر انده بک چوق اوره سئلش وقرون وسطاده صره سیله بیزانسلر وارقه سندن عربلر تملک ایللمشلردر . عربلر که تحقیقه نظراً ایکی یوز قرق الی سنه حکم و حکومت ایلدکلری زمان اطهنک من الباب الی الحراب یوزی وسوزی بلکه ده اوزی عرب ائلش قالمشدر .

عربلردن صوکره نورمانلر کلش وصوکره آلمانلر آلمش وارقه سندن «آن جوان» خاندانه منسوب فرانسلر پرئسلری یرلشمش دها صوکره ده اسپانیانک اراغون فامیلیاسی طرفندن حکومت ایللمشدر . قرون اخیره ده «شارل کوینت» ک خلفلری اولان ناپولینک بوربون خاندانی حکومت ایتمش ونهایت مشهور غاریبالدینک غیرتیه شمیدیکی «Savoia» «ساوویا» عائله سنک یعنی ایتالیا قرالغنک تبعه سی اولمشدر . «سیچیلیا» ده بوکون کندینه مخصوص لهجه ایلله برنوع ایتالیا بنجه تکلم ایدیلمور . ایچنده کلمات عربیه دخی یادکار تاریخنی اوله رق قالمشدر .

یوزده وکوزده اغلیت، عربلغی ا کدردیغی کبی سوزده دخی کرک یوکسک سسله سویلملری وکرک ال ، یوز ، کوز وقاش اشارتلیله سوزلرینی تقویه ایللماری اصلنده عرب بولندقلرینی اثبات ایدر . عموماً اوروپا لیلر برینه ال ایلله کل





سیمچلیا سیماسی که حالایوز لرندن عربلق آقیور



اشارتی ویردکلی زمان الی سهایه آچه رق شهادت پارماغنی  
تحریرک ایلر. بزم شر قده ایسه ال ایله ویریلن کل اشارتی  
برعکسدر. یعنی الی زمینه طوغرو آچه رق درت پارماغنی بدن  
ایله برابر تحریرک ایدر. آیشته بوراده دخی تماماً بزم یاپدیغمن  
کی ال ک ارقه سی هوایه اوله رق پارماقلی تحریرک ایله کل  
اشارتی ویر یورلر.

بازار اولدیندن تکمیل خلق تمیز و یکی کسوله رینی کیمشدر -  
دی. از جمله طائفه نسا دائماً بازار کونلری ال تمیز واک کوزل  
کسوه اکتسا و حایاتله تیزن ایلدکلی حالدیه بوقدر جماعت  
اراسنده دها اوله بر قیزه ویا قادی نه تصادف ایله دم. فقر ا کر وهنه  
منسوب قادی ن و قیزه ب سابقه سز کز یورلر. یالکز بر جهته دقت  
ایلدیم که بوشهرده اکثر نسوان روماده اولدینگی کی قیصه فیستان  
کیمیورلر. رسمده دخی کورلدیکی وجه اوزره فستانلرینی  
قوندوره لری حذاسنه قدر اوزا تیمورلر. خوش بوراده دخی  
نه لر وار اما، بزم شوسوزم اغاییقی تشکیل ایدن خلقه در.  
صوکره لری اوتله چای ایچمک بهانه سیله کلن اوله لری  
مصادف نظرم اولدی که: فیستانی کیمکی اونودده رق دلیلر کی  
ایچ کوملکی ایله کلش ظن ایتیمشیدم.

پارمونک سکانی صوک احصاده یعنی ۱۹۱۱ - سنه

سندہ « ۳۴۱۰۸۸ » نفوسہ بالغ اولمشدر . عربلر زمانندہ  
ایسہ بالرمودہ دوت یوز بیک نفوس موجود اولدیغنی ایتالیان  
مؤرخلری یازیورلر .

« سان دومانیقو » کلیسا سنک یانندن مردیوانله اشاغی  
اینلهرک سبزه بازارینه واریلیمور . بن بوراسنی ده کزه رک  
سبزه ومیوه لرینی سیرایلدیم . بزم مصرعادتیه مخالف اوله رق  
بوراده پورتقال ولیمون وماندارینائی ترازو ایله ساتیورلر .  
بونلردن بیوک دانه لی اولانلر فیاتجہ دها بهالیدر . مثلاً برکیلو  
پورتقال قاقه در ؟ یاریم کیلو لیمون اوچ لیرایه در دییورلر . بزم  
مصرده بونلرهب دانه ایله ساتلیر . برنوع زیتونلری واردرکه  
دانه سی پک بیوکدر . درلوسبزه لری ده واردر . قیش  
اوزوملری صاری و سیوریدر . فیاتلری دخی ناپولی ورومایه  
نسبتله دها اوجوزدر . تقریباً وقت ظہره قدر شوراده بورا  
ده کزدکدن صوکره ارا به ایله اوتله عودت ایلدم . بد الطعام  
سوقاغه چیقمدم . سیچیلیا اوزرینه اولان کتابلری  
قاریشدردم .

اوطه خدمتکارینک ویردیکی برخبره کوره قومشوم اولان  
خسته لقلی ذات حرمله اوتلی ترک ایتمش ویرینه بال ایجی  
بر چیفت کوکر جین قونمشدر . قولاقلردینجلسون ! ...  
« ایتالیا ولایاتی » نام کتایده « سیچیلیا » اطه سنک



دوره سی « ۱۰۱۶ » کیلومترو اولدیغی و طولی ایسه  
 ۲۸۸ و عرضی ۱۰۰ کیلومترو بولندیغی محرردر . « غرنویچ »  
 دن طولی ر ۱۹° ۱۲° ایله ر ۴۱° ۱۵° اراسنده اولوب  
 و عرضی ده ر ۱۸° ۳۸° ایله ر ۳۶° ۳۸° درجه . یئننده  
 دیور . جزیره نك يكون سکانی ایسه ۲۵۸ ۶۷۲ ۳  
 نفوسدر که هر بر کیلومترویه ۱۴۳ نفوس دوشیور . « صقلیه »  
 اطه سی اداره جهندن یدی ولایتیه منقسم اولوب اسملری  
 شونلردر « قالتانیسه تتا Caltanissetta ، قاتانیا Catania ،  
 جیرجنتی Girgenti ، مسینا Messina ، پالمو Palermo ،  
 سیراقوزه Siracusa و ترابانی Trapani » ولایتلیدر .  
 جزیره نك آق دکزده طومش اولدیغی موقعی هر زمان  
 پك مهم بولنشدر . اراضی عارضه لیدر . نهرلری وارسه ده  
 دره کبی سیای کبی شیلردر . اقلیمی حاردر . یازین علی العموم  
 درت ماه قدر یا غمور سز قالیور و صیجاق اولیور ایمش . ذاتا هند  
 اینجری ، اینجیر ، اوزوم ، لیمون ، پورتقال و نار هب صیجاق یرلرک  
 اوت و اغاچلر نندر که بورا نك بروقی همان ده بونلردن عبارتدر .  
 « ابن جبیر الکنانی » سیاحتنک التنجی فصلنده « پالمو »  
 حتمده دیور که : بوشهرک اسمی اسلام اراسنده « مدینه »  
 اولوب خرسیتیانلرده « بلرم » در . پالمویه بر فرسخ مسلفه  
 ده « قصر سعد » نام سرای واردر . بورا ده قبور اسلام

موجوددر . نيجه علماء وزهاد بوقبرستانده مدفوندرلر .  
« قصر سعد » اسلام بناسيدر . پارمو شهرى كرك ميانى  
وعماراتى وكرك باغ وباغچه لرينك كوزلايكى جهتنده « قرطبه »  
يى اكدريور . جامع ومسجد لرينك كثرى واذان محمدى  
سسلرى بوشهرك هر نه قدر كفار انه دوشمش ايسه ده ينه  
اهل ايمانله طولو اولديغنى كوستريور . پارموده اك غريب  
اوله رق كورديكز برشى وارسه اوده بركلسا دركه  
ايچربسى تكميل التونله ورنكين طاشلرله ترين ايدلمشدر .  
جوارنده بر صومعه يعنى مناستر واردركه دائراً مادار درلو  
ديركلرله ياپلمشدر . بونك اسمنه « صومعة الصواري »  
دييورلر . بوشهرده خرستيان قادينلرينك كيملرى تاماً  
مسلمان قادينلرنكى كيدر . لسانلرى ده پك فصيحدر .  
( فصيح عربجه سويليورلر ديمك ايستيور ) چارلى ونقا  
بليدرلر . سمنه باشى بياراملرى مناسبتيله بتون خرستيان  
قادينلرى رنكارنك ايكلى وانتون صيرمه لى كسوه لرينى  
كينمشلر وچارلانمشلر ودرلورنكده نقابلرياه يوزلرينى  
سترايمشلر وياقلاينهده صيرمه لى چيزملرينى طاقشارو « كلسا  
لرينه كلشردى . حتى بوقادينلر اسلام قادينلرى كې حليات  
طاقش ، كوزلرينه سورمه ، قاشارينه راستيق چكش وكوزل  
قوقولر سورنمشلردى » ديدكدن صوكره

« ان من یدخل الكنيسة يوماً یلق فیها جأزراً وظباء »  
 « یعنی کونک برنده کلیسایه کیرن ذات اورا ده کیمک یاوریلرینه  
 راست کلیر » دیهده بر لطیفه ادیه ده بولنیور .

ابن جیبرک سیاحتی یازدیغی زمانده هر نه قدر سیچلیاده  
 اسلام حکومتی محوایدیلرک خرستیان متعصبلیرنک اللرنده  
 اسلام اهالی او یونجاق اولمش ای دیسه ده کرک مبانینک  
 صنعتلی والتونلرله زینتلی و کرک طائفه نسانک ایاق  
 قابلرینه قدر صیرمه ایشاملی بولنمی ثروت مملکتک موجودیتنی  
 کوستریور . اوکونلره نسبتله بو کونده « سیچلیا » عوامنک  
 حالی پک قلندرانه قالمشدر . اطهده معارف دینلن شی پالرمو ،  
 مسینا و سائره کبی مرکز ولایت اولان شهرلرده کوزه  
 کورینه جک قدر موجود ایسه ده قصبه و کویلرینه ، هله  
 اهالینک فقرا قسمنه علمک دها قوقوسی بولاشما مشدر .  
 تولدات ایسه پک چوقدر . قادیناری پک ولوده شیلردر .  
 فقرا محلهلرندن کچلدیکی زمان سوقاقلرک کیرلی ، پاصلی  
 چو جقمارله طالغه لاندیغی کوریلیر . بویاوریلر آج چبلاق قالیر ،  
 اولور و تعلیم و تربیه لرینه پاره لازمدر دیه ده قورقما یورلر . برکت  
 و پرسون که امریقایه هجرت قپوسی ، سیچالیلر ایچون حالا  
 آچیق ایمش . هر سنه بورادن بیکلرله خلق جنوبی امریقایه  
 هجرت ایدیورلر ایمش .

دیرلرکه اکر دنیا ده نه قادین نه ده قاصیرغه اولماسه یدی  
نه فنا آن نه ده کوتو زمان اولمازدی . صباحلین پک ارکن  
اویاندیغم زمان جوار او طه ده کی قومشوده قاری قوجه  
غوغاسی باشلامشیدی . ایشیتدم . اوزون مدت عاشق ناقمه  
یک دیگرینک اخلاقی اوکر ندکدن صوکره ازدواج ایتمک  
ازیره اولمکدن دهه زیاده امتزاجی داعیدر دینلره شوقومشو  
بال آیحیلرینی تقدیم ایدرم .





## ۲۰. کانون اول ۱۹۲۰

بوصباح سوقاغه چيقيدم . پالرمو حتمنده هر درلو معلومات  
ايدنمكاه مشغول اولدم . هانكي تاريخده عساكر اسلام  
پالرمويه كيرمشدر ديه تحري ايلدم . ايتاليا نجه « سيچليا  
تاريخ و جغرافيا سي » نام كتابده خلاصه الخلاصه شويله  
بولدم .

ميلادك ۴۴۰ تاريخنده « واندال » لرسيجليايي المشلر  
و ۴۹۳ سنه سنده غوتلر استيلا و ۵۳۵ تاريخنده شرق  
ايمپراتوري « جوستينيان » نك جنرالي غوتلري طرد ايله  
بواطه يي ، ايتاليا يي فتح ايچون سوق ايديله جك اردويه  
مرکز اتحاد ايله مشدر . يونانلرك بوزماننده سيچليا جزيره  
سي خالق غايت فقير ، جاهل و پريشان برحالده بولنيور ايمش .

میلادى ۸۲۷ تاريخنده يعنى هجرتك ۲۱۲ سنهسى، اوزمانده « شريقون » « Saracena » نامى ويردكارى عربلر ، مسلمانلر « صقليه » تسميه ايله كارى سيچيليايه گلشلدن . « پالمو » شهرى عساكر اسلاميه يه قولاي قولاي تسليم اولموش و انجق ۸۳۱ تاريخنده شهرك مدافعلى تقريباً تكميل قانلرينى دوكرهك يوق اولدقن صوكره تسليم اولمشدر . « مسينا » شهرينى ۸۴۲ سنهسى عربلر المشلر و « سراقوزه » نى ۸۵۵ تاريخنده ضبط ايلمشلر در كه بوشهر اون آي محاصره ده قالمشدر . عربلر زماننده سيچيليا هيچ ده راحت ايلامشدر . « ايتاليانلر بويله سويليور » ديركن بونلر كندى آرازنده حرب ايتمهك باشلامش و بونى فرصت كورن « نورمان روجارو » « Rugerri il Normanno » ده ۱۰۶۱ تاريخنده « قالابريا » « دن بوغازى كچهرك » « مسينا » يه مستولى اولمش و طورمادن يكرمى سكز سنه حرب ايدكدن صوكره تكميل اطه ي المش و اسلام حكومتى يوق ايلمشدر .

ايسته صقليه اطهسى حقهده عربلر دائر بو قدر حق قيصة برنجى سيچيليا مكتبلرنده او قوديورلر . ايلروده ينه ايتاليان مؤرخلرينك سيچيليا ده عربلر و حكومتى ديه يازدقلى بعض يالان ويا گلشلىرى ده آيروجه نقل ايده جكم . مقصدم

ایسه غربت دأما شرق حقننده ایکی دکل بردرلو فکری  
بولندیغنی کوستره کیدر .


اوکله طعامندن صوکره امیره حضرترلرینک برابرلنده  
« فلووریتا » نام محله قدر او توموبیل ایله کیتدک . شهرک  
شمالنده بولنان « Monte Pellegrino » « جبل زیارت »  
کصول اتکندن اعتبار آباشلا یان وپالرموده « Conca d'oro »  
« التون اوجاغی » تسمیه ایدیلن اولدقجه ککیش ایکی  
طاغ اراسنده واقع براووا ده در . پالرمو بلدییه سی هر حالده  
ناپولی ، حتی روما بلدییه سندن دهها فعال وبلکه ده ایرادینی  
تکمیل معاشاته ویرمیهرک قسم اعظمیله یوللرینی یامق و تمیز  
لیوب محافظه ایلمک خصوصلرند ده ایشکدار اولدیغنی  
بورالرینی زیارت ایدنلر البته اعتراف ایلرلر . غایت کوزل  
واوزون یوللرینک ایکی طرفی « زیتون ، پورتقال ، لیمون  
واوزوم باغچه لریدر . بر قسم اراضیسی ایسه مصرک دیکنلی  
اینجیر باغچه سی اولمشدر . جبل زیارتک اشبواتیکاری تکمیل  
دیکنلی اینجیر اغاجیله دائمی یم یشیل بر حاله افراغ ایدلمش  
اولدیغنی کوریا یور . ذاتا مصرده وسوریه ده اولدیغنی کبی  
بواطه ده دخی دیکنلی اینجیرک میوه سنی ییدیورلر . دیمک که  
بلدییه ده بیوک بر ایراد در . یولده قوشومیدانی ده کوردک .  
موسملرند بوراده بیوک قرشولر اولورمش . « فلووریتا »

دینلن یرده بر سرای موجود در که چین طرز معماریسی اوزره  
بنا ایدلمش ایش .

اورادن شهره کیتدک « حریت » جاده سندن کچدک .  
بوجاده آلمان اصولی اوچ یوللی ودرت بیاده قالدیریمی کوزل  
وتمیز برشیدر . پک دلربا ویللار بوجاده نک ایکی طرفی  
تزیین ایدورلر . نهایت معهود صلیب شککنده کی جاده نک  
درت یول اغزندن صوله دونه رک « مارینا » میداننه کلدک .  
بوراده بر انکلیز کتابخانه سی بولندیغنی خبر آلهرق  
اوتوموییلدن ایندک . بو کتابخانه ، میدانده کی باغچه یه ناظر  
بربنانک برنجی قاتنده در . چیققدق . متعدد اوطه لری وار  
قوجمان برآپارتمان ، بر بلو کدر . غریب شی ! بوراسی کتابخانه ،  
آنتیقه خانه اولمقله برابر ساعت بش چاپخانه سی ده ایش .  
کوبار قاج کتاب الدق . آنتیقه قسمنده صیرمه لی برقادین  
وبرارکک آباسی ، یلک وقوشاغی وارایدی . براسکی  
سلاحلق دخی اصلمش ایدی . بوکسوه لرایکی دکنکه طاقلمش  
واوزرلرینه « تپه دلنلی علی پاشا » نک دیه یافته لر قونمشیدی .  
قیمتی صوردق . اوزرنده اوتوزیمک ایرا یازیلی اولدیغنی  
ارائه ایلدیر .

بن ، تپه دلنلی کیم اولیور ؟ دیه صوزدم . بر مشهور  
حیدوددر . . . دیه جواب ویردیر . بوکسوه اونک اولدیغنه







الده بر وثيقه وارمی دیدم . بزم سوزمنز وثيقه در ديه جواب  
ویردیلر .

چارشو خلقنك متاعلرینی سورمك ایچون سویلدكلری  
یاغلی بالی سوزلره زمانمزده کیمسهلر ارتق اینانه ماز . لکن  
بو چایجی وانتيقه جی انكلیزه سوز اكلانق ده براز کوجدر .  
حریفك کندی هودوك ویدیکی دیدکدر .

اوتله عودتمزده « صقليه » فتحی حقنده عرب مؤرخلرينك  
نه دیمش اولدقلرینی تحقیق ایلدم . برنجیسی ۱۸۴۱ تاریخنده  
پارسمده طبع ایدمش « اخبار دولة بنی الاغلب بأفريقية  
وصقليه » نامنده برکتا بدرکه ابن خلدونك « کتاب العبر  
ودیوان المبتدا والخبر » ندن آلمشدر . هم اصلی هم فرانسزجه  
ترجمه سی برآراده جمع ایدمشدر . افریقا ده و « صقليه »  
ده بنو اغلب حکومتی ایله کذا « صقليه » ده « بنو کلب »  
حکومتی یازمشدر . مفصل دكلسه ده ینه کوزل برتقویم  
تواریخدر . برکنام ده واردر . اوده « شیخ شهاب الدین  
ابی عبدالله یاقوت » ك « معجم البلدان » یدر . بو کتاب  
« لایبزیخ » ده طبع ایدمشدر . ایشته بوایکی کتابدن  
« صقليه » فتحی بروجه آنی بالاجمال شورایه قید ایدیورم .

شویله که : عسا کر اسلام ، « صقليه » جزیره سنی  
تاخليفه ء ثالث حضرت عثمان ذی النورین رضی الله عنه زماننده

شام والیسی اولان معاویہ نك امریله مصر دن افریقا ساحلنه  
 كلكلاری وقت اوكرتمشلدی . حتی اوزمانلرك موده سی  
 اولق اوزره ده « معاویہ بن خدیج الكندی » نك قومانداسی  
 تحتنده « صقلیه » جزیره سنه كیلرله آقینجیلیق ایلمشله وعساكر  
 اسلام افریقا ساحلنك ایلرینه اوزاندقجه اورالرده  
 ساكن بولنان روملر « صقلیه » جزیره سنه فرار وهجرت  
 ایتمشله و صوكره لر كیلرله كله رك ساحلده ساكن اولان  
 اسلامه هجوم ایلمشله و بوندن صوكره اسلامده مقابله جزیره یه  
 آقینلر ایتمشلدر . ارتق یوندن صوكره زمان زمان هرایکی  
 طرفدن ده آقینجیلیق وینماجیلیق وقوع بولمشدر . هجرتك  
 ۲۱۲ سنه سی افریقاده والی بولنان « زیاده الله بن الاغلب »  
 قیروان قاضیسی « اسد بن الفرات » نام ذاتك قومانداسی التنده  
 « صقلیه » یه عسکر سوق ایلمشدی . مؤرخین عرب اشبو سوق  
 عسکرینك سببی بوجه اتی حكایه ایدیورلر . دییورلر كه :  
 استانبول ایمپراتورلغنه تابع بولنان « صقلیه » اطه سنه  
 « قسطنطین » نامنده بر ذات والی تعیین اولنهرق استانبولدن  
 جزیره یه كاشیدی . بو ذات « فیمی » اسمنده جسور بر  
 رومالی كیچی یی « صقلیه » دونامه سی اوزرینه قیودان  
 تعیین ایلمش « فیمی » ده افریقا ساحلنه آقین ایدرك پك  
 چوق شهرلری صوغش و نیجه مالارینما ایلمش ایسه ده در حال



« صقلیه » به عودت ایتمیه رگ افریقا ساحلارنده تأخیر  
ایلدیکندن استانبول ایمپراتورلغی بوکاقیزمش و « صقلیه »  
والیسی بولنان قسطنطینه « فیمی » یی طوتوب حبس  
واشکنجه ایلمسنى امرایلمشدى . بوايسنه مال غنیمتندن  
مرکزی محروم ایلدیکی ایچون اوللی دیرم . اغیزدن قولاغنه  
انتشار ایلین بوخبر نهایت « فیمی » نك قولاغنه وارمش  
اولدیغندن قپودان دریا افریقا ساحلندن همان « صقلیه » یه  
ککش و « سراقوزه » لیماننه کیره رگ حرباشهره مستولی  
اولمش وبونی خبرالان « قسطنطین » دخی عسکریله ککش  
« فیمی » ایله حرب ایلمش ونهایت قسطنطین منهزماً فرار  
ایتمش ، « فیمی » ده عسکریله ارقه سنه دوشه رگ « قاتانیا »  
ده تکرار حرب ایتمش و دشمنی اولان قسطنطینی قتل  
وکندیسنی « صقلیه » قیرالی دیه اعلان ایلمشیدی .

جزیره نك برقصمنه « بالاطه » نامنده « Palatino »  
برینی والی تعیین ایلمش ، بوزات ایسه « فیمی » یه قارشو  
طورمش وعموجه زاده سی « میخائیل » اسندنه برکیمسه  
ایله ده اتفاق ایدرک بر چوق عسکر جمع ایلمش حرباً  
« سراقوزه » یی « فیمی » دن آلمشدر . بونك اوزرینه  
« فیمی » قیزه رق کملریله افریقا ساحلنه ککش ، « زیاده الله  
بن الاغلب » ه التجا ایتمش وعسکر ویردیکی حالد « صقلیه » یی

اسلام نامنه فتح ایده جگنی وعد ایلمش . ایشته بوکا بنّا  
 « صقلیه » یه ایلک اسلام عسکری کوندر لمشدر . بووقعه  
 هجرتک ۲۱۲ سنهسی شهر ربیع الاولنده وقوع بولمشدر .  
 کمیلر اولا « مازر » نام لیمانته گلش و بورادن « فیمی » نک  
 دشمنی اولان « بلاطه » اوزرینه کیدلمشدر . نهایت عساکر  
 اسلام قارشولادیغی روم عساکری ایله حرب ایلمش بونلری  
 منهزم ایتمش و « بلاطه » ده « قالا بریا » یه فرار ایلمش  
 واوراده مقتول دوشمشدر . بو محاربه ده اردوی اسلام  
 برحق قلعه لر ضبط و نیجه مال اغتنام ایلمشدر . ایشته  
 بوتار یخدن اعتباراً عساکر اسلامک ایاغی « صقلیه » ده  
 برطوش ایسه ده کندیلری برکون راحت اوتوره مامشدر .  
 زیرا استانبول ایمپراتورلغی بالطبع بوحاله سکوت ایتیمیه رک  
 ارقهسی ارقهسنه سیچلیایه سوق عسکریده بولمش اولدیغندن  
 اردوی اسلام ایکی سنه یی متجاوز برمدت ایچنده حربسز  
 برکون کچیرمامش و آزاله دشمننه مغلوب اوله جقمش . حتی  
 جریره یی ترکله « سیراقوزه » دن کمیلرینه یینه رک افریقایه  
 چکلمک ایستمشارسه ده دشمن دونامه سی لیمانک اغرنده  
 کندیلرینی محاصره یه الدیغندن بونلرده کندی کمیلرینه اتش  
 ویردرک قاره یه چکلمش و اولا « میناو » شهرینه کلشرو  
 صوکره « جیرجنتی » یی حرباً آلمش و ارقه سنندن « قصر یانه » یه

کیتمش اوتورمشلردر .

روم اردوسی ارقلرینی بیراقماش و ارالرنده قولیرا  
دخی ظهور ایتمش اولدیغندن قوت اسلام کوندن کونه  
اکسالمش وزاد وزخیره لری بوسبتون توکنمه درجه سنه  
کیش ، حیوانات حتی کویک اتلرینه قدر نه بولدیلسه  
ییمشله و دشمنلرینه تسلیم اولماشلردر .

نهایت هجرتک ۲۱۶ سنه سی بردنبره اندلس دونامه سی  
« صقاییه » صولرنده ظهور ایتمش وبوصره ده افریقادن  
دخی کیملرله عسا کر امدادیه یتشمش اولدیغندن روم اردوسی  
محاصره خطلرینی قالدیرمشله ، حتی پیری یی پیرتی یی طوپلایه  
رق بوسبتون اطه نك اسلام عسکری بولنمایان یرلرینه صاویشوب  
کیتمشلردر .

عرب مؤرخلرینک یازدقلرینه کوره اندلس دونامه سیله  
افریقا دن « صقاییه » یه عسا کر امدادیه یی حاملان کیملرک  
یکونی اوچ یوز قطعه یه بالغ بولمشدر .

دیرکن اردوی اسلام « پالرمو » اوزرینه حر کتله مواصلتمده  
همان شهری صیم صیقی محاصره ایتمشله ، پالرمو ده بولنان  
والی وقوماندان الک صوکره امان دیمش و مال و عیالی آله  
رق بحرأ شهری ترک ایلش اولدیغندن عسا کر اسلام ده

۲۱۶ سنه سی ماه رجینده کوسنی، نقاره سنی، کومبورتیه ده کومبورتیه ده پالمویه کیگمشدر . یازیورلرکه « پالمو » ده محاصره ابتدا سنده یتیمش بیک نفوس بولندیغی حالدیه اردوی اسلامک دخولنده ابحق اوچ بیک کیشی قالمشیدی . بوندن صوکره ارتق « پالمو » ده معموریت باشلامش و پک آز مدت صوکره تکمیل جزیره یه پایتخت اولمشدر .

بواقشام خبر الدم که : اوتلمزه یکر می قدر امریقالی سیاح گمشدر . صول طرف او طه ده چیت یوق . باله آجی قومشولر کوسکون اولمیدر دیدم .

اقشام طعماندن صوکره براز موزیقه دیکلیه یم دیه آلت قاته ایندم . هانکی موزیقه یی دیکلیه حکم ؟ امریقا زنجیلرینک تپنمه لرینه « تانغو » آدینی ویره رک بتون اوروپای طیب طیب اویناتان انکیز وامریقانلر « صقایه » یی زیارت ایچون « ویللا ایجی آ » اوتلمه مسافر کلدکدن صوکره بوراده « تانغو » هواسندن بشقه بر موزیقه چالیر می ؟ بردوزینه قدر کوکر جینلر چیقتر چیقتر اوچشیورلردی . اللربلاره صارماشیق اولمشیدی . کوزه یساق یوق آ ! . . اختیارلرک اشغال ایلمش اولدیغی برکوشه یه بن ده قورلدم . اوزاقلری سیرایتمک ایچون قوللانیدیغم دوربین کوزلرکی ده برونمک



دیره کینه صیم صیقی برکیتد کدن صوکره اورتالغی واز جمله  
رقص ایدنلری برر بر سوز مکّه باشلادم .

تیلکی چوق بیلیر دیرلر اما بنجه عاشق قادین دها چوق  
بیلیر . رقص سالوننده سیرجیلرک اک چوغنی اختیارلر ، اسکی  
قورتلر تشکیل ایدیوردی . نظر دقتلری ایسه اویونچی قادین  
وقیزلرک ایاقلرندن زیاده سورمه لی کوزلرینی تعقیب ایلمکده  
اولدینغی کوردم . حقیقه بولرک کندیلرله رقص ایدن ارککلره  
کوز سوزملری طویلور تماشا لردن دکدر . خصوصاً بزیر  
کی آلتیشنی طولدرمشلره کوزه مناظر نفیسه دن عد  
ایدملیدر . بابل اوتتمکدن اوصانیر ، قادین سویلمکدن  
اوصانماز . ایچلرنده هم رقص ایلیور هم متصل سویلیور  
اولانلری دخی واردی . غایت اوزون بویلی برکنجک پک  
قیصه بویلی برمادام ایله رقص ایلمسی طاتسز کورنیور ایدی .  
هله دازباشلی وجاملری بیوک سکوزالکلی وقیصه بویلی  
براختیارک پک کنج وکوزل برقیزله رقص ایلمسند ک  
مناسبیتسزک بردرلو کوزلیمک قارشو سندن کیتیمور .  
بکا اوطه قومشورلر اولان بال آجیلرینی کوستردیلر . میلانو  
شهرندن ایمشیر . کنج وکوزلدرلر . قان ترایچنده رقص  
ایدیور وآراده برکره بری برلرینه معنالی معنالی ده باقیورلر  
ایدی . ممنون اولدم . کندی کندیمه ، امان اویناسونلر . اییجه

یوراسونلر . حتی زیاده سیله خاط خمورییه اولسونلر که بن  
اوطه مده راجتجه اویویه یم دیدم .  
حقیقه کنج ، دینج قومشولر حقنده بویله برتمنی نازکک  
عد اولماز . اما اختیارلرک کنجلدن زیاده جانلرینی  
سودکلرینی ده انکار ایتملیدر .



## ۲۱ کانون اول سنه ۹۲۰

پارمونك هواسى هيچده صغوق دكلدر . او طه لمزده  
اوجاق ، صوبا وسائره كې شيلريوقدر . انجق بولنديغمز  
شوموسمده براز زياده يا غمور يا غارمش ديورلر . نادراتدن  
اوله رق اقامت ايلديكمز اوتلك تام قارشوسنده ، شرق جهتمده  
كورينان چيلاق طاغلرده دون كيجه براز قارسرپمشيدي .  
صباحلين بو طاغلرك كوش قابلامش كې پارلاديغني كوردم .  
براكي ساعت صوكره قارلر اريدي . طاغلر تكرار حال  
طبيعيسي آلدی .

قبل الظهر شهره كيدرك صوره صوره بلديه نك مقاولات  
محرراكي قسمك يازينخانه سني بولدم . پك اسكي برسوقاقده  
قديم بر بنانك زياده سيله كيلى بريرقاتني اشغال ايتمشيدي .  
امان ياربي ! نه جماعت ! نه ده پزمرده قيافت ارباب  
مصلحت ! . . . مقاولات محرراكي ايله ايشم ، برحيلات


بولنديغمه دائر رسمي برشهادتنامه آلتدی .

سينيور مأموري نهايت كوره بيلدم . مقصديمي وسببني اكلاتدم  
اوزرنده فتوغرافم بولنان پاسپورتمی ده ارائه ايلدم .  
بو پاسپورتك صاحبي بن اولديغمه دائر ايكي معتبر شاهد  
كتورمى طلب ايلدى . سنيور ! عناد ايتميكر برفتوغرافه  
اعتماد ايتميز ديه ده صوك سوزيني سويليه رك بني  
صو صدردى .

بر حدت مأموري ترك ايلديكم صره ده بر ذات پيدا  
اوله رق ايسترسهم شاهد لر بوله جغنى واجرتنى اله جغنى فلانى  
اكلاتدى . لکن اجرتلى شاهد قبول ايده ميه جكمى سويلدم  
و حريفك سوزيني ديكله مدم . حدت ايله قالقان زيان ايله  
اوتوردير لر . يالانجى شاهد اجرتى فلان ديه بلكه ده اون  
ايتاليان ليراسى ايله يته جك برايشمى اوتلك دعوا وكيلى  
واسطه سيله يتمش ليرايه يادردم . اوتل مديرينه آيروجه  
تشكر لرم ده جابا ! . . .

اوكله طعامندن صو كره اميره حضرتلريله « سان  
جيوانى دهلى اره ميقي » « St. Giovanni degli  
Eremiti نامنده كي جامعدن دوئم بر مقبره ني ويا بر صومعه  
ني زيارته كيتدك . قپوسنه وارد يغمزده ايكي شير ليرا دخولييه  
سنى ويره رك باغچه سنه كيردك . رسمندن ده كوريله جكي







وجه اوزره يوراسى برجامعدر . ذرت كوشهلى زواللى  
منارهسى ده وقتيله چاك قولهسى اولمش ايمش .

پالرموده بونك كې نه قدر اسكى وتاريخى مېانى وسائره  
وار ايسه جمله سنى معارف نظارتى آلمش وايكىشرا ليرا دخوليه  
وضعيه معارفه ايراد پيدا ايلمش وسياحله ده زيارت محلارى  
تهيه ايتمشدر . هر حالده حفظ اثار ايچون فنا بر قاعده  
دكلدر ديرم .

دخوليه يىلقى وىرن آدجغز رهبرلك دخى ايدرك بنانك  
هر طرفى طوغرو ، اكرى تعريفلىله برر برر بزه ارائه  
ايلدى . بوراسنى نورمانلر ۱۱۳۲ سنه ميلادىده عربلردن  
الهرق ذاتلرينه مدفن يامشلمش (۱)

قپوسنك اوزرنده وداخلنده بولنان اويمهلر هب عرب

(۱) بزم سينيور رهبرك سوزنجه نورمانلر بوجامعمزى  
۱۱۳۲ سنه ميلادىده واقتيژ ايلمشدر . بوايسه هجرتك ۵۲۷  
تاريخنه مصادقدر . حالبوكه نورمانلر اطه يى ۴۶۴ هجريده  
يعنى ميلادك ۱۰۷۲ تاريخنده تكميل استيلا ايلمشدر .  
بوحسابجه خريستيان استيلاسندن آلمش سنه صوكره اسلام  
عرقى اطه دن قطع ايدلمش ووقفلرى مندرس اولمشدر  
ديملى ظن ايلرم .

رسم وصنعیتدر . خارجدن منظره سی مصرده «قبور الخلفاء»  
نام محله کوریلن بنالری ا کدریور . انجق قبه لری نصف  
کرویدر .

باغچه سی پک ظریفدر . مصرک باغچه لری کبی خرما  
ولیمون و هند اینجیری وسائر اشجار و نباتاتدن عبارتدر .  
بوراده نورمانلر طرفندن بنا ایدلمش وشمیدلرده یالکنز  
دیرکاربله کمرلی قالمش بر صومعه خرابه سی دخی کور-  
یلیور . برده قدیم صوصهریحی موجوددر : بو جامعک  
بش عدد قبه سی واردر . بوراسنی یاریم ساعتدن زیاده  
کنزدک . موجود مبانی و خرابه سی کوستر بر قاجده صولی بویا  
رسملر آلدق . ارواح کذشتکان اخوان دینه فاتحه لردخی  
اوقودق .

دیرکن امیره حضر تلری ، زواللی دین قارداشلرمن ! کیم  
بیلیر بورالرده نه قدرکنز مدفونسکنز ! دیه برحس دیندارانه  
ایله باغچه نلک برکوشه سنده ظوران برطاشک اوزرینه اوتور  
یوریدی . وماضی اسلام تفکر اتمه طالدی . بن بو حالدن زیاده سیله  
متأثر اولدم . کوزچقورلرم یاشله طولدی . چکم و دودا قلم  
تیره یهرک کندی کنده شوپله سویلنمکه باشلادم .

سلام الله علیکم ای ارواح مسامین ! رحمة الله علیکم



سمجلیاده مرکب آرابه سی





یا اخوان دین ! قان و جانلرکز بهاسنه قازانه رق ار-لامه  
وطن ایلدیککز بواطه بی اخلاقسنز اخلافکزر ، جهالتی  
یوانه فدا و اهل تئلیشه پیدشکس چکدیلر .

اعلان کلمه الله ایچون بنا ایلدیککز شومعبدک کلکزر  
ده بو کونکی حالنه باقیکزر . منارهمنه چاک تعلیق و محر ابنه  
صلیب رکز ایتمشلردر . عجبا بو حاللری کوروبده اچیمیان  
و جیکری یا عیان بر مسلمان بولنورمی ؟ آه حس ملی ! واه  
حس دینی ! بوراده کیم بیلیرنه قدر مسلمانک « لله اکبر  
ولله الحمد » صدالری ایشیدلمشیدی ؟ کیم بیلیر ؟ بو مسجد  
مؤمنینه نه قدر علما و فضالای موحدین دوام وادای فریضه  
صلات ایلمشلردی ؟ یاربی سن امت محمدیه مرحمت ایت .  
هدایت ایله ده باری بو کون اللرنده قالمش اولان بقیه  
ملککی حفظ ایلسونلر . آمین .

نه دن سوکره امیره حضر تلری کیده لم دیدی . رهبرک  
مع زیاده بخشیشنی ویره رک چیققدق . طوغروجه اوتلمزه  
کلدک .

اوتوموبیل ایله کلدیککز ائناده تصادف ایلدیککز شیلردن  
برسی ده مصر کی چمندرلری آرا به لره قوشه رق استخدا م  
ایلملریدر . حتی تنظیفات آرا به لرینه قدر مرکب قوشمشلردی  
کوردم .

سوقاقلری ، جادهلری هم ککیش هم تیزدر . مبانى تکمیل  
یوتنه طاشدنددر . خانهلرینک بالقونى چوقدر . همان  
هر بالقونده اوزون ایپله مربوط پرست موجود اولوب  
سوقاق ایله اپارتمان اراسنده واسطه نقلیه بونک ایله اجرا  
ایدیلور . مثلاً ایاق صاتیجیلرندن سبزه ومیوه ویاهرنه  
اولورسه اولسون برشى الیرسه یوسپله نقل اولنیور . نه  
یوقاروده کیلر اشاغى یه ونه صاتیجیلر یوقارویه اینوب چیقمنه  
لزم قالمشدر . حتی پوسته جى ییله کلدیکنده کتوردیکی  
مکتوبى وغزته یی ویا پاکیتی اشاغى یه صارقیدیلان سپتک  
ایچنه قویور . بواصول او مملکتلرجه پک مقبول اولسه  
کرکدر . هم اپارتمان ساکنلری ایکده بر اشاغى یه اینمک  
زحمتندن قورتولور همده صاتیجى وسائره کبی نه ایدکاری  
بالیسز حتی ایچلرنده هر درلوسی بولنان اشخاصه اپارتمان  
قیولری آچلایور .

نه دیرسکیز ؟ پالموده سیار صاتیجیلر متاعلرینی اعلان  
ایچون کوجلری یتدیکی قدر باغیردقلری ائناده الیرینی  
قولاقلرینه قویورلر . بنجه عرب اوغلى عرب اولدقلرینه  
بر دلیل ده بواوله ییلیر . بلاد عربده هله بزم مصرده اذان  
او قویان مؤذن افندیلردن الده خوانندهلره وایاق صاتیجیلرینه  
قدر جمله یی چاغیردقلری ، باغیردقلری زمان بر وبعض کرده






سبز و میوه یوکللی در کیمله سوقاقلرده الی قولاغنده  
باغیره رق طولاشان سیار صاتیجی








کچیلریاه طولاشه رق سودصانان بر سودجی







بالو مو سو قاقلر ننده اینسکار پله کزن سو جینک بالقون سینه سو د بی قومی


ایکی اللزینی قولاقلرینه قورلر . انسان دیننی دکیشمکه  
خوینی دکیشمز . خوی جانک السده در . جان چیمدقچه  
خوی چیماز .



## ۲۴ کانون اول سنه ۹۲۰

بوصباح شهره کلدن . اشاغی یوقاری طولاشدم « مارینا »  
میداننده بولنان غاریبالدی باغچه سنه کیردم . هرطرفی  
کیزدم . مصرک اوزبکیه باغچه سی قدر بلسکه بیوک دکلدن . لکن هم  
کوزل طرح ایدلمش همده اشجار و ازهار ی ای انتخاب  
اولمشدر . دهاسی وار . یولارینک مناسب محللرینه مشاهیر  
هیکلری رکیز ایدلمشدرکه : رساملره کچوک برمدرسه دخی  
اوله ییلیر . باغچه نک طولامباجلی یولارنده بعض صیق  
اغاجلی نقطه لرینه وضع ایدلمش اولان طاش و اغاج قنا پهلر  
اوزرنده قیز اوغلان چیفت چیفت تازهلر اوتور مشلر ، کویا  
حیات مستقبله لرینه نظام ویرمک ایچون صیق فیق سوز  
ایدیورلر !... صاحی ، صقالی دکیرمنده آغارتمش ، اوننی الهمش ،





پیانزا مارینادہ کی باغچہ وغاریبالدینک نصف ہیکلی



الکینی اصمشیکی توبه کارا اختیارلر ایسه یوللرک آچیق یرلرنده  
کی طاش سدیله ر اوزرنده کونشله نیور وکلوب کچن تازله ره  
سونوک نظرلرینی منتقدانه عطف ایلورلر ایدی .

نه دن سوکره باغچه دن چیقهرق « ویتوریو امانوئیل »  
جاده سنه کیردم . درت کوشه یی کچدکدن سوکره صاعده  
بولنان ملت کتبخانه سنه واردم . بوکتبخانه عظیم برننانک  
جاده اوزرینه بولنان اوست قات نصفی تشکیل ایدیور ایدی .  
بنانک باقی اقسامی ایسه بیوک براعدادیه مکتبیدر .

اوست قاته واردینعمده اولا کتبخانه مأمورینک او طه سنه  
کیردم . السنه شرقیه وخصوصاً عربجه کتابلرک اسمنی حاوی  
فهرست وارمی دیه سئوال ایلدم .

فهرست سالوننه بیورکز دیه جوارنده کی براوطه یی  
کوستردیلر . او طه یه کیردم . حیرتمی موجب اولدی . زیرا  
او طه نک ایچنه پک بیوک برماصه وضع ایدلمش اطرافنده  
کزیه ییله جک قدر بر بوشلق براقله رق ماصه نک  
اوزرینه صره صره تلرکریلمش وحروف هجا اوزره  
بوتلره مقوا یافته لر کچیرلمشدرکه : اسامی کتب ، مؤلفلری  
اسملرینک ایلک حرفی موجینجه بویافته لره یازلمش ونومرولر  
وضع ایدلمشدر .

عمومی و بعضی خصوصی کتبخانه لره یاپله جق بیوک

فهرسته مسوده اولق اوزره حاضرلارنان وارابنجه معلوم اولان « فیش » تسمیه ایلدکلری کچوک یافته لری مصرده چنگلی برجلدا یچینه وضع ایدرلر . بوراده ایسه بونلری عمومی فهرست حالنده سرکی یامشلدی .

مؤلفنک اسمیه کتاب ارامق آز چوق معلوماته متوققدر . بوراده عجبانه کتابلر واردر ؟ دیه کلن برکیمسه یه بو اصول چوق فائده ویرمز . نه ایسه الف حرفی صره سندن فیشلری اوقومغه باشلادم . اولا بوراده ایلک اوکر ندیکم شی ، السنه شرقیه اوزره موجود اولان کتابلری کندی کتابلریله قاریشدرمش اولدقلریدر . مصر کتبخانه سندده کتب شرقیه فهرستلری کتب غربیه فهرستلرندن آیرلمشدر . پارسده کی « کتبخانه ملی » ده دخی خط دست بولنان کتب شرقیه فهرستلری بوسبتون آیرو جلدلر تشکیل ایدیور .

اقباله ، نجمه حیقان ییانقویلیتی کی فیشلری قاریشدریرکن « ابن حوقل » ک « پالمو » اوزرینه یازمش اولدینی سیاحتنه راست کادم .

بوگونلک بونکله اکتفا ایدهیم دیه کتابک اسمی ونومروسی کتبخانه نک مطبوع طابنامه سنه یازدم وبعد الامضا مطالعه سالونته کیردرک حافظ کتبه تقدیم ایلدم .



ظن ایدر سه‌م اون دقیقه قدر برانتظاردن صوکره رساله‌ی  
کتوردیلر . بوايسه «ابن حوقل» ك عمومى سياحتنامه‌سى  
دكل ، يالـكـز «پالرمو» حقه‌ده يازديغى قسميدر . «ميشيل  
آمارى» نام برایتالينان مستشرقى طرفندن فرانسزجه يه ده  
ترجمه اولمش وپارسـده طبع ايدلمشدى . بوذات محترم  
«سيچليا» اوزرينه عربجه نه قدرشيلر يازلمش ايسه جمله سنى  
بش جزؤده جمع ايلمش ولمانيا جمعيت شرقيه سى طرفندن  
«لاينزيك» ده طبع ايتدرلمشدر . حتى توسيع معلوماتم  
ايچون بوندن برنسخه سنى بن دخى صاتون آلدـم .

«ابن حوقل» بصره لى برتاجرايمش . بغداددن قالقه رقتا  
«پالرمو» يه كمش و سياحتنه سيچليا وپالرمو معلوماتى  
يازمشدر . «ابن حوقل» هجرتك ۳۳۳ سنه سى پالرمو يه  
كمشدر «ميشيل آمارى» نك سوزينه كوره ابن حوقل  
۳۶۶ تاريخ هجري سنده يعنى ۹۷۶ سنه ميلاديسنده بغداده  
عودت ايتدكدن صوكره سياحتنامه سنى يازمشدر .

رساله يى ممكن مرتبه برسرعتله مطالعه ايلدم . خوشمه  
كيتدى . بوكون پالرمو ملت كتيبخانه سنده بو قدر برمعلومات  
ايدينه بيلدم . بوراده برذاتدن اوكرندم كه كتيبخانه ده  
ايكى يوزيك جلد قدر كتاب وارمش . حالبوكه فهرست  
اوطه سنده بولنان فيشرك يكوننى براحتمال ضعيف اولمق

اوزره لون بیک قدر تخمین ایدرم .

فهرستی یا پلماش کتابلر انتفاعدن ساقطدر . بویله اولان کتبخانه لری ، التونلرینی پیوملکله لرله یرلره کومه رک نفسی ده بشقه لرینی انتفاعدن محروم ایدن بخیلله بکزدرم . بر بشقه کون تکرار کلک نیتیه چیقدم وبعد الظهر ساعت بره طوغرو اوتله کلدیم .

اوتلمزک عمومی قیوسنی « قره بینیه ری » تسمیه ایدیلن تعلیمی و کبار پولیسلر اشغال ایلماش اولدیغنی وخیر اوله دیه ایچ قیودن کیردیگمه اوتلاک ایچنده ده بونلردن بولندیغنی کوردیم . اوطهمه کیردیگمه اوکرندم که « السید ادریس السنوسی » حضرتلری ناپولیدن ککشدیر .

اوروپا ده مستعمر اتدن کتوریلن امرای و مشایخ اسلامی قیرال مسافری نامیه کوز حبسنه المقبر عادتدر . قیرال حضرتلرینی زیارت لیچون مکر السید ادریسی طرابلسدن رومایه کیتماش و شمدی ده وطننه عودت ایدیور ایمش . کندی کندیمه دیدم که : وقتیه امرای اسلامک استبداد و غباوتلرینه قربان و یردکاری او میلیونلره امت محمدک وطن زائللری اولان « حقلیه » نک مرکز امارتنی ، شوکوزل « یارمو » نی اوتلاک پنجره لرندن اولسون شیخم حضرتلری حمر تلرایله سیرایلسون ده احساس ملیسنک میزان الحراره

سنى بونىكله اولچسون .  
 تربيه دينيه سنى غيب ايدن احساس تىكلدن قالير . طوكار .  
 « اذا كان اصلى من تراب وكلها بلادى وكل العالمين اقاربى »  
 يعنى « مادام كه خلقتم توپراق دندر . بتون دنيا وطنم وخلق  
 عالم ده اقربامدر » ديمك ايچون حاسه مليه يى ، عصبيت  
 قوميه يى بوسبتون غيب ايلمك لازمدر والسلام .  
 اقشام طعامنده اميره حضر تلى ايله بوبخشه دائر اوزون  
 بويلى مذاكره لر دخى ايلدك . نه يارار ؟ ... اولان اولمش  
 وايش ايشدن كچمشددر .



## ۲۷ کانون اول ۱۹۲۰

میلاد عیسی بایرامی مناسبتیه ایکی کوندنبرو هر طرف  
قبایلی ایدی . انجق ما کولات و خصوصاً مشروبات ساتان  
محللر آچیقدر . کلیسا قپولری ایسه ایکی کوندنبرو کیجه لی کوندوزلی  
آچیق قالدی . چاک صداری بر آن کسامدی . پوسته خانه لر دخی  
قبایلی اولدیغندن غزته لرمز کلمدی . دون بایرام و بوکون بازار  
دیہ عمله کروهنک ، چارشو خلقنک سرخوش اوله رق  
سوقاقلره دوکولدیکی و خصوصاً تونبولاییلترینک نومرولرینی  
علام الغیوب پاپاس افندینک تعریفی وجه اوزره الدیغی حالده  
ینه قسمتیه چیقمامش اولدیغندن میخانه لرده یومروقلرینی  
دستکاهه اوران قلندر انک غوغا ایتیمک ایچون بهانه ارادیغی  
برکونده اوتلدن طیشاری چیقمه نک بر فائده سی اوله میه جغنی





باپاس افندی قوندوره بویاجیسنه پیا نقونومرولرینی املا ایدور که  
بویاجی بونومرولری آلیسه مطلقا پیا نقوی قازانیرمش ! ...



بیایور ایدک . بومملکتده برنوع سیار پاپاسلر واردر که :  
سادهدل خلقه آله جقلری توبه بولا بیلتنک نومرولرینی سویلرلو  
مقابلنده بخشیش آلیرلر . رسمده دخی مشاهده اولنور .  
بنأ علیه بوکچن ایکی کونمزی هب اولدینمز یرده کیچیر  
مشیدک .

بهوده کچن ایکی کونمزک آجیسنی چیقارمق ایچون ده  
« Monte Pellegrino » دیدکلری زیارت طاغنه چیقمغه  
قرار ویرمش و بوبابده لازم کلن ترتیبلری یامش ایدک . شویله که  
اوتل مدیری ، اوکله طعممزی و صومیزی ایکی سپته ترتیب  
ایتدرمشیدی . سیاحین طاغنه مرکب سوار چیققلرندن بزم  
ایچون ده یاریم دوزینه چمندر حاضر ایدلمشیدی . چقه  
جغمز زیارت طاغنک سطح بچردن ارتفاعی ۶۰۶ مترودر .  
نهایت قبل الظهر ساعت اونده امیره حضر تلریله برآرا بهیه  
بینهرک اوتلی ترک ایدک . جیل زیارت شهرک شمالنده  
بولمان اوتلمزک شمالنده و تمام ساحل بچرده در . طاغنک  
جنوب اتکنه یعنی شهرک قره کمرکی بولمان محله و صولمزده  
ارابه دن ایندک . قدوممزه انتظار ایدن مرکبجیلری بوراده  
حاضر بولدق .

اولا امیره حضر تلری اکرلی بر مرکبه سوار اولدیلر .  
بعده جمله مز برر برر مرکبلره بینهرک بر قطار تشکیل ایدک  
(۵)

وطاغە طیرمانغە باشلادق . کیم بیلیرنه قدر عصر مقدماتی نیجه کافتلرله میدانە کتورمش اولدقلری بو طاغ یولی ایکی اوچورومک زاویه مائله حالنده تشکیل ایلدیکی غایت قورقونج برکوشه سنه کوپرورلرله یاپلمش « زیق زاق » دینلن بر طریق منکسردن عبارتدر . زولالی مرکبلر آهسته آهسته حقیقورلردی . براز صوکره مرکبجیلر « عا ... » دیه باغیره رق حیوانلرینی سورمکه باشلادیلر .

عا ... می ؟ نه غریب ندا ! بزم مصرده مرکبجیلر ایله یوک ارا به جیلری حیوانلرینی « حا » دیه سوررلر . سیچلیاده ایسه « عا ... » دیه سوق ایدیورلر . بنجه « حا ایله عا » اراسنده یک آخرج حلقی فرقی بولندیغندن هرایکی نداده بر قومک بر جماعتک مالیدر دیرم .

پارمو بلدیسه سی بو عجایب طریقی محافظه و تعمیر ایچون دایما فدا کارلقدە بولمش اولدیغی ظاهر ایدی . خصوصاً کوپرورلری ختامه ایصالدن صوکره یاپلمش اولان یوللرک ایکی طرفنده محاک قابلیتته کوره چام و سروی فدانلری دیکمش بعض یلرینی ده هند اینجیری اورمانی حالنه کتیرمشیدی .

یولک اک دیک محلی بیتیرمک اوزره ایکن ، چمندرلرک بر قاجی آدیملرینی قیصه لیدیله . و عا ... نداسنی اکلاما مازلغه



کدکارندن سوروجیلرینک صوپاری ده صاغر یلرینه اینمکه باشلادی .

احیاس حیوانی نه غریب شیئدر ؟ بولندیغی محیطک هر درلو حالنه اورتاق اولور . حتی اراسنده یشادیغی قوملرک، احتیاجی درجه سنده لسانلرینی اوکرنیر . خلاف معتادی بشقه برقومک اراسنه دوشرسه لسانلرینی بیلمز اولور . برمدت برابرلنده بولمدقجه امرلرینه اطاعت ایلمکی بیلممز . نهایت زمانه احتیاجی قدر لسانلرینی اوکرنه رک امرلرینه اطاعت ایلر .

شوکیچن حرب کبیرک ختامنده مصرده بولنان انکلین اردوسی کندینه لزومی قالمیان مکاره حیوانلرینی فروخت ایلدیکی صررده قاهره تظیفات دائرہسی ده بولردن برمقدار استر صاتون آلہرق تظیفات اراہه لرینه ویرمشیدی . بوآراہه لردن برینک استری نصلسه برکیمسه یه چارپمش اولدیغندن اراہه جیسی مسئل طوتلمش ومحکمہ یه سوق اولتمشیدی . حضور محکمہ ده نفسی مدافعه بابنده اراہه جینک بروجهائی سوزلرینی غزتہ لرده شویله او قودق ایدی . «رئیس افندی امین اولکزرکه بن بووقعه دن مسئل دکلیم . تہاکہ نک وقوع بوله جغنی کوردیکم آندہ کوچمک یتدیکی قدر « یص . یص » دیه باغیردم . حالبوکه حیوان عربجه اکلامیور . بن ایسه انکلینجه

بیلیمورم ». بویله غریب بر مدافعه اوزرینه محکمه نك  
ارابه جی یه نه حکم ویردیکنی اوکر نه مامشیدم .


مصرده عموماً بوکی حیواناتی « حا ... » دیه یورو تدکلری  
کبی « یص .. » دیه ده طور دریرلر .

بر کون مقدمی بر چوق یاغور یاغمش اولدیغندن یوللرمز  
ایلر ولدکجه یاپشغان چامورلره تصادف ایلر اولدق . زواللی  
حیوانلر نه : عا ... نداسنه نه ده صوپا اشارتنه قولا ق ویرمیه  
رک عادتاً طیان دیلر قالدیلر . جمله مز مر کبلردن اینه رک یورو مکه  
باشلادق . اراصره طور هرق دونوب پالرمویه باقیور ایدک .  
حقیقه شهرک بو جبل زیارتدن منظره سنه طویلماز . پالرمو،  
هلال شکندده قوشاتمش اولان طاغلرک اوکندده خفیف  
بر سطح مائل اوزرینه بنا ایدلمش دکنر کنارنده جسم و شیرین  
بر شهر در .

بلدیسه سی بو جبل زیارته برده اوتوموبیل یولی یاپدرمغه  
باشلامش اولدیغنی یولده کوردک . « همه الرجال تقلع الجبال »  
سوزی بونلره عائد در دیرم . غایت دیک بر طاعه سرت طاشلرینی  
دینا میتلرله سوکوب اتهرق ارا به یولی یامق حقیقه مادی  
ومعنوی بیوک بر همه متحاجدر .

نهایت بر بچوق ساعت صوکره « Santa Rosalia »  
« عزیزه روزالینا » نك مقامی وقبرینی تمثیل ایدن بر زیار

ایتالیان طایه سیه جبل زیارتک کورنشی







تکاهه واصل اولدق . بوراسی وقتیه عادی بر مغاره اولدیغی  
حالد میلیونلر صرف ایدیله رک کلیسا حالنه قونمش و مخصوص  
موسملرنده عموم پالمو و اطرافنی خلقنه بر زیارتگاه اولمشدر .  
« Santa Rosalia » عزیزه روزالیا حقنده نقل ایدیلن  
حکایه ایسه شویله در . عزیزه روزالیا ، قرال ایکنجی غوئیلامک  
اقرباسی بولنان « دوق سینیدالدو » نك کریمه سی ایمش .

روزالیا نك یکنی اولوب پالموده والی بولنان بر ذات  
قیز جغزی رغبت و محبت ایده میه جکی بر کیسمه یه جبر آترویح ایتمک  
ایتمش و روزالیا ده قتولیک مذهبی اوزره عفتنی حضرت  
مریمه وقت ایلمش اولدیغی دعوا و بقیه حیاتی عبادتله  
کچیرمک ایچون بومغاره یه کلش طیقانمش والی آخر العمر  
بوراده اعتکاف و عبادت ایتمش ایمش . نهایت میلادک ۱۱۹۰  
تاریخنده قیز جغز فوت اوله رق مغاره سنده دفن اولمشدر .  
بوکی اموائی اعزه مسیحیه صره سنه قومق ایچون کازدن  
بر عصر زمان مرور ایتمک لازم اولدیغندن « روزالیا » خانم  
قیزی ده طبیعی یوز سنه صوکره پالمو پاپاسلری تعزیز ایتمشلر  
واسمنی ده « سانتا روزالیا » قومشدر .

میلادک ۱۶۲۴ سنه سی پالموده شدتلی بر طاعون ظهور  
ایتمش و پک مدھش بر صورتده ضایعاته سبب اولمش بولندیغندن  
مرضی توقیف ایله اهالی نی مصیبتدن تخلص ایچون « عزیزه

روزالیا « نک میکورینی شهره نقل و زمان اسلامده مشهور  
اولان « الجامع الاکبر » ک خراب ایدیلن تملی اوزرینه مینی  
« قاتادوال » دیدکری بیوک کلسایه دفن ایتکی رئیسای  
روحانیه چاره یکنه اولمق اوزره تنسیب و تصویب ایلمشدر و  
سنه مذکوره نورنک اون پشچی کونی دینی آیتلر و بک  
بیوک آلایرله ساتا روزالیا نک میکورینی مرقدن آلوب  
کنورمشدر و قاتادوالده دفن ایلمشدر . طبعی مرض  
مدهشک حکمی بعد الایفاغیب اولسنی روزالیانک معجزه سنه  
و میکورینک کرامته حمل ایدرک اوکوندن اعتباراً متوفیه یی  
« یارمو » حایه سی طایب مشدره نائل آملما اولمق ایچون ده آدفلر  
ادامغه باشلامشدر .

شوقانی دنیاده زهد و عبادتدن بشقه هیچ برایشلری  
اولمایان طایفه رهبان ، یالندقلری شهر و کورلرک الک کوزل واک  
یوکسک یارینه صومعه لر و وکلایسار بنا ایتدرمکی و جلب  
منفعت ایچون ده درلو کرامتلر و معجزه لر سببیه بین الناس  
او اماکنی اشهار و اعزاز ایلمکی بروقت اهل ایتامشدر .  
بنا علیه جبل زیارتده کی بومغارده یی میلیونلر صرفیله پکرعنا  
برعبید حایه قومشدر و « ساتا روزالیا » نک قبرینی ده مقام  
مقدس حایه افراغ ایلمشدر . تره یالدرلی بر پارماق  
ایچنه آتشی و آیلوب قبیلان قبرک ایچنه ده روزالیا نک

برتمالی یاتیرلشدر . بونی ایسه فلورانسلی هیکاتراش مشهور  
 « Grigorio Tedeschi » « غریغوریو تدسکی » نام  
 ذات یامشدر . قیرال اوچنجی قارلو طرفدن ده بونماله  
 التوندن برماتو کیدرلشدر . کلیسا ده و قبره جوار برمحله  
 « روزالیا » نك تتویجی نامنده برهیکل ده موجود اولوب  
 بونی ده « Nunzio la Mantia » « نوزیو لامانتیا »  
 نام هیکاتراش اعمال ایلمشدر .

امیره حضر تلریله برابر بومغاره یه کیردک . هر طرفنی  
 زیارت ایلدک . تر به دار و مفتاحدار پاپاس افندی امیره مزک  
 حالندن ممتازیتنی ادراک وکمال خضوعله قبرک درونی ده  
 کورملرینی بالاخطار بلندن اشاغی اصیلی اولان براناختارله  
 پارماقلغی آچدی وهمان کویا لحد دروننده یاتیورمش کبی  
 بولنان و صاغ الی اوزاتش کبی طوران التون مانتولی هیکلی  
 اوائه ایلدی . حقیقه یك صنعتی برهیکلدر .

مظاهر دن زیاده حقایق اشیایه اعتبار ایتسک ایچون ،  
 احساس بشر حال حاضرندن دها زیاده تمکمل ایتملیدر .  
 هرکس کوروشه مفتوندر . کوروشی ترکیب ایاین اصله  
 اعتبار ایتمیورلر . بونک ایچون اولملیدر که : بنم کوردیم قتولک  
 رئسای روحانیسی دعوت ایمانی نشر ایچون لافدن زیاده  
 مثالره و رسملره اهمیت ویرمشلردر . عقائد مذهبی لرینی علی

الا كثر رسم وهيكله ترويج ايتمشلردر .

اميره حضرتلى مغاره دن طيشارى يه چيقدقلى ائئاده خدمتچىلى اولان سيچىلى ايتاليان « روزاليا » نك قبرى ايقاد ايدلك اوزره پاپاسه بى مقدار موم پاره سى ويرمىنى امر ايتىش ، سينيور پاپاس ايسه همان دفتريه بيوك موملردن اتى عددنك بدلى قيد ايلمش وقبض واستلام مطبوع سندن دى دى يازره رق دفتريه كىشمش ويرمىش ايتىش . خدمتچى ايتاليان كويا اكلايه مامش كى رايمى صورمق اوزره بى استلام سندن كوستردى . اتى عدد موم اوتوز اتى كيلو وزننده ايتىش . او . . . ديه استىكشار ايله پاپاس جنابلرينه بوموملرك كچوكلارندن انتخاب اولمىنى اخطار ايلدم . سينيور ! دفتريه قيد ايلدى . بو حساب رومايه قدر كيمده جىكدر . تبديل ايدىم . ذاتا ثوابى موملرك بيوكللى قدرده چوق اولور . روزاليا نك همتى حاضر اولسون . كراماتى دايما واقعدردى .

ضررى سينه يه چىككدن بشقه چاره بيلمىم ايتچون خدمتچى يه بى صورت ايدرك ايتىرسىك پاره يى وير واميره حضرتلرينه ده حالى عرض ايله ديدم . صوكره خبرالدىم كه موملرك بدلى ايكي يوز وكسور ايتاليان ليراسى طوتمشدر . قتولاك عالمده بو كى زيارتلك حسابى وكتابى يوقدر . بونلرك



اقلیم و موسمنه کوره سنه ده برقاچ کون بپراملری ایدیلیر .  
هر طرفدن زیارتجیلر آقین آقین کلیرلر . نذرلرینی کتوریرلر  
و موملریاقلار و صدقه صندوقلرینه باره لر اتارلر .

کرچه بزم مصرده ده قبور اولیا جوارنده « موالد » نامیه  
پنایرلر اولور اما قبر جوارینه قونان صدقه صندوقلرندن زیاده  
اوافق تفک تاجرلر و حتی طنطاده سنه ده ایکی دفعه یاپلان  
« سید البدوی » مولنده بیوک تاجرلر خیلی آلیش ویریش  
ایدلر و حرکتدن برکت حاصل اولور دیرلر .

بومملکتلرده ایسه هر درلوکاری پاپاس افندیلر ذاتلرینه  
و کندی کیسه لرینه حصر ایلمشلر در . مغاره دن چیققدن  
صوکره تمام یکریمی دقیقه ده یورویهرک طاغک شمال برونه  
کلدک . بوراده عظیم برقاعده اوزرینه رکز ایدلمش « سانتا  
روزالیا » نک غایت جسیم برهیکلی موجوددر . باشنده  
معدندن برتاجی ده اولوب یوزی دکره در . وقتیه بوراده  
دکر ایچون بر اشارت قوله سی دخی واریمش .

« سیچلیا دلیلی » نام ایالتیالانجه ائرده دییورکه : بوراده کی  
روزالیا نک هیکلنه ایکی دفعه ییلدیرم دوشمشدر . بنجه  
کیدرمش اولدقلری معدن تاج باشنده طور دقجه عزیز هیکل  
ییلدیرم قضا سندن دهاده قورنورله میه جقدر .

ارتق جمله مز بوراده هم راحت هم طعام ایتمک ایچون

اوتوردق . هانکی طرفه نظر ایدلسه بشقه درلو بر منظره  
کورلیور ایدی . شمالا دکنز واک اوزاقده براطه ، شرقاً « اتما »  
یانار طاغی کورلیدیکی کی غرباً « قاپوغالو و موندلو » و  
« اسفه راقاوالو » ساحل بوی قریه لری مشاهده اولنیور ایدی .  
جنوبیز ایسه طانگ ال یوکسک جهتی اولدیغندن تقریباً زروه  
سمنده « تلسز تلغراف » استاسیونی بنا ایدلمشدر .

بعد الظهر ساعت اوچ بیچوغه قدر بوراده راحت ایلدکدن  
صوکره چمندرلره سوار اوله رق آهسته آهسته طاغی  
ایندک وانجق بش بیچوقده ارا به لر می بولدق . اوتلمزه  
عودت ایلدی کمزده امیره حضر تلی دییور ایدی که « چوق  
زمانلر یاد ایدلمکه شایان طاتلی برکنزینمیدر » دگی ؟



## ۲۹ کانون اول سنه ۹۲۰

بوصباح ارکنجه سوقاغه چیقدم . شهره کیتدم . اکسیک  
اولمایان اوفاق تفک ایشلریمی کوردکدن صوکره طوغروجه  
« کتبخانه ملی » یه کیردم . فهرست سالوننده برمدت مقوا  
یافته لره کوزکزدردکدن صوکره اولکی کونکی سطحی  
مطالعه ایلدیکم « ابن حوقل » ک پالمو حقننده کی رساله سنی  
تکرار ایستدم . کتوردیلر . اولندن اخرینه قدر برحمله ده  
او قودم . ذاتاده مقدمه سیله ، فرانسزجه ترجمه سیله وعلاوه  
لریله مجموعی قرق درت صحیفه در . خوشمه کیتدی . وقتم  
دخی اولدیغندن استنساخ ایتمه که قرارله رساله یی بر لحظه  
ایچون حافظ کتبه براقه رق چارشویه فیرلادم واک یقین  
برکاغدجیدن بیاض بر دفتر صاتون آلدیم وهمان کوری کلدیم .

قویومانی مرکبی قلمی چیقاره ق « ابن حوقل » ی بوجه  
اتی ترکیه ترجمه باشلادم .

یوقاریده دخی تحریر ایدلیدی کی « ابن حوقل »  
بصره لی بر تاجر اولوب بغداددن تجارتله کزه کزه اوننجی  
عصر میلادیده « صقلیه » جزیره سنه واصل اولمش ایمش .  
ایشته « ابن حوقل » پالمو حقنده کی معلوماتی « ذکر  
صقلیه » دیه شویله باشلاور .

— « صقلیه » بر جزیره اولوب طولی یدی و عرضی  
درت کونلک مسافه در . اکثر اراضی طاعلق بولنوب  
قلعه و حصارلری پک چوقدر . اراضی تکمیل مزروع اولوب  
هر طرفی سکان ایله طولمشدر .

« بلرم » یعنی پالمو شهرندن بشقه غلبه لیکلی و مشهور  
بر شهری یوقدر . پالمو شهری اطه نک شمال جهتمده و ساحل  
بحرده واقع اولوب حدودلریله بش قسمه منقسمدر . بوبش  
قسمدن برنجیسی « پالمو » نامی ویریلن بیوک شهردر که  
طاشدن یاپلمش متین و عالی بر سورله ده احاطه ایدلمشدر .  
بو قسمده تاجرلر اسکان ایدرلر .

« جامع الاکبر » دخی بو قسمده در . دخول اسلامدن  
مقدمی بو جامع روملرک معبدی ایمش . خرسیتیانلق زماننده  
دخی بوراسی کلیسا اتخاذا ایدلمش ایمش . لسان اشنا بر کیسه



دن ایشدیکمه کوره یونان حکما سندن اولان «ارسطاطاليس»  
یعنی «Aristate» ک اغاجدن معمول بر هیکل یوکل یساده  
معلق ایش . یونانلرک بو صورته تعظیم ایلدکلرینی کورن  
خرستیانلر ده بوکا احترام ایتمشلردر . بووجه ایله معبد دروننده  
یوکلک بریره تعایق ایللملرینک سببی شودر . خلق امور مهمه  
لرنده هب کلوب بونی زیارتله استمداد ایدرلر و حتی نسل  
طلبلرنده بیله زیارتنه کلرلر ایش .

ایکنجیسی « الخالصة » <sup>(۱)</sup> تسمیه ایدیلن قسمیدر .  
بونک ده طاشدن بنا ایدلمش برسوری وارایسه ده برنجیسی

(۱) الخالصة نک بو کونده انجق بر اسمی قلمشدر . اوده  
پارمولیلر « Kalsa » قالصا یاخود « Gausa » غاوصا  
دیورلر که پارمونک بو کونده بر محله سیدر .

« ابن البناء » دیه مشهور اولان « ابو عبد الله محمد » ک  
« احسن التقاسیم فی معرفة الاقالیم » نام کتایبده « صقلیه »  
جزیره سنده « پالرمو » جوارنده کی « الخالصة » ی ذکر  
ایلدیکی صره ده دیور که بوراسی برسور ایله محاط اولوب  
درت عدد قیوسی واردر . اسملری ایسه « باب کتنامه ، باب  
الفتوح ، باب البنود و باب الصناعاته در . جامعی و چارشولری  
موجوددر .

کبی دکلدر . بوراده سلطان « خلفا طرفندن سیچایایه کوندریلن والی دیمک ایستور » ومعیتی سا کندرلر . « الخالصه » ده نه چارشو نه خانلر بولما یوب یالکیز حماملر واردلر . برده کچوک برجامع موجوددر . والینک حبسخانه سی دخی « الخالصه » ده در . دار الصناعه سی <sup>(۱)</sup> « ترسانه » و حکومت داره سی هب بوقسمده در . « الخالصه » نک اوک ، ارقه و غرب جهتلرندن درت عدد قبولری موجود اولوب جهت شرقیه سی ایسه دکیز و قیوسز برسوردن عبارتدر .

اوچنجیسی « الصقالیه » قسمیدر . بوراسی برنجی وایکنجی قسملردن دها زیاده معمور و معتبر بولنوب پارمو نک عمومی لیانیدر . بوقسمده اقارصولر موجود اولوب پارمو قسمی بوصولر مجراسی « الصقالیه » قسمندن تفریق ایتمشدر .

(۱) « دارالصناعه » عربلرک کیمیلر انشاسنه مخصوص اولان محلاته ویردکاری برنامدر . قرون وسطاده بوسوزی رومالیلر « Tarsianatus » دیه لاتینلشدرمشلر ایدی . شاعر مشهور « دانتی » بولکله یی « Arzana » دیه آلمش . دها صوکره لری « Arsenal یاخود Arsenale » دیمشلردر . ترکیجه مزدهده لاتینلردن « ترسانه » دیه کچمشدر .

دردنجیسی ایسه « ابن سقلاب » اسمیه معروف اولان  
« المسجد » قسمیدر <sup>(۱)</sup> بودخی بیوک برقسم اولوب انجق  
اقرار صولری یوقدر . سکانی هب قویوصوی ایچرلر .

بوقسمک جنوبنده بریر موجود اولوب اسمی ده « وادی  
العباس » در . <sup>(۲)</sup> بووادی پک بیوک اولوب شهرک دکر منلری  
بوراده بولندیغی کبی فائده سز برچوق باغ و باغچه لری  
دخی واردر . بوراده یکی برقسم دخی واردر که « المسجد »  
قسمی قدر بیوکدر . ارالرینی تفریق ایچون اولکی قسملر کبی

---

(۱) « المسجد » قسمی قدیم پالرمونک جنوبنده  
وشمدیلرده « سان نیقولو تولنتینو » نام کلیسا نک ارقه  
سندگی میدان اولوب بوکونه قدر اسمی « Moschitta »  
موسکیتتا اولوب بوایسه مسجد کله سنک ایتالیا نجه تلفظندن  
بشقه برشی دکادر . فرانسلرک « Mosquée » سوزیده  
مسجد دندر .

(۲) میشل امارینک قولنججه « Oreto » اوره تو  
تسمیه اولنان کچوک نه ره عربلر « وادی العباس » نامی  
ویرمشلردر . نورمانلر زماننده « Habes » هابس یاخود  
آییس تسمیه ایدیلیر ایمش که عربلرک « عباس » کله سنک  
بربوزمه سیدر .

سورلری ده یوقدر . حتی «الصقالبه» قسمی جهتندن یوراسی  
برسورله تفریق دخی ایدلماشدر .

الکیموک چارشولری « ابن سقلاب » قسمیه یکی قسمک  
آراسنده بولنیور . زیتون یاغجیلرهب بوچارشوده در .  
صرافلرله اجزاجیلر و ورزیرله سلاجیلر و باقیرجیلر سورک  
خارجنده درلر . برده بغدادی بازارلری وار ایسه ده اشبو  
چارشولرک خارجنده در . دیگر صنعتلر دخی کذا خارجده  
بولنیورلدر . بوراده قصاب دکانلری پک آزدر . انجق شهر  
داخلنده یالکرات ساتان قصابلرک یوزاللی دکانلری واردر .  
بوانسه سکانک عدد ودرجه تروترلرینه بر دلیل اوله ییلیر .

برده درجه صنعت و اعتبارلرینه مسجد لرینک عظمتی  
دلیلدر . بر دفعه سنده بنومسجد ده ایدم . حساب ایدم که  
اگر مسجد جماعته طولار ایسه عددی یدی بیک کیشی به  
بالغ اولور . زیرامسجد اوتوزالتی صف جماعتی الهیله جکی  
کی هر برصف ده ایکی یوزکیشیدن زیاده دکلدر .

« بالرمو » قسمنده بولنان جامعلرله « الخالصه » قسمنده  
وبونی احاطه ایلین قسمنده کی جامعلرک عددی اوچ یوز  
وکسوردر . بولرک اکثریسی قبولری ، دیوار و طوانلری تمام  
وصاعلام بنالدر . بوجامعلر علما و فضالیه جمعدرلر . اجتماعلریله  
نورعر فافلرینی تزید ایدرلر .



بورانك خارجنده و «وادی عباس» جوارنده «معسكر»  
یعنی اردوگاه نامنده بریر موجود اولوب بری بری ارقه سنه  
دیزلمش اولان مبانی «البيضاء» ديه معروف بولنان قریه یه  
قدر واصل اولمشدر .

«البيضاء» <sup>(۱)</sup> برکوی اولوب پالمویه ناظر و بر فرسخ  
قدر اوزاقدر . بوقریه جمله نك معلومی اولدیغی اوزره وقوعه  
کلن داخلی اختلالار سببیه خراب و سکانی هلاک اولمشدر .  
«البيضاء» قریه سنده ایکی یوزدن زیاده مسجد و جامع  
موجود در . بن بویله کچوک و مساحه سی طار بر قریه ده  
بو قدر جوامع شریفه بولندیغی کیلسنی هیچ بر دیارده کورمدم .

(۱) «البيضاء» بوکونه قدر اسمنی و موقعی حفظ  
ایلمشدر . «Baïda» دیورلر . موقعی اراضی جیره دن  
اولدیغی ایچون بیضاء دینمشدر . اسلام طرفندن بنا  
ایدلمشیدی . میلادک ۱۱۷۷ سنه سی مایسنده ایکنجی  
غوئیلیام بر فرمانله «البيضاء» نی مورده یال پاش پستقوسنه  
«Archevêque de Moreal» احسان ایلمشدر .  
«میشل آماری» پالمو نام کتابنک اوتوز سکزنجی صحیفه سنده  
بویله دیور . بوکون «البيضاء» ده پک صنعتلی بر کلیسا واردر .  
(۶)

هر نه قدر قرطبه ده بو قدر جامع اولديغنى ايشتمش ايديسهم  
 ده بو خبرك موافق حقيقت بولنديغنى اوكرنه مدم . بالعكس  
 بوبابده شېهه م بيله واردر . حالبوكه « صقليه » ده بويله  
 اولديغنى بنجه محققدر . زيرا اشبو جوامع شريفه نك چوغنى  
 بالذات مشاهده ايدم . بن بركون فقيه « ابو محمد القفصى  
 الوثائقي » نك خانه سى جوارنده ظور يوردم . بو عالمك  
 مسجدندن براوق آتمى مقدارى مسافه ده اون قدر جامع  
 بولنديغنى كوردم . حتى بونلردن بعضلى قارشى قارشى يه بنا  
 ايدلمش اولوب ارالزنده انجق بريول موجودايدى . بوشهرده  
 جوامع ومساجد شريفه نك بو قدر كثر اوزرينه بولمسنك  
 سببىي صوردم . بكا شويله سويلديلر .

بوراده كي خلقك او درجه برونلرى بيوكدر كه :  
 هر كس ذاته مخصوص بر جامع صاحبي اولمىنى و كندى اهل  
 وعيالى ايله معيتندن بشقه بر كيمسه نك جامعنه اورتاق  
 بولمامىنى ايستر .

بعض دفعه لر كورلمشدر كه ايكي برادر اولدقلى حالده تك  
 باشنه مسجدنده او تور مق و عبادت ايلامك ايچون هر برىسى  
 آيزو آيزو جامعلر بنا ايتدرمشلردر . بروجه بالا ذكر ايلديكم  
 اون قدر جامعك ايچنده بر جامع واردر كه ايچنده « ابو محمد

القفصى « ادای صلات ایلر و بونك یکر می ادیم قدر ایلر و سنده  
دیگر بر جامع بولنوب دروننده اوغلنك علوم دینیہ تعلیم ایلہ سی  
ایچون مخصوص بنا ایتدرمشدر . بوندن هر بریسنك غرضی  
ایسه انجق شوبنا ، فلانك جامعی دیسونلردیه در . اشبو  
« القفصى » نك اوغلی اودرجه ده کندی بکنمشلردن  
ایدی که . ذاتی صانکه پدرینك پدری ایمش کبی ظن و مکاره  
ده بولنور ایدی . یاخود ده پدرسنز دنیاہ کلش کبی طوتار  
ایدی . زیرا کندی یوزی پدرینك یوزندن دها کوزل ایمش .  
اشبو « الصقالبه » <sup>(۱)</sup> قسمنده ساحل مجردہ پک چوق  
خانلر موجود اولوب نیجه فاسق و سرسر یلرله طولمشدر .

(۱) ینہ میشل اماری دیور که شهرک بوقسمنه « صقالبه »  
نامی ویرلمسی افریقاندن کلن مهاجرلرک وحتی صوکره  
« قالابریا » و « ساردنیا » و « جنوا » طرفلرندن حرباً  
آلوب کتوردکاری کیمسه لرک بوقسمده اسکان واقامه  
ایلمسندندر . سیچلیا امیری بولنان « سالم بن اسعد . یاخود  
رشید » ک امریاه دونما برقاچ سنه غارت ایلدیکی جهتلردن  
الیدیغی اسرایى بو « صقالبه » قسمنده اقامه ایتدریرر ایمش .  
« L'Esclavon » کله سی دخی بودر .

بونلر جیمینلرینه سجده علامتلی یاهرق ایاق اوزرنده خلقلک  
صدقه سنه انتظار ایدرلر . حالبوکه بوخیشلر کلوب کچن  
ناموسلی مخدراته ییله اطاله لسان ایلرلر . اکثریسی ایسه فسق  
و فجوره واسطه اولدقدن بشقه خلاف طبیعت حالرده دخی  
بولنورلر . بورزیلرک بورالره التجا ایلملی ایسه مجرد یرسز  
ویورتسز سرسری اولدقلر ننددر .

اولجه « الخالصه » نك احوال وقبولینی ذکر ایلمشیدم .  
« القصر » (۱) تسمیه ایدیلن قسم « پالمو » اولوب بوایسه  
قدیم برشهردر . قبولی دخی موجود بولنوب اك مشهوری  
« باب البحر » در . بو قپو دکره یقین بولندیغی ایچون دکر  
قپوسی نامنی المشددر . بوراده یکی وکوزل بر قپو ده بولنوب  
اهالینک طلبنه نبأ « ابو الحسن احمد ابن الحسن ابن ابی

---

(۱) عربلرک « القصر » نامی ویردکلی قسمک اسم  
قدیمی « Palepolis » اولوب بوایسه شمدی شهرک  
مرکزیدر . شهری ایکی یه آیران مشهور جاده نك اسمنه  
پالمو اهالیسی حالا « Il Cassaro » القصر دیرلر . هر نه  
قدر رسماً بوجادهیه « Toledo » نامی ویرلمش ایسه ده  
« توله دو » پالموده حکومت ایدن بر اسپانیا والیسنک نامی اولوب  
مجرد شهرت ذاتیه سی ایچون نامنی « القصر » جاده سنه  
ویردیرمشیدی .



الحسین « طرفندن یا پدرم شد در .  
 بوقیو بر تپه اوزرینه آچلوب اورادن ده نهره و «عین الشعاع»  
 نام (۱) چشمه یه واریلیر که شمیدیلرده بوقیونک اسمی « باب  
 الشعاع » در . خلق صولرینی بورادن آلیرلر .

برده «باب شنتغات» اسمنده قدیم برقیو موجود اولوب  
 بوراده «باب روطه» اسمنده برقیو دها واردر «روطه» (۲)  
 بورادن اقان بر نهرک اسمی اولوب مصبی بوقیونک الت  
 طرفنده در . بو نهرک صولری کافی اولدیغندن بری بری ارقه  
 سنده خیلی دکیمرنلرده موجود در .

«باب الریاض» اسمنده برقیوسی دها واردر . بودخی  
 یکی اولوب بانسیینه «ابو الحسن» در . اشبو قیونک  
 جوارنده «باب قره ب» نامنده برقدیم قیو وار ایدیه ده  
 محلی دیوارله قیالی بولمندیغندن و شهر دخی قدیم بورادن ایرلمش  
 واهالی بو یوزدن متضرر اولمش اولدیغندن «ابو الحسن» ک  
 امریله بولندیغنی یردن ییقدرلمش و برمناسب محله یکیدن بنا

(۱) ظن ایدرسهم «عین الشعاع» غلط اولوب طوغروسی  
 «عین الشفا» در .

(۲) «روطه» دیدیکی نهرک بو کونده اسمی «اوره تو»  
 «Oreto» در .

ایتدرمشیدی . بورایه جوار برقیو دها اولوب اسمی « باب  
الانباء » در . شهرک الک قدیم برقیو سیدر .  
بوندن صوکره « باب السودان » کلیرکه « باب الحدادین »  
ایله قارشو قارشویه در . باب الحدادیندن یهودی محله سنه  
کیچلیر . بوراده اسمسز برقیو دها موجود اولوب بونی دخی  
« ابو الحسن » بنا ایتدرمشدر . اشبو قیودن « ابو حماز »  
محله سنه کیچلیر .

بو قیولرک یکونی طقوز در . « پالرمو » مستطیل برشهر  
اولوب شرقدن غربه ممتد اولان چارشوسی « السماء »  
اسمیله معروفدر . تکمیلی طاشله دوشه لیدر . اولندن اخرینه  
قدردرلو تجارتلرله معموردر . پالرموده پک چوق چشمه لر  
وارددر . جمله سی جهت غربیه سندن نبعان ایدوب شرق  
طرفنه منصب اولورلر . اشبو کوزلرک مجموع صولری ایکی  
دکیرمنی دوندره جک قدردرکه مجراسی بونجه خیلی دکیرمنلر  
موجوددر . بوصولرک مجراسندن تامصبنه قدر کیچدیکی  
یرلرده پک چوق را کد کولار موجود اولوب بوراده ساز  
وچیک قامیش توره مشدر . مع ذلک بوصولرک منبئندن  
منصبنه قدر اولان محلاتک جمله سی هواجه موافق صحتدر .  
مجراده بعض صولاق یرلر موجوددرکه بردی اونی یتشیور .  
بوندن یازی کاغدی یاپلیور . مصرده یتشن بردی اونی

دنيانك اك اعلا برديسى اولديغى حالده « صقليه » برديسى  
تمام مصر برديسنه معادل كليرديرم .

« صقليه » برديسنك اك چوغنى بوكوب كميلره خللاط  
ياپارلر . انجق سلطان ايچون كفايت مقدارى ده كاغد اعمال  
ايدرلر . اهااليدن « باب الرياض » ايله « باب الشفا » طرفلرنده  
ساكن بولنانلرك اكثريسي ايچهجك صولرني بوكوزلردن  
آليرلر . و باقى اهالى ايله « الخالصه » ساكنلرى وديكر قسملر  
سكانى خانه لرنده موجود اولان قيولردن ايچرلر . بو قدر  
اقارطاتلو صولرى بولنديغى حالده خلق ينه آجى ، طاتلى  
كندي قيوصولرني سورلر . « معسكر » « اردوكاه » ده كى  
خلق « عين غربال » ( ۱ ) ناميله معروف بولنان كوزدن  
ايچرلر كه صويي پك لذيذدر .

---

( ۱ ) « عين غربال » ك بوكونكى اسمى « Gabriele »  
و Garbieli « « غابريهلى » ياخود « غابريهلى » در .  
عربك غربالى يعنى قابوريني ايتاليانلر غابريهلى يعنى جبرائيل  
چشمهسى ديه لسانك هوا وانا نيلكك هوسنه كوره چوير  
مشلردر . آمارى ديبوركه اون اوچنجى عصر ميلادیده  
صادر اولان لا تينجه بر امر عالیده بوچشمه نك اسمى  
« Gribel » ديه يازلمشدر .

اردو کاهده دیگر برکوز دها اولوب اسمنه «عین السبع»  
دیرلر که صوی بک چوقدر . بوراده «عین ابی سعد» (۱)  
نامنده بشقه برکوز دها واردر «ابو سعد» بروقتلر پالرمو  
والیسی ایمش واسمینی بوصویه ویرمشد .

غرب جهتنده ساکن بولنان اهای «عین الحدید» نام  
کوزدن ایچرلر .

بوراده برده دمیر معدنی موجوددر . بو معدن سلطانک  
اولوب کیمیرینه لازم اولان دمیری بورادن آلیرلر . اوللری بو  
معدن «بنو اغلب» دن بعضارینه عائد ایدی . بومعدن  
«باهرا» نام قریه جوارندهدر . «باهرا» قریه سی جوارنده  
دخی بر چوق کوزلر ونهرلر موجود اولوب «وادی عباس» ه  
جریانله موجود باغ و باغچه لرینی اسقا ایدلر .

برنلردن بشقه پالرمونک اطرافنده دیگر کوزلر دها واردر .  
«العادوس» نام کوزک صوی ایله اهای منتفع اولیور .

(۱) «عین ابی سعد» یاخود «عین ابی سعدین»  
یعنی ابو سعد چشمه سنک و قتیله اسمی «Ain Saïtim»  
آین سائیتیم ایکن شمیدیلرده «Anuisini» یاخود  
«dannisinni» اننی زینی یاخود داننی زینی تسمیه  
ایدیایور .



شهرک قبله جهتهنده و طاغک اتکنده کچوک و بیوک «فواره» نامیله معروف چشمه‌لر موجوددر . بونلرک صولری پک چوقدر . بوصولر دخی اوراده بولنان باغچه لری اسقا ایلر . «البیضاء» ده دخی پک کوزل بریکار موجوددر . اسمی ده «البیضاء» در بوکوز «عین غربال» دن اوزاق دکلدر . جهت غربنده واقمدر .

«برج البطل» نام محلك خلقی «عین ابی ملك» نام کوزدن ایچرلر . بورانک اکثر باغچه‌لری ساقیه‌لرله اسقا اولنور . بوراده‌ینه برچوق تارلا و باغچه‌لر موجوددرکه سوریه و سائر جهتلرده اولدیفی کی اسقا دن محرومدرلر . شهرک اکثر اقسامنده قیوصولری ایچرلر . حالبوکه قیولرینک صوبی هم اغیرهم انسانی قاندرماز . بو خلقک اک طاتلی و تمیز اقا رسولری ترکه بویله اغیر و طاتسز قیو صولری ایچملری ایسه ذوقسز لکلرندن و پک چوق صوغان ییمه‌لرندن و خصوصاً صوغانی چیک چیک ییمکی سوملرندر . قوه احساسیه لری بوزلمشدر . هر هانکی طبقه‌دن اولورسه اولسون بونلرندن هرکون خانه‌لرنده صباح اقشام صوغان ییمین برکیمسه بولنماز . بو حاللری بونلرک فکرلرینی افساد وینلرینی خراب ایلش ، قوه حاسه لرینی بوزمش ، عقللرینی چیغیرندن چیقارمش ، ادراکلرینی اکسلیتمش و بوزلرینک رنگنی صارارتمش اولدینلر .

موازنه لرینی غیب ایدرک تکمیل اشیایی ویاخود اکثریسی  
حقیقتی کی کوره مز اولملر در .

بوراده چو چوق او قودور اوچ یوزدن زیاده مکتب  
خواجه سی واردر . بومعلملر کندیلرینی خلقک اک فضیلتلیسی  
و محترمی کور یورلر . کویا بونلر اولیاء الله اولدقلرندن ذاتلرینی  
طرف الهیدن ناس اوزرینه مؤکل ظن ایدیورلر . پالرموده  
کی مکتب معلملرینک شهرتی بویله در . بوایسه بین یوزوقلغی  
وعقل یوقسوللغندندر . بونلرک بو وجهله معلم اولملری ایسه  
جهاددن فرار و حربدن نکول ایتمکدن بشقه برشیدن  
دکلدر . بونلر حتمده مخصوص برکتاب دخنی یازدم .

ابن حوقاک پالرمو حتمده یازدینغی پارچه ایشته  
بوراده ختام بولدی . کتابی حافظ کتبه اعاده ایله بروجه بالا  
یازدینغم ترکیه ترجمه یی دوروب جیممه قومهدقیجه وقتک بعد  
الظهر ساعت ایکی کی کچمش اولدینغی درخاطر ایده  
مامشیدم .

کتبخانه دن سوقاغه فیرلادم . « وییاما قوئیدا » جاده  
سندمه تمیزجه اولدینغی کورینن براشجی دکانته کیردم .  
طوماتس صویله یاپلمش بول مقارنه سندن باشلايه رق میوه  
سنه قدر نه کتوردیسه ییدم . خدمتجی بخشیشی ایله برابر  
الدینغی اقچه یی نابولی اشجیلرینک الدقلری پاره یه نسبت


ايدرسەك بوراسنى ك اوجوز بولورز .  
بعد الظهر ساعت اوچده اوتله عودتمده اوكله طعامى  
زمانى اوتلده موجود اولمديغم ايچون اميره حضرتلرينىك  
يك چوق مراق ايلمىش اولديغنى خبرالدم . عجبانه اولدى ؟  
شويلاه مى اولدى ؟ يوقسه بويلاه مى ؟ ديهده دنياده انسانك باشنه  
كله بيله جك هر درلو قضاالى هب صايمىش دوكمىش ايمىش .  
طوغروسى بنى مراقده براقدك ديمه لرينه قارشو بيان تاسف  
واستغفاى قصورله خاطرلر ينى آلم .



### ۳۰. کانون اول سنه ۹۲۰

بوصباح ارکنجه سوقاغه چيغه رق شـهره کلدـم . آرایـه  
صـوره بالیق بازارینی بولدم . مدد الله ! بزم مصرک قادیـن  
همملری کـی کوریلـتیلی بریردر . نه ده کیرلی بر بازار یا !  
غالبا سنه باشنک تقریبی مناسبتیه اهالی اوموز اوموزه  
طولمشیدی . صاتیجیلر اجی اجی باغیرپور ودرلو بالقلرینی  
هـب مدح ایدیورلردی . کرک بالیقلرینک انواعی کرک فیئاتی  
کورهم اوکر نهیم دیه غلبه لیکه قاریشدم و بعض یرده دیوار کـی  
نظرمه حائل اولان خلـقک اوموز لرندن باقق ایچون ده  
پارماقلریمک اوزرینه قالمهرق باشمی اوزاتم . غلبه لک ، کورولاق  
وفنا قوقو دن طورلور ، اکلتایر بریر اولمديغندن پک آز زمان





سماة، قصر النكاح، صد محمدين، آلمش، شهر ك وحمل زيارتك كور نشيد.



صوكره كىكىش وتىز سوقاقلردن اولان « وىياروما » يە  
التجا ايلدم .

سنه باشى مناسبتىلە شىكر جىلرلە طاتلىجىلر كارتق كوفى  
طوغمىشىدى . درلوشىكرلە وطاتلىلرىنى جاملار ارقة سنه  
ترتيب ايدەرك انظار عمومە عرض ايلەشلىرى . ھە درلو  
مىوہ لرى تقليداً اعمال ايدىلن شىكرلەر وطاتلىلر ھب جالب  
اشتھا برحالە كورنىوردى . چارشو وسوقاقلرى طولدرمش  
اولان اھالى ، عائلە واقرباسى ايچون سنه باشى ھدىہ لرى  
الھجىزىدە ھب جىللىرىنى بوشالدىورلىرى . كىمسە الى بوش  
كزىمىوردى . بوجادە يە يقىن برسبزە بازارىنە كىردى .  
طوماتىنى داللىلە كسوب آصەرق يارى قورومش برحالە  
صاتىورلى ايدى . برنوع قىش قاونلىرىنى آصەرق حفظ  
ايلەشلىرى . بزم مصردە « قوافە » دىلنن بوروشوق ارمودە  
شېئىہ برنوع قباقلرى دە واردى . صوغان ، صارىمساق وقىرمىزى  
آجى بوزلىرى پك چوقدر . ابن حوقلك دىدىكى كې اھالى  
غالبا ھر كون بونلردن اكل ايدىرلى . موسمى مناسبتىلە  
پورتقال وماندارىنا پك مېزولدىر . سىچمە ماندارىنانك بركىلو  
سنى سىكسان ساتتىمە آلدىم .

قصاب دكانلىرىنى دە كىزدىم . كىچى ياوروللىرى غايت  
كچوك اولەرق ذبح ايلەشلىرى . يىلەين بونلىرى طاوشان

ظن ایلر . غریبی ! بویاورولرک وکچیلرک دریلرینی هب طولوم  
 چیقاریورلر . کچیی دریلرینی طولوم چیقارمقده بزم مصریلیری  
 فرسخ فرسخ کچمشلردر . کویلور طولومی ایچنه صوواشیا  
 وضعی ایچون قوللانیرلر مش . برده بزم عربلرک مزمارینه  
 برقوزی طولومی ربط ایدهرک چیقته روزناسنی اوتدرمک  
 ایچون آوورتلرینی شیشیرمک زحمتندن قورتولشلردر . بویله  
 طولوملی مزمارک اسمنه « Zampogna » زامپونیا  
 دییورلر . کویلرده بومزمارله هم تغنی هم رقص ایدرلر . شهرلرده  
 ده سیارمغنیلر بویله مزمارلریله اجرای اهنک ایلدور . بنجه  
 طاول سسی کی اوزاقدن بلکه قولاغه خوش کلیر . یقیندن  
 ایسه بومزمار دیکلنیرشی دکلدور . بوصره ده کوزیه  
 برعجائب دکان ایلیدشدی .

مصرده عمله وفقرا کروهنه مخصوص « مسمط » دیرلر  
 برنوع آشیخانه لرواردرکه : چماشیر قازانی قدر بیوک برقازان  
 مخصوص بنا ایله اوجاغنه تثبیت ایدیلیر وایچنه قیون واکوز  
 وماندا ووده کی ساخانه ده کسیلر مواسنینک باش وایاق  
 وجیکر واشکبه لری قونور واغزینه قدرده صوطولدریله رق  
 اتشنه قوت قاینادیله قاینادیله برنوع ایلیک چورباسی یاپلیر  
 ومشتیریلری اوجوزلغی ایله ممنون ایدیلیر .

ایشته بوکوردیکم دکان ده بویله برنوع مسمط ایدی .



قازانی وار. آروجه کچوک برفرونی وار. مائی اوکچکلی براوسته  
دستگاهنه ییغمش اولدینمی چورکلردن بریسنی آلیور وکچوک  
بریچاقله چورکی یاریور وماشه ایله قازاندن چیکر و سائر هی  
چیقاریور و براز قییه رق بوچورکی طولدریور و بر مقدارده یاغلی  
صودن دوکیور و مشتریله نه تقدیم ایلیور . بو حاله طالغین  
طالغین باقدینمی کورن اوسته باشی، سیننیورم ! بیور = کز .  
دیه بنی ده دعوت ایلدی . بر تشکرله صاویشدم .

بزم مصرده « ترمس » دیدکاری آجی بقله یی صالاموره  
یاپه رق طاتلی اندردقدن صوکره ال ارا به لریله سوقاقلرده  
صاتارلر . بوراده ده تمامی تمامنه بویله یاپه رق صاتیورلر .  
اسمنه ده « Lupino » لوپینو دیورلر . عطار دکانلری  
بزم مصرده کی عطارلر کی بهارات صاتیورلر . بلاد حاره  
خلقی کی طوزلی ، بو برلی بهارلی واکشیلی طعاملری سوپورلر .  
مصرک فول نابت دیدکاری ایصلا تله رق چیملندرلدکدن  
صوکره ساده صوده حاشا دیلوب ییمنان قورو بقله یی بوراده  
دخی همان بویله یاپوب ییورلر . مسموعمه کوره عوام ناس  
دوگونلرنده بو قورو بقله حاشا لاشنی دعوتیلره چرز مقامنده  
تقدیم ایلمک سیچیلانک بر عادت ثابته سی ایمش .

پالرموده بوکونه قدر کوردیکم وایشتدیکم حال و عادت  
اهالی هب اثبات ایدیور که بونلر عرب اوغلی عرب ایدیلر .

دیل و دینلرینی دکیشدرمشیر . لایتین و قییک اولمشیر . قیلیق  
 و قیافتلرینی دکیشدرمشیر . قادیملر فیست و ارککار پاتالون  
 کیمیشلردر . اخلاق و عادات قومیهلری ایله اولدییی طور یور .  
 بالار موده چیچکجیلک مترقی دکلدر . الک مشهور جاده  
 لریده ایله نیک آرز چیچک صاتانلره تضاد ایدیلیر . اوده غیر  
 مرتب شیلردر . بر مقدار منکشه آلهیم یه درت یول اغزی  
 جاده لرینی الت اوست ایلدیکم حالده بران کچوک دمتدن  
 بشقه بوله مادم . سببی سئوال ایدم . بالویه چیچک نابولیدن  
 کلیر دندیلر .

وقت ظهرده اوتله عودت ایدم و کیل کونئی مطالعه  
 کتب ایله کچیردم .





سیاده کوئی قیزی



دیل و دینلرینی دکیشدرمشدر . لاتین و قتولیک اولمشدر . قیلیق  
و قیافتلرینی دکیشدرمشدر . قادیملر فیستان وارککار پاتمالون  
کیمشدر در . اخلاق و عادات قومیهلری ایسه اولدینی طور یور .  
پارموده چیچکچیلک مترقی دکدر . اک مشهور جاده  
لرنده بیلک پک آز چیچک صاتانلره تصادف ایدیلیر . اوده غیر  
مرتب شیلردر . بر مقدار منکشه آلهیم دیرت یول اغزی  
جاده لرینی الت اوست ایلدیکم حالده براییکی کچوک دمتدن  
بشقه بوله مادم . سبینی سئوال ایلدم . پارمویه چیچک نابولیدن  
کلیر دندیلر .

وقت ظهرده اوتله عودت ایتدم و تکمیل کونئی مطالعه  
کتب ایله کچیردم .







سیچلیاده کویری قیزی



### ۳۱ کانون اول سنه ۹۲۰


ينه بوضاح بر معتمد سوقاغه چيقدم . كوره جك برايشم  
اولديغندن شوراده بوراده كزهرك برمدت تازه هوا تنفس  
ايلدكدن صوكره اوتله عودت ايلدم .

يكي سنه نك عرفه سنده بولندقلرندن پالمو خلقى راحت  
ايديور وسوقاقلرده پك آز انسان كوريلىور ايدى .  
« ويللايجى آ » اوتلندن شهره كيدركن ليان دائره سندن  
براز اولجه صولده بولنان گوشه باشنده كى جسيم برديوارك  
اوزرينه بر كمرلى پنجره شكلى ياپلمش وايچنه ده بر مريم  
انارسمى قونمشدركه قوجاغندهده اوغلى حضرت مسيح  
رسمى موجوددر . بعض دفعه اقشاملرى بورادن كيچركن  
اشبو عزيز رسمك اوكنه برچوق موملر ايقاد ايدلمش اولديغنى

کوریور ایدم. بوسباح ده کوردم که : بورسماک اطرافنی دمت  
دمت چیچکارله تزیین ایلمشلردی .

امیره حضر تلی ، بعد الظهر ساعت درتده « ماسسیمو  
ویتوریو امانوئل » تیاترو سنده پالرمو اعمالری منفعتنه اجرا  
ایدیله جک روس رقصنی سیر ایلمک ایچون کینده جکزی  
خبر ویردی . اوکله طعامندن صوکره او طه دن طیشارویه  
چیقمدم . زوالی ساعت اوچ بچوقده کینه رک حاضر اولدم .  
ساعت درتده امیره مزله تیاترویه واردق . بوتیاترو  
« وییاما قوئیدا » جاده سنک تقریباً منتها سنده و « جوز پی  
وردی » میداننده در . حقیقه پالرمو شهری ایچون پک مهم  
بر اثر در . اوروپاده بولنارن بیوک تیاتر و لردن بریسی ده بو  
« ماسسیمو » تیاترو سیدردیرم . زیر ابناسی ۷۷۳۰ مترو مسطح  
بر عرصه اوزرینه اقامه ایدلمشدر . معمارینک اسمی ده « فیلیپو  
بازیلی » ایمش . ۱۸۷۵ سنه سی کانون ثانیئک اون ایکنجی  
کونی رسماً بناسنه باشلامش و ۱۸۹۷ سنه سی معمار اولک  
اوغلی « ارنستو بازیلی » واسطه سیله ختامه اردرلمشدر .  
تقریباً التون اقچه یدی میلیون فرانق مصرف  
اولمشدر که ایکی یوز سکسان بیك انکلیز لیراسی ایدر . بنا  
« ایٹالیا ن قورینتین » طرز معماریسیدر . رسمندن دخی  
ظاهر اولدیغی کبی تیاترویه کیرمک ایچون اولا اوتوز قدم





پارموده « ماسیمو » نام تیآرو



وواسع بر مردیوندن چیقلیور . مردیونك ایکی طرفنده  
بروزدن دوکمه ایکی عدد ارسلان هییکلی موجود اولوب  
صیرتهده ایکی قیزهییکلی ارکاب ایلمشدر .

بوقیز لردن بریسی فالجه دیگری اشعار حماسیه یی تمثیل  
ایدیورلر . تیآرو داخلا هم عظمتلی هم زینتلیدر . ایکنجی  
قاندہ صحنه یه قارشو کان برلوجهده اخذ موقع ایلدك .  
لوجه لری بش قاتدر . طوغرو صایه بیلدیسهم یکونی یوزاللی  
لوجه یه بالغدر . صحنه سندن باقلنججه درونی برآت نعلی شکلنی  
آلدیغی کوریلیر . موقع صندالیه لرینك اولدیغی یردرت یوزاللی  
مترو مسطحنده ایمش . بوتیآرو ده اوچ ییمك ایکی یوز  
سیرجی راحت راحت تماشا بیلیر ایمش . لوجه لرینك داخلا  
مفروشاتی آغیر وبهالی شیلر اولدیغی کبی خارجاً زینتی دخی  
ایتالیان اصولیدر . هر طرف تمیز وخوش کورینیور . صحنه یی  
آچوب قپایان بیوک پرده سنده « صقلیه » یی عربلرك النذن  
آلان « نورمان روجارو » یه بیوک کلیساده سیمچلیا تاجی الباس  
ایتدرلدیکی مرسومدر .

لوجه لرك اکثرینی یواش یواش پالرمو کبارلریله  
طولدی . موقعلرینی دخی یازیدن زیاده سیرجیلر اشغال  
ایلدیلر . ارتق هرکسك النده بردوربین اطرافنی سوزیور

ایدی . هرکس ذوقنه ، صفا سنه کوره برشی آرایور  
دی دیه لم !

آه کوکل ! واه کوکل ! نه ده قوجه ماز بریوصمه  
ایمشسک ؟ دورینله بن بيله لوجه لری معاینه ایتمهک باشلادم .  
آچیق ، صاحب کسوه لرك انواعی کوردم . بو کسوه لرك  
ایچنده کی جنس لطیفک چالیرینه ، صالیرینه حیران اولدم .  
دیلمزده دیرزکه «دوزن یوروش اوکر دیر» . لوجه ساکنلرینه  
ده سوس و دوزن ، چالیم و صالیم اوکرتمشدر . سیچلیا خانم  
قیزلرینک سورمه لی سیاه کوزلرینی کورملی . خوش و جاذبه  
لیدرلر . دورینمله تیاترونک زمیننی ، آسمانی هب نظر  
ترصدمدن کچیردم . حیرت ! دیرلرکه عالم برتیاترودر .  
بنجه سی تیاترو برعالمدر . بوراده کی لوجه لر و موقعلر هب  
بشقه بشقه درجه لره ، قیمتلره آیرلمشدر . بوراده انسان  
کوکل واریوق قدرینه و قدرتمه کوره موقعی آلیور .

ساعت بشه طوغرو موزیقه باشلادی . مجموعی التمش  
کیشیلک برهیئت موسیقیه ایمش . پک مؤثر پارچهلر چالیوردی .  
چوقدنبرو بویله شوق آور بر موسیقی دیکلمه مشیدم . حقیقه دیه  
بیلیرم که اویقوسنه طالمش روحی ایقراض ایدی . فضای خیالده  
جانی معنالر اوچوشمغه باشلادیلر . عکس صداسی ده شوایدی .  
ای موسیقی ! سن نصل بر سحرسک ؟ حرفسز ، کلمه



سنز چیقان سسلر کده نه قدر معنالر کیزلنمشدر ؟

ای آهنگ ! سن نصل برروز کارسک ؟ شدت جریانک  
انسان فدانلرینی تحریک اینله معانقه ایتدریور . آتشی تأثیرک  
جوان قایلری غلیانله تقبیه سوق ایدیور .

ای آلات طرب ! شکل وحرکاتیکزک اختلافیه برابر  
نصل بویله منتظم آهنگ نشر ایده بیلورسکز ؟ عجبا مقصدکز  
نظام جماعتک اتحاد شکل وقیافته دکل ، قانونه اطاعتله اوله  
جغنه می ایمادر .

ای مقام ! سنک صداک ، درجه لرینی بک منتظم  
چیقدیغی حالده نه دن مستعملریکک نظامی بوزیورسک ؟  
یوقسه نسیم غرضک زلف حیاتی برکون پریشان ایده  
جکنه می ایمادر ؟

ای صدا ! سکبز دوزن ویریورز . سن ایسه بز  
بوزیور ، باشدن چیقاریورسک . ایملکه قارشى فنالق  
جائز میدر ؟

ای روحم ! اشتها لرله انتظار ایلدیكک غذاکی ایشته  
شمدی بولدک . ارتق جان قولاغملکه طویه طویه تغذی ایت .  
ایت که زمانک تأثیریه زبون قالان ذاتکه قوت کلسون .

ینه نه اولدک ؟ نه به طالدک دیه امیره حضرتلری اخطار  
ایلمسه ایدی کیم بیلیر دهانه قدر تماشای خیالده قاله جقدم ؟

پردہ آچیلدی . غایت شوق آور کیمیلی برنازنین خانم قیز  
ظہور ایلدی . بر قوجاق سیاه صاحبزینی اوزرینہ ییغین ایتمش  
اولدیغی باشیلہ تماشاچیلرینی سلاملاقدن صوکرہ موسیقینک  
آہنکنہ توفیق ایلدیکی طاتلی تیتہرہ ک سسیلہ تغنی ایلہک  
باشلادی . ہرکس کوز قولاق اولمش . اورتالقدہ چیٹ یوق .  
تغنی ایلہ آہنک ارقداشجہ براولمش کبی سوزولور و مغنیہ  
خانم قیزک کوزل پارماق اوچلری دہ معنای شہرک ایجابنہ  
کورہ اعضای بدنندن کوز ، اغیز و یکاق ، یورک کبی معانی  
اشعاری احتوا ایلین عضولہ اشارت ایلور ایدی .

قیز جغز ، منظومہ سی ختام بولنجہ صوصدی . موزیقہ دہ  
طوردی . آقیشلر ، الشاقیردیلری بیس صدالریلہ امتزاج  
ایلدی . مغنیہ خانم قیز باش وال اشارت لریلہ تشکرلر و دود  
اقلرینی کرہرک تبسملر ایلدی و ادای مخصوصلریلہ چکلدی  
کیتدی . دیکری ، بردیکری و دہا بردیکری دیہ اداسی ،  
صداسی خوش کوزلر دن اوچ خانم قیز عینی اقبال  
واستقباللرلہ تغنیلر ایلدیلر . ایلک فصل ختام بولدی . پردہ  
دخی قیاندی .

بن دہ نظر خیالمی ماضی یہ ، ییک ییل کرویہ طوغرو  
ارجاع ایدرک او متمدن عربلرک ، اومسلمان برادرلرمزک  
مغنیہ لرینی و حرکات منتظمہ لرلہ اجرا ایلدکلری تغنیلرینی

سیر ایلدم . هب شمدیکیلرله بربولدم . مکر بونده دخی خلف  
سلفی تقلید ایتمشدر دینیرسه فضیلت ینه سلفه برحق اوله رق  
قالیر دگلی ؟ دیدم . شوسطرلری یازدیغم تاریخدن سکزیوز  
اون برسنه مقدمی ارتحال داربقا ایدن « صقلیه » نک شاعر  
مشهوری اختیار « حمدیس » ی مکر قارئلریمه تقدیم ایلرم .  
کنندیسی سکسانندن زیاده معمر اولمش غایت حساس سیچایمالی  
برشاعر در . سراقوزه ده طوغمشدر . وطنی قرون وسطی  
متعصبیری استیلا ایلدکاری وقت اندلسه هجرت ایتمش وغالباً  
« غرناطه » ده سکسان و کسور یاشنی متجاوز اولدیغی حالد  
ترك دغدغه عالم فنا ایلمشدر .

اسمی « ابو محمد عبد الجبار بن حمدیس الصقلی السرقوسی »  
در . دیوان اشعار ی قوجمان برجلده « روما » ده طبع  
ایدلمشدر . کورد و اوقودم .

اندلس ادباسندن بر ذات صقلیه مغنیه لرینی تعریف  
و توصیف ایللمسی ایچون حمدیسه رجا ایدر . زیرا صقلیه  
مغنیه وراقصه لری اثنای رقص و تغنیلرنده صره سی کلدجه  
الریله و پارماق اوچلریله آتش عشقک یاقه جغی ، قاویردجغی  
عضولرینه اشارت لر ایدر لر و مثلاً تغنیسنده کوز یاشلرینی ذکر  
ایلدیکی وقت پارماق لریله کوزلرینی کوستیر لر و عشق و غرامی  
توصیف ایلینجه یورکارینه اشارت ایدر لر ایمش . حالبوکه

بونلر ، معشوقه لرك ناز وعاشق لرك نياز لرينى تقليد ايله كوزلر  
آچيجى خوش اشارت لرايله احساسلر اويانديريجى طاتلى  
حركتلرى ، كندى حالرينى حكايه دكل تماشا جيلرينى ممنون  
ايتمك ايچون ياپارلر ايمش .

محترم قارئلرم سزه حمد يسك بوبابده برشعرينى اوقويه يم  
ده اوزمانكى راقصه ومغنيه لرك حال وحركتلرينى بوكونكى  
ايتاليا نلرك « بالالارينا وقانتا تريچا » لرينك رقص وتغني لريله  
مقايسه بيوريكز .

### حمد يس دييور كه

وراقصة بالسحر فى حرركاتها  
تقيم به وزن الغناء على حد  
منغمة الفاظها . بترنم  
كسا معبداً من عزه ذلة العبد  
تدوس قلوب السامعين برخمة  
بها لقطت ما للحنون من العد  
بقدموت الغصن من حرركاته  
سكوناً وابن الغصن من نزهة القد  
وتحسبها عما تشير بأتمل  
الى ما يلاقى كل عضو من الوجد



بنالایها ماتشتکی من جوی الهوی  
وادمع اشواق مخددة الخد

## ترجہ سی

راقصہ ، رقصندہ کی سحر آلود حرکاتیلہ تغنیسندہ کی  
وزنی تحدید ایلر . یعنی ایاغنی چاغیردیغی شرقینک مقامنہ  
اویدرہرق اوینار .

نغمہ دار اولان الفاظندہ کی ترغیلہ پک قیمتلی « معبد »  
ذلت عبودیت خفتانی کیدریر .

یعنی سوزلرینک تیرہک ویاطالغہلی آھنکیلہ « عباسیلر  
دورینک پک مشہور برخوانندہ سی بولمان « معبد نام ذات  
معززی برعادی کولہ درجہ سندہ ذلیل ایلر .

صایدسز نیجہ مقاملری جمع ایامش اولان اوطاتلی  
یموشاق صداسیلہ مستمعلرینک قلبلرینہ باصیور ، یورکلرینی  
ازیور .

قامتنک حرکاتی تازہ نہالاری قوروتور وحرکاتدن ایدر .  
نرہدہ اوشوخ قامت بشر ؟ نرہدہ برعادی شاخ شجر ؟  
ظن ایلرسک کہ ہرعضوک دوچار اولدیغی غرامہ  
بارماقلریلہ اشارتیر ایلور .

حالبو کہ یکاقلرینک اوزرنندہ صرہ لانان سرشک اشتیاق

ایله الم عشق دن شکوار ایلمسی کنندیسی ایچون دکل هب  
بز لر ایچوندر .»

بروجه بالا حمیدسک طقوز عصر مقدمی وصف ایلدیکی  
شکل و حرکات تغنی بؤکونکی ایتالیا نلرک اثنای تغنیده اجرا  
ایلدکاری حرکات و اشاراتک عینیدر .

اون بش دقیقه برآر القدن صوکره ایکنجی پرده آچلدی .  
اورتالغی درین بر سکونت بورودی . هرکس کوز قولاق  
اوله رق نظرارینی حنیه توجیه واساله ایلدیلر . صحنه ده اون  
آلتی رقاصه طورمشیدی . روس رقصی اجرا ایده  
جکلردی . هیئت موسیقیه رئیس لرینک اداره سیله آهنکه  
باشلادی . باش رقاصه ده برابر اولدیغی حالده رقاصه لر رقص  
ایلدیلر . علامت استحسان اولق اوزره هر طرفدن رقاصه لره  
اوقدر چیچکلر آتدیلر که صحنه یی بهارده آچامش چیچک  
باغچه سنه دوندردیلر . رقاصه لر ایسه بو باغچه نك کله بکاری  
اولمش کبی هواده اوچشیورلردی .

باش پارماق لرینک اوزرینه قالقه رق آقیورکبی رقص ایدن  
باش رقاصه یی ک چوق آلقیشلادیلر .

بزم جناب حمیدسک صقلیه رقصی تعریف بانبده سویلمش  
اولدیغی برقطعه سنی خاطر لادم . دیمک که اوزمانکی رقصیه  
شمیدی رقصک اراسنده پک چوق فرق پیدا اولمشدر .

خصوصاً رقاصه لرك كسوه لری اراسنده اصلاً مناسبت  
قالماشدر . شوتاشا ایلدیکمز رقاصه لرك كسوه نامیله برشی  
کیمشلمی ؟ کیمشلمی ؟ اولاً بوراسی موضوع بحث اوله  
بیلیر . غایت اینجه وتن رنکنده بر فانیلا کیهرك بونیکله کویا  
عیلیرینی اوتمشلر و قتمرلی بیاض خطمی چیچکی کبی بر فستانی  
ده اینجه بلندن اشاغی طاقمشلدر . بوندن اوتیه سی ده  
صاغلقدر .

### حمديسك قطعه سی شودر

ومن راقصات ساجات ذیوها  
شواذ بمسك فی العبیر تضمخ  
کما جررت اذیالها فی هدیلهها  
حمام ايك او طواویس تبخ  
ترجیه سی

کوکر جینلر ویطاوسلر ، باغچه لرده حرکات مخصوصه  
لریله یورودکلری زمان قویروقلرینی یرده سورودکلری کبی  
وجود لرینی کوزل قوقولرله تعطیر ایلمش اولان راقصه لرده  
رقص ایلدکلری وقت اطرافه مسك قوقولری نشر ایدرك  
اوزون انکلرینی ارقه لرنده جر لیلرلر .

اسکی زمانده رقاصه کسهلری اوزون اتکلی اولور  
ورقصلرینه اتمک سورومه سنی اویدر لر ایش . کوزل  
قو قولله تعطیر جسم ایلک عادی ایه حالا باقیدر .  
تماشایی صو کینه قدر کورمیه رک چیققدق وطوغروجه  
اوتلمزه عودت ایلک .

هر طرف ییل باشی بایرامی دینه شلنمش ایدی . بواقشام  
بتون غرب خرسه یانلری کیجه یاریسنه قدر اویانق قالیر  
وساعتلری اون ایکی ارائه ایدر ایتمز بوسهلرله سنه جدیده  
لریغی تبریک ایدر لر .  
بزه نه ! ...





## ۱ کانون ثانی سنه ۱۹۲۱

بوصباح ارکنجه اوتلک باغچه سنه ایندم . هوا پک خوش وکونشلیدر . باغچه نک شرق منتهاسی کوزل بر ریختیمله دکز اوزرینه اولوب پک مکمل چیقمه لر یله ده اون مترو قدر بریرندن دکره کیرمشدر . بو چیقمه ده مکمل وظریف طاشدن معمول سدیلهر بولندیغی کی شوراسنه بوراسنه ده حصیروسائر صندالیلهر وضع ایدلمشدر . بوسندالیه لردن بریسنه قورلدم . دکزک خفیف طالغه لری ریختیمی اوخشا یور ایدی . بر ساعت قدر بوراده هم ککونشاندم هم کتاب مطالعه ایلدم .

وقت ظهر دن بر ساعت مقدماتی امیره مز ایله ارابه سوار شهره کلدک . طوغروجه نباتات باغچه سنه کیتدک .

باغچه «لینقولان» جاده سنده در . صباحك ساعت طقوزندن  
 بعد الظهر درده قدر محترم زیارتچیلرینه آچیقدر . باغچه نك  
 وسعتی الیزده کی دلیك تحریرینه کوره سکز هکتاردر . (برهکتار  
 عرض و طولی یوز مترو اراضیدن عبارتدر ) اولاً عمومی  
 قیودن کیریلانجه برطاقم بنالردن کچلیور و صوکره غایت  
 طوغرو بریولدن کیدیلهرک ایکی طرفی اشجار و نباتات  
 مجموعه لری تماشا ایدیلیور . امیره حضر تلی ده ذاتا اشجار  
 و نباتاته مراقلی اولدینندن تمام بر ساعت بوکوزل باغچه نك  
 کوزل و نادر مجموعه لرینی زیارت ایلدک . الك صغوق اقلیمك  
 اشجار و نباتی وهله امریقانك درلو نباتاتی بو باغچه ده موجود  
 اولدیغی کی افریقاقو سائر صیجاق مملکتلرک اشجارندن «صباره»  
 فامیلیا سنه منسوب اولوب علم نباتاتده قاقئوس تسمیه اولنان  
 نباتك بیوك بر مجموعه سنی بوراده کوردک .

صولرده یشایان نباتاتدن نیجه لری صنعی حوصلرده  
 بسلنمور ایدی . باغچه نك ترتیب و تنظیمنه و خصوصاً مجموعه  
 نباتاتك چوقلغنه هیج بر دییه جك یوقدر . مجموعه لرك  
 انواعی ارائه ایچون یزه بر باغچوان دلالت ایدیوردی .  
 باغچه یی ترك ایده جکمز ائناده بو ذاته وامیره حضر تلی نه دمت  
 دمت درلو چیچک لک تقدیم ایدن باغچوانلرك چوققلرینه بنخشیشلر  
 ویردک . باغچه ایچون بر جهت موأخذه خاطریمه کلدی .

اوده باغچه نك تمامى اتصاليده شهرك غاز فابريقهسى بولنمىدر . باغچه نك صوكننده بولنان صباره مجموعه لرى زيارتمز ائناسنده كوردك كه اوكونم نباتاتك اوزرينه معدن كورى تولى قشرلر ياشيدى . هوا غازى قوقوسندن ايسه بزراحتسىز اولدق . باجهلرينك دومانندن دخى اشجار اينجينيردىم . نباتات باغچهسى غاز فابريقه سندن پك چوق مقدمى موجود اولديغندن بلديه نك وياتنظيم دائيرهسنىك شهره هوا غازى استحصالى ايچون بورايه فابريقه انشا سنه اذن ويرمىسنىك سببى اكلايه مدم .

نباتات باغچه سنه شمال جهتمدن متصل بولنان بلديه باغچه سنه كوردك . بيوكلكى نباتات باغچهسى قدردر . لكن يوللرى و تزييناتى او قدر خوشدر كه : انسان ساعتمرجه ايچنده بولنسه ينه اوصانماز و طيشارى به چيقمق خاطرينه بيله گلز . پك ظريف نصف هيكلر كوزل و تميز يوللرينك ايكي طرفلرينى تزيين ايلمشلردى . پك صنعتلى يالмыш اولان سديهلر ميدانچقلىرى قوشاتمشلر ايدى . يوزلرله كبار چوجقلىرى مرييه ليله گلشلى و باغچه نك يوللرينى طولدرمشلردى . ياريم ساعت قدر بو باغچه ده دخى اشاغى يوقارى كزه رك تنظيم و ترتيبى كوردك . پك خوش برشيئدر . باغچوانلردن بشمه كسوه مخصوصه لرله تميز ايدن باغچه محافظلى دخى

پك ساكن و تربيه لى آدم لردر. تكرار ارايه مزه بينه رك اوتله  
 عودت ايلدك . باغچه دن اوتله عودتمز ساحل بوي ايدى .  
 اثنای طريقده قديم ساحل قاعه لر دن متباقى برخرابه يى  
 كوردك . اثار عربيه دن اولديغى طرز و شكل بنا سندن  
 مفهوم ايدى . كچديكمز جاده نك اسمى ده « Via Cala »  
 قلعه جاده سى ديه يازلمش اولديغى كوردم . ينه باشم دن اشاغى  
 صيحاك برصودوكلش كې اولدم . بركتله عظيمه ايكن استبداد  
 وجهالت طوقاقلرى التنده قيريلوب تارمار اولان بلاد واسعه  
 اسلاميه دن ديلمز ، دينمز و نسلمز غيب ايدلمش اولديغى  
 كورن كوزلر عجبا اغلامازمى ؟ درت يوزييك نفوسدن اوچ  
 يوزيكي مسلمان بولنوب تكميل اهالينك ديلارى عرب اولان  
 پالرمو ده بوكون بز دن بشقه عجبا برمسلمان دهامو وجودميدر ؟  
 ايكي بجوق عصر قدر بر زمان ايچنده پالرموده حك و حكومت ،  
 اسلام النده بولنه رق مائر علوم و فنون دن اولان معموريت  
 اوزمانك « قرطبه » و « قاهره » شهرلرينه معادل كلشيدى .  
 قوه بريه و بحريه سى تكميل ايتاليماي تيرتمش و افريقاده  
 و شرقده بولنان بلاد اسلامى دشمن شرن دن محافظه ايلمش  
 و تجارت بحريه سى ايسه زمانده برنجى درجه يى احراز  
 ايتمشيدى . پالرمو ، مسينه ، قاتانيا و سراقوزه و مازر كې  
 شهرلرنده يتيشمش اولان علما و سائر منتسبين فنونك همت



و غیر تریله او وقت « قلوریه » تسمیه ایلدکلی « قالابریا » دن اعتباراً رومایه ودها یوقاریلرینه قدر مدینت عربیه کمال سرعتله انتشار ایللمکده ایدی . مرا کنز اسلام اسباب معلومه سندن طولانی ضعیفلامش اولدیغندن « صقلیه » جزیره سی ده اداره مرکزیه سنی غیب ایدرک جهت جهت امیرلکاره آیرلمش و زمانله سبیلی ، سبیسز بری برلرینه دوشمش وچالا بالطه اللریله کندی کوکلرینی کسمشله و فرصت بکلین دشمنلری ده کله رک بقیه امت محمدی یوق ایلدکدن ماعدا تکمیل مبانی واثار اسلامییه یی برله یکسان ایتمشلردر .

او تله عودتده حدتمی کتابلر مدن آلدیم .

قارشومده سیچلیانک بیوک برخریطه سی و او کمده ایسه شریف ادریسینک « زهه المشتاق فی اختراق الافاق » نام کتابی آحیق طور یور . بو کتابک « لایپزینخ » باصمه سی نسخه سنک یکر می او چنجی صحیفه سنده محرردر که « پالمو » دن اعتباراً ساحل بونی دور ایدیلیرسه اوتوز بش عدد شهر و لیمان اولدیغی کوریلیر . تکمیل « صقلیه » جزیره سنده بولنان شهر ، قلعه قصبه لرک یکونی ده یوز اوتوز عدددر .

حکومت اسلامییه زماننده شهر ، قصبه ، قلعه و قریه لره ویریلن اسملرله بوکونده ویریلن اسملر آراسینده کلی فرق لر ظاهر اولمشدر . قدیم اسملری عربلر کندی لهجه لرینه

ویدر مش اولدقلری کبی اصل عربلرک ویردکلری اسامی اماکن ده بوکونده ایتالیا نلاندریله رق غریب حاللر آلمشدر . بونک روجه آتی بر نمونه سنی قارئلریه تقدیم ایدرم . « پالرمو » لیماندن باشلایه رق صاغدن ساحل بوی دور ایدرسهک شو لیمان ، شهر وقصبه لری کوریرز .

| ایتالیانجه    | ترکجه         | عربجه                 |
|---------------|---------------|-----------------------|
| Palermo       | پالرمو        | بلرم                  |
| Termini       | ترمینی        | ترمه                  |
| Trabia        | ترابیا        | تریعه                 |
| Cefalo        | چه فالو       | جفلودی                |
| Tusa          | توزا          | طرزه                  |
| S. Marco      | سان مارکو     | سنت مارکو             |
| Milazzo       | میلانو        | میلاص                 |
| Messina       | مسینا         | مسینی                 |
| Taormina      | تائورمینا     | طبرمین                |
| Catania       | کاتانیا       | قطانیه                |
| Siracusa      | سیراقوزه      | سرقوسه                |
| Caltanissetta | کالتانیسه تتا | قلعه النساء « داخلد » |
| Girgenti      | جیرجنتی       | جرجنت                 |
| Sciacca       | شیاققه        | الشقه                 |

|         |         |          |
|---------|---------|----------|
| Mazzara | مازارا  | مازر     |
| Marsala | مارسالا | مرسی علی |
| Trapani | ترابانی | طرابنش   |

بووجه ایله یوزلرله اسمی اما کن وبلادهب یمدیل و  
تغییره اوغرامشدر . « زهة المشتاق » ده برچوق اسمی  
محلات وبلاد موجوددر که ایٹالیانجه سیچلیا خریطه سنه ک  
دقتلی کوز کزدردیکم حالدہ هیچ بریسنه تقریبی اولسون  
تصادف ایده مدم . مثلاً قلعه لردن . قلعه ابی شامة ، قلعه  
الفار ، قلعه ابی ثور ، قلعه الصراط « و وادیلردن « وادی  
موسی ، وادی المدارج ، وادی القوارب ، وادی المالح « و  
« مرسی بشیره ، مرسی شکله ، مرسی الشجره ، مرسی  
الشلوق ، مرسی الحمام « و « الصخرة ، الشبكة ، الملاحه »  
وسائر اسملرک یرلرینی بیلہ بوله مدم .

سیچلیایه عساکر اسلام کیردیکی زمان مرکز  
استانبول بولنان شرق ایمپراتورلغی اطهنک حاکمی ایدی .  
زراعت و تجارتی هیچ درجه سنده بولنیور ایدی .  
صنایعی ده یوق ایدی . معارف جهتی ایسه تکمیل  
پاپاسلرک النده یولندیغندن خلقک بیکده بری بیلہ او قومق  
ویازمق بیلمز ایدی . بری وبحری قوه عسکریه ، اطه یی محافظه  
و روم مخلوطی بولنان جاهل اهالی یی عسکر قوتیلہ اداره

ایلیور ایدی . عسا کر اسلام حرباً اطهیه مستولی اولدقلری  
زمان علوم ، معارف و مدینت نامنه تقریباً برشی بولما مشلردی .  
قرون وسطی موده سندن بولنان جاهلانه بردیندارلق ، خلق  
اراسنده فضیلت عد اولنیور ایدی . عسا کر ، مأمورین  
ومهاجرین اسلام سوریه نک و مصرک هر درلو علوم ، صنایع  
وزراعتیه ایله کلشله وهرشیدن مقدم اطهیه قانون و شریعت  
اسلامیه نامنده بر عدالت کتور مشلردی . امنیت و عدالت  
موجود اولان بریده ایسه ترقیات مدنییه کنندی کنندینه  
ظهور ایدر دکللی ؟ یاریم عصر قدر بر زمان ایچنده صناعت ،  
زراعت و تجارت زیاده سیله ترقی ایلمش و پالرمو دخی اطه نک اک  
معمور بر شهری اولمش قالمشیدی .

(۱) «سیچلیانک اک منور تاریخی ، حکم و حکومت اسلامیه  
ایله باشلامشدر . اسلام سیچلیایه مستولی اولدقدن صوکره پالرمو  
شهرینی مرکز امارت اتخاذا ایلدیلر و بوندن صوکره اطه نک  
بعض جهتلرنده قالمش اولان شرق ایمپراتورلغینک صوکره قوتنی

---

(۱) ۱۹۱۰ سنه سی پالرموده طبع ایدلمش «Storia  
Siciliana» «سیچلیا تاریخی» نام کتابک التمش ایکنجی  
صحیفه سندن التمش سکرنجی صحیفه سنه قدر اولان  
بر خلاصه سیدر .



تارمار ایتدیلر . آرتق هر معنا سیه اظه نك حاكمی اولدیلر  
 قالدیلر . عسا کر اسلام ، اللرنده سلاح ایله اظه کیردکاری  
 زمان یغما جیلق ایلمشلردی . تعصب دینی لرنده نهایت یوق  
 ایدی . بوحال لریله برابر اظه ییکی بر مدنیت کتور مشلردر که  
 اوزمانده کی اوروپا مدینتی بویکی مدنیتک بوسبتون غریبی  
 ایدی . عربک سیچلیا به کتوردیکی مدنیتک نخومی اظه ده  
 او یله بر حرکت وبرکت تولید ایلدی که : طرف طرف اهالی  
 آراسنده راحت وثروتی وصلح ومسالمتی تأمین ایدی . ارتق  
 مدنیت اسلامیه اظه ده بریلدیرم سرعتیله انتشار ایلدی .  
 عربلر علوم ریاضیه جاهلی دکل ایدیلر . حکمت وکیمیا علملرنه  
 ده آشنا ایدیلر . فن نبائی بیلورلر ایدی . علم طبده ماهر  
 ایدیلر . منجم ایدیلر . قنون بحریه ده کرکی کبی آشنا ایدیلر .  
 تجارت بحریه ده تجربه کار اولمشلردی . سوریه دن ومصر دن  
 کاربانلر واسطه سیه هر طرفه محصولارینی نقل ایلور و  
 بحر آده ممالک اجنبیه مالارینی کوتور یور واورالردن آلدقاری  
 امتعه یی مملکتلرنه نقل ایدرک کار ایلورلر ایدی . بویله جه  
 سیچلیا اظه سی ده آزمان ایچنده تجارت وزراعتیله پک بیوک  
 بر شهرت قازاندی . صحرائشین عربلر سیچلیا ده غایت متمدن  
 بر حال آلدیلر . حیات قدیمه سر سر یانه لرینی ترکله پک نازک  
 بر شهرلی اولدیلر . اوزمانده اظه نك زراعتی پک کروبر حالد

قلمشیدی . عربلر طرز زراعتی تحسین ایلدیلر . خارجدن  
 کرک تخم و کرک اش-جار جلب ایلدکلرندن اطه ده یکی یکی  
 محصولات پیدا اولدی . سوریه و مصرده موجود حبوباتک  
 جمله سنی جلب ایدرک سیچلیا ده اکدیلر . حیوانات و مواشی  
 تربیه سنه باشلادیلر . صنایع اسلامیه یی ده اطهیه ادخال  
 ایلدکلرندن مملکته اقتصاد جهتدن بیوک فائده سی اولدی .  
 دیرکن تجارت دخی طبیعتیه رواجی بولدی . عربلر اطهیه  
 پرچ زراعتی ادخال ایلدیلر . سیچلیانک بوکونکی ثروتمه  
 سبب حقیقی عربلر اولمشدر . عربلر پموق زراعتی سوریه  
 و اناطولیدن کتوردیلر که : صقلیهیه پک آز زمان صوکره پموق  
 تجارنی قپوسنی آچدیلر . اطه ده موجود اولان اراضی  
 مرزغیه یی قورودهرق اصلاح و تکمیلی زراعت ایلدیلر .  
 شکر قامیشی زراعتی ایجاد ایلدیلر . بویوزدن اطه ده « معصره »  
 لر<sup>(۱)</sup> یا پلمسنه ده سبب اولدیلر .

شکر اعمالی یوزندن اطه هم زنکیین اولدی هم شهرت  
 قازاندی . میلادک ۱۶۰۰ تاریخنه قدر سیچلیا شکر ی آوروپا

(۱) عربلرک « معصره » کلمه سی سیچلیا ده حالا مستعمل  
 اولوب املاسنی « Mahassar » و یا خود « Massara »  
 دیه تحریر ایدیلر .

ده پك مشهور و مقبول بر متاع ایدی .

نباتات علمنده آشنا اولماری سیچلیا اطه سنك داخلنی معمور ایلدی . زیرا حکومت اسلامیہ گمزدن مقدمی اطه نك داخلنی تقریباً غیر مسكون بر حالده بولینور ایدی . فیستیق و خرما اغاجلری یتیشدر دیلر . بونلرله اهالی نك معیشتنی تسهیل ایلدیلر . دوت اغاجی دیکدیلر . اپك بوجکی بسلدیلر . اطهده اپكجیلکی احداث ایتدیلر . خلقك ثروت منبعنی تزید ایلدیلر . « سماق » اغاجی یتیشدر دیلر . لیون ، پورتقال و ماندارینا باغچهلری یاپدیلر . اطهده روما لیلر زماننده یالکز « Cedro » دیکلری اغاج قانونی معلوم ایدی . بونیده انجق زینت ایچون بسلرلردی . عربلر علم و معارفلری سببیه بوقدر درلو اشجاری اطهده زرع و تربیه ایله اقلیملشدر دیلر . عربلر اطهده زیتون اغاجی یتیشدر دیلر و آشیلایه رق محصولنی تحسین ایلدیلر . اسقای اراضی ایچون قانونلر و نظاملر احداثیه اطه نك صولرینی بوشنه صرف ایتدرمدیلر . اداره ایله قولالنه رق زراعتی تکیثیر ایلدیلر . جزیره نك مدنیت و ثروتیه یکانه عربلر سبب اولدی . حالبوکه یوقاری ایتالیا اهالیسی سیچلیا نك بوکونی سکانی ایتالیان عربجعی « Arabaci » دیه مواخذه ایدرلر . دها غریبی قیزدقلری وقت ده « Razza Seracena » جنس شرقی

دیده سوکرلر و صایارلر. حقیقتده ایسه اوشر قلیلر و اومسلمانلر  
سیچلیایه برمدنیت جدیده ایله کملشرو کیتدکاری ایتالیا  
شهرلرینه علوم و معارفلر کو تورهرک آج و بیعلاج قلمش اولان  
او خلقه معیشت و سعادت قبولری آچمشلردی «

ایشته ایتالیا بحه صقلیه تاریخنک یدی صحیفه لک ترجمه  
خلاصه سی بوراده ختام بولدی .

بوکیجه اولده بالو واردی . بلکه اکنیرم دیه طعامدن  
و کره موزیقه ورقص سالوننه کیتدم ایسه ده محزون  
ولهرق او طهمه دوندم . هرشی کوکل خوشلغی ایله اولور .





## ۲ كانون ثانی سنه ۱۹۲۱

بوکون بازار اولمق مناسبتیله هر طرف ینه قیالیدر . بعد  
الظهر آرابه سوار «La Zisa» لاذیزا نام قصری تماشایه  
کیتدک . لاذیزا «العزیز» کلمه عربیه سنک ایتالیا نلاشدر  
مشیدر . سیچلیا اوزرینه یازیلان ایتالیا نجه کتابلرده میلادک  
۸۲۷ تاریخنده عربلر صقلیه جزیره سنه مستولی اولمش و  
نهایت امرابری برلرینه دوشدکارندن میلادک ۱۰۶۱ سنه سی  
«نورمان روجارو» اطهیی بونلرک اللرندن قورتارمشدر ديه  
محرردر . اشبو تاریخندن اعتباراً برعصر قدر زمان صقلیه  
جزیره سنده عربلرک باجمله علوم و معارفی پایدار اولمش ،  
ازجمله یاپلان بنالر عرب طرز معماریسنک خارجنه پک چوق  
چیقه مامشدر . زیر اطهیه مستولی اولان نورمانلرک

معارف و مدنیاتی اطه دن حکومتی غیب ایدن اسلامک علوم و مدنیتمدن فرسخ فرسخ کرو بولندیغندن بالطبع امور مهمه علمیهده قوه حاکمه ، معارفپرور عربلری استخدام ایلمشدر . بونک ایچوندرکه پالمو شهرینی خارجندن هلال شکلنده قوشاتمیش اولان نورمان سرائیلرینی عرب معمارلرینه بنا ایتدرمشلردر . تکمیل اطهده ساکن اولان اسلام و خرسیان اهالینک دیلیری او زمان فصیح عربجه اولدیغندن اشبو بنا ایتدکلی سرائیره ده عربجه اسملر طاقمشلر و یازمشلردر .

حالبوکه کرک امرای عرب آراسنه قانلی اختلافلر دوشدیکی و کرک نورمانلرک اطهیه استیلا ایچون حرب ایلدکلی وارقه سندن ده قرون وسطی متعصبلی بولنان پاپاسلرک توحیدینه عداوتلری اولدیغی ایچون تکمیل انارمدنیه اسلامیه یرله یکسان ایدلمش و طاش طاش اوستنده قالمشدر .

ابن حوقلک یالکز پالموده موجود اولدیغی سویلدیکی اوچ یوز شوقدر جامع زویه کیتمشدر ؟ یا او مرکز امارت اتخاذا ایدیلن سرائیلر و امرا مساکن جسیمه سی واغنیایا خانه لری نه اولمشدر ؟

هیچ بریسنک دیوارلری اولسون ایاقده قالمشمیدر ؟ هله قبور اسلام تکمیل آرپه تارلاسنه تحویل ایدلمشدر . اسملرینی ، صره سی کلدیکنده نقل و حکایه ایده جکم علما و فضلا نک

قبرلری نزه ده قالمشدر ؟ اوزرلری غایت مزین و کوفی  
قیرمه سیله قاربتمه یازیلی قبرطاشلری نزه ده کیتمشدر ؟ بنجه  
تاریخدن سیلمک ایچون تکمیلی اون ایدلمشدر !..

امان یاربی ! بونلرک هیج برندن بر اثر قالمشدر . گویا  
افریقانک ینماجی سر سری عربلری صقلیه جزیره سنه کلمشله ،  
حکومت ایده جکز ديه قوردقلری چادیرلری تحتنده برمدت  
جاهلانه و غافلانه امرار حیات ایلمشله و نهایت اطه ایله هیج  
ده مناسبتی اولمیان نورمانلر واسطه سیله چادیرلری ، ارقه  
لرینه یوکادیلهرک سیچلیما دن کلدکلری چوللره  
قوغولمشلردر . بز ترکلر استانبوله قیلیمجمله کیردیلمز  
وقت حال ومدنیت ینه هب قرون وسطی ترکمنی ایدی .  
حالبوکه هم خرسیتیانلری حمایه هم اثار مهمه مسیحیه دن مثلاً  
« ایاصوفیا » و سائر بنا لری محافظه ایلمشله . عجباً بونلری محو  
و خراب ایلمدیکمزه اییمی یوقسه فنا می ایلدک ؟ بوراسنک  
محاکمه سنی قارئین کراممه حواله ایدرم . حکملرینی ده  
وارسون کندیلری ویرسونلر .

« لاذیرا » سراینه کلدیکمزده بونک پک متین بر بنا  
اولدیغنی کوردک . طرزی معماریسی نورمان قاریشیغی عربدر .  
بونک آلت قاتنی زیارت ایده بیلدک . زیرا اوست قاتلری قپالی  
ایمش . المزده کی دلیلک تعریفنه کوره بوسرایی ، ۱۱۵۴

تاریخندن ۱۱۶۶ تاریخنه قدر سیچلیانک قرالی بولنان  
« Guglielmo I » برنجی غولیهلو عرب مهندس و معمار لرینه  
بنا ایتدر مشدر .

« لاذیزا » نك خارجدن مدخلی دمیر پارماقلقلی اوچ  
کمردن عبارتدر . شمدیلرده ایسه بومدخله سرائیک ایچندن  
کیرلیور . اوچ کمردن اورته کمره قارشوکلن دیوارده پک  
خوش برچشمه یاپلمشدر . پک براق و برکتلی برصودخی بورا  
دن دائمی الجریاندر . مدخلک مردیوان بولنان صاغ جهتمده  
دیوارده قابارتمه اوله رق عربجه یازیلر وارددر . اوقودم .  
شعردر . استنساخ ایتدم .

انجق مالی سرائی و صاحبی مدحدر . قیرال « غولیهلو »  
یه « المستعز » دیه خطاب ایدلمشیدی . ایتالیا نجه ترجمه سنی  
مراد ایدنلره « il Cicerone per Sicilia » کتایبی توصیه  
ایدرم . بوکتاب ۱۹۱۰ تاریخنده پالرموده طبع ایدلمشدر .  
سرائیک اوست قاتلرینی زیارت ایچون بوکونکی وارئی  
بولنان « Marquis de s. Giovanni » « مارکی ده سان  
جیوانی » دن اذن المق لازم ایش .

بورادن آراهه ایله « La Cuba » القبه نام بنایی زیارته  
کیتدک . عسکر اداره سی بوکا وضع ید ایله امور عسکریه ده  
استعمال ایدیور ایش . بنا خارجدن « لاذیزا » یه بکرز



بوده عرب ايله بنا ايدلمشدر . تاريخ بناسى ۱۱۸۰ سنه سنه .  
 مصادف ايمش . هب خارجدن تماشا ايدورز . بورادن ده  
 « La Piccola Cuba » كچوك قبه نام اثرى كورمكه  
 كيتدك . بريوك كمر اوزرنده نصف كره شكلنده برقه در .  
 بوندن صوكره بيوك وكچوك « Fauara » فواره يعنى فسقيه  
 ناملريه موجود اولان اثرلى زيارت ايتمك خاطر مزه  
 كلديسه ده رغب ايتمك واوتلمزه عودت ايچون دوندك .  
 اثنای عودتده « ماقوئيدا » جاده سندن « ويتوريو  
 امانوئيل » جاده سنه صاهر ق كلدك . بوجاده نك دكز  
 طرفندن « مارينا » ميدانته منتهى اوله جغى برمحله صاغده كى  
 برقه وه ويمكخانه نك اوكنده برازدحام كوردك . مكر  
 بردوكون درنكى ايمش . كلين ايله كويكى آراهدن اينمشلردى .  
 پك خصوصى احبا واقربا لرندن ده اون كيشى قدر قادين  
 واراك هب بومحله كيويور لردى كه كليسا ده عقد ازدواج  
 دینی وقوع بولمش اولديغندن ارتق ييوب ايچمك صره سى  
 كلش ديمكدى . اوروپاده اهالينك قسم اعظمى تشكيل  
 ايلين خلق آراسنده عادت اولديغى وجه اوزره بويله دوكون  
 دعوتلرينى هر كس درجه سنه كوره قهوه ويمكخانه وزنكيه  
 لرى ده مسافر خانه لرد ياپارلر . واقتدار ماليسنه كوزه  
 دعوتليرينه اكرام ايدرلر .


زیرا کیرا ایله اقامت ایلدکلری کچوک آپارتمانلری  
مسافرلرینه کافی کلمیه جکندن بشقه برده سفره طاقلرینی  
وسائره بی زردن بولسونلر؟ الک مناسی حالنه کوره دعوتیلرینی  
قهوه و طعمخانه لرده اکرام ایلیمکدر . دکلر؟

کلین خانم کویکیسنک صاغ قولنی صیم صیق طوتوب پک  
مجبوبانه ادالره اطرافنی سوزهرک کوزلر سوزیور و سینمیور  
کویکی ده فخور ، مغرور هیج برشیدن خبری یوقمش کبی  
طور یوردی . داریلری قوجه قاریلرینک باشنه تمیسیله یولوزه  
دوام ایلدک .

دوکون وکلین ، کویکی مناسبتیه عرب عادتلرندن اولان  
پک نازک بر مسئلهیه حالا سیچلیا ده مراعات ایلدیکنی  
خبرویرهیم . سیچلیالی پک موثوق برکیمسه دن ایشتم که :  
تکمیل « صقلیه » جزیره سنده یرلیر آراسنده قیزلرینک  
یکارتی الک زیاده اهمیت ویریلن بر مسئله در . عرض ، ناموس  
وشرف عائله حین ازدواجده هب دم بکارتده آرانیرایمش .  
ایله زفافک فرداسی صباحلین قیز و اوغلان انالری پک  
خصوصی اقربالریله برلکده زفاف او طه سنه کیره رک یاتاق  
چارشافلرینی معاینه ایله کلین خانمک استقبالی حتی حیاتی  
تأمین ایدرلیرایمش . معاذالله ! عکسی تقدیرنده دکل یالکز  
زواللی قیز جغزانا و باباسی اوینه عودتله قالیر ، حتی قادینجغز

ارتق نفسی محو اولمش عدیله باشنی آیرکیدر و نمکنسه اطه دن  
بلاد بعیده یه فرار ایدرایمش . اشبو عادتک تأثیریه نیجه  
نیجه معصوم قادیلار یوق اولیورلر مش .

بزم مصرده وهله کویلرده بویله دم بکارت بختنده حالا  
بوکوته قدر پک چوق آجی حالر مسموعمز اولمقده در . شونی  
دیمک ایسترم که : سیچلیا خلقی بو عادتلیله ده اصلارینک  
عرب اولدقلرینی اثبات ایلورلر دکلی ؟



## پالرمو ۳ کانون ثانی ۱۹۲۱

بوکون هوامز یاغفور لیدر . اوتلدن طیشاری چیقمدم .  
صقلیه یه متعلق کتابلری عی قاریشدردم طوردم .  
بواطه پک چوق علماً و حکماً و اطباء و سائر اعظم  
اسلامه مهد وجود ، اکثریسنه ده نهایت مقبر اولمشدر . اشبو  
اعظمک اثار علمیه لری بوکونده بزله علی الاکثر خفی  
قالدیغی کبی جسدلرینه مرقد اولان محلات دخی بوسبتون  
مجهول اولمشدر . یازیقلر اولسون ! ...

قرون وسطی متعصبلیری مستولی اولدقلری بلاد اسلامده  
بالمله اثار مدنیّه عربیه یی ، نه قدر قیمتلی اولورسه اولسون



ونه ندرجه ده فائده لی بولنورسه بولنسون محو واعدامه  
محکوم ایتمشلردی .

ترکجه اندلس تاریخنک برنجی جلدنده ، طقسان برنجی  
صحیفه ده محرردرکه . « اسپانیول قتولاک متعصبلی غرناطه  
شهرینه کیردکاری زمان برمیليوندن زیاده کتب عربیه یی  
آتشه یاقشلردر » . بوحال صقلیه نک ده باشنه کمشدر .  
حالبوکه بوحالریله ینه کندیلرینک سرعتله تمدن ایلملرینی  
تاآخیر ایتمشلردر .

صقلیه نک علما وشعرا وسائر مشاهیرینه دائر بعض  
اسملر قیدایده ایم ده قارئلرم حضراتی بوبابده بر فکر مخصوص  
ایله حکملرینی ویرسونلر .

شویله که « صقلیه » ده « سمنطار » (۱) قریه سنه  
منسوب عالم وزاهد مشهور « ابوبکر عتیق السمنطاری »  
پک چوق ائار یازمشدر . بونلردن اک مشهوری اون  
جلده « کتاب دلیل المقاصدین » در . بوذات بلاد اسلامده  
سیاحت ایتمش وسیاحتی قاموس صورتده جمع ایلمشددر .  
« الرقاق » اسمنده برکتابی ده واردر . « اخبار الصالحین »

---

(۱) شیخ شهاب الدین ابی عبد الله « معجم البلدان »

نام کتابی صحیفه ۱۱۳

نام اثری يك مشهور در . علم فقه و حدیثدن دخی بر چوق  
اثری موجود در . بوذات هجرتك ۴۶۴ سنه سی ۲۲ ربیع  
الآخرنده وفات ایتمشدر .

« شاقه » قصبه سندن « ابو عمر عثمان بن حجاج الشاقی  
الصقلی » ظهور ایتمشدر . امام مالک مذهبی اوزره علم فقهده  
تفرد ایتمش و فقهه دائر يك چوق کتابلر یازمشدر . وفاتی  
هجرتك ۵۴۴ سنه سی محرمنده در .

عماد الدین ابی عبد الله محمد الاصفهانی « خریده القصر  
وجریده العصر » نام کتابنك التمش اوچنجی بابنك برنجی  
فصلنده « ذکر محاسن فضلاى جزیره صقلیه » دیه سیچلیا  
نك علما و فضلاسنی صایه رق دیور که . « ابو الحسن علی بن  
عبد الرحمن الصقلی » بر چوق اثار قلمیه سیله شهرت شعاردردر .  
يك متین ده برشاعردردر .

و « ابو الفضل جعفر بن البرون الصقلی »

و « الفقیه ابو محمد بن صمنه الصقلی »

و « عبد الرحمن بن رمضان .. »

و « عبد الحلیم بن عبد الواحد .. »

و « البئیری الصقلی »

و « عبد الرحمن بن ابی العباس الاطرابنشی »

و « ابو علی حسن بن واد الغاون »

« الفقيه ابو موسى عيسى بن عبد المنعم الصقلي » و  
 « ابو حفص عمر بن حسن النحوى .. » و  
 « عثمان بن عبد الرحمن بلرمى الصقلي » و  
 بونلردن بشقه دها يوزلرله علما وشعرا اسملى او قودم .  
 بونلرك يك چوق اشعارى دخى ذكر ايدلمشدر .  
 « كتاب الدرة الخطيرة والختار من شعراء الجزيرة » نام  
 اثر كه ابن القطاع ديه مشهور اولان « ابو القاسم على بن  
 جعفر كدر . بونده دخى يك چوق سيحلىالى ادبا وشعرا  
 اسملى و اثر لرنيك بعض پارچه لرى ذكر ايدلمشدر .  
 « ابو عبد الله محمد بن الحسن ابن الطرزى » نك نيجه  
 اثار ادبيه سى موجودر . شعرى دخى يك قوتليدر . تصوف  
 حقهده اولان شروسوزلى خوشمه كيمدى .  
 ليس التصوف لبس الصوف ترعه  
 ولا تكون ان غنى المغنونا  
 ولا صياح ولا رقص ولا طرب  
 ولا تغاش كان قد صرت مجنونا  
 بل التصوف ان تصفو بلا كدر  
 وتتبع الحق والقرآن والدين  
 وان ترى خائفا لله ذا ندم  
 على ذنوبك طول الدهر محزونا

## ترجھہ سی

«تصوف ، یامہ لی بر قیل عبا کیمنمک دکادر . مغنیلرک  
تغنیلرندہ دخی دکادر . تصوفدہ حایقیرمق ، رقص ایتمک  
وکیفلنمک یوقدر . دلی کبی جذبہ بایغینلغی دہ یوقدر .  
تصوف ، کدرسز اولہرق صفوت بولمق وحق وقرآن  
ودینہ اتباع ایلمک وایشلمش اولدینگک کناہلریکہ نادم  
وبر حزن دائمی ایلہ خدادن خوف ایلدیگک کورلمسکدر .»  
صقلیہ امرا ووزراسندن دخی نیجہ افاضل اسملری  
قید ایدلمشدر . بونلرک بعضیسی شاعر وبعضیسی ادیب  
اولوب ایچلرندہ علم فقہ وحدیثدہ ید طولی اصحابی دخی  
موجوددر .

« الامیرثقة الدولة جعفر الکلبي » و

« القائد ابو محمد الحسن بن عمر بن منکود » و بویکی  
رأس کار دہ بولنان امرادن وقوماندانلردن دخی پک چوق  
شعرا وادبا کلشدر .

(۱) « ابو محمد عبد الجبار بن حمدیس السرقوسی پک بایغ

(۱) ابن خلکانک « وفيات الاعیان » ندہ ذکر

ایدلمشدر کہ : هجرتک ۴۷۱ سنہ سی « ابو محمد عبد الجبار  
حمدیس » انداسہ کلشدر . هجرتک ۵۲۷ سنہ سی رمضانمده



و متین بر شاعر در . مکمل مطبوع دیوانی و کتب ادبیہ عربیہ  
 ده پک چوق قطعات اشعاری موجود در . حمدیس سکسان  
 یاشنده ایکن الزده کی عصا سی حقنہ بروجه آتی ایاتی  
 سویلمشدر .

ولی عصاء عن طریق الذم احمدھا  
 بہا اقدم فی تأخیرھا قدمی  
 کأنھا وہی فی کفی اھش بہا  
 علی ثمانین عاماً لاعلی غنمی  
 کأنی قوس رام وہی لی وتر  
 ارمی علیہا زمان الشیب والھرم

### ترجہ سی

المده بر عصام وارد رکہ ذم بابتدہ تشکر لر ایدرم . بونک  
 تأخیر یلہ قدمی تقدیم ایلرم . صانکہ بو المده کی عصا ایلہ  
 قیونلری می دکل سکسان سنہ می سور یورم .  
 بن صانکہ براوق آتجینک یاییم . عصام ده بکابر گیریش

---

« میورقہ » اطہ سندہ وفات ایللمشدر . مرحوم ، « ابن اللبانہ »  
 تام شاعر مشہور ک قبری جوار ندہ دفن اولنمشدر . حمدیس  
 صوک زمانلر ندہ کوزلرینی غیب ایتمش ایمش .

اولمشر . « بلم بولكلش ديمك ايستيور » ارتق اختيارلق  
وكهنه لك زمانى بونك اوزرينه آتيور ، يوكلتيورم ديمكدر .  
« محمد بن حمديس الصقلي » بوذات پدرندن دها قوتلى  
برشاعر اولديغنى ابن بشرون « المختار » نام اثرنده  
ذكر ايليور .

« محمد بن عيسى ابو عبد الله الصقلي » هندسه ونجوم  
علملرنده ماهر ايدى . شعري دخى واردر . « المعلم ابواليث  
الصقلي » يك ييوك برمعمار در . بوذات ، امير المؤمنين يعقوب  
ابن يوسف بن عبد المؤمنك امريله اندلسده « اشبيلية » جامعنى  
بنا ايتمشدر .

« ابو على الصقلي العطار المعروف بابن الباجي » علم  
حديثده زماننك فريدى برعالم ومجتهد ايدى .  
« ابو عبد الله الصقلي » يونان قديم لسانته اشنا برعالم  
بولنديغندن « قرطبه » ده ابو داود سايمان المعروف بابن  
جلجلك رياستى تحتهنده كي جمعيت طبيه ده بولنه رق نباتات و  
ادويه اسملرينى يونانجه دن عربجه يه ترجمه ايلمشر .

« ابو على الحسن بن رشيق » قيروانلى اولوب صقليه يه  
هجرته « مازر » ده توطن ايتمشدر . يك مهم تاليفاتى  
واردر . از جمله « كتاب العمدة فى معرفة صناعة الشعر »  
و « كتاب الاموزج » ناملرنده اثرلى وخيلى اشعارى واردر .

بوذات ۴۵۶ سنه سی ذو القعدة آينده مازرده ودفن اولمشدر .  
« قراضة الذهب » اسمنده برکتابی دها اولوب بونده لسان  
عربده بولنان کلمات شاذه بی جمع وشرح ایلمشدر .

« ابو العلا صاعد بن الحسن البغدادی » علم لغتده پک  
ماهر ایدی . غایتله حاضر جواب برذات ایدی . جمله تألیفاتندن  
« کتاب الفصوص » پک معروفدر . بوذات ۴۱۷ هجریده  
صقلیه ده ارتحال عالم بقا ایلمشدر .

« ابو القسم المعروف بابن القطاع الصقلی » ادب ولغتده  
عصرینک اک عالمی ایدی . جمله اثارندن « کتاب الافعال »  
و « کتاب ابنیه الاسماء » « کتاب العروض » و « کتاب  
الدرة الخطيرة المختار من شعراء الجزيرة » و « کتاب  
لمح المالح » در . وطنی اولان « صقلیه » یی خرسیتانلر آلدقندن  
صوکره مصره هجرت ایتمش و هجرتک ۵۱۵ سنه سی  
صفرنده قاهرده وفات ایلمشدر .

« ابو عبد الله محمد بن علی المازری » امام مالک مذهبی  
فقها سندن اولوب پک بیوک ده برمحدثدر . کتب سته دن  
« صحیح مسلم » ی شرح ایتمش واسمندی ده « کتاب المعلم  
بفوائد کتاب مسلم » تسمیه ایلمشدر . « قاضی عیاض » ک  
« کتاب الاکمال » ی بونک کتابنه برتکمله در . ابدن دخی  
نیجه رساله لر یازمشدر . « کتاب ایضاح المحصول فی برهان

الاصول « اسمنده بر مهم کتابی دخی واردر .  
 « ابو عبد الله محمد بن ابی محمد الصقلی « شهرتی « حجة  
 الدين « در . خیلی اثار صاحبی بر عالم وادیدر . جمله اثارندن  
 « کتاب سلوان المطاع فی عدوان الاتباع » و « خیر البشر  
 بنحیر البشر » و « کتاب الینبوع فی تفسیر القرآن الکریم »  
 و « کتاب نجیاء الایناء » و « کتاب الحاشیة علی درة  
 الغواص للحریری » و « شرح المقامات للحریری » اشبو  
 مقامات حریری شرحی ده صغیر وکبیر ناملریله ایکی کتابدر .  
 « محمد بن الحسن بن علی الکرکنتی « مذهب مالکی  
 اوزره مشهور بر فقیهدر . « حسن بن علی الصقلی النحوی «  
 عالم وفاضل بر ذاتدر . « عبد الله بن ابی مالک المصیب الصقلی «  
 علمای لغتدن و شاعر مشهوردر . « الشیخ ابی سعید بن  
 ابراهیم المغربی الصقلی « زمانتک اطباى مشهوره سندن  
 اولوب « کتاب المنجح فی التداوی من صنوف الامراض  
 والشکاوى » نام اثری پک معرو فدر . « احمد عبدالسلام الشریف  
 الصقلی « اک مشهور اطبا دندر . بر کتابنده بسیط اولان تداوی فی  
 التزام ایلمشدر . کتاب الاطبا سنک تقسیمى بوجه آیدر .

۱ باش آغریلری ایچون ادویه مفرده

۲ کوز آغریلری ایچون

۳ قولاق خسته لکی ایچون



۴. برون خسته لکری باینده
  ۵. آغیز خسته لکی ایچون
  ۶. بیون و بوغاز خسته لکری ایچون
  ۷. قره جیکر و معدده خسته لکری ایچون
  ۸. امعاء و یوشادیجی شیرلر حقننده
  ۹. مقعد و امراضی بمختلعه
  ۱۰. بوبرکلر حقننده
  ۱۱. مثانه
  ۱۲. قادی و ارک کلرک اعضای تناسلاری حقننده ادویه مخصوصه لر
  ۱۳. امراض رحم ایچون علاجلر
  ۱۴. مفصل خسته لکری نه علاجلر
  ۱۵. جراحات حقننده ادویه
  ۱۶. ورملر و اورلر حقننده علاجلر
  ۱۷. آق جیکرلر مخصوص خسته لکری تداوی
  ۱۸. حمالر و فساد هوالر حقننده
  ۱۹. زهرلر و حشرات صوقسی حقننده علاجلر
  ۲۰. بدن انسانه فائده ویریحی علاجلر بیاننده در .
- بوکتابده ایکی فصل دهها موجود اولوب برنجیسی آغری و صانجیلری تسکین ایدن ادویه یی وایکنجیسی اشیا نلک بری برلرینه اولان تأثیرینی ذکر ایلمشدر .

صقلیه‌لی شاعر مشهور حمدیسک بروجه آتی بر قطعه سنی  
بوراده ذکر ایتمکی مناسب کوریورم .  
حسن غذائک واعتمد

منه علی وقت وحد  
فالنفس تهزل بالماً

کل کلمه سمن الجسد  
ترجمه سی

یه جکک ای اولسون و ییه جککک ده بر وقتی بولنسون .  
بدن یاغلاندقجه جان آریقلر ، ضعیفلر . دیمکدر .

« ابن القطاع الصقلی » صقلیه اوزرینه بر تاریخ یازمشدر .  
ینه بوذاتک « الدرّة الخطیرة والمختار من شعراء جزيرة صقلیة »  
نامنده بر کتابی اولوب بونده « صقلیه » لی یوزیتمش بیوک  
شاعر اسملری ذکر ایتمشدر .

کاتب چلبی مرحومک « کشف الظنون عن اسامی  
الکتب والفنون » نام اثر مشهورنده دخی صقلیه‌لی نیجه  
مشاهیر اسلامک اسامی ائاری تعداد ایدلمشدر .

(۱) شریف ادريس ديه مشهور اولان « ابو عبد الله بن

(۱) بوراسی « الشيخ صلاح الدين ابن ابی الصفا

الصفدی » نک « کتاب الوافی بالوفیات » نام اثرینک ۶۵۷  
نجی صحیفه سندن مقتبسدر .

محمد . . . بن عبد الله بن ادريس « دخى صقليه ده وفات  
ايلمشدر . «زهة المشتاق فى احتراق الافاق» نام جغرافياسنى  
« صقليه » ده نأليف ايدرك اسلام دشمنى نورمان روجارويه  
تقديم ايلمشدر . شريف ادريس صقليه قيرالى ايككنجى  
روجرونك دعوتى اوزرينه افرىقاده طانجه جوارنده بولنان  
« العدو » دن صقليه به كشمدر . صقليه يى اسلام المندن سلب ايدن  
برنجى روجرونك اوغلى ايككنجى روجرو علوم و معارف عربيه  
سايه سنده قوه بويه و بحريه سى ترقى ايتمش و اوزمانده استانبول  
ايمپراتورلغنه تابع اولان تكميل اشاغى ايتاليانى قيليجى  
و معارفى ايله فتح ايدرك ايكى سيچليانك قيرالى برنجى روجرو  
نامى المشيدى . ايشته بوروجرونك مدت حكومتى ۱۱۰۱  
تاريخندن تا ۱۱۵۴ تاريخنه قدر دوام ايتمشدر . سنه هجرىه ايله  
مقارنت ايدرسه ك ۴۹۵ تاريخندن ۵۵۴ تاريخنه قدر بولنديغنى  
كوريرز . شريف ادريس صقليه وصولنده بوقيرالدين پك  
چوق اكرام و عزت كورمش و اعمالنى طلب ايلديكى كره  
مجسمه ايچون درت يوزييك درهم كوش و ير مشدر . شريف  
ادريس مطلوب اولان كره يى اعمال ايله اوزرينه اوزمانك  
جغرافياسى موجبنه يدى اقليمى چيزمش و بلاد اسملرينى  
ياز مشدر . قيرال روجرو بوندن پك ممنون اوله رق جناب

شریفی احسانلرینه غرق ایلدکدن بشقه صقلیهده  
اقامت ایلمسنى طلب ایتمش و سن خلفا نسلندن بولندیغک  
ایچون بلاد اسلامه عودت ایدرسهک تحت خلافتده بولنان  
ذات سنى قتل ایتدیرر دیمشدر. بونک اوزرینه شریف ادریس  
قیرالک طابنه اجابتله صقلیه ده الی اخر العمر قلمشدر. قیرال  
روجر و بربرنسه لایق اوله حق مخصصاتی حضرت شریفه  
تخصیص ایلمشدر. »

شریف ادریس ، قیرالک امريله « نزهة المشتاق فی  
اختراق الافاق » نام جغرافیا سنی هجرتک ۵۴۸ سنه سى  
شوالنک اوننده اکمال ایلمش اولدیغى کتابنک مقدمه سنده  
سویلیور .

جناب ادریس بوکتابنک مقدمه سنده « الملک المعظم  
رجار المعز بالله المقتدر بقدرته ملک صقلیه » ديه ده ثمالریله  
حرینی عرش اعلا لره چیقاریور . قیرال روجار و افریتما  
ساحلرنده بولنان اسلامک و خصوصاً آق دکز اطه لرنده  
ساکن اولان امت محمدک باشنه بلاکسلمشیدی . ادریس  
« نزهة المشتاق » نام اثريله قیراله اسلامک ده بلاد و ممالکنى  
بیلدرمش و بولارینى ارايه ایلمش اولدی . کندی کتابی کافی  
کلیورمش کبی برچوق کتب نفیسه عربیه اسملری ده



صایمور که بونلری کویا هب « روجارو » مطالعه ایلمشدر  
دیور . شریف جنابلرینک اسملرینی سویلدیکی کتابلر  
شونلردر .

- « کتاب العجائب للمسعودی »
- « کتاب ابی نصر سعید الجیهانی »
- « کتاب ابی القسم عبیدالله بن خرداذبه »
- « کتاب احمد بن عمر العذری »
- « کتاب ابو القسم محمد الحوقلی البغدادی »
- « کتاب جاناخ بن خاقان الکیماکی »
- « کتاب موسی بن القسم القرندی »
- « کتاب احمد بن یعقوب المعروف بالیعقوبی »
- « کتاب اسحاق بن الحسن المنجم »
- « کتاب قدامة البصری »
- « کتاب بطليموس الاقلودی »
- « کتاب ارسىوس الانطاکی »

زمان انقراضده اخلاق عمومیه فسادده کیدر . فقط  
اخلاق اشراف وافاضل دخی عوامک درجه سنه قدر عجبا  
تنزل ایدرمی ؟ ديه شبهه ایلر ایدم . قیرالک اکرام وانعامی  
مقابلنده پک چوق قصیدهلر و مدحیهلر او قومشیدم ده .

آدم سن ده! . . شعرا ايشيدر ديمشيدم . حالبو كه شريف  
ادريس قيراله بوكتاييله يك جدى برمرشدو بر دليل اولدينى  
خبر وريور . لا حول ولا قوة الا بالله ديرم .



## ۴ کانون ثانی سنه ۱۹۲۱

بوکون صالیدر هوا مز خوش و کونشایدنر . صباح  
گزینمسی یایق ، قوتلی برقهوه آلتی ایتمکدن دها زیاده  
وجوده نافعدر . ارکنجه اوتلدن چیقدم . برچوق ساعت  
قدرجاده وسوقاقلرده کزه رک ایکی طرفمی سیرایتدکن صوکره  
معهود « روما جاده » سنده « غوریچیا قهوه سی » نامنده  
کچوک برقهوه جی و بورکچی دکاننه کیردم . قهوه لری ما کینه  
لی بخاردن کچیریلهرک احضار ایدیلیور . ساده سی شکر  
لیسندن دها تمیز و امیندر . دستکاهنک اوزرنده ، تپسیلر  
ایچنده صره صره دیزلمش پتاس ازمه سندن مصنوع ایچی

طاتلیلی فرونده قزار تلمش یومروق بیوکلکده لقمه لر و پک  
 عادی پینیرلی بورکلرو دهانلر ده نلر ایچون مشتریلر هب  
 بورایه طولمشلردی . قهوه یی ایاقده ایچیورلر . عجله ایشلری  
 بولمان ایشجی قادین وقیزلرله مغازه لرده کاتب یماقلغی ایدن  
 دلی قانلیلر دخی لقمه لرینی ، بورکلرینی ایاقده ییورلر .  
 برفیلجان قهوه یاریم لیرایه یعنی بوکونده بزم مصرک یکر می  
 پاره سنه معادلدر . لقمه نک وبورکک دانه سی ده بویله در .  
 بوکی محلاتده پک مقتصدانه قهوه آلتی ایدیورلر . دهاسی ده  
 وارا ! فقط بن هپسنی سویلمک ایستیمورم . جوان سینیمورینالر  
 لقمه وبورکلرینی ییوبده اوزرینه بر بارداق ده صوایچدکدن  
 صوکره ال توربارندن چیقاردقلری کچوک بر آینه یه باقهرق  
 پارماقلریله زلفلرینی تنظیم ولعل قلمله دوداقلرینی تلوین  
 ایلدکاری اثناده کوزلرینک ایچنه باقان دلی قانلیلرده درلو  
 شاقه لریله بونلرک یکاقلرینی آل رنکه بویایورلر . ایتالیانلر  
 دیرلرکه « قادین نه قدر آینه یه باقارسه او قدر خانه سنه باقه  
 ماز » . بیلیم بوقاعده ، قهوه آلتیلرینی بوکی قهوه خانه لرده ،  
 ایاقده ایدن ایشجی وآلش ویریشجی قادینلره ده شامل  
 اولورمی ؟

دقت ایلدم . بو قبیل ذواتک شاقه لری هیج ده شاعرانه  
 دکلدر . هم ده شاقه لرینی یوکسک سسله ایدیورلر .




الويوز اشارتلىرى ايله ده سوزلىرىنى اخرسىلر كېي تعريف  
ايدىيورلر . آلدىغم صباح غزته لرىنى بوراده او قودقن صوكره  
تراموايله اوتله عودت ايلدم . اوكله طعامندن صوكره  
اميره حضرتلريله برلكده پالمويه يدى كيلومترو مسافه  
بعدنده بولنان « Monreale » « مونره آله » نى زيارته  
كیده جكمزى خبرآلدم .

مونره آله « Monreale » پالمونك جهت شرقيه سنده  
ويدى كيلو مترو مسافه بعدنده واقع بر ناحيه اولوب ۲۳۵۵۶  
نفوسى واردر . سطح بچردن ارتفاعى ۳۵۰ مترودر .  
« مونره آله » اورادهكى بيوك كليساسى و معطل بر مناسترى ايله  
كسب شهرت ايلمشدر . پالمودن اليكتريق ترامواىى هر ياريم  
ساعته بر حر كته يكرمى بش دقيقه ده مونره آله يه واصل اولور .  
اوكله طعامندن صوكره ساعت ايكیده اميره حضرتلريله  
اوتوموبيل سوار مونره آله يه كيتدك . اولا اوتلدىن ساحل  
بويى كله رك مارينا ميدانندن « ويتوريو امانوئيل » جادهسى بويىنجه  
« قورسوقا تافىمى » يه كيردك . بوندن صوكره بر مدت دها  
كيتدكدن صوكره شهرك بنا لرىنى ييتيردك . دها صوكره  
صاغمهز كلن بر طاغك اته كىندن اعتباراً ياپالمش اولان  
ككيش وكوزل بريولدىن چيقمغه باشلادق . چيقدقجه منظره  
كوزلشور ايدى . صولمزه « Conca d'oro » آلتون

یواسی تسمیه ایدیلن « وادی العباس » ل پورتقال ولیمون  
 وماندارینا باغچه لری قوجمان وادی یی تکمیل قاپامش ایدی.  
 صاغمزده کی طاغ دخی قابلیتمه کوره درلواشجار و هنداینجیری  
 ایله زیتلنمشدی . یاریم ساعتده « موزده آله » ده برمیدانک  
 صولمزه کلن جهتمده کی کلیسانک قپوسی اوکنده طور دق .  
 اوتومو بیلدن اینهرک اولا اطرافزی و کلیسانک خارجنی  
 کوزدن کچیردک . بو کلیسانک اسمی « Duomo di S. Maria la Nuova » یعنی « سانتا ماریا لانووانک بیوک کلیسا  
 سی » در . خارجدن کورنیشی پالرمونک اکثر معابدی کی عرب  
 ونورمان قاریشغی بر بنادر . بو کلیسا ایله جوارنده کی مناستر  
 داماصباحک ساعت یدیسندن اعتباراً زائرلرینه آچیق بولندیغی  
 کی بعد الظهر ساعت درتده قپانیور . بانیسی ایسه ایکنجی  
 « غولیهلو » در که : تاریخده « Guglielms. II. il Buono »  
 دیه معروفدر . بو ذات میلادک ۱۱۶۶ تاریخندن ۱۱۸۹ تاریخنه  
 قدر سیچلیا قیرالی بولمشدر .

ایکنجی « غولیهلو » نک بو کلیسای بنا ایلمسنه سبب  
 اولمق اوزره ده شویله بر مصال سویلیورلر . پالرمو دلیلمنده  
 دخی محرردر که : قیرال جنابلری برکیجه رؤیا سنده حضرت  
 مریمی کورمش و مریم انا کندیسنه دیمشدر که : سن بردفینه  
 بوله جقسک . بولدیغکده اونی دین یولنه صرف ایلیه جککه



کلیسا : ۱۰۱۰۰۰








سوزویر . قیرال ایسه موعود دینه یی بولش و بونکله  
کلیسانی بنا ایتدرمشدر .

بنجه او زمانده افکار واسرار اهالی یی قبضه تصرفلرینه آلمش  
اولان طائفه رهبانک تحصیل رضالری ایچون بویله بررؤیایی  
کورمش و وعدی موجب بنجه عمل ایدرک کلیسانی بنا و آلا ی  
والارله پارمو پاش پاپاسنه تقدیم و تسایم ایلمشدر .

بیوک قیوسندن ایچرویه کیردک . کلیسا خدمه سندن  
اولوب زیارتچیلره دلالت ایدن کیسه لر دن بریسی درحال  
پیشمره دوشدی . آهسته آهسته یوریور وایکی طرفزی سیر  
ایدرک ایلریلیوردق . دلیل جنابلری ده طور مادن سویلیورایدی .  
بوکی محلاتده بولنان دلیلر چوق سویلمکله همده دلالت ایلدکلری  
ذوات ، لسانلرینی اکلاسون اکلاماسون و دیکلسون دیکلمه  
سون عقللرنجه تعریفلر ایلمکله بخشیشه کسب استحقاق ایلیه  
جکلرینی دایما ظن ایدرلر . کلیسانک طولی ۱۵۲ عرضی ۴۹  
متر و ایمش . ارتفاعی اوکر نه مدم . دوشه مسی رنگلی  
مرمر لرله ایشلنمشدر . ایکی صره دیرکلرک یوکلمنش اولدقلری  
کمرلر بیزانس طرزیدر . موزایق اوله رق قرق ایکی عدد  
لوحه رسم ایلدمشدر که بونلرک هر بریسی کتب مقدسه دن  
اقتباس اولنش بروقه در . دیرکلرک تاجلری حذا سندن  
یوقاریسی تکمیل آتونه ایشلنمشدر . محققاً سویلرم که !

زمانزده بویله بر کلیسا بر میلیون مضر ایراسنه یا پله میه جغی کی دیوارلرنده قابارتمه و یا موزایق اوله رق ایشلنمش اولان انسان و اشیا رسملرینی رسم ایچون اسکی زمانک صبری رسام و هیکل تراشیلرینی شمدیکی زمانزده بوله میه جغمز دخی پک محتملدر . کلیسانک ایچنده و جنوب طرفنده غایت مکلف ، مزین یا پلهش ایکی عدد تابوت موجود اولوب بونک برنجیسی برنجی « غولیه لئو » نک وایکنجیسی ایکنجی « غولیه لئو » نک کمیکارینه مرقد ایشلر .

یاریم ساعتدن زیاده کزه رک کلیسانک هر طرفی اییجه سیرایلدک . رسمندن دخی معلوم اوله جغی اوزره کلیسا داخلا عظمتی بر بنادر . خارجه چیقمازدن اول ده « تبرکا و تیمناً » دیه اوزری موازیق ، مسدس بر سیاه طاشی کلیسا خدمه سندن بریسی امیره حضر تلرینه تقدیم ایلدی . مع زیاده بخشیشلرینی ویره رک کلیسادن چیققدق . بو کلیسانک تمام اتصالنده بولنان « il chiostro » یعنی مناسترک دهلیزینی کورمک ایچون کیردک . بازاردن ماعدا کونلرده ایکی لیرا دخولیه سی واردر . رسمندن دخی تخمین ایدیلیر که مناسترک بو دهلیزی حیرت افزا صنعتلرله میدانله کتیرلشدیر . تمام درت کوشه لیدر . هر کوشه سی یکر می آلتی کمرلی و تمام ایکی یوز اون آلتی دیرکلیدر . دیرکلرک قابارتمه و اویمه و موزایق ایشلرله لری



موزره آلهده بولنان بنه ديتيتي Benedettini طائفه سنه مخصوص  
مناسترك دهانيزيدر . عرب نورمان طرز معماريسيدر .







تقریباً هیچ بری دیگرینه مشابه دکلدر . شکل عمومیسندینه  
 عربلغی غالب ونورمانلغی ناقصدر . دیرکار ، شـطرنجی  
 وحلزونی ویولی ودرلو موازیق شکللرله ایشلمشدر .  
 بومناسترك حوالیسی کوزل برشکلده تقسیم ایدیلهرك چیچك  
 باغچهسی یاپالمشدر . بریادکار تاریخی اولمق اوزره ده امیره  
 حضر تلریله برابر بوراده رسمیزی آلدردق .


رسمده دخی کورولدیکی کبی مصنع بر فسقیه حاولینك  
 صاغ گوشه سنی تزین ایتمشدرکه بوندن دائمی اوله رق ده  
 صولر فیشقیریور . بومناسترك ارقه طرفنده کی بر قپودن  
 باقلنجه « مونزه آك » بیوك پارق کوریلور . اشاغیسند  
 ایسه « وادی العباس » ك زمردین باغچه لری تادکزه قدر  
 امتداد ایدیور .

دهلیرك دیرکلرینك مختلف رسملری وخصوصاً فسقیه  
 دیرکینك رسمیه باندلس عرب رسملرندن آلمشدر دیه ایتالیانلر  
 یازیورلر . بومناسترك پك یتمیننده وچاك قوله سنك التنده  
 عربلردن قالمه بر اثر موجوددر . بوایسه مربع شکلده بر بنا  
 اولوب درت عدد قپوسی وبرقبهسی موجوددر . « مونزه آله »  
 نك اسم قدیمی پالرمو قبهسی ایمش . اشبو بیوك کلیسانك بنا  
 سندن صوکره اسم قدیمی قالدلمشدر . ینه بوراده وقتیله راهبهره  
 مخصوص بر مناستر وارايمش . صوکره لری اشبو مناستر سراه

تحول ایدلمش ایدی . ۱۱۹۴ تاریخ میلادیسنده سیچلیا ده  
قیرال بولنان اوچنجی « فردیناندو » چوق دفعه لر زوجه سیله  
کله رک بوسرایده استراحت ایدرایمش .

وقتیه بورالر هب امرای عرب سرایلری و کبرای  
اسلام قوناقلری ایله مزین ایمش . بورالر کیم بیلیرنه قدر علما  
و حکمای اسلام استراحت ایچون کلیرلردی ؟ « قبه بلرم »  
دینلن بوکوزلم یرلرده کیم بیلیرنه قدر دوکونلر اولمش و قیلیج،  
قالقانلر اوینامش و دعوتلر ویرلمشدر ؟

دیه بیلیرم که : کوزلر مز یاشلی اوله رق ملول مخزون  
« موزره آله » یی ترک ایلدک . تمام ساعت بشده اوتله عودت  
ایلدیکزدن اشبو زیارتمزی اوچ ساعتده یامش اولدق .





مون رآلدہ کی « بنہ دتین » مناسترینک حاولیسندہ  
امیرہ قدریہ حسین ایلہ بو محرر عاجزی





## • کانون ثانی سنه ۱۹۲۱

ایتالیانلر ، چارشو خلقنی تعریف ایچوب شوویه  
برمصال سویلر لر . دیرلر که : چارشوده عطار و توتونجی بولنان  
ناموسلی و پک کبار برحرب زنکینی صباحلین ارکنجه  
کله رک حالایاری قیالی بولنان دکاننه کیرو یاماغنی بوجه آتی  
استجواب ایدر . صورار که :

— قییلش توتونلری براز ایصلاندکی ؟

— اوت اوسته م ! خفیفجه صوسر پدم .

— طوزه بر مقدار قوم قاندکی ؟

— اوت اوسته م ! قاندم .

— بوره بر مقدار توزقاریشدر دکی ؟

— اوت اوستهم ! قاریشدردم .

— قهوه یه پیرنج قاته رق دگیرمنده چکدکی ؟

— اوت اوستهم ! چکدم .

— دونیکی کتیردیکمز رومه صوقاندکی ؟

— اوت اوستهم ! قاندم .

— برنجی درجه شرابه ده صوقودکی ؟

— اوت اوستهم ؟ شمدی بونی ده اکمال ایدرم .

— پك اعلا ! چایوق بیتیرکه : دکانی عمومه آچماز دن

اول عبادت ایچون کلیسایه کیدهلم ! . . . .

بن بومصالی دیکلایکم زمان مبالغهیه حمل ایلمشیدم .  
 حالبوکه بوصباح بعض شیر المق ایچون چارشویه کیتمش  
 ایدم . من جمله ایکی حقیقت چوراب آمشیدم . همده پالرموده  
 بوندن دها اعلاسی اوله مازمش که ! . . دیه پك بهالی  
 آمشیدم .

امیره حضر تلیرنک سالونلری ایچون برمقدار ده کل و  
 فرنفیل آمشیدم .

مکربوآلدقلمده بنی بوسبتون آلدآمشلردر . ایلک کییشده  
 چورابلرک آتی قوندوره مک طباننه یاپشهرق یالکز قونجی  
 اینجیکلرمده قالدی . کالرله قرنفیللر ایسه مکربو بوجلرندن

قیریق ایش ددی کر کل وقرنفیل ساقلرینی اینجه تلرله اکلده رک  
 یکی ساقلریا پامش ایش . بونی اوتلده طانیدیغم بعض کیمسه لره  
 سویلدم . حرب کبیر اخلاق عمومیه یی زیاده سیله فسادده  
 ویردی . هرکسده برپاره قازانق طمع یی آرتدی . معامله ده  
 انسان کوزلرینی درت آچمازسه وای حالنه ! وای باشنه !  
 شمدیکی دینلنجیلر بیله آلدیغی بش اون سانتیم صدقه یی بالمعاینه  
 قلب اولمادیغنه تماماً امنیت ایلمدکجه ویرنه تشکر ایتسیور  
 دیدیلر . بوکون دکانجیلردن برشی ده اواکرندم که بنجه  
 اصلرینک عرب اولدیغنه بردها دلیدر . ایتالیان لساننده  
 « چ » حرفی پک چوقدر . عرب لساننده ایسه بو حرف  
 بولمادیغندن عربلر عموماً « چ » حرفنی « ش » حرفی کبی  
 تلفظ ایدرلر . ایشته بزم پالرمو لیلرده تکمیل « چ » حرفنی  
 « ش » تلفظ ایدیورلر . مثلاً بش دیمک اولان «Cinque»  
 اسم عددی ، « چینکوه » دیه تلفظ ایدیلر . پالرموده ایسه  
 بونی « شینکوه » دیه سویلیورلر . بزم مصرده ده مثلاً  
 « چاویش ویا چوربا » کلمه لرینی « شاویش و شوربا » دیه  
 تلفظ ایدرلر . صقلیه لیلر عربجه لرینی ایتالیا بنجه یه دیکشه لی  
 سکز یوز سنه یی متجاوز اولدیغی حالدده ذوق لسانیه لرینی

بردلو اونوده مامش-لردر . آتاويلك بونده دخى تائيريني  
كو سترمشدر .

پارمودة قيريق طبق و چناق ، چوملك تعمير ايديورلر .  
بزم مصرده دخى كورلديكى كېي تعميرچى اوسته ادواتى  
برزنيله طولدره رق صيرتلامش و مثقابى ده زنميك اوزرينه  
كوريله جك برحالده وضع ايلمش سوقاق سوقاق كزه رك  
قيريق كاسه و چوملك تعمير ايده جكنى يوكسك سسله اعلان  
ايديورلر . طرز تعميرينه دقت ايلدم . آلات و ادواتنه و خصوصاً  
مثقابنه نظر ايلدم . هب بزم مصرده كېي تعميرچى اوسته لركى  
كېي اك آزدن بيك سنه لك ابتدائى شيلردر .

مصرده ايچى صوطولو بيوك يردستى يى آرقه سنه يوكانه  
رك چارشو و بازار لرده يازيلى طاسلرله صوصاتار آدملىر  
كوريليركه بونلره « حملى » نامى ويررلر . بوراده ده ايچى  
صوطولو بيوك دستى يى اليه طاشيه رق صوصاتيورلر . برالنده  
ده ايكي قاتلى كچوك برحاله يه برقاچ بارداق قومشدر .  
بونلر ده برچوق مدحله باغيره رق صولر يى ساتيرلر .  
پارمودة آلدنم ير صوجينك رسمى شورايه وضع ايديورم .  
صوجى باششه نك چهره و قيلمغه دقت ايديليرسه شرقيلى  
غربليلى ؟ درحال اكلاشيلير .







بر سیار صوجی

بعد الظہر اوتلدن طیشاری چیقہامدم . قیمتلی قانلر  
دو کهرک وعزیز جانلر ویرہرک امتلاک واسلامہ وطن ایلدکاری  
« صقلیہ » یی نہ ایچون ونصل بر آویج نورمانلره ویرمشلردر  
دیہ کتآب قاریشدردم طوردم .



## ۶ کانون تانی ۱۹۲۱

صقلیه جزیره سی نه ایچون ایادی اسلامدن خروج  
ایتمشدر ؟ دیه کتابلری قاریشدر دینم ائتاده نیجه نیجه مهم  
وقوعاته تصادف ایلم . اسلام برکته کبیره ایکن زمانله  
ایادی جهلهده او یونجاق اوله رق پارچه لائمی و بو پارچه لرک  
ده بری برلرینه دوشهرک غوغا ، کورولتی صوکه درجه ده  
کچولمی انقراضنه سبب اصلی اولیور . جاهل و کیفی براداره ،  
افراد امتک اخلاقی ده بوزدیغندن اضمحلاللارینی تعجیل  
ایلیور و ذاتاً فرصت بکله یین اطرافنده کی دشمنلری ایسه  
حاضره قونوق ، کلوب یرلرینی ویورتلرینی اللرندن ایلیور .  
طبیعیدر که انقراضه ، اضمحلاله زمینک حاضر لائمی ایچونده  
موقع و اهمیتنه کوره چوق ویا آز زمان لازمدر .



هجرتك ۳۴۴ سنه سى خلفای فاطميه دن المعز لدين الله العلوى ايله اوزمانده اندلسده خليفه بولنان عبدالرحمن الاموى آراسنده بروجہ آتى بروقعہ ظهور ايلديکندن اختلاف ايله ائتلاف برآراده جمع اولماز قاعده سنى قومشلا واسلامه نيجه نيجه ضررلر ايتدرمشلردر . شوييله که :

سنه مذکوره ده « خليفه عبدالرحمن » ک امريله اندلس دارالصناعه سنده غايتله بيوک برسفينه انشا ايدلمش وايچنده اندلس متاعى طولدريله رق صاتمق وبدلنه اشيا الملق ايچون شرقه کوندرلمش ايدى . بوسفينه شرق صولرندن دوز ايکين برسفينه يه راست کلمش ، کيمک وزره يه عزيمت ايديور ديه تحقيقنده بونک صقليه واليسى طرفندن « المعز لدين الله » ه بر مأمور ايله مکتوبلر کوتوردیکنى اوکرنمش ونهايت سفينه ايله برابر مأمورى ومکتوبلرى ضبط ايله اندلسه کوتورمشدر . طبيعى بونى المعز لدين الله خبر آلدیغنده عظيم بردونما احضار واندلس اوزرينه ارسالنى امر ايتمش وقوماندا نلغنى ده معزک صقليه ده مأمورى اولان « حسن بن علی » يه ويرمشدر . اشبو دونما اندلسک « المریة » لیماننه هجوم ایدهرک لیمانده بولنان بالجله کيلرى ياقش و « عبدالرحمن الاموى » نک مانتدی بولنمايان او معهود بيوک سفينه سنى وايچنده مشار اليها ايچون اسکندريه دن کتوريلن درلو قماشلرى وخصم صا

برخی خواتنده جاریه لری هب ضبط وحق « المریه » یه ده  
 عسکر چقاره رق سکانی قتل و شهری یفا ایتدکدن صوکره  
 سالماً « المهدیه » یه عودت ایلمشیدی . بونی خبر آلاز  
 خلیفه عبد الرحمن ایسه عظیم بردونما تجهیزله اندلسدن شرق  
 صولرینه ارسال ایلمش ونهایت المعزك دونما سیله مصادمه  
 ایتمش وآراده نیجه اسلام قانی ینه اسلام ضررینه اوله رق  
 آقش کیتمشدر . بین الاسلام بوکی اختلافک ظهوری بعدما  
 آرارنده ائتلافک حصوله امکان بر اقاماز دکی ؟ نیته کیم ده  
 هب اوله اولمشدر .

کله مقصده : شویله که « صقلیه » جزیره سی  
 « بنو اغلب » طرفندن فتح اولمشدی . بنو اغلب ایسه  
 خلفای عباسیونک افریقاده کی مأمورلری ایدی . زمانه افریقا  
 ده فاطمیون دولتی ظهور ایلدیکندن « صقلیه » جزیره سی ده  
 موقعی اعتباریله بغداددن آیرلمش و بالطبع مصرده حکومت  
 ایدن « المعز لدين الله العلوی » یه تابع اولمشیدی . هجرتک  
 ۳۸۸ سنه سی المعز طرفندن « صقلیه » والیسی تعیین ایدلمش  
 اولان « ابو الفتوح یوسف بن عبدالله بن محمد بن ابی الحسین »  
 « پازمو » ده خسته لمش وصول طرفی فلج اولمشیدی .  
 بونک اوزرینه « ابو الفتوح یوسف » کندی رینه اوغلی  
 « جعفر » ی وکالة تعیین ایلمشیدی . « جعفر »

« ۴۱۰ » تاریخنه قدر وکالة صقلیه والیسی بولمیش ایدی . سوء سیرتدن طولای اهای علیه قیام وعصیان ایله کلوب سرایی محاصره ایلدکرندن مفلوج اوله رق حالا حیاتده بولنان پدری یوسف بر محفه ایچنده محاصرینک یانلرینه کلشیدی . بونک اوزرینه اهای اغلایه رق دردلرینی بوکا حکایه ایلمشدر و جعفری ظلمندن طولای ایستمدکرینی و دیگر اوغلی « الا کل » دیه معروف اولان « احمد » ی اوزرلرینه امیر تعیین ایتمسنی طلب ایلمشدر . بنا علیه « یوسف » ده اهاینک طلبنی تنفیذ ایچون جعفری عزل ویرینه احمدی تعیین ایتمش ، بو وجه ایله عصیان ده نهایت بولمشدر . اوزمانک القاب موده سندن اولمق اوزره ده « احمد » ه « تأیید الدولة بن ثقة الدولة » لقبی ویرلمشدی . بوندن سوکره ایسه « یوسف » معزول اوغلی جعفری صقلیه دن اخراج ایله مصره کوندرمش و کنندیسی دخی اوغلنه التحاق ایچون مصره کیتمشدر . بونلر صقلیه دن حقیققلری وقت برابرلرنده پک چوق مال ومتاع آلمشدری . خصوصاً « جعفر » (۱) حیوانات اوله رق

---

(۱) ابو الفدا دیه مشهور اولان « عماد الدین اسماعیل ابن علی » نک « کتاب المختصر فی اخبار البشر » نام تاریخنک ۴۱۳ نومرولی صحیفه سی ، لازیم باصمه سیدر .

قاطر و سائر دهن بشقه اون درت بیک رأس آت کوتور مشدر.  
دیرلر که یوسف مصرده وفات ایلدیکی زمان رکوینه مخصوص  
تک برآدن بشقه حیوانی قالمامشدی.

«الا کل» صقلیه ده امارتی زماننده برمدت حسن  
سیاستله اداره امور ایلش وایتالیا اراضیسنه عسکر سوقیه  
صولت اسلامی فرنگلر آراسنده کوسترمش و آرتق سیچلیا  
اطه سنده حکومت طاعت ایتمین نه بربلده نه برقلعه قالمامشدی.  
زمانله «صقلیه» کبرا سندن بعضیلری «الا کل» هطارلمش  
وهور جاهلانله ایله ده افریقاده حکومت ایدن «المعز بن  
بادیس» ه کیتمش و عسکر کوندردیکی حالده اطه یی کنیدیسنه  
تسلیم ایده جکلرینی سویامشدر. یعنی «صقلیه» جزیره سی  
خافای عباسیونه تابع ایکن صوکرلری فاطمی بولنان  
«المعز لدین الله» ه تابع قالمش و شمدی ایسه قیروانده  
بولنان «المعز بن بادیس» حکومتنه فراغ ایدلمک ایستتمشدر.  
بونک اوزرینه هجرتک ۴۲۷ سنه سی «المعز بن بادیس»  
دونما و عسکر ایله اوغلی «عبد الله» ی قیروانده صقلیه  
اطه سنه کوندرمشدر. بادیسک عسکرلری پالمویه حیقنجه  
«الحالسه» ده اقامت ایدن «الا کل» ی سراننده محاصره  
ایتمشله نهایت در دستیه قتل ایلمشله و باشنی ده قیروانه «المعز» ه  
کوندرمشدر. دیرکن «صقلیه» لیلر یایدق لرینه نادم اوله رق



« المعز بن باديس » ك عسكريفی اطه دن طرد واخراجہ  
قالقیشمشلر ، حرب ایلمشلر و عسکرلرندن سکزیوز کیشی  
مقتول دوشدکدن صوکره «عبدالله» ده بقیه سیوفيله دونما  
لرینه جان آتمش و کلدکلری یره دونمش کیتمشدر .

(۱) بوندن صوکره ایسه « صقلیه » لیلر قتل ایلدکلری  
« عبدالله الاکل » ک برادری بولنان «الصمصام بن یوسف»  
ی اوزرلرینه امیرتعیین ایلمشلردر . حالیه که اطه ده اختلال  
واضطراب ، مزمن برحال آله رق برطاقم ارازل وادانی ،  
اشراف و امرانک یرلرینه کچمش اولدیغندن سوز بوسبتون  
ایاغه دوشمش ، نتیجه سی اوله رق ده هر طائفه بولندیغی یرده  
تفرد ایله مرکزدن یعنی «پارمو» ده بولنان صقلیه امارتندن  
علاقه لرینی کسمشلردی . پارمو نک اسمی او زمان بین  
الاسلام « المدینه » ایدی .

پارمو اعیان و اشرافی ایسه سیل اختلاله قابلمش  
اولدقلرندن « امیر صمصام » ی ده سریر امارتندن قالدرمشلر ،  
حتی حریفجکزی طیشاری به آتمشلر و یرینه «محمد بن ابراهیم بن  
المنه» بی تعیین ایلمشلردی . بو ذات ایسه موجود قائدلرک

(۱) « الشيخ شهاب الدين النويری » نک « نهایت  
الارب فی فنون الادب » نام کتابندن خلاصه آندی .

ك مشهورى بولنديغندىن امير تعيين ايدىلغىچەدە «القادر بالله»  
لقبنى وىر مشلردى . «عبد الله بن منكوت» نام قائد «مازر»  
طرابنش ، الشاقە و مرسى على « و ملحقا تئەدە حكومتى  
الىنە آلمشىدى . «ابن الحواش» دىە معروف اولان « على بن  
النعمة » نام قائد دخى « قصر يانى ، جرجنت و قصر نوبو » و  
ملحقا تئەدە اجراى حكومتە باشلامشىدى . « ابن المكلاتى »  
نام قائد دخى « قطانيە و سرقوسە » و ملحقا تئەدە حكومت  
ايلەمشىدى . بو حاللار ھىجرەتك ۴۳۱ سەنەسى وقوعە  
كەلسەدر . يوقارىدە اسمى كەچن « ابن النمة » عسكەر جەمىلە  
« سرقوسە » يە مستولى اولمش وارقە سندن « قطانيە » يە  
دە كىرەرك امىرى بولغان « ابن المكلاتى » نى قىل و شەھرى  
آلمشىدى . مقتول اولان « ابن المكلاتى » « ابن الحواش » ك  
ھەمشىرەسى « ميمونە » نام قادىنلە اولى ايمش . ميمونە نك  
دەرت آى اون كوف عدت مدتى ختامندە « ابن النمة »  
ازدواجنە طالب اولمش و برادرى « ابن الحواش » ك رضا سىلە  
عقد ازدواج ايلەمشىدى . ميمونە عاقلە برقادىن ايمش . « ابن النمة »  
بركون ايچكى ايچدىكى ائنادە زوجەسى ميمونە يە براختلافدن  
طولايى طارلمش و قادىنك قولندىن برطمار كسەلسىنى امر ايلەمش  
وامرى تەنفيذ اولنەرق ميمونە نك بازوسندن حىجامت طمارى  
آچامش وقان آقغە باشلامشدر . مقصد ايسە بو وجەابلە قادىنى

قتل ایلمک ایدی . دیرکن میموننه نك ابراهیم نام بیوک اوغلی  
وقعه یی خبر آلمش وهمان حکیملر جلی ایله زواللی قادینه خنزك  
طمارى باغلامش ونهایت ایلمش ، ای اولمشدی .

« ابن النمه » سرخوشلق بلاسی بیلمیهرك بویله برحالدله  
بولندیغنی مقام اعتذارده زوجه سنه بیان وندامت ایلمش  
ومیمونه ده زوجنك عذرینی کویا قبول ایله باریشمشلردی .  
برمدت صوکره « میموننه » برادری « ابن الحواش » ی  
زیارت ایچون زوجندن اذن آلمش وبرخیلی هدیه بهیه لرله  
« قصریانی » یه کیتمش ووصولنده زوجنك کندیسنه  
یابدیغنی برادرینه خبر ویرمشدر . بونك اوزرینه قائد « ابن  
الحواش » میموننه یی زوجنه اعاده ایتیمیه چکنه دائریمین ایلمش و  
بونى خبرالان « ابن النمه » ایسه زوجه سنی ایستمش ونهایت  
نائل امل اوله مدینی ایچون عسکر طوپلامش و « ابن  
الحواش » له حرب ایچون « قصریانی » اوزرینه حرکت  
ایلمشدر .

دیرلرکه « ابن النمه » جزیره نك اکثر بلادینی تحت  
اداره سنه الهرق حتی « مدینه » ده یعنی پالموده اسمنه  
خطبه بیله اوقومتغه باشلامشیدی .

قائد « ابن الحواش » دخی عسکرینی آلهرق « قصریانی »  
دن « ابن النمه » یه قارشى چیقمش وایکی عسکر پك شدتلی محاربه

ایلمش ، نهایت « ابن النمه » نك عسكری بوزلمش وفرار  
ایتمشیدی . ابن الحواشك عسكری دشمنلرینی تعقیب و  
یتشدکلرینی چاله قیلنج قتل وبقیه سیوفنی ده پریشان  
ایلدکلرندن « ابن النمه » یالکز قالمش وانتقام ایچون  
کفاردن استمداده کیتمشدر .

شویله که : هجرتك ۴۴۴ سنه سی « ابن النمه » قاین  
برادريله ایلدیکی حربده تکمیل قوتنی غیب ایتمش اولدیغندن  
« پالمو » یه دونمه رك طوغروجه « قالابریا » یه کچمش  
واوراده « ملیطوا » نام قلعه ده اقامت ایلین « القمط رجار  
بن تنقرد بن خیره » یعنی نورمان « قونت روجارو » یه التجا  
ایله عسکريله کلهجك اولورسه کندیسنه تکمیل « صقلیه »  
جزیره سنی تملیک ایده جکنی وعد وتأمین ایلمشدر .

اشبو « ملیطو » شهری وقتيله بربلده اسلام ایکن  
هجرتك ۳۷۲ سنه سی فرنکار محاربه ایله بونی ایادی  
اسلامدن سلب ایلمشلر واوزماندنبرو قلعه سنی تعمیرله ایچنه  
نورمانلریرلشمشلر ایلمش .

« ابن النمه » نك « صقلیه » ده صاحب نفوذ اولدیغنی  
بیلدکلری ایچون « قونت روجارو » ویدی عدد برادرلری  
برروایته کوره یالکز یدی یوز نفر فرنك عسکريله  
« قالابریا » دن اطهیه کچمشلر و « ابن النمه » خائی اوکلرنده



اوله رق اوغرادقلری یرلری واکثر بلادی سهولته استیلا  
ایلمش لر و بویله جه تا « قصریانی » به قدر کیشلر در . بوراده  
« ابن الحواش » ک عسکری ایله محاربه ایتمش لر ، نهایت  
بونلری ده مغلوب ایلدکلرندن « ابن الحواش » « قصریانی »  
قلعه سنه التجا ایتمش و « قونت روجارو » ده عسکرینی آله رق  
دیگر بلادی فتح ایچون « ابن النمة » ایله اورادن کیتمشدر .  
شخصی عداوتله اسلام قانی آقیتدقلرینه قناعت ایتمیوب  
ده انتقام دیه دین دشمننه التجا و بونلره دلالت و معاونتله  
وطن اسلامی کفارہ تسلیم و میلیونلرله امت محمدی اسیرایلین  
خائن دین و وطن « ابن النمة » ملعونی بیلمم که نصل توصیف  
ایتملیدر ؟

« ابن النمة » ملعونک « قونت روجارو » یی ، اوکینه  
دوشه رک « صقلیه » اطه سنه کتورمسی هجرتک ۴۴۴  
سنه سی شهر رجبنده وقوع بولمشدر . دیرکن « نورمان  
روجارو » اطه نک شهر و قصبه لرینه برر برر مستولی اولمغه  
باشلامش ، خصوصاً خرستیان عسکرک کیردیکی یرلده  
اسلامه یامدقلری قالماش ایدی . بو عسکرلر اسلامک انده ،  
آویجنده نه بولدیسه آلمش لر ، حتی خانه و دکان کبی املاکدن  
تجرید ایتمش لر و ممانعت ایتمک ایستیملری قتل و نه ایچون  
دیلملری ده مرحه جزیره خارجه طرد ونفی ایلمشلر در .

اخافه و ارهابك بودرجه سنی کورن عقلای امت ایسه کمال  
سرعتله خارجه ، بلاد اسلامه جان اتمشله و علما و صاحای  
اسلامدن پك چوقلری او تاریخده « تونس » ، اندلس  
و مصر جهتلرینه هجرت ایتمشلردر . بوندن سوکره « صقلیه »  
اسلامنك باشنه کتوریلن فجایع حکایه لرینی ایلری به تعلیق  
ایله وطننه خیانت ایدن کیمسه نك وقتیلله عربلر نزدنده اك  
آلچاق بر مخلوق اعتبار ایدلدیکنه دائر بروقه مشهوره  
تاریخیه بی عبرت ایچون شوراده نقل ایلیهیم . شویله که :

« محمد طلعت حرب » بلك تالیفی اولان « تاریخ دول  
العرب والاسلام » نام کتابك برنجی جلدینك ۲۳۳ نومرولی  
صحیفه سنده « حبشك مکه اوزرینه عسکر سوقی و وقعه  
فیل » فصلنده محرردرکه : حبش قیرالی « ابرهه الاشرم »  
کعبه بی هدم ایلمك ایچون مکه اوزرینه عسکر سوق  
ایلمشیدی . سببی ده « ابرهه » یننه مستولی اولدیغی زمان  
« ضنعا » ده بر کلیسا بنا ایتدرمش و ینلیلری کویا کعبه  
زیارتندن فراغتمله اشبو کلیساسنی کعبه قیلمغی مراد ایلمش  
ایدی . بوکا مخالف بولنان ینلیلردن بریسی بو کلیسا یه کیردرک  
کیجه بی کیچیرمش وحتی ایچنه دفع حاجت ایتمش اولدیغی  
خبر آلان « ابرهه الاشرم » مادام که سز بویله یاپدیکز ، بنده

کیده یم کعبه کزی هدم ایلیه یم دیه یمین ایلمش ایدی . بونک اوزرینه « ابرهه » بیوک براردو و مشهور « محمود »<sup>(۱)</sup> نام فیلمدن بشقه دها اون ایکی ده عادی فیلم ایله مکه اوزرینه یورو مشیدی .

« ابرهه » اردو ایله مکه یه تقرب ایلدیکنده قریش عربندن « ابو رغال » اسمنده بر ملعون وطننه خیانت بابنده دشمن اردوسنه مکه یه کیدن اک قولای یوللری ارائه یه دلالت ایلمشیدی . مکه یه تقریرلنده جمله دن اول بو « ابو رغال » ملعونی هلاک اولمش و بین العرب وطننه خیانت ایدنلرک ده برنجیسی صایلمشدر . بناء علیه بونک قبرینی عربلر طاشلامشدر ، صوکره لری ده وطن خائنی دیه هر کچن کیمسه بو قبری طاشلر ایمش . اودرجه ده کی اشبو خائن وطنک قبرینی طاشلامق اسلامده مناسک حیدن اولمشدر . عربلر قدیمده وطننه خیانت ایدنلری اک آچاق مخلوق عدایدلر و علامت تلغین اولمق اوزره ده قبرینی طاشلر لرایدی . اعتبار ایدنلر نه بیوک برعبرتدر دکللی ؟ شوراده استدراک قیلندن اولمق اوزره ده بر خاطره بیان ایده یم . شو یله که : عرب شاعرینک

---

(۱) فرنکلرک « Mamoth » دیدکلری بیوک بر فیلمک

معربی اولوب بونک جنسی شمیدیلر ده منقرض اولمشدر .

اذا كان جسمی من تراب وکلها  
بـلادی وکل العالمین اقاربی

### ترجھہ سی

مادام کہ اصل تو پراقدندر . ہر طرف وطم و ہر کس  
اقربامدر . دیدیکی زمانی آراسہ ق اخلاقک فسادہ کیتمش  
اولدینغی دوری بولورز . اخلاقنی غیب ایدن برقوم آراسندہ  
ایسہ خیانت جنایت عداولماز و امور عادیه صرہ سنہ کچن  
منہیاتک فاعلاری دہ جماعت آراسندہ خورکورماز . نصل کہ  
بوکون بزده ایچکی ایچنلر و قمار اوینایانلر مواخذہ دین  
مصون بولنملردر . ظن ایدیورم کہ فیکرلردہ خائن وطن  
جرمی کیچولمش اولدینغندن « ابو رغال » خائننک قبری یرینہ  
شیطانک قبری سوزی کیچمشدر . بزم حاجیلرک ہانکیسنہ  
صورارسہ کزسزہ حجدہ شیطانک قبری طاشلادیغنی  
سویلر ، نہ اصلندن نہ دہ فصلندن ارتق کیمسہنک خبری  
قلامش اولدینغنی بوسوزیلہ اثبات ایلردکلی ؟

بنجہ ، وطننہ خیانت ایدن « ابورغال » ک قبری خیانتنی  
تلمین ایچون طاشلادیغنی بیلن برحاجینک نظرندہ خیانت  
برجنایت اولور . مملکتنہ عودتندہ دخی خائن قبری



طاشلادیغنی همشهریلرینه حکایه ایلر و آرارلنده قصه دن حصه  
آلانلر چوغالیر . خدا جمله به هدایت ایلسون .

« ابن التمه » ملعونتك خصمندن انتقام آلق ایچون  
قوجان صقلیه اطه سنی میلیونلرله ساکن اولان مسلمانلریله  
براکده دشمن دینه دلالت و معاونتله پیشکش چک سنی تاریخ  
صحیفه لری عجبا نصل بر آغزله قید ایده جکدر ؟ سعی خائمانه سی  
اولمق اوزره اطه مسلمانلری دینلرندن و دیلرندن تجریده  
سبب اولمشدر . اطه دن قچه میان و حقیقه میان اخوان دین  
ایسه انک زسیون الارنده یا قتل و یا تنصیر ایدیله رک حساب و  
دفتر امت محمدن طرح اولمشلدر .


دیرلر که تاریخ بر تکرر دن عبارتدر . هجرتک ۲۱۲  
تاریخنده عسا کر اسلام « صقلیه » جزیره سنه کلدیکی وقت  
اوکلرنده اورالی « فیمی » نامنده بر دلیل موجود ایدی .  
اسلام حکومتی ، هجرتک ۲۱۲ سنه سی و میلادک ۸۲۲  
تاریخنده ، ربیع الاول آینه مصادف اولان حزیران ایچنده  
جزیره ده اجرای احکامه باشلامشیدی . هجرتک ۴۵۳  
تاریخنه مصادف بولنان <sup>(۱)</sup> ۱۰۶۱ سنه میلادیسنده « قونت

---

(۱) ایتالیا نجه « سیچلیا تاریخی » نام کتابک تحریرینه

کوره « نورمان روجارو » ۱۰۶۱ تاریخنده عسکر یله اطه به

روجارو « والقی عدد برادری بر آویج عسکر لریله اوکلرنده  
 یرلی مسلماندن قائد « ابن الثمنه » ملعونی دلیل ومعین اوله رق  
 « صقلیه » به کیرمش و اطهده کی اسلام حکومتک انتها سنه  
 یوتاریخ مبدأ اولمشدر . قلعه دأما ایچندن انیر . بوبابده  
 « لا حول ولا قوة الا بالله » دیرم .




---

کچمشدر . « نهایت الارب فی فنون الادب » نام کتابک  
 قولنججه ۴۴۴ هجریده یعنی میلادک ۱۰۵۲ سنه سنده « ابن  
 الثمنه » دلایتله « قط روجارو » وعساگری اطه یه کمشدر .

## ۷ کانون ثانی ۱۹۲۱

بوصباح او طه مده قالدیم . امیره حضر تلریله پالمو  
« دار الاثارینی » زیارت ایده جکزدن بو خصوصده معلومات  
ایدنمک ایچون موجود دلیلارمزی مطالعه ایلدم . پالمو دار  
الانارینه « Museo Nazienale » ملت موزه سی نامی  
ویرمشلردر . موقعی روما جاده سنده در . ایام عادی ده قبل  
الظهر ساعت اوندن بعد الظهر اوچه قدر و بازار کونلری  
ساعت اون بردن بعد الظهر اوچه قدر زیارتجی قبولی ایچون  
آحیق اولوب اعیاد رسمیه ده قبالیدر . بازاردن ماعدا کونلرده  
ایکی لیرا دخولیه سی واردر .

قبل الظهر ساعت اونه طوغرو امیره حضر تلریله آرابه  
سوار اوتلدن حیققدق ویکرمی دقیقه صوکره دار الاثارک

قپوسی اوکنده طوردق . دخول رسمی ویردکدن صوکره  
 قپوسندن کیردک . بوخانه اوچ قاتلی اسکی برنا اولوب دها  
 برنجی قپودن ایچرویه کیریلنجه انسان کنديسی قاهره نك  
 قدیم خانه لردن برینک برنجی حولیسنده ظن ایلر . سوقاق  
 قپوسندن ایچرویه کیریلنجه براینکنجی قپویه تصادف  
 ایدیلور . بوندن صوکره خانه نك سلاملق قسمنه کانیور که  
 اورنه ده کی حولیسی ، حالنجه کچوک برباغچه در . بونک  
 اورته سنده کوزل بر فسقیه سی ده وار . باغچه سنده  
 موز وبامبو مزروع اولدیغی کبی فسقیه سنده دخی مصرده  
 « قلقاس » دینلن غایت بیوک یپراقلی « کوله کهز » اوتی  
 زرع ایدلمشدر . اشبو برنجی حولیده بولنان اثار هب قرون  
 وسطی یه مخصوص هیکل لردر . بوراده کوردیکز اثارک  
 مفرداتی خبرورمکده قارئلم حضراتی ایچون بر فائده  
 ملحوظ اولدیغندن یالکز دیرم که میلادک بیک تاریخندن  
 بیک بش یوز تاریخنه قدر یاپلمش اولان طاش  
 هیکل وسائرینی بورایه صف صف ترتیب ایلمش لردر .  
 بورادن برقیوایله ایکنجی حولییه کیردک . بوراسی برنجی  
 حولنک اوچی قدر بیوکدر . بزم مصرک اسکی کبار خانه لرنده  
 حرم دائره سنک حولیسی ده تماماً بویله اولور . کذا بو حولییه  
 دخی اون بشنجی واون التنجی عصر لره مخصوص اثار وضع



ایده‌مند. فرنگ‌کرده « Renaissance » دینان دور تجدد. عائد بوراده خیلی اثار موضوعدر. بونلرک جمله سی صنایع نفیسه نك هيكل تراشی قسمنه عائد کوزل بر نمونه مکتبیدر. بوراده کی بر قیودن اوچنچی بر حولی یه کچدک . بوراده دخی پالمودن بشقه اطه نك دیگر شهر لرندن آلتوب کتورلمش پك چوق اثار سیرایلدک .

آلت قاتده حقیقه پك چوق قیمتی اثار موجود اولوب صنایع نفیسه ایله علاقه دار بولمان ذوات ایچون آیلرله ، سنه لرله سیرینه طویه میه جقلری شیلدر . امیره حضر تلرینك مراقی ، پالموده بولمان اثار عربیه یی کورمکدی. صالونلری محافظه یه مأمور اولانلردن برینه اثار عربیه یه مخصوص صالونك زده اولدیغنی صورددق . برنجی قاتده کی صوك صالونده بولندیغنی خبرویردی . همان برنجی قاته حقیقه رق موجود دهلیزده کی اثار ی و بوندن صوکره صالونلره آیرلمش اولان ادوات منزلیه وسائره یی و خصوصاً قدیم و جدید یاغلی بویا لوحه لرینی برر برر سیرایلدکدن صوکره « Sala Araba » تسمیه ایلدکلری اثار عربیه یی محتوی او طه یه کیردک . بوراسی او یله اکینه بوینه دینه جك قدر بر صالون اولمایوب عادتاً کچوک براوطه در . دروننه وضع ایده‌مش اولان اثارک اک چوغی ده بر قیمت تاریخیه یی حائز اثار عربیه دن دکلدر . بونلری

« La covelli » لاقوولی برادرلر پالرمو انتیقه خانه سنه  
هدیه قاهره دن ارسال ایلمشدر . بونلرایسه صنایع نفیسه  
عربیه دن دواکر و طوغرامه جی ایشلریدر که ینه کمدیلرینک  
یازدقلرینه کوره میلادک بیک اوچ یوز ، درت یوز ، بش یوز و  
یدی یوز تاریخلرنده اعمال ایدلمش شیلردر . بونلرده آلیچیدن  
معمول ورنکلی جاملر اوتوردلمش پنجره قفسلری و چکمه  
اغاجلردن مرکب مشربیه دینلن بیوک قفسلر و شکل هندسیده  
اعمال ایدلمش قندیل آصمغه مخصوص چرخ فلک و بویالی  
ویالدیزلی و آلچی ایله قبارتمه لی تاوان پارچه لری و فیل  
دیشیله ایشلمه لی صندالیه و برچکجه و اوزری فیل دیشی و معدن  
ایله ایشلمش کچوک برصندوقدن عبارتدر .

برنجی دولابده دخی کیلدن معمول و فرونده پیدشمش  
واوزرینه غایتله کوزل رسملریا پلمش بر چوملک و مینالی  
بیوک برطابق موجود اولوب اسپانیا عربلری طرفندن آلتون  
رسملر و عربجه یازیلریلریشدر . قیرمزی توپراقدن معمول  
ساقسیر دخی واردر . بونلردن صوکره موجود اولان اثار  
عربیه پالرمو کلیسا لردن آلمش دینی شیلردر .

بونلردن بشقه بر مقدار ده برونزدن معمول ادوات بیتیه  
واردر . بوراده ینه بر دولاب ایچنده موضوع بیوک  
برصاقسی موجود اولوب طرزی و شکلی و رسمی هب

اسپانیا عربلرینه مخصوصدر. بونی ایسه « Mazara » مازر شهرندن کتورمشلردر. بونلردن صوکره برمزار طاشی موجود اولوب اوستنده یونانجه وآلمنده عربجه ایله خرسیان بولنان صاحبنک اسمی قپارتمه اوله رق یازلمشدر.

برمزار طاشی دهها موجود اولوب اوزرنده لاتین، یونان و عرب و یهودی یازیلریله صاحبنک اسمی یازلمشدر. یازینک ترجمه سی شویله در. « سیچلیا وایتالیا قیرالینک راهبی « Grisando » « غریزاندو » نک والده سی « Anna » « آنا » تاریخچی ده ۱۱۴۸ در.

ایشته بوراده حسرتلرله مشاهده ایلمک ایستدیکمز صقلیه اسلامنک اثار باقیه سندن برشی وارایسه اوده بوندن عبارتدر. اثارک قسم اعظمی قاهره دن هدیه گیش اولدیغی حالده اوده فلان خانه نک ویا فلان ذاتک دیمکله تاریخده قیمتی تزید ایدیلن آثاردن دکلدر.

باقیسی دخی کلیسا ادواتی و مزار طاشیدر که صقلیه نک مسلمان عربلریله علاقه سی بیله یوقدر. صقلیه جزیره سنی علم و کمال و عمارتدن محروم بوله رق یاریم عصر ایچنده جنت حالنه کتورن مسلمان عربلرک اثاری عجبا نره یه کیتمشدر؟ اطهده بولندقلری ایکی بیچوق عصر ایچنده یونمه طاشدن بنا ایلدکلری بیکرله جامع و مسجدلری و بونلرک یازیلی لوحه لری،

امرایه مخصوص سرایلر و اعیان و اغنیا قصر و خانه لری  
ایچنده کی فن و صنایع عربیه ثمره سی اولان ادوات و اساس  
یئتمیه و مدرسه لرنده کی یوز بیکرله خط دست کتب دینییه  
و فنییه و سائره بقایاسی زرهیه کورتورلمشدر ؟ امرا و اغنیا و علما  
و صلحا قبرلرینک یازیلی طاشلری نه اولمشدر ؟ نه اوله حق ؟  
معابد ، مدارس ، مبانى و قبور هب یا قلمش ، بیقلمش کولی  
هوایه صاویرلش ویرلری ده سوروله رک آریه اکلشدر دیرم .  
زیرا زمان قرون وسطی ایدی . جبراً تنصیر ایدیکن مسلمانلرک  
اوزرینه تفتیش ایمان نامیله انکزیسیون رهبرانیه ده مسلط  
اولمشیدی . دینی وار ، دلی وار . النده قرآنی ، قابنده  
ایمانی وار مسلمانلری دکل یا لکیز کافر ، بتپرست ملعونلردیه  
تلعین ایدن لاتینلر عجباً اوزوا لیلره نه لر یا نمازلر ؟ اثار باقیه  
لرینی نه دن بیقمازلر ، یا نمازلر و یوق ایتمزلر ؟ صره سی کلدکجه  
خبر ویره جم کی صقلیه ده کرک شهر و کرک کویلرده کندی  
خانه و کاشانه لرنده ساکن بولنان اسلامی ، نورمانلر تحت  
حکمرینه آلدقندن سوکره قتل و نفی و تنصیر ایله اسلام عرقنی  
محوایلشدر و بوندن سوکره اموالی مصادره ایله ایتالیادن  
آقین آقین کلن خرستیان مهاجرلره ویرمشدر و وجوامع  
و مساجدی ایسه بیتخانه لرده دهها بدتردیه ویران ویر ایله



يکسان ايلمىشلىرى و مزارات و مراقد مبارکيه قدر جمله قبورى  
دخى يوق ايتىمىشلىرىدر .

قرون وسطى متعصبلىرىنىڭ الارىندە يوق ايدىلن مېمانى  
و سائىرە اسلاميه نىڭ پىك طبعيىدىر كە آلات وادوات مصنوعه لىرى  
وطاشلىرى اوزرىندە بولغان يازىلىرى دە تىكىل مھويىلىشىدۇر .  
علوم و فنوندى خواجه لىرى ، معارف و صنايعده استاذلىرى  
بولغان عربلىرىك اثار مدنیه سنى مھويىلىرىك اوروپا تمدنى اوزون  
مدت تاخير ايلەللىرى كىندىلىرى ايچون برعاردىر . تاريخلىرى  
صحيفه لىرىنى صقلىه مسلمانلىرىنىڭ وقوعاتىدىن اسير كەللىرى ايسە  
عار ايچىندە برعاردىر .

اميره حضرتلىرى بوندىن سوكره دار الاثارىك قالان قات  
و صالونلىرىنى زيارت ايتامىك ايتىدى . تشهد مقدارى اولسون  
بقية اثارى سيرايلمىكى رجا ايله صالونلىرى كىزىمك باشلاشق .  
برنجى قانده حقيقه پىك چوق اثار جمع ايدىلىشىدۇر . امكن  
اثارىك اكثريسى بىك دىرت يوز ودها سوكره لىرىنە منسوب  
شىلىرىدۇر . اطه دە بولمىش اثار يونانيه دن دخى بوراده خىلى  
شىلىرى كوردىك .

چناق وچوملىك كى اثار پىك چوقدر . تونجىدىن معمول  
آلات وادوات مجموعه سى دخى زىكىنىدۇر . بوندىن سوكره  
ايسە ايكنىچى قانە چىقدىق . آرى آرى اسملىرى اولان اثار

صالونلری برر برر کزدک . بوراده خیلی قره قلم وصولی  
ویاغلی بویارسملری سیرایلدک . بیوک لوحه لرك اكه مکمل  
وبهالیرلی هب دینی رسملردر . مریم انارسملرینک انوعانه  
نهایت یوقدر . اغاجدن اویمه وسائر انار ایچونده بوقانده  
برصالون وارددر .

اوچنجی قاتی ده زیارت ایلدک . بوراده سیچیلیانک  
اوافق تفک تحف اشیاسی جمع ایدلمشدر . برصالونده دخی  
مختلف سیالر و سیچیلیا اعیانندن بعضلرینک نصف هیکلری  
جمع ایدلمشدر . براوطه ده دخی سیچیلیا ده یدی یوز سنه  
میلادیسنده یشامش اولان برقامیلیا نک یاتاق اوطنه سی  
کوسترلمشدر . بوندن صوکره ایسه ال ایشامه لری ایله تنتمه لره  
مخصوص براوطه موجوددر .

بووجه ایله « پالرمو » ملی موزه سنی تکمیل سیرایلمش  
اولدق . کلدیگمز دهلیز دن کچوب قاتلری برر برر اینهرک  
سوقاق قبوسندن روما جاده سنه چیققدق . آرابه مزه  
یینه رک اوتله کلدیگمز وقت ساعت بره کلشیدی . اوکله  
طعامزدخی حاضر لاشیدی . بعد الطعام بقیه کونمی اوطنه  
مده کچوردیم . اشبو دار الاناری زیارتدن اوکرندیگم  
درس شودر دیرم . « عقائد نامنه حقایق قربان وخیالیات  
یولنه مادیات فدا ایدلمشدر »

## ۸ کانون ثانی سنه ۱۹۲۱

صقلیه اطه سنك محصولات زراعیه سیله معادن ،  
کوکرد ، معارف ، صنایع و تجارتسه دائر شمدی به قدر  
ایدینه بیلدیکم معلوماتی بوکون محترم قارئلریمه بیسان ایتمك  
ایسترم . بواطه اقلیم جهتیله اوروبادن زیاده افریقا اقلیمنه  
مشابه بواندیغندن کونشی قوتلی اولوب صولری ده برکتلیدر . قابل  
زراعت اراضیسی کافیدر . حالبوکه ینه کندیلرینك دیدیکی کبی  
حقیه زراعت ایدلیور . سببی ایسه اطه ده انقلابات سیاسییه  
عصرلرله دوام ایلدی دیورلر . بئم ظنمیجه احوال سیاسییه  
لرینك انقلابندن زیاده معارفسزلك ایله برابر قتولك رهباننك

اهالی اوزینه اولان نفوذ متحکمانه لری سبب حقیقی  
عدایدلمیدر .

صقلیه ده اسلام زمانی نقل ایدن کتب عربیه و افرنجیه نك  
قولنجه اطه نك اولجه غیر مسکون اولان ایچرولرینی بیله  
عربلر معمر ایلیمش لر و زراعت جهتمده هر طرفی باغچه  
حانه قومش لردی . تکمیل افریقا و براز ده اوروپا ايله  
ایلدکاری تجارتلری بوزندن ده پك زنکین اولمش لردی . هله  
بارمونك، اندلسده قرطبه و مصرده قاهره شهرلرینه معادل  
کیش اولدیغنی و هر طرفی مساجد ، جوامع ، مزین و  
مطنطن خان ، خانه و کاشانه لرله طولمش بولندیغنی اوزمانك  
عرب سیاحلری صایه صایه بیتیره میورلر .

نه ایسه ایتالیا زراعت نظارتك ۱۹۱۴ سنه سی ۱۲  
جزیران و ۹ مارث و ۷ کانون نانی تاریخلرنده نشر ایلمش  
اولدیغنی سیچلیا زراعت و صناعت و تجارتی احصاً بیاننامه  
سندن خلاصه ایدرك بروجه آتی جدولی شورایه درج  
ایدیورم . سیچلیاده بغدادی کبی حبوبات مزروع اولان  
اراضینك مقداری ۶۷۶ ۹۰۰ هکتار<sup>(۱)</sup> اولوب آلمان محصوله

(۱) « Hectare » برهکتار عرضی و طولی یوز مترو  
اراضی دیمکدر . « Hectolitre » برهکتولیتزده یوز لیتردر .



ایسه « ۵۰۷۸۰۰۰ ر » قنطاره بالغ اولمشدر . مصر دارایی  
 مزروع بولنان اراضی ۴۲۰۰ ر هکتار اولوب « ۳۴۰۰۰ »  
 قنطار محصول آلمشدر . پنج مزروع اولان اراضی ایسه  
 یالکز ۳۴۰ هکتاردردر . محصولی ایسه « ۵۰۵۰۰ ر »  
 قنطاردر .

پورتقال وماندارینا ولیمون اشجارینک اشغال ایلمش  
 اولدیغی اراضینک مقداری « ۳۵۹۰۰ ر » هکتاره بالغدر .  
 محصولی ایسه « ۶۲۹۲۰۰۰ ر » قنطاردر . زیتون اغاجلری  
 ده « ۴۸۳۰۰ ر » هکتار اراضی اشغال ایدوب آلمان زیتون  
 یاغی ایسه « ۲۷۱۰۰۰ ر » هکتولیتره بالغ بولمشدر . اوزوم  
 باغلرینک اشغال ایلدیکی اراضی دخی « ۱۶۷۰۰۰ ر » هکتار  
 اولوب بونک شراب محصولی ایسه « ۴۶۹۷۰۰۰ ر »  
 هکتولیتره بالغ بولمشدر .

صقلیه موایشسندن برنوع اوزون بوینوزلی اوکوز و  
 اینکلری و آق کچیلری پک مشهوردر . بزم مصرده اولدیغی  
 کبی بومملکتهده دخی سودجیلر اینکلرینی و کچیلرینی اوکینه  
 قاتهرق باغیره باغیره سوقاقلرده سودلرینی صاتیورلر . رسملرده  
 دخی کورلیدیکی کبی اینک و کچیسنی الندهکی اولچکینه صاغار  
 و مشتریلرینک بالقونلردن ایپله صارقیمدقلری سیتلرنده کی

قابلیت نه بوشالدرلر . سیچلیا نك قوتلی بارکیر و قاطرلی  
واوزون قویروقلی برنوع مرکبلی دخی مشهوردر .

سیچلیاده معادن مختلفه دخی موجود ایسهده چوقدن  
عربلر زمانندهکی اهمیتنی غیب ایلمشدر . دیمرمعدنی متروکدر .  
شمیدیلده الك مهم معدنلری کوکرددر . بومعدن « قاتانیا »  
جوارندن باشلایهرق اطه نك بر چوق اراضیسی قاپامشدر .  
کوکرد موجود اولان اراضینك « Licata e Nicosia »  
« لیقاتانیا لیه نیقوزییا » آراسندن عرضی سکسان بش  
کیلومترودن طقسان کیلومترویه قدردر . « Gibellina »  
« Centuripi » « جیبیلینا ایله چنتورپی » آراسندن طولی  
یوز التمش کیلومترودن یوزیتتمش کیلومترویه قدردر . اشبو  
اراضی ء واسعه نك نصفندن براز زیادهسی ایشلدیلهرک کوکرد  
چیقارلمقدهدر . حرب کیردن مقدمی یعنی میلادك ۱۹۱۴  
سنه سنه قدر هرسنه سیچلیادن ۲۶۰ بیك طونولاته کوکرد  
اخراج ایدیلر ایمش که بونك قسم اعظمی آلمانلر آلیرلر ایمش .  
کوکرد اخراجاتی اوزمانلر سنه ده یکرمی الی میلیون  
ایتالیان لیراسنه یعنی برملیون مصر لیراسنه بالغ اولورمش .  
کوکرد اوجاقلرنده ایشلین عمله نك اکثریسی کیچوک  
چوجقلر ایمش . بونسلرک ده کوکرد پارچه لرینی اوموزلرنده  
نقل ایلدکلرندن اون کیشیده اوجنك بیویه مدکلرینی وشکلی

بوزوق اوله رق قالدقلىنى ايتاليان ارباب قلمى شكوا بانبده  
يازبورلر و حكومتلرندن چوجقلىك كوكورد معدنلرندە  
ايشلمكدن منع ايدلمسنى طلب ايلبورلر . كيم ديكار ؟ . .

معارف جهتنى صورما يگز . ۱۸۷۵ احصا سنده اهاينك  
يوزده « ۸۵ و ۲۶ » نفوسى او قومه يازمه بيلمز ، اميار اولديغى  
كوستريور . صوك احصا كه ۱۹۹۱ سنه سى ياپلمشدر . بونده  
ايسه يوزده « ۸۸ و ۷۱ » نفوسك امى اولديغى ميدانه  
چيقمشدر . حالبوكه ايتاليا قانوننده تعليم جبريدرديه يازيليدر .  
ايشتمدكه كوره معارف نظارتى يالكرز معلملى تعيين ايدرك  
معاشرلى ده بلديه لره تحمىل ايلرايمش . حالبوكه بلديه لر  
مصرفلى چوق ايرادلى آز دائرلر بولندقلرندن معارف  
جهتمده صبرى اولمغى هر كسه بول بول توصيه ايلمكدن  
چكمنزلرايمش .

سيچلياده پك مكل دكل ايسه ده ينه مناسب ارايه  
بوللى موجوددر . دميربوللى ايسه بوجه آتيدر .

اولا — پالمودن — ترمى — سانتا قاتارينا —  
قاتانيا — مسينا بيوك خطلىدر .

ثانياً — مسينا — باتى — چردا — خطيدر كه برنجى  
خطه متصدر .

ثالثاً — پالمو — روققا پالموبا — جرجتی —  
پورتو امپه دو قله خطیدر .

رابعاً — سانتا قاتارینا — قانیقاتی — لیقاتا خطیدر .  
خامساً — قاتانیا — سیراقوزا — مودیکا — لیقاتا  
خطیدر .

سادساً — قاتانیا — والساویا — قالتاجیرونه خطیدر .  
سابعاً — چیرقومتنیا — خطیدر .

ثامناً — پالمو — قورلیئونو خطیدر .

تاسعاً — پالمو — القامو — ترابانی خطیدر .

عاشراً — قالداده — قانیقاتی شعبه سیدر .

سیچلیاده دهها نیجه بلاد واردر که دمیروالرینه  
محتاجدر .

اطه نك الك بیوك شهری و مرکز اداره سی بولنان  
« پالمو » <sup>(۱)</sup> آلتی دائرویه منقسمدر . بونلرایسه

(۱) پالموده یونانلر ساکن ایکن اسمنه «Panhomos»  
پانوموس و صوکرلری «Palermo» پالمونامی ویرلمشدر .  
عربلر زماننده «پالم» یا خود «پالم» و بین الاسلام «مدینه»  
دیرلرایمش . بوکونده پالمولی ایتالیا نلر ایسه «پالمه مو»  
دیه تلفظ ایدیورلر .



|                |                |
|----------------|----------------|
| Palazzo Reale  | سرای قرالی     |
| Tribunale      | محکمه          |
| monte di Pieta | امانت بانقه سی |
| Castellammare  | قلعه البحر     |
| Molo           | ایسکله         |
| oreto          | وادی العباس    |


بونلردن بشقه « Cuba » قبه و « Zisa » عزیزه  
 دائره لری ده آروجه بولنیور . اوکله طعامندن صوکره امیره  
 حضر تلیله چارشویه کیتدک . تحفجی دکانلرینی کزدک .  
 یرلی ایشی اولمق اوزره کوزه چارپار برشی بولوب ده  
 آلهمدق . آثار عتیقه بیع ایدر ایکی بیوک محلی کزدک . ینه  
 برشی بولهمدق . اجنبی کبار سیاحلرینی ممنون ایده جک  
 بر صنعتلری یوقدر . پالموده بردار الفنون و بر چوق ده مکتبلر  
 موجود اولدیغی حالده سیاحلرک خوشالانوب آله جغی تحف  
 و کبار برشیلری یوقدر . آرایه صوره بر تحفجی بولمق که :  
 بوده ماندارینا قبوغندن کچوک قوطولر یاپیور . تحف دیه  
 یونلردن درت قوطو آلدق . هر بر قوطو ایچون اون ایکی  
 یچوق ایتالیمان لیراسی آلدیلر .

چارشو و بازار لرنده کی امتعه تکمیل آلمان وامریقا دن  
 کتور لمشدر . شهرک اخراجاتی لیون و پورتقال وماندارینادر .

بونلرده کاغدلره صاريله رق صندوقلانيور واکثریسی امریقایه  
کوندریلیور ایش .

خلق قسم اعظمی بالیقجی ، قایقجی و آراهجی کبی  
عادی ایشله اتمکرینی چیقاریورلر . قیافت عمومیه خلق  
درجه فقرینی کوستریور . طبیعیدر که بو طبقه معارف جهتمده  
دخی فقیردرلر . ایپسز صاپسز لرنک حسابی یوقدر . کوزدن  
سورمه یی چالیورلر . برده شهرده رهبان رهبان اوستنه .  
سوقاقلرده سورو سورو کزیورلر . امور دنیویه ایله اشتغال  
ایتمک لرندن اعاشه لری ایسه ایشلین اهلینک بیوننه در .

اقشام بزم اوتلده بیوک بربالو وار ایدی . بعد الطعام براز  
رقص سالوننه کیتدم . اوراده قلمه گلز نه لر کورمدم ده  
نه لر ! . . .



## ۹ کانون ثانی سنه ۱۹۲۱

بوکونیکی تجمعاتم هب «Messina» مسینا شهرینه دائر  
اولدی . عربلر زماننده اسمنه تشدیدلی سین ایله « مسینی »  
دیورلر . بوکون « مسینا » غایت کوزل وایشلک برلیماندر .  
ایالت مرکزیدر . صوک احصاً سنه نظراً « ۱۴۷۱۰۶ »  
نفوسی وارددر . شهر ، اطه نک شرق شمالی گوشه سنده  
ومسینا یوغازی اوزرنده و قالابریا ایالتنک قارشوسنده در .  
اداره اسلامیه ده ایکن مسینا نک ثروتی و معموریتی  
عرب کتابلری بیتوره میورلر . دیورلر که « مسینی » شهری  
اطه نک شرقنده و طاغلری دخی غربنده بولندیغندن پک

کوزلدر . سواحلی خوشدر . اراضیسی غایتله برکتلیدر . پک  
چوق باغ و باغچه‌لری و پک لذیذ میوه لری واردر . آقار  
صولری اوزرنده خیلی دکیمنلری بولنیور . مسینی جزیره  
نک اک معتبر شهرلرننددر . لیانی پک مهمدر . شرق و غربدن  
پک چوق تجار کمیلری کلیر و اطرافه کیده‌جک اولان  
یولجیلر هب بوشهرده طوپلانیر . چارشولری بیوکدر .  
مئاعلری ایسه پک اعلا ورواجلیدر . طاعلرنده دمیر معدنی  
موجود اولوب ایشاندیکی ایچون ده جوار شهرلر دمیرلرینی  
مسینی دن آلیرلر . لیانی پک ای اولوب رنجتمیلری مناسبیتله  
اک بیوک سفینه بیله اولسه ینه کناره یاقلاشور و بر ایسکله  
ایله کمیدن همان قاره‌یه چیقیلیر . مسینی بوغازی بوراده بولنوب  
قارشوسنده کی « قلوریة » قالابریاه بو بوغازدن کچیلیر .  
بوغازده ایکی طرفدن کلن صولر بری برلریله مصادمه  
ایلدکلرندن کمیلر اکثریا تهلهکه‌یه اوغرارلر . بوغازک طولی  
اون و عرضی اوچ میلدر . بوکونیکی اولچی و حساب کوره  
« مسینا » بوغازینک اک طار محلی ۳۲۰۰ مترودر .

صقلیه شعراسی مسینا مدخنده خیلی شعرلر دخی  
یازمشاردر . صقلیه‌لی احمدلیس نام شاعر

« من ذا یسینی علی مسینی

نفسی بها فی عقدہ اتسمینی »



« مسیناده بنمله اقشاملیه جق اولان کیمدر ؟ طقسانلق اولدیغم حالده کوکلم ینمه مسیناده در « دیور . عرب مؤرخلرینک قولنججه حکومت اسلامیہ زماننده « مسینا » نك مقابلنده المشهور اولان ایسکله « ریو » شهری ایمش . ظنمجه « Reggio » اوله جقدر . عربلر « قالابریا » یه سوق عسکریلرنده ینمه بو « ریو » دن قارده چیقدقلرینی یازیورلر . اسلام حرب کیمیلری مسینانک محافظه لی لیماننده قیشلارلر ایمش . بووجه ایله هم « قالابریا » دهکی اسلام مستعمراتنه قره قوللق ایدرلر هم هر سنه نیشان آییندن اعتباراً باشلایان دکر محاربه وغز الرینه نقطه استناد اتخاذا ایلرلر ایمش .

کتابک اون آلتنجی صحیفه سنده اسمنی ذکر ایلدیکم اندلسی سیاح « ابن جیر » میلادک ۱۱۸۶ سنه سنه مصادف بولنا هجرتک ۵۷۷ سنه سی مسینایه کلمش و سیاحتنامه سنده بوراسنی ذکر ایلهمشدر . معلوم اولدیغی اوزره نورمانلر تاریخ مذکور دن چوق اوللری صقلیه جزیره سنی تکمیل استیلا ایلهمشلر ایدیسه دهها اسلام عرق اطه دن بوسبتون کسلما مشیدی . انجق اطه ده اسلامک بقیة الباقیه سی خور و حقیر بر حالده جان سورومکده ایدیلر . ابن جیرک مسینا حقنده یازمش اولدیغی صحیفه لک ترکیجه سنی شوراده خلاصة قائلریمه لوقویه یم ده اسلامک اوزماننده نه

حاله کیش ایدیکنی کوریکز. ایشته «ابن جبرالکسانی» دیور که :  
 — مسینا شهری خرسیان تاجرلرینک اجتماع ایدکلی  
 بریردر . هر طرفدن بحراً بورایه کلیرلر . پک چوق متاعلی  
 بولنوب فیائی ده غایتله اوجوزدر . مملکت ظلمات کفره  
 مستغرق اولدیغندن ارتق بوراده مسلمانلره یرقالماشدر .  
 مملکت سراپا اهل صلیب ایله طولمشدر . انواع مناهی پی اجرا  
 ایدورلر . غریب برانسان بوشهرده طورهماز . جادهلری  
 ککیش وکوزلدر . راحتجه یشامق ایچون واسطه لر پک  
 چوقدر . امنیت عمومیه سی کالندهدر . شهر ارقه سنی پک  
 کوزل برطاغه ویرمشدر . اوکنده دخی دکز موجوددر .  
 لیمانی دنیا نك اك ای لیمانلرندن بریسیدر . زیرا اك بیوک  
 برسفینه بیله ال ایله طوتله حق درجه ده قاره یه یقین طوره  
 بیلور . قاره دن اوزادیلان برایسکله ایله کمی به چیقلیور .  
 حتی ارقه لری یوکللی حمالر بیله بوایسکله دن کمیره کیریورلر .  
 مسیناده کمی به بینمک ایچون انسان اصلا قایقه محتاج اولماز .  
 کمیلرک یوکلرینی دخی قایقلرله دکل حمالر واسطه سیه  
 تحمیل ویاتفریغ ایدرلر . شاید بعض کمیلر ریخته مه باقلاشمیه  
 رق اوزاقده طورمشلرسه اوزمان قایقلره محتاج اولیورلر .  
 « مسینا » شهرینک قارشو سنده « ریو » اسمنده کچوک  
 برشهر موجوددر . محصولات ومیوه جهتلرندن غایتله برکتلیدر .

انجق چلیا پرستله طولودر . مسلمانلر بونلرله برابر یشامقده درلر . حکومتلری مسلمانلرله اییدر . املاک و اراضیلرینی الیرندن آلامشدر . شو قدر وار که مسلمانلره ویرکولر قومشارو سنهده ایکی معلوم موسمه بو ویرکیاری حکومته ویرلر . حالبوکه مسلمانلر واسع اراضی امتلاک ایده مزلر . الله تعالی یاردیمجیلری اولسون و صوکنی خیر ایلسون . مسینا نک طاغلری تکمیل میوه باغچه لریدر . اما و آریک و فندق و سائر آغللری پک چو قدر . آرتق مسیناده چوق مسلمان قالمشدر . قالان ایسه بر مقدار اصناف کرو هیدر . بونک ایچون بورایه کلن بر مسلمان مدت مدیده اقامت ایلمکی سومز .

صقلیه نک بایتختی اولان « بالرمو » شهرندن صوکره مسینا شهری مشهوردر . اطه نک قیرالی « غلیام » ( غولیهلمو )<sup>(۱)</sup> در . بو قرال پک عادل بر ذانددر . مسلمانلردن معیتنه مأمورلر آلمشدر . سراینده حرم اغلری قوللانیور . انجق بونلر اسلامیتنی اظهار ایده میوب جمله سی ظاهراً خرستیان

(۱) ابن جبیرک اطه نک قیرالی « غلیام » دیدیکی میلادک ۱۱۶۶ تاریخندن ۱۱۸۹ تاریخنه قدر سیچلیاده حکومت لایدن « Guglielmo II il buono » ، « ایکنجی غولیهلمو » در که « ابی آدم » دیه معروفدر .



بولنیورلر ایسه ده ینه شریعت اسلامییه ایله عمل ایدیورلر .  
 قیرالک ، مسلمانلره امنیت و ار . بونک ایچون ده جمله خدمه  
 سنی مسلمانلردن انتخاب ایلمشدر . حتی کندی خصوصی  
 مطبخنده کی مدیری بیله مسلماندر . برچوق ده سیاه عرب  
 کوله لری واردر . سیاه کوله لره ده رئیس ینه  
 کندیلرندندر .

قیرالک وزیر و مأمورلری هب کنج و دینج مسلمانلردندر .  
 بونلردن پک چوق کیمسه لر معیتنده و خصوصی ایشارنده  
 بولنیورلر . بومسلمان مأمورین غایتله مفتخر کسوله لر اکتسا  
 ایدرلر . ایاق قابیلری دخی پک سوسلیدر . قیرالک پک چوق  
 سرای و باغچه لری بولنوب از جمله پایتختی اولان پالرموده  
 درلو باغ و باغچه و سرایاری واردر « مسینی » ده دخی دکزه  
 ناظر بر اق سرایی واردر . قیرالک سرایلری ایچ اوغلانار  
 و جاریه لر ایله طولیدر . خرستیان حکمدار لرینک هیج  
 بریسی دبده و سلطنت و رفاه و سعادتده بوقیراله بکزمزلر  
 بوقیرال اجرای سلطنت و تنظیم قوانین و تقسیم مراتب و اظهار  
 عظمت مملکتده ملوک و سلاطین اسلامی تقلید ایدیور . معیت  
 قیرالکسنده اطبا و منجملر بولنوب بونلره زیاده بیله اعتبار  
 و احترام ایدیور . حتی کندی مملکتندن بر اجنبی طیب  
 و یامنجمک کچمکنده اولدیغنی خبر آلیرسه همان آیفونمسی



امرایله رغبت ایلدیکی هر نه ایسه ویریه رك مانمکنده  
ابقا ایلور .

قیرالك عجائب حاللرندن بریسی ده عربجه او قومه و یازمه  
بیلیمسیدر . معیتی رجالندن اولان بر مسلماندن ایشتمیکه  
کوره قیرال « الحمد لله حق حمده » جمله سنی ذاته عنوان  
اتخاذ ایلمشدر . سراینده بولنان جاریه و او طه لقلری ایسه  
هب مسلمان قیزلریدر .

قیرالك خدمتکار لرندن « یحیی بن فتیان الطراز » نام  
ذات که سرایك التون صیرمه کشیدر . دیدی که : سرایه بر  
خرستیان فرنك قیزی کیرسه ایچریده کی مسلمان جاریه  
لك الیه مطلقا مسلمان اوله رق سرایدن چیقار . حالبوکه  
قیرال بوجاریه لك مسلمان بولندقلرندن خبری بیله یوقدر .  
بوقادینلر زیاده سیله خیر و حسنات صاحبدرلر . ینه بوذات  
خبرویردی که : برسنه جزیره ده دواملی زلزله لر وقوع  
بولمشیدی . قیرال زلزله دن زیاده قورقش اولدیغی حالده  
سراینده کی قادینلرله ایچ اوغلانلری طرفندن الله و پیغمبرینك  
اسملری ذکر ایلدیکنی کمال حیرت و دهشتلرله ایشتمش ایسه  
ده برشی یامیه رق بویله دهشتلی بروقتده تسلیه روحی ایچون  
هرکس کندی اعتقاد ایلدیکی معبودینی ذکر ایلسون  
دیشدر .

دولتتک اعیانی واک قیستلی مأمورلری بولنان کنجیله  
مسلماندرلر. بونلرک ایچنده نائل اجر و ثواب اولمق ایچون آیلرله  
اوروج طوتانلری بیله موجوددر. الله رضاسی ایچون صدقه لر  
ویزر و قول آزاد ایلر و کچوک چوجقلری تربیه و بیودکارنده  
زویج ایدرک غریق انعام واحسانلری ایدرلر.

« مسینه » شهرنده « عبدالمسیح » اسمنده مملکتک  
وجوه و اعیانندن معدود برذات طانیمشیدق. بوذات بزّه زیاده  
سیله اکرام و انعام ایلدی. برکون خانه سنده تنه اجه بولندیغمز ائنده  
کندیسنک قلماً مسلمان بولندیغنی و محافظه حیاتی ایچون  
اسلامیتنی اظهار ایده مدیکنی یانه یاقیله سویلد کدن صوکره  
مکه مکرمه ایله مدینه منوره نی زیارت ایدوب ایتدیگمزی  
سؤال ایلدی. حج الحرمین بولندیغمزی و شام شریفی ده  
زیارت ایلدیگمزی خدایه تشکر لرله خبر و یردیگمزه اشتیاقدن  
کوزلری طولدی. او اما کن مبار کدن برابر مزده بعض شیلر  
وارسه تبرکاً کندیسنه ده بر مقدارینی احسان ایلممزی رجا  
ایلدی و دبدی که سز لر اسلامکزی اظهارله مسعود سکزی.  
هر ایشکز اسلامکزه خیر اولور، بزر ایهسه بورالده جانمزی  
قور تارمق ایچون دینمزی صاقلایور و عبادتمزی دخی کیزلی  
اجرا ایلپورز. بزر بلاد کفر ده اسیرل کبی بولنیورز.  
بیونلرمزه عبودیت کفر حلقه سی کچیر لمشدر. بتون

مقصود من سزله کبی حجاج کرامک یوزلرینی کوره رک تبرک  
ایلمک و بلاد و اما کن مقدسه اسلامیه یی زیارتلر کزه غبطه لر  
ایتمک و خیر دعا لری کزی آلمقدیر . بزله احسان ایلیه جک کز  
اما کن مقدسه ائارینی صاغ قالدقجه تبرکاً تقییل ایدر  
و وفاتم زده جسد مزله برابر کفنم زک ایچنه وضع ایلر ز . غایتله  
مؤثر بولنان بوسوزلر جیکر لر مزی داغلادی . برابر مزده بولنان  
حاجی هدیه لرندن برازینی ده کندیسنه ویردک . امیدم زک  
فوقنده اوله رق بزه انعام و احسانلر ایلدی . بوحالری ایسه  
کندیسنک ارقداش لری اولان کنجلردن صاقلادق .

بو کنجلرک غریب حاللردن بریسی ده افندیلرینک نزدنده  
ایکن نماز وقتی تقرب ایدر سه بر رایکیشر حضورندن چیقارلر  
و کیزلیجه ادای صلات ایتدکدن صوکره عودت ایدرلر . بعض  
دفعه لر اولیور ایمش که نماز قیلدقلری محالری قیرالک کوره  
بیلمسی دخی قابل ایمش . حالو که خدای متعال حضر ت لری  
بونلری کورلمکدن شم دییه قدر سترو محافظه ایلمشدر .  
بو کنجلر دایما اعمال خیرییه لرنده ، نیت حسنه لر یله راست  
کلدکلری مسلمانانه کیزلی کیزلی نصیحتلر نده دایمدرلر . بونلری  
الله قور تارسون .

«مسینة» ده قیرالک بر «دار الصناعة» سی اولوب  
ایچنده بیشمار سفین حرییه سی موجوددر . بز «مسینة»

شهر نده بر خانه به نازل اولمش و طقوز کون شهر ده قالمشیدق .  
اوننجی کون ایسه بر سفینه به راکب اوله رق «مدینه» به یعنی  
بالرمویه توجه ایلدک .


« ابن جبیر » ک مسینا حقنده ویردیکی معلومات بوراده  
ختم بولدی .

مؤرخین عرب یازورلرکه : مسینا شهری ولیمانی  
« قلوریة » ساحنه کچمک ایچون صقلیه اسلام حکومتنه پک  
مهم مرکز ایدی . لیماننده اسلام دونماسی قیشلی یازلی بولندیغی  
کبی شهر ده دخی عساکر اسلام کثرتله اسکان ایلرایدی .

« ابن الثمّة » خاتمتک تشویق ودلائلیله اطهینی استیلایه کلن  
« قونت روجارو » عسکریله اولا « مسینا » به کلشدر . بوایه  
میلادک ۱۰۶۱ سنه سنده در . بوکونده مسینیایی کورمکه کلن  
برمسلمان سیاحی بوراسنکده ایکی بیچوق عصر قدر اوزون  
برزمان ایچنده اسلام شهری و حکومتی بولمش اولدیغی اثبات  
ایچون برچوپه بیله تصادف ایلدیه جکمه قناعت کتورسون .  
حیرت ! عبرت !







هولیتامانغا، مالدی، نام تناب و



## ۱۰ کانون ثانی ۱۹۲۱

بوکون کونمز بازار ایرتسیدر . اویقو وقتمی بالو واردیه  
فدا ایده مینلردن اولدیغم ایچون هرکون ککی ارکنجه  
قالقدم . قهوه آلتی عقبنده باستونمی قاوورایه رق سوقاغه  
فیرلادم . اوتلدن ترموای بوی کلهړك ایسکله دمیریولی  
موقعی کچدکدن صوکره «Corso scina» «قورصوچینا»  
نام جاده صاهرق ایکی طرفی تماشا ایده ایده «Politiama»  
«Garibaldi» «پولیتیمما غاریبالدی» تیاترو سنه قدر کلدیم.  
بوراسی یدنجی «روچارو» میداننده در . بونك شکلی  
شمیدی یه قدر کوره بیلدیکم تیاترو لرك هیج بریسنه بکزه میور.  
«بوهپه ی» شهری تیاترو سنه بکز دلمش عجایب برینادر .  
تعریفندن زیاده رسمی ، نصل اولدیغی اراثة ایده جیک

ایچون تفصیلاته لزوم کورمم . یوقاریده طقسان سکزنجی صحیفه ده تعریفی کچن «ماسسیمو» تیاتروسی قدر بیوک دکل ایسه ده هر حالده قاهره ده کی اوپرا تیاترو سندن متین ، سوسلی ویو کدر . میلادک ۱۸۷۴ سنه سی رسم کشادی اجرا قیلنمش وعمومه خوش کان تیاترو اوپونلرینه تخصیص اولنمشدر . بونانک مهندسی «دمیانی المیدا» نام ذات ایش شوراده ایدتدراک قیلندن اولق اوزره عرض ایلرم که : سینئور مهندسک اسمندن ، اصلینک هر حالده صقلیه عربلرندن بولندیغی ظاهر در . زیرا کرک ایتالیا نجه وکرک تمکیل اوروپا لسانلرنده «ال» حرف تعریفیه باشلایان کلهلر مطلقا عربجه در دیرلر .

مصرده دخی دمیانی اسمی بولندیغی کبی «المیدا» کلهسی ده احتمال که «المیضا» دن دونه در . — درونتک رسملریغی دخی «غوستاو مانچینلی» اسمنده مشهور بررسام یاشدر . رسملری ایسه «سیراقوزا» ده وقوع بولمش تاریخی بروقه یی کوسترئور ایش . بوندن بشقه پالموده اک قدیم برتیاترو واردر که اسمنه «بلینی تیاتروسی» دیورلر . بوتیاترو ده دائم منثور اوپونلر اوینارلرو قیشلی یازلی آخیقدر .

«بیوندو تیاتروسی» نامیه برتیاترو دها موجود اولوب




موقعی ده روما جاده سنده در . بوتیاترو ایسه میلادك ۱۹۰۳ سنه سی كشاد ایدلشددر . بونلردن بشقه ملاحی اوله رق برخیلی ده «سیناما» یعنی صور متحرکه سالونلری موجوددر . هر حالده پالمولیلر مصرلیلردن زیاده حیاتلرینك لذتی طادیورلر دیرم . فرنكار علی العموم صنایع نفیسهیه اهمیت ویریور واربابی تبجیل ایدیورلر . بزده ایسه ایش برعكس بولنوب صنایع نفیسه اكلنجه باینده اشتغال ایدیلور و اربابی تحقیر اولنیور . بونك عكسده اوله رق ده بزده فرنكارك نخر وعظمتلرینی تمثیل ایدن تیاترولر اوینانیر وفرنكار ایسه حیاتك تأخرینی تمثیل ایدن تیاترولری اوینارلر . لا حول ولا قوة . . . دیه لم !

بورادن یدنجی «روحیهرو» جاده سنه دونهرك ایکی طرفی سیرایده ایده «ماقوئیدا» جاده سنی «quattro Canti» درت گوشه نام میدانده بیتیردم و صاغه دوندم . «ویتوریو امانوئل» جاده سندن یورو مکه باشلادم . یوقاریده اسمی کچن «کتابخانه ملی» دن یوز مترو قدردها ایلرو یورویه رك صاعده پالمونك پك مشهور اولان «Cattedrale» باش کلیسای میدانته کلدن . میدان ککیش ، پك کوزل ومزیندر . رسمده دخی کوریه جکی کبی باش کلیسانك عمومی مدخلی ده بومیداندندر . خارجنی دونه طولاشه اییجه سیر

ایلام . عرب نورمان طرز معماریسیدر . اشاغی پنجره‌لریله  
 کمرلری نورمان طرزی اولدیغی کبی یوقاری پنجره‌لری  
 وچاک قوله‌سی پنجره و کمرلری و طامنک قورقولقلری بوسبتون  
 عرب طرز معماریسی اوزره مینیدر . کلیسا نك ایچنه  
 کیردم و هر طرفی کیردم . اکر بوباش کلیسانک ایچنی فن  
 معمارى و ائارى و تاریخی نقطه لرندن جدی بر صورتده تعریف  
 و تحریر ایده جک اوله یدم بوکتابمه اک آزون ایکی ملزمه یعنی  
 اوتوز ایکی صحیفه ضم ایلامم لازم کلپدی . حالبوکه اساس  
 مقصده کوره اویله بر تفصیلاتده فائده مز یوقدر . یالاکز  
 شونی دیرم که : زمان زمان تعمیر و تزیین ایدیله رک قارمه  
 قاریش و پک غالی بر عالی بنا حالى آلمشدر . عمومی قیوسندن  
 کیرلنجه ایچروده و مدخلک جنوبی قربنده سییچایلا  
 حکمدارلرینک قبرلری بولنیور . بولرده میلادک « ۱۱۹۷ »  
 تاریخنده فوت اولان ایمپراتور التنجی « انریقو » و ۱۲۵۰  
 سنه میلادیده فوت اولان ایمپراتور ایکنجی « فدهریقو »  
 و ۱۱۵۴ ده فوت اولان برنجی « روجهرو » و « ۱۱۹۸ »  
 ده فوت اولان ایمپراتور یجه « قوستانزا نورمانا » و ۱۳۲۲  
 تاریخنده فوت اولان ایکنجی « فدهریقو » نك زوجه‌سی  
 « قوستانزا ده آراغونا » و ایکنجی « فدهریقو » نك اوغلی  
 آتیه دوقی « غولیهلمو » نك جسدلرینی حاوی اولان

پارموده باش کلدسا که تمام جامع الا برك على اوزرينه بنا ايدلماشدر







تابوتلردر . نه قدر مصر فلرله بوتابوتلرك و محللرينك وجوده  
كتورلمش اولديغنى كورملى ده سيجلياده دار بقايه انتقال ايلين  
امرا وعلما و صلحا و سائر مسلم و موحد بالله اخوان دينمرك  
قبرلى نه اولمش و زهيه كيتمشدر ديه دوشونملى ! ...

يوقاريدى جبل زيارته كيتديكمزى حكايه ائناسنده اسمى  
كچن عزيزه « روزاليا » نك بوكليسا ده اصل قبرى  
موجوددر . . پالرمو حامييه سى اعتبار ايدلديكى ايچون ده  
نه زينتلر يالمامشدر . ? سنه نك ايام معلومه سنده تكميل خلق  
بايرام ايدر و كليسا به كيره رك « روزاليا » عزيز آبلاني زيارتله  
پاپاسلرك صدقه صندوقنى پاره لرله طولديرلر ايمش . بنجه  
بونك براهيتي يوقدر . وقاتلرندن پك چوق سنه لر كيچدكدن  
صوكره تقديس ايديلن امواتك قبرلرينى سرمايه انخازيله  
تجارت و جيبيلرينى طولدران رئساي مذاهبه قارشى برديه  
جكمده يوقدر . صايمادم اما بوباش كليسانك دروننده ك چوق  
اعتراف طولابلرى موجوددر . كؤنمز بازار ايرتسى و وقتمز  
قبل الظهر ساعت طقوز بچوق اولديغى حالده ينه خيلى قادين  
واركك كليسانك يان صنداليه لرنده عبادت و برقسى ده  
بنم كبي شوراسنى بوراسنى زيارت ايليور ايدى . مراق  
بويا ! بوراده اعتراجى بر پاپاس ياقه لايه رق طولابلرك برينه  
صوقق و باقه لم نه لر صوره جق ديه ياننده ديز چو كرك بر كناه

چيقارتدرمق عقلمه كلدی ايسه ده ذاتا پك چوق دفعه لر  
اعتراف سئواللرينى بالذات كنهه چيقارمغى اعتياد ايدن  
خرستيان بيلدكلردن ايشتمش و « ليوتاقسيل » نام پاپاس  
دوئمه سى برفرانسزك « آچيق پرده دن خرستيانلق » اسمنده  
و اعتراف عليهنده يازديغى كنهانندن او قومش اولديغم ايچون  
اويله برساخته كارلغه تنزل ايلمدم . كليسانك محرابى جوارينه  
كلهرك طوردم و طول و عرضى تقريبي اوله رق بالحساب  
پالمونك « جامع الاكبر » ينى كوزيمك اوكنه كتوردم .

يوقاريده « ابن حوقل » ك رساله سنده « جامع الاكبر »  
ك يدي ييك مؤمنك بردن اداى صلات ايده بيله جك قدر  
واسع بولنديغى ذكر ايدلمشيدى . شمدىكى حالى ايسه باش  
كليسا يدي ييك خرستيانى آلسه بيله عرضاً جامع الاكبره  
بكزه ميور ديرم . زيرا « ابن حوقل » بوجامعه هر صفك  
ايكى يوزكيشى آله جغنى يازيور . باش كليسادا ايسه بوقدر  
اوزون صف باغلانه ماز .

اي قارئين كرام ! جامع الاكبرله شوايچنده طولاشديغم  
باش كليسانك مناسبتى نه درديه خاطر كزه برشى كليسه  
سزله يانه ياقله خبر و يررم كه : بوباش كليسا ايسته اوزم جامع  
الاكبرمك بولنديغى يرك اوزرينه بنا ايدلمشدر ! ابن حوقلك  
ده ديدىكى كى بونك اصلى ، اسكى يونانليرك برمعبدى ايمش .

خرستیانلق زمانی کلیسا اولمش و حکومت اسلامیہ زمانی ده  
جامعه تحویل ایدیلهرک اسمنه جامع الاکبر دینمشیدی .  
« ابن الثمنه » ملعونتك یاردیمله اطهیه خرستیانلر کیردکدن  
صوکره ایسه تکرار کلیسا یه تحویل ایدلمشدر . اتحق طاش  
طاش اوستنده قالماق شرطیله جامع شریف یرله برایدلکدن  
صوکره شمدیکی بنانک تمی آتلمشدر . بقیه اثار اسلامیہ دن  
اولق اوزده ده کلیسانک قپوسی اوکنده کی دیرهک آلتنک یعنی  
رواقنک صولده کی برنجی دیرهکنده قرآن شریفک یدنجی  
سوره سی اولان سوره اعرافک الی ایکنجی آیت کریمه سی  
خط کونی ایله جک اولمشدر . نصلسه اوزمانده اثار اسلامیہ یی  
تحقیر ایله محوایلین متعصبین بوش بولنش ده اشبو آیت کریمه یی ده  
قازیهرق محوایلما مشلدر .

سوره اعرافک الی ایکنجی آیت شریفه سی « ان ربکم  
الله الذی خلق السموات والارض دیه باشلار و تبارک الله رب  
العالمین » دیه ختام بولور . باش کلیسا رواقنک صولده کی  
برنجی دیره کی اوزرنده خط کوفی ایله حک ایدلمش اولان  
شویوقاریده کی آیت شریفه یی حکایه ایدن ایتالیا انجه « سیچلیا  
دیلی » نام کتابک قرق دردنجی صحیفه سنده بونک برده  
ایتالیا انجه ترجمه سی یازلمشدر . اتحق ترجمه سی دیه قید ایتدیکی  
درت سطرلق ایتالیا انجه نک معناسیله محکوک بولنان آیت



مباركه نك معناسى اراسنده مالا اولسون هيچ برمناسبت  
يوقدر . اوروپا ليلرك ايچندن مستشرق ناميله ظهور ايدن  
كىمسيله اراسنده يك آزلىنك ادعاسيله مناسبتى بولنديغى  
بالذات كوردوم وبونلرك يازمش اولدقلى كىتابلىنى اوقودم .  
اكثريسى كندى تفصيلينه نسبت و اثرلر نده دعوا ايتدكلى  
علم ومعارفدن يك اوزاق بولنورلر . يازمش اولدقلى ياصديق  
قدر كىتابلىنى صيغسه كىز دعوالردن ليكى طاملاسى چىقماز .  
زمان اسلامده موجود اولان جامع الاكبرك خراب  
ايديلهرك يرينه بوباش كليسانك بنا ايدلمش اولديغنه دائر  
معلوماتى ايتاليان مؤرخلرينك كىتابلردن آلدوم . برنجيسى  
سيچليا اقتصاد جمعيتى طرفندن مخصوص تحرير ايتدرلمش  
اولان «سيچليا دىلى» «il Cicerone per La Sicilia»  
نام رسملى وخریطه لى اولدقجه مكل بر كىتابدر . بو كىتابك  
قرق اوچنجى صحيفه سنده يازيوركه اشبو باش كليسا وقتيله  
خرستيانلرك ييوك بر كليساسى ايدى . عربلر پالمويه مستولى  
اولدقدن سوكره بونى جامعته تحويل ايلديلر . نورمان پرنسلىرى  
اون برنجى عصر ميلادى اوائلنده اطه ي مسلمانلرك اندن  
قورتاردقلى زمان عربلرك دين ابتدائيسنه معبد اتخاذا  
ايتدكلى بويوك كليساسى ده تخايص ايتمشلر و اصلنه ارجاع  
ايلمشلردر . »




بوندن بشقه ایتالیان مستشر قلدن « Michel Amari »  
« میشل آماری » نام ذاتک « ابن حوقل » ک پالمو حقنده  
یازمش اولدیغی رساله سنی فرانسیزجهیه ترجمه سنده حاشیه  
قیلمدن اوله رق ۳۲ نومرولی صحیفه سنده دیورکه « اشبو  
جامع الاکبر زیاده سیله احتمالی اولدیغنه کوره شمیدیکی باش  
کلیسانک بولندیغنی یری اشغال ایدیور ایدی . دهها محقق  
ایسه باش کلیسانک شمال جهتمده و تمام قارشو سنده بولنان  
« Sainte-Marie-L'incoronata » « تاجلی مقدس  
مریم » کلیسا سنک بولندیغنی یرده ایدی . بو کلیسا وقتیه  
سیچلیا قرالارینک تویججه مخصوص ایدی . سیچلیا نک  
فیلسوف و مشهور مؤرخلردن عدایدیلن « غوفره دمالاترا »  
« Gaufred Malaterra » نام ذات که اون برنجی عصر  
میلادی محرر لرنددر . بو ذات دیورکه « دوق روبرت ایله  
قونت روجر » پالموده « تاجلی مقدس مریم » کلیساسنی  
بنا ایتدردیلر . بوراسی وقتیه خریستیانلرک بیوک کلیساسی  
ایکن پالمو استیلا سنده مسلمانلر طرفندن تحقیر ایدیلرک  
کندیلرینک مذهب باطلارینه معبد اتخاذا اولمشیدی ! مستشرق  
« میشل آماری » دوستمز بونی رد باننده دیورکه :  
« مالاترا » نک بویله بردعواسنی قبول ایده م . مسلمانلره  
مذهب جهتمده خرافات نسبت ایلمک طوغرو دکلددر .

زمانلرينك علوم و معارفنده دنيانك خواجهلری بولنان  
مسلمانلره عتايد باطله اسناد ايديله مر . مع ذلك خرستيانلقدده  
دخی وقتيله نيجه باطل فکەرلر موجود اولديغنی تاريخلر  
يازورلر . »

صدد خارجنه چيقماق ايچون ديرم که . باش کلیسا ايله  
شمالنده و لك يقيننده کی « تاجلی مقدس مریم » نام کلیسانك  
ايکيسنك بردن اشغال ايلديکی اراضی جامع الا کبرک موجود  
اولديغی اراخيدر . چونکه « ابن حوقل » ک حسابنجه ايکی  
يوز کيشيلک برصف ، باش کلیسا نك عرضنه کافی کلميه جي  
کبی نماز صفلرينك تحيات وسجده ايچون بری برلرندن آچيق  
بولنمی دخی ضروری اولديغندن یدی بيک کيشی یی باش  
کلیسا ايله « تاجلی مقدس مریم » کلیسا سنك مجموع اراضیسی  
الحق استيعاب ايليه بيلير . هله ابدست وسائرره ايچون  
لزومی ضروری اولان حولی یی ده حساب قاتارسه ق باش  
کلیسا میداننی بيله جامع الا کبره ضم ايلمک لازمدر .

اوزاتميه لم ! باش کلیسادن ميدانه چيققدن صوکره  
يوزیمی قبله جهنمه چويره رك اوچ اخلاص وبرفاتحه اوقودم  
و ثوابی ايکی يوزاللی سنه اشبو جامع الا کبرده ادای صلات  
ايدن ارواح گذشتگان اخوانه بخش ايلدم . کلديکم جادديه  
دونه رك يورومکه باشلادم . درت گوشه تسميه ايلدکلری







دورت يول اغزنىه كلديكمده صاغمه دونهرك «ماقوئيدا» جاده  
 سنه كيردم . اللهى مترو قدر يورودكدن صوكره صولده بولنان  
 « پره توريا » ميداننه كيردم . ميدان ديكركلى قدر بيوك  
 دكلسه ده انجق بوراده كي مشهور فسقيه تماشايه شاين نفيس  
 يرشيددر . فلورانسهلى مشهور هيكلتراش «فرانچسكو قاميليانى»  
 ميلادك ۱۵۵۵ سنهسى ياشددر . هيكلتراش مشهور كذا  
 فلورانسهلى « ميكل آنجولو ناكهرينى » دخى « قاميليانى » به  
 معاونت ياشددر . فسقيه نك اطرافنده يرير ركز ايدلمش  
 اولان اوتوز قدر انسان هيكلرينك بعضلرينك قاعده سنده  
 « فرانچسكو قاميليانى » اسمى محكوكدر .

بوفسقيه نك صاغنده بولنان اوزون قبهلى بنا پالمونك  
 بلديه دائره سيدر . براز ايلروسنده سانتا قاتارينا كليسا سنك  
 مناسترى واردر . رسمنده دخى كوريليور .

بوراسنى ده اييجه سير ايلدكدن صوكره دوندم وتك اتلى  
 برآرابه سوار اولهرق تمام ساعت بره طوغرو اوتله ، او طهمه  
 عودت ايلدم .



## ۱۱ کانون ثانی سنه ۱۹۲۱

هجرتك ۴۵۳ سنه سنه مصادف بولنان ميلادك ۱۰۶۱  
تاريخنده اهل اسلام سيچايا اظه سنده حكم و حاكموتلريني  
ارتق غيب ايتمش و « نورمان روجارو » ده اظهده قرال  
اولمشيدي<sup>(۱)</sup> ايشته اوزمانده تكميل صقليه اظه سنده و ملحقاتي

---

(۱) « ابن الاثير الجزرينك كامل التواريخ » نام  
« لايزنج باصمه سي » كتابنك ۲۷۳ نومرولى صحيفه سنده  
محرر دركه — هجرتك ۴۸۴ سنه سي ، صقليه جزيره سنك  
عمومنه افرنج مستولى اولدى . بوراسنى ذكر ايلدكدين  
صوكره جزيرهده امرا آراسنده وقوع بولان اختلافى نقل  
ايدرك « ابن النمنه » ملعونتك فرنگلردن استمداديني واولنره

بولنان كچوك اطه لرده ساكن اهل اسلام ، نفوس جهتنده خرسٲيانلره نسبتله درتده اوچ زياده بولنديغنى ايتاليان مؤرخلرى يازيورلر . بووجه ايله عموم نفوسك درتده اوچنى تشكيل ايلين مسلمان عربلر علم ، معارف ، ثروت ، صنايع و تجارت جهتنده هر حالده خرسٲيانلر دن چوق ايلروده بولندقلر دن پك طبيعيدر كه قرون وسطى متعصبلىرىنك اللرنده اويلاه قولاي قولاي محو ومنعدم اوله مازلر ايدى . بونك ايچوندر كه كتابك دها اون التنجى صحيفه سنده اسمنى يازديغم « محمد بن جبير الكنفانى » نك مسينا دن ميلادك

امرا آراسنده تفرقه بولنديغندن جزيره مستولى اولمق پك قولاي اولديغنى واهالينك پك چوغى كنديسنه اطاعت اوزره بولنديغنى خبر ويرمسنه بناء فرنكلر ابن التمه ايله برابر ۴۴۴ تارنخنده صقليه يه كلدكلرينى يازمشدر . بو حسابجه فرنكلارك و دها آچيغى « نورمان روجارو » نك عسكريله « صقليه » اطه سنه اياق باصديغى سنه دن تكميل اطه يى استيلا ايلديكى ۴۸۴ سنه سنه قدر آراده تمام قرق درت سنه واردر . ديمك اطه ده اهل اسلام حياتلرينى و وطنلرينى دشمنه تسليم ايتامك ايچون قرق درت سنه فرنكلرله حرب ايتمشلردر . اسلامك بوكوفى دوتنه وياخود دونى بوكوتنه پك بىكزيور دكلى ؟...

۱۱۸۲ سنه سی پالمویه کیده رک بر هفته اقامتدن صوکره  
« اطرابنش » دیدیکی « Trapani » ترابانی یه کلدیکی واراده  
اقامتنی حاوی بوننان سیاحتنامه سنده ارتق اهل اسلامک  
متعصب لاندده نصل ازم کیده اولدیغنی نقل ایلدیکی « رحله  
الکینانی » سندن شورایه برازینی قید ایلیم .

« ابن جبر » هجرتک ۵۷۷ سنه سی رمضان شریفک  
برنجی جمعه کونی میلادک ۱۱۸۲ سنه سی کانون اولنک یدیسنه  
مصادف اولمشیدی دیور ایدی . پالموده اسلام نازل اولان  
خانلرک برنده ساکن اولمش ورمضانک یکر می ایکیسنه  
مصادف اولان جمعه کونی که سنه مذکور کانون اولنک  
یکرمی سکرنجی کونی پالمودن قاره طریقله « اطرابنش »  
« Trapani » شهرینه حرکت ایلمشدر . « ابن جبر »  
سیاحتنی شویله حکایه ایدیور .

— « اطرابنش » لمانده ایکی سفینه موجود اولوب بونک  
برسی اندلسه و دیگرکی « سبت » یه حرکت ایده جکفی خبر  
الدیغمزدن همان پالمودن حرکت ایلک . اثنای طریقده  
بری بر لرینه متصل قریه لره اوغرداق ویک دیگرینه یقین قصبه  
لردن کچدک . یولده پک کوزل ایشلمش تارالره ، طاقلره  
راست کلدک . اويله کوزل اراضی ، اويله خوش باغلر کوردک که:  
بونلری انجق « قرطبه » اراضیسنه بکرتدک . حتی یواراضی



قرطبه نككنندن دها قوتلى ودها كوزلدر بيله ديه بيايرم .  
يولده ياتدق . كيجه مزي « علقمه » (۱) قصبه سنده  
كچيردك . بوراسى يك معمور بر قصبه اولوب بيوك چارشوسى  
وكوزل مسجدلى واردر . كرك « علقمه » ده ساكن  
اولان اهالى و كرك پالمودن بوزايه قدر يولمز اوزرنده  
مصادف ايلديكمز كويلرك خلقى تكميل مسلمانلر .

« علقمه » قصبه سندن سحر وقتى قيام وحركت  
ايلدك كه رمضان شريفك يكرمى اوچنجى جمعه ايرتسى كوني  
اولوب « دجنبر » ك يعنى كانون ثانى افرنجينك يكرمى طقوزينه  
مصادف ايدى . « علقمه » يه جوار بولنان « حصن الحمة » (۲)

(۱) زمان اسلامده تأسيس و تسميه ايديلن « علقمه »  
قصبه سنك اسمى بوكونده « Alcamo » القامو اولوب  
« پالمو » دن « Partinico » طريقه تقريباً اوتوزبش  
كيلومترودر .

(۲) « حصن الحمة » دينلن يرلك اسملى بوكون  
« Sorgia caldo » « ايلجه كوز » و « Sorge Terre »  
و « Posto Bagno » صيچاق كوز و حماملى در . فرنكلر  
عربلك « صيچاق طاييه » ديه ويردكلرى اسمى اشاغى  
بوقارى طوغرو ترجمه ايتمشلرديك اوليور .

نام بيوك برقریه اوغراق . بوراده من طرف الله صیجاق  
صولی آقان برچوق کوزلر موجوددر . درجه حرارتی  
جسم بشرک تحمل ایده میه جکی بدرجه در . بویه صوی  
صیجاق برکوزک باشنه کلدی کمزده بیندیکمز حیوانلردن اینه رک  
براعلا حماملاندق . یوم مذکورک ایکندی وقتی «اطرابنش»  
ه واصل اولدق و کیرالادیغمز برخانهیه یرلشدک .

اطرابنش شهرینک ذکرى «Trapani» ترابانی  
«ابن جبیر» ک بوشهری ووقعاتی نقلندن اول حال حاضرینی  
نقل ایله قارئلریک بوباده توسیع معلوماتنه یاردیم ایتمک ایسترم .  
شویله کد : «Trapani» «ترابانی» شهری ، ترابانی سنجا  
غنک مرکزی اولوب پک کوزل لیمانی ورواجلی تجارتی  
واردر . سکانی ایسه صوک احصایه کوره «۶۱ ۴۴۸»  
نقوسه بالغدر .

دکیزنده پک چوق مرجان بولنیور . ترپانیده مرجان  
ایشلری هم پک صنعتی هم رواجلیدر . درلو بالیق لریله ده شهرتی  
واردر . شهر باغجوان اوراغی شکلنده دکیزه کیرمش بر دیل  
ویا بر برون اوزرنده یاپلمش وتمام جوارنده کی «سان جولیانو»  
نام طاغه قدر امتداد ایلمشدر . سیچلیا اطه سنک افریقایه  
کیچمک ایچون اک یقین واک مهم بر ایسکله سیدر .

انار و بیانی ، برچوق کلیسا ایله قدیم و جدید دوائر

رسمیه و میدانلرنده کی ماهر هیکل تراشلر الندن چیقمش  
هیکللردر . یازی پک صیجاق اولور . بعض سنه لر قرق  
درجه یه قدر صیجاق اولورمش . « شریف ادریسی » نک  
« زهه المشتاق » نام کتابنده « طرابنش » تسمیه ایلدیکی  
تراپانی ایچونده شویله دییور :

« طرابنش » پک قدیم برشهر اولوب هر طرفی صوایله  
محاط اولدیغندن قاره دن برکوپرو ایله واریلیر . بوکوپرو شهرک  
شرق جهننده اولوب لیمانی ایسه جنوب جهننده یولنیور .  
بولیمانی قبالی اولدیغندن دکزک اک فورتنه لی زماننده بیله  
ایچنده بولنان کیلر راحت راحت طوردرلر . موسم شتاده  
ایسه بولیمانده نیجه سفینه لر قیشلارلر . دکزنده پک چوق  
مرجان بولنور . شهرک ارقه سنده کی اراضی پک واسع  
وبرکتلی اولوب زراعتیله مشهوردر . « طرابنش » ک ایچنده  
پک بیوک بر چارشو موجود اولوب معیشت قبولری هرکسه  
دایما آچقدور .

طرابنش یقینین اوچ عدد جزیره بولنوب اسملری ده (۱)

(۱) اشبو جزیره لک بوکونکی اسملری شونلردر .

جزیره الراهب      isola di Levanzo

جزیره الیابسه      «      Fauignana

« جزيرة الراهب وجزيرة اليابسة وجزيرة مليطمه » در .  
كله لم بزم « ابن جبير » ك حكاية سنه : « رحلة الكيناني »  
سنك يدنجي بابي شويله باشلايور .

— « اطرابنش » كچوك برشهر اولوب اطرافي برسور  
ايلاه احاطه ايدلمشدر . ليماني اك اي ومهم ليمانلردن اولديغندن  
يك چوق روملر بورايه كليرلر . خصوصاً افريقايه كچمك  
ايسئينلر داما بورايه كليرلر . زيرا بورادن تونسسه كمى ايله  
بركونده كچليور . فورتنهلى هوالرى اخراج ايدرك قيشلى  
يازلى بوليماندن كميلر افريقايه كچرلر .

چارشنى وحماملرى احتياجات بلدهنى مكملاً ايضا ايده بيله  
جك مقدار ده در . « اطرابنش » ك برعبي وارسه اوده  
اوج جهتندن دكينزله محاط بولنمسيذر . يالكز برجهتندن  
قاره ايله متصل اولوب اوده يك طار در . يرلى اهاالينك

### جزيرة مليطمه isola di Marittimo

جزيرة الراهبه يالكز بيوك برمناستر موجود اولوب  
بوراده وقيميله پاپاسلر كنج چوجغلرى خادم ايدرك استانبوله  
صاقلرلر ايمش . بيزانس عادى اوزره حرم قبولرنده بوخادملر  
قولالانلير ايمش . ديرلر كه بزلرده خادم اغاسى قولالانمق روملردن  
كچمشدر .



فکر لرینه کوره دکنک طالغه لری دو که برکون اطرابنشی .  
 ییوب بیتوره جکدر . اطرافنده ک چوق زراعت ایدلمکده  
 اولدیفندن شهرده هرشی اوجوزدر . اها ایسی مسلمان ایله  
 خرسیانندن متشکل بولنوب هرایکی فرقه نک جامع  
 وکلیسالی واردر . اطرابنش شرق جهتندن شماله طوغری  
 مائلدر . جوارنده یوکسک برطاغ موجود اولوب اوزرنده  
 روملرک برقلعه سی بولنیور . بوطاغده روملرک بیوک برقریه سی  
 دخی موجوددر . قلعه په برکوپرو ایله کچه رک واصل اولنور .  
 اراضی منزرعه سی ، باغ و باغچه لری ده واردر . ایشتمدیکه  
 کوره بوطاغده درت یوز قدر آقارصو کوزلری موجود ایمش .  
 اشبو طاغک اسمی ایسه « جبل حامد » <sup>(۱)</sup> در . مسلمانلر  
 بوطاغه حقیقمقدن منع ایدلمشدر . طاغده بوقدر آقار  
 صوکوزلری موجود اولدیغی حائده تام ایاغنده بولنن  
 اطرابنشدی صوبوقدر . ایچه جک صولری ایسه جوارنده  
 بولنان برقیودن آلیورلر . خانه لری دروننده دخی صولری

---

(۱) « جبل حامد » ک اسمنه شمدیلرده Monte  
 Santo Giuliano یعنی « عزیز جولیانو طاغی » دییورلر .  
 صوک احصایه کوره بوطاغک سکانی بوکونده « ۱۷۸۱ »  
 نفوسه بالغ بولنیور ایمش .

اولدقجه شربه صالح قويولرى موجوددر . موجود اولديغنى  
اولجه ذكر ايلديكمز ايكي سقينه يي ليمانده زيارت ايلدك .  
انشالله اندلسه عزيمت ايده جك اولان سفينه يه راكب اولور  
وراه مقصوده عزيمت ايلرز .

«اطرابنش» كى غرب جهننده اوچ عدد جزيره واردر .  
بونلرده بريسي ليمانه تقريبا ايكي فرسخ بعدنده واقع اولوب  
ديكرلرى ده اوزاق دكلدر . اسملى ايسه جزيره مليطمة  
ويابسة والراهب در .

ماه «ينير» يعنى افرنكى كانون ثانينك بشنجى جمعه  
ايرتسى اقشامى شهر شوالك غرهسى ايدى . زيرا اطرابنش  
حاكمنك حضورنده هلال رمضان شريفك چهارشنبه اقشامى  
يعنى پنجشنبه كيجه رؤيى شرعاً ثابت اولمش و پنجشنبه كوفى  
«صقايه» اهالىسى اوروج طوتمشيدى . رمضان پنجشنبه  
كونندن حساب اولنه رق تكميل اوتوزكون اوروج  
طوتمشيدى . بزله بايرام نمازىنى اطرابنشك برجامعنده ادا  
ايلدك . زيرا اهالىدن برقىسى برسيمدن طولاي مصلاى  
عمومه كيتمكدن امتناع ايلمشلردى . بونلره برابر بايرام نمازى  
«صلاة الغربا» اوله رق ادا ايلدك . خدا جمله غريبلره وطنلرينه  
واصل اولمقى نصيب ايلسون .

اهالى بايرام نمازىنى رجال حكومتلريله برابر مصلاى

عمومیده ادا ایلدکدن صوکره عادتلری وجه اوزره طاول  
وزورنارله خانه لرینه عودت ایتدیلر . رجال حکومتک  
خرستیان اعضاسی ایسه مسلمانلری بویله حرکتلرندن منع  
ایلمدکارینه تعجب ایلدک .

اندلسه کیده جک اولان سفینه صاحبی ایله اجرت نقلمزی  
قرار لاشدرمش و زاد و زخیره مزی احضار ایلمش ایدک .  
دیگرکن « صقلیه » قیرالی طرفندن ، تکمیل جزیره نکلیمانلرنده  
بولنان کمیلرک عزیمتدن منعی ایله اولدقلری برلرده باغلی  
قالسی امر ایدلمشیدی . سببی ایسه قیرالک بالجمله سفن حربیه سی  
تعمیر و تحمیز ایدلمکده اولدیفی خبرینی خارجدن منع  
ایتمک ایمش .

بنأ علیه صقلیه دونماسی حرکت ایتدکجه دیگر کمیلر حرکت  
ایلمیه جک ایمش .

ایکی سفینه نکل صاحبلری اولان « جنوا » لی کمیلر  
بو خبری ایشدکلرندن همان سفینه لرینه تحصنه امره اطاعت  
ایتامک ایستدیلر و آرایه آله ویره رشوت دخی کیردیکندن  
لیماندن چیقوب کیتمک ایچون مناسب هوانک اسمسنه انتظار  
ده اولدیلر .

بوانتاده ایدی که : خوشه کیتیمیه جک خبرلر آلفه  
باشلادق . بوجلهدن اولیق اوزره « میورقه » حاکمک

« بجا به » ٻه مستولی اولدیغی خبریدر . انشا الله طوغرو  
دکدر .

اطرا بندشده بولنان خلق صقلیه دونماسی ایچون درلو  
ظنلرده بولنیورلر . دیورلر که تعمیر و تجهیز ایدلمکده اولان  
حرب کملرینک یکونی اوچ یوز و کسور بولنیور ایمش . حتی  
بولنرک ارزاقنی کوتوره جک اولان کملرک عددی ده یوز  
قطعه به بالغ ایمش . برروایت کوره دونما اسکندریه بی فتحه  
و برروایت کوره « میورقه » بی استیلا به کیده جک ایمش .  
ویا افریقا ساحلنده بولنان بلاد اسلامی استیلا ایچون حرکت  
ایلیه جک ایمش . برروایت کوره دونما نک اصل مقصدی  
« قسطنطنیه » به کیتمک و اوراده حرب ایتمک ایمش .  
زیرا اورادن صقلیه به اصل اولان کملرله کلن کیمسهرلرک  
عجایب خبرلر کتورمشلردر . شویله که کویا قسطنطنیه قیرالی  
فوت اوله رق مملکتی زوجه سنه ترک ایلمش ایمش . بوقادینک  
ایسه کچوک براوغلی وارا ایمش . متوفی قیرالک موجود اولان  
بربرادر زاده سی عصیان و قیام ایله جا که بولنان قادینی قتل  
و چو جغنی آلهرق حبس ایلمشدر . دیرکن عاصینک براوغلی  
پدرینک حبس ایلمش اولدیغی وایلروده دخی شبهه سز قتل  
ایده جکی بو چو جغه آحیه رق سبیلنی تخلیه ایتمشیدی . چو جق  
قسطنطنیه دن چیقوب سوق قدرله صقلیه جزیره سنه کلش



ويك پريشان قالدیغندن نہایت اجرتلہ برپا پاسہ خدمتکار  
اولمش ایش . صقلیہ قیرالی بولنان « غلیام » « Guglielmo »  
بوپرنسک جزیرہ التجا ایلمش اولدیغنی خبر آلدیغندن  
مامورلری واسطہ سیلہ بولدرمش ایسہدہ سؤال ایدلیکنده  
حقیقت حالی انکارلہ مرقوم پاپاسک کولہ سی اولدیغنی  
سویلمشیدی . حالبوکہ برمدت صوکرہ قسطنطنیہ  
کیدوب کلن جنوالی کمیجیلر بونی بیلہرک علامتلینی تمامیلہ  
خبرویرمشیدی . رسمی بریارام کونی « غلیام » سرایندن  
چیقمش واهالی ایسہ قیرالارینک سالامنه طورمشلردی .  
بوچوجغنی دہ کتورمشلر ، قیرالک کچہ جکی بریردہ طوران  
خلقک آراسنه قومشلرایدی . قیرال اورادن کچدیکی ائنادہ  
بتون خلق تعظیم ایچون رکوعہ وارمشلر ویلسکز بوچوجق ،  
ملوکانہ برسلامدن بشقہ برحرکتدہ بولنماشدر . بونک اوزرینہ  
« غلیام » چوجغنی یاننہ آیش وزیادہ سیلہ اکرام ایدرک  
عموجہ زادہ سنک سؤ قصد ایلمامسی ایچون دہ سرایندہ  
حسن محافظہ سنہ اہتمام ایلمشدر .

مکر بوپرنسک غایتلہ کوزل برہمشیردسی وارایش . عاصی  
بولنان عموجہ زادہ سی بوقیزہ عاشق اولمش ایش . روملرک  
شریعتمندہ عموجہ اولادی بونک یقین اقربا اولدقلمدن بری  
برلریلہ ازداجدن ممنوع طوتولورلر ایش . بوایکی عاشق ایسہ

هرشي<sup>۱</sup> فدا ايله مطلقاً برى برلريله اولمك مراد ايلدكلرندن  
 قسطنطينيه حكومتنه هم حدود بولنان «قونيه» و سائر بلادك  
 حاكمى «امير مسعود» ه التجا ايلمش و بونك حضورنده  
 دين اسلامى قبول و بوجه شرع محمدى ازدواج ايتمشلردر .  
 بناء عليه امير مسعودك اذنيه عساكر اسلامى آلهرق قسطنطينيه  
 اوزرينه كمش و حرباً پايتخه كيرمش و عليهنده بولنانلرك  
 برچوغنى قيلمجندن كچيرمش و لهدار لر ينك معاونتيله ده سرير  
 حكومه كچمش و بويوزدن عساكر اسلام برچوق مال غنيمته  
 نائل اولمش و امير مسعود دخى بونلرله كسب قوت ايلمشدر .  
 اشبو حكايه قسطنطينيه دن صقليه جزيره سنه ايشلين  
 كميچيلردن نقلاً مسلمان و خريستيان تسكيل اهلينك اغزنده  
 كزوب طور يور .

بارمويه واصل اولديغيز كون شهرك محافظى طرفندن  
 قسطنطينيه دائر بزه برخبر اولوب اولمديغى سؤال اولمش  
 و بزدخى پرشى بيلمديكمزى سويلمش ايدك . حالبوكه بويلا  
 برسؤال دن مقصدك نه اوله بيله چكى اوزمان بيلميور ايدك .  
 قسطنطينيه لى بوچوجنى عموجه زاده سى قتل ايتدره چكى  
 روايتنه بنا صقليه قيرالى بونى زياده سيلا حافظه ايدلمسنى امر  
 ايلمش ايمش . سويلدكلرينه كوره بوكنج پارس غايله كوزل  
 ، پك تربيه لى و وقارلى اولدقدن بشقه لسان عربيه والسنه<sup>۲</sup>

سائر ديه دخی وقوفی وار ایش . صقلیه قیرالینک مقصدی  
ایسه تمکیل دونماسنی برنسک قومانداسی آلتنه ویره رک  
قسطنطنیهیه ارسال و حرباً اوراسنی آلهرق عموجه زاده سنی  
طرد ایتدرمک ایش . امید ایدرزک : بروجه بالایاز یلان  
حکایه نک اصلی واردر . و قسطنطنیه دخی ممالک اسلامیه  
صره سنه کیرمشدر . انشاالله صقلیه قیرالی ده مقصدینه نائل  
اوله میهرق کوندره جکی دونماسی مغلوباً و منهزماً اطه سنه  
عودت ایلر .

« ابن جبیرک » نقل ایلدیکی شو قسطنطنیهیه وقعنه سنک  
نه درجهیه قدر صحیح اولوب اولمادیغنی تعیین ایدمه .  
هجرتک ۴۵۳ سنه سی قونیه و اطرافی حاکمی « امیر مسعود »  
دیه تسمیه ایلدیکی ذاتی ده تحقیق ایلمک لازم ایسه ده شو  
« سیچلیا » خاطر اتم او یله بر تحقیقک یری اوله میه جغی  
درکار در . ینه « ابن جبیر » دیورکه :

ماه ذی القعدہ نک هالانی ده « اطرابنش » ده کوردک .  
« فبریر » ک یعنی شباط افرنجینک دردنجی چهارشنبه کوتنه  
مصادف اولمشیدی . بزحالا بوشهرده یز . موسم شتاتک  
کچمسنی بکلیورز . راکب اوله جغمز جنوبی سفینه سی ده بورادن  
حرکت وانداسه عزیمت ایدمه بیلمک ایچون بهاری بکلیور .  
بوشهرده اقامتمز اثناسی نیجه نیجه آجیقلی وقعله



مطلع اولدق . بوراده ساکن بولنان اهل اسلامک چلیپا  
پرستلر الندن چکدکاری پک چوق مظالمه کسب وقوف  
ایلدک . امت محمد خرسیتیانلرک النده ذلیل وحقیر قالمش  
وخصوصاً قبا و پک متعصب بر قیرانک تحت حکمنده زیاده  
سیله بدبخت اولمشلردر . اخلاق عمومیه فساده کیتدیکندن  
چوق دفعه بر مسلمان ، ذکور و نساء کنندی عائله سندن امنیتی  
منسلب اولیور ایش . حق زمان اولیورکه بر مسلمان علمی  
شخصنه کله جک بر ضروری دفع ایتمک ویا بر فائدهیه نائل  
اولق ایچون کیدوب تنصر ایدیور .

ایشته بوجمله دن اوله رق « ابن زرعه » نام بر فقیه ده  
اسلام دیننی ترکله خرسیتیانلغی قبول وانحیلی حفظ وعقاید  
مسیحیهنی تعلم ایله صنف رهبانه داخل اولمش و پالرموده کی  
کنندی مسجدينی ده کلیسایه تحویل ایلمش واحکام مسیحیه  
اوزره فتوالر ویرمکه باشلامشیدی . دها غریبی بومرتدک فقه  
اسلامده وقوف سابق بولندیغندن بعض دفعه لر اولمشدر که هم  
اسلام هم خرسیتیان شریعتی اوزره ده فتوالر ویرمشدر . « ابن  
زرعه » مجبوری تبدیل دین ایلمش اولدیغندن ایمانی واسلامنی  
قابنده حفظ ایدیور ديه ده مسموعمز اولدی . مناسب ایسه  
الله عفوا یلسون . ديه لم . برده شوجزیره ده کی مسلمانلرک  
بیوکی و آفندیسی بولنان « ابن الحجر » ديه معروف قائد



« ابو القاسم بن محمود » شوکونلرده بورایه ، « اطرابنش »  
 بلده سنه کیشیدی . بوآدمجکز صقلیه خاندانندن اولوب سیاده  
 ابا عد جدد وارث اولمش بر ذات محترمدر . صاحب خیر  
 و حسنات اولدیغنی و اهل و عیالنه محب بولندیغنی وفدیه نجات  
 و یرهرک نیجه نیجه اسرای اسلامی ایادی نصارادن تخلیص  
 ایلدیکنی موثوقاً پالرموده ایکن خبر آلمشیدق . فقیر و غریبلره  
 دایم معاونت مالیه ده بولنور و محتاج قالان حجاج مسلمینک  
 احتیاجلاریتی هر وقت قضا ایلر ایش . بوذاتک بورایه مواصلتی  
 تکمیل شهر خلقنی مسرور ایلدی . مکر ، زوالی آدمجکز  
 افتراجیلر شرینه اوغرایه رق صقلیه قرالینک امریله خانه  
 سنده حبس ایدلمش ایش . زیرا افتراجیلرینک هر طلبنی انجاز  
 ایدمه دیکی ایچون کندیسنی خارجده بولنان موحدین اسلام ایلله  
 مخبره ایدیوردیه اتهامله قیراله شکوا ایلمشلردی . الاهدن  
 اولمش ده بعض کیشیلرک کندی لهنده شهادتیه قائدمذکور قورتو  
 لمشدر . یوقسه اعدام ایدلمسی هیچ برشی دگش . هر افترا  
 باشنه برتغزیم ، برجزای نقدی دیه دیه کندیسندن تمام اوتوز  
 ییمک مؤمنیه لیراسی آلمش و بوجه ایلله آبا واجدادندن وارث  
 اولدیغنی مال و ملکینی صویه صویه النده ، اویچنده برشی  
 بیر اقامشلردز . برکون نصلسه قیرال کندیسندن راضی اوله رق  
 بوراده برایشه تعیین ایلمش و اوده کلوب عاجز برقول کی

امره اطاعتله ویریلن ایشی کورمکه باشلامشیدی .

بو ذات محترم کوریشمک ایچون بزی دعوت ایلدیکندن  
زردینه کیده رک کوریشدک . کیندینک وتکمیل جزیره ده  
بولنان اهل اسلامک ظاهر وباطن احوالی واعداى دینک  
بونلره یامقده اولدیغی مظلومی یانه یاقله بزه هب حکایه ایلدی .  
یورکلرنده ایمانی اولانلر ، بواطه ده کی اسلامه ، روا کوریلن  
مظلومی ایشتمهلر شبهه سز جیکرلری یانار وقان اغلارلر .

اثناى کلامده قائد ابوالقاسم دیدی که: بلاد اسلامه کوتورلمک  
شرطیله بن وتکمیل افراد عائله م اسیر بازارنده کوله اولوب  
صاتلمغی جائزه منت عد ایلرز. اشراف واعیان جزیره دن  
اولوب اوغللری وقیزلری بولنان یک محترم ، مکرم بویله  
برعائله رئیسینک اشبو تمیسی نظر دقته آلیرسه حالک نصل  
مشکل بردرجه ده اولدیغی تخمین ایدیلیر .

کندیسینک وجزیره ده کی بتون اهل اسلامک دوچار  
اولدقلری مصائبدن قورتولسی ایچون دعالر ایلدک . تکمیل  
امت محمدکده بواخوان دینک خلاصی ایچون کیجه وکوندوز  
دعالر ایلهلری بیونلرینه ربورجدر. نهایت بوعالیجناب و حسن  
خلق صاحبی اولان سید وقائد مکرم ایلله آغلايه آغلايه آرلدق .  
پالرموده بولندیغمز زمان بوقائدک وهمشیره لرینک ، اولاد  
وعیالنک اقامت ایلدکلری بیوک بیوک قوناقلرینی کورمشیدک .

صقلیه دن کلوب کچن حجاج و فقرای مسلمینک جمله سنه  
معاونت ایدیور ایدی .

برده بو آطه ده امت محمد پک بیوک بر مصیبتیه دوچار  
اولمشدر . اوده بر عائله صاحبی بولنان ذات شاید افراد عائله  
سندن اوغلنه ویا زوجه سنه برشیدن طولانی طاریلیر ویا برزوجه  
کندی کریمه سنه بر مسئله اوزرینه قینارسه او مؤاخذه  
اولنان شخص کویا عزت نفسنک قیرلمسنه تحمل ایدمه دیکی  
بهانه سیله همان کلیسانک برینه التجا و تنصر ایدرک وافتیز  
اولیور . بوندن صوکره ایسه نه پدر نه ده والد اوغلنی ویا  
قیزینی پاپاسلرک قانجه سندن ، پنجه سندن قورتارده میور .

بویله بر بلایه دوچار اولمق خوفیه بر پدر ویا بر والد نک  
اوغلنه و قیزینه قارشو نه قدر مدارا ایلیمه چکی ارتق تصور  
ایدلسون ! مع ذلک صقلیه ده بولنان عتملا ی اسلام ،  
« اقریطش » یعنی « کرید » اطه سنده اسلامک باشنه کتوریلن  
مکرر تضییقلر سببیه بلاد اسلامه جان آتان امت محمدن ماعدا  
سنک تکمیل تنصیر ایدلدیکی کبی بر کون بواطه ده دخی عموم  
اسلامک جبراً خرستیان ایدیله چکنی اوزاق کور میورلر .  
طائفه رهبانک فکرینه کوره اکر « قائد ابو القاسم »  
مع عائله خرستیانلغی قبول ایده جک اولورسه تکمیل جزیره  
(۱۵)

مسلمانلری ده تنصر ایدرلر ایمش . خدا جمله اسلامی طوغرو  
بولدن شاشیرمسون .

کوردیکمز یورکلر آجیسی وقوعاتدن بریسی ده  
« اطرابنش » اعیانندن بری ، حجدن عودت ایتمکده اولان  
بر دوستمزه ، اوغلانی کوندره رک سن بلوغه تقرب ایدن بر کریمه سنی  
قبول ایلیمسنی ، ایسترسه کندیسی ازدواج ، یوقسه مملکتنده  
راضی اوله حق بریسنه تزویج ایتیمسنی استرحام ایلور ایدی .  
بوقیز جغز ایه دار و دیاری اولان و پدر ، مادری بولنان  
شو آطه دن چیقهرق دیار اسلامدن بریسنه جان آتمگی جاننه  
منت بیلور ایمش . پدر و مادری ایه قیز جغزی بووجه ايله  
تخلیص ایلدکدن صو کره کندیلری ده برکون چیقهرق قیلرینی  
امید ایلورلر ایمش . احبابمز بولنان بو حاجی رجایی قبول ايله  
قیز جغزی آلهرق دنیا و آخرتده نائل اجر عظیم اولدی .  
دوشونکیز که : برانسان کندی جیکر پاره سی بولنان بر قیزینی  
اسلامیتنک خاطری ایچون دیار اسلامه ارسال و فراقنه تحمل  
ایدیور . دوشونکیز که بوقیز جغزده ایماننک خاطری ایچون  
پک کنج یاشنده انا و بابا اوینی تر که راضی اولیور . »

« ابن جبیر » ک « اطرابنش » نقلیاتنه بوراده ختام  
وبره رک دیرم که : دنیا ده کرک دین کرک سیاست هب اصحابنک  
وجودیله موجود و عدمیله منعمدر . شرایع الهیه و قوانین



وضعیه حسن نیتہ مقارن باک اللہ حفظ و احکامی تنفیذ  
ایدیلیر . صاحبی ویا غریبی طرفندن ترک ویا اہمال ایدیلن  
برشی حال اصلیسندہ قلماز . زمانلہ باقلہ میان قماشلر کی صولار  
وتوزلانیر . رنگینی و پاکلر کی غیب ایدہ ایدہ نہایت نہ  
ایدیکی بللیسز اولور کیدر .

امت محمد ، « صقلیہ » محووانقراضندن صوکرہ افریقا  
سواحلی مظالمی و مالطہ وسائر اطہ لردہ اسلامہ روا کوریلن  
خجایعی و ارقہ سندن قوجہ اندلسک باشنہ کتوریلن مصائی  
برر بر صرہ سیلہ کوردی . « العاقل من وعظمتہ التجارب »  
عقلی او آدمدرکہ تجربہ لردن درس آلہ دیرلر . متعصبین  
اہل صلیک افریقا و مصر و سوریه ساحلرینی یغما واورالردہ  
ساکن اولان اہل اسلامی عموماً قتل ویا جبراً تنصیر ایلمک  
نیتیلہ « صقلیہ » جزیرہ سنی دونما لرینہ مرکز و عسکر لرینہ  
آتلامہ طاشی ویا اورتہ قوناق اتخاذا ایتدکلرینی دہ ایشتدی .  
تکمیل عالم تملیشک بنی بشری خطالردن تخلیص ایدہ جکز دیہ  
متفقاً و متحداً موحدین اسلام اوزرینہ هجوم و تسلط لرینہ مقابل  
محمدیلر طرف طرف و قطعہ قطعہ مالک بولندقلری یرلردہ  
سلطنت نامیلہ کندی قبرلرینی کندی اللریلہ قازدیلر طور دیلر .  
« ابو البقاء صالح بن شریف الرندی » نک اندلس

مرثیہ سندہ

ماذا التقاطع في الاسلام بينكم  
وانتم يا عباد الله اخوان  
ترجمه سی

«آرا كزده کی شو مقاطعه اسلام نه در ؟ بهی تکرینک  
قولاری سزقارداشسکز » یتقی اوزمانده بیله قولاقله  
ویز کشیدی .

ای اخوان دین شو حکایه لردن عبرت آلسکز . ملت و  
دولت ایچون هر زمان کوز قولاق اولسکز . الله بر ، دین بر  
اولدیغی کبی کون دخی بر در . بوکون دونه بکزمیور ظن  
ایتمیکز . اهل صلیک امت محمدی چاله قلیج طوغراملری  
قرون وسطایه مخصوص بر تعصب ایدی دیمیکز . ظهور  
اسلامدن اعتباراً اهل هلاک باشی اوزرنده چکیلی طوران  
صلیب شکننده کی یالین قلینج حالاقینه قونماشدر . انانیت  
مذهبیهلری طوردیجه ده طوره جقدر . « ملتلی سونلر اله  
قلیج آیلر — یشامق ایستینلر حق یولنه اولورلر » دیرم



## ۱۲ کانون تانی ۱۹۲۱

بوکون هوامزده یا غمور وار اما برده طاتلی صغوق وار .  
بوصباح ینه برچوق امریقالی مسافرلر اوتلمزه کیشلردیه خبر  
آلدم . ناپولی ایله امریقا اراسنده ایشلین واپورلر اکثریا «پارمو»  
لیماننه اوغرارلر . سیاح کتوریرلر و امریقا نک غایت اوجوز  
امتعہ سنی کتوریرلر . مهاجر کوتورورلر و سیچایا نک لیمون ،  
پورتقال ، و قوری میوه لرینی کوتورورلر . «Catania»  
قاتانیایه دائر تفکر مه لریمی برآرایه جمع ایتمکله مشغولم .  
پارمو سیاحتندن صوکره مصره دوزکن قاتانیایه ده اوغرایه  
رق شهری وجوارینی زیارت وخصوصاً «Atna» اتنا یانار  
طاغی مشاهده م اثناسی روزنامه مه فائده لی ظن ایلدیکم

برچوق معلوماتی قید ایلمشیدم . بونلری ده بورایه علاوه ایله  
بروجه آتی بیان ایدرم . شویله که :

قاتانیا نك الك كوزل منظره سی واپورله لیمان اوکینه  
کلندیکی زمان ظاهر اولیور . قاتانیا «اتنا» یانار طاغتك ساحل  
بحره قدر اینن اتکی اوزرینه بنا ایدلمش اولدیغندن شهرک  
طول وعرضی منتها سنه قدر هب مشاهده اولندیغی کی  
«اتنا» جهنمك باجه سی ده شهرک اورته سی حذاسندن  
دومانلر ایچنده کورنیور . بو منظره نك اوروپا ده ده  
برمثیلی یوقدر . ناپولیده کی «وه زهویو» ولقاتنك منظره سی  
بیله بونك باننده اهمیتسز قالیر . زیرا دائره سی یوز قرق بش  
کیلومترو بر اراضی واسعه یه تمنی آتمش اولان «اتنا» یانار  
طاغتك ۱۹۰۰ سنه سنده کی مخروطی زروه سی « ۳۲۷۴ »  
مترو ارتفاعنده اولدیغی حساب اولمشدر . بوقوجه طاغده  
مخروطی اوله رق ایکی یوز قدرتملر ده موجود اولوب  
ارتفاعلری ایسه نهایت « ۲۰۰۰ » مترویه قدر بالغ اولانی  
بیله واردر .

«اتنا» برکافی تاریخك بزه خبر ویره مدیکی بر زمانده  
پاتالایه ق یرنده بر دلیك آچمش ، زمان زمان هیجانه کله رکه ده  
چامور نهرلری آقیمش وبوکونه قدر شو کوردیکمز قوجه طاغی  
یوقدن واریتمشدر . هر هیجاننده هم رزوه سنی یوکستلیور هم



اطرافنده يکي يکي طاغلو، تپه لر ميدانه کتوريور . باجه سنک  
 اطرافي ايسه قيش ، ياز چپ چوره قارلر ايچنده پارلايور .  
 واپوردن برکچوک ايسکله ايله « قاتانیا » لمانته صباحك  
 ساعت سکزنده حيقم شيدم . ريختيم بويي طولدرمش اولان  
 تئك آتلي آرابه لردن برينه راکب اوله رق شهره کادم . يولاري  
 هم ککيش هم طوغرودر . « اتنا » برکاني « قاتانیا » ي  
 دفعاتله خراب ايتمش ، برکرده چاموريله قاباش اولديغندن  
 بوشهرده اثار عتيقه زيارتي خاطره کتور مامليدر . حتی  
 شمدیکی قاتانیا نك آلتنده براسکی « قاتانیا » موجود اولديغندن  
 آچامش اولان بر خيلى محله لرينى سياحينه دخى کوستريورلر .  
 طابمه بنا آرابه جی برميوه بازارينك ياننده طورمشیدی .  
 بازاري کزه رك ميوه لرندن برنوع يشيل رنگلى قيش  
 الماسيله برسبت ده هند اينجيري آلم . سيچليا اطه سنک  
 هند اينجيري اويله بزم مصر ککينه بکزميور . حجمى يموک  
 ورنکی قويوقيرميزدر . « Piazza del Domo » قبه لی  
 باش کلیسا ميدانی بورا سنه پک يقين ایدی . بوميدانده  
 مشهور « فيللی فسقيه » ي کوردم . قاعده سی مربع مستطیل  
 دینه بيلير . فقط جدار اربعه سی ستونلرله ، حوضجقرله  
 وچوجق هيکلريله تزئين ايدلمشدر . اوزرى محبدر . تقریبا  
 طبعی حالنده بر فيل هيکلی اشبو محبک اوزرينه وضع

ایدلمشدر . سیاه طاشدن اولان بو هیكلك خرطومى یوقارى  
یه قالدیرلمش وایکی آزی دیشی وکوزلری آق طاشدن  
یونتمشدر . هیكلك تمام صرتنه سکز پارچه دن متکون  
برطاش دیکلمشدر که زروه سنه ده بر صلیب وضع ایدلمشدر .  
اشبو فیل هیكلنى بیاغی بنمسه یهرك دقتلی دقتلی اطرافنی  
طولاشدم . زیرا اسلام زماننی حکایه ایدن کتابلر مزد  
« قطنیه » و « قطالیه » دیدکلری « قاتانیا » نك براسمی  
ده « مدینه الفیل » در . قطنیه نك طاسمی تصور ایدیلن  
بوفیل هیكلی شمیدیکی بولندیغی میدانه عربلر زماننی نقل  
اولمشدر . اوندن مقدمی ایسه دیگر بر محله مرکوز ایکن  
خرستیان اهالینك رجا سنه بنأ بیوک کلیسا میداننه نقل  
ایدلیکنی یازیورلر .

شریف ادیسی نزهة المشتاقنده دییورکه « قطنیه »  
کوزل بر شهر اولوب براسمی ده « بلد الفیل » در . اشبو  
فیل بر طاسمدر . وقتیه یوکسك بر محله مرکوز ایکن  
شمیدیلر ده شهرك ایچنده بولنان « کنیسه الیهبان » ك  
اوکنه نقل ایدلدى . قطنیه یی ده مدح ایلیهرك دییورکه  
ساحل بحرده بولنان بوکوزل شهرك غایتله ای بر لیانی واردر .  
پك کوزل چارشولری و مزین بنالری ونیجه نیجه مسجد  
و جامعلری !... خیلی هاملری خانلری موجوددر . لیماندن

جهانك هر طرفنه كميلر قارقار و هر طرفندن كميلر كليز . نه  
و چشمه لری پك چوق اولوب باغ و باغچه لرند هردر لولند  
اوزوم و میوه لریتیشیر »

« علی بن ابی بکر الهراوی » نك « كتاب الاشارات  
فی معرفة الزیارات » نام اترینك طقوزنجی بابنده دیركه  
« قطانه » صقلیه اطه سنده برشهرك اسمی اولوب جهات  
شرقیه سنده بولنان مقبره سنده شهdamزارلری واردر . بولن  
ایسه تابعیندن اولوب « قطانه » محاربه سنده مقتول  
دوشمشلردی . شرق جهتمده بولنان « قصریانه » ایله « قطانه »  
اراسنده « اسد بن فرات » ك قبری واردر . بوذات علم فقهیدن  
« الاسدیات » ك صاحبیدر .

« قبهلی باش کلیسا » نی كزوب كورمك ایچون قپوسندن  
ایچرویه كیردم . « Messa » دیدكلری « قداس » آیینی  
اجرا ایدیلیور ایدی . آیاقده طوره رق قداسی ده سیر ایلدم .  
نه آیین نه ده ارکانی ایچون طبیعی بر دییه حكیم یوقدر . انجق  
نظر انتقاد ایله سویلرم كه : شو عظیم وجسیم معبدی حقیله  
تمیز طوته میورلر . رهبانك اثنای قداسده كینمش اولدقلری  
ایشلمه لی بیاض كوملكلری ده كیرلی ایدی . حتی یریسنك  
كوملكنده كي تنهنه صاچاغك برطرفی ده یرتلمش ، صار  
قیور ایدی .

شهرک جاده لرنڊن اک مشهوری - Via stesicoro «  
 Etnea — استه زی قورو — اتنه آ» جاده سیدر . بوراسی  
 قاتانیانک بللی باشلی و حرکتلی برکتلی ، اک طوغرو ویک  
 اوزون برجاده سیدر . صوگ احصائیه کوره قاتانیانک سکانی  
 ( ۱۴۶۵۰۴ ) نفوسه بالغدر . بیوک برتیا تروسی وار . بتون سنه  
 آچیق ایسه ده قیش موسمنده موزیکه لی اویونلر ویریلیر  
 ایمش . « ویللا بلینی » اسمنده کوزل بر باغچه سی وار .  
 خوشمه کیدن جهتی تقریباً بش عصر دنبرو تأسیس ایدلمش  
 اولان « L'universita » دار الفنونیدر . بودار الفنون ،  
 ادبیات ، فلسفه ، فن حقوق ، حکمت طبیعیه ، حساب ،  
 هندسه ، طب ، جراحلق و اجزاحلق فاکولته لرنڊن  
 مرکدر . غایله کوزل بر نباتات باغچه سی وار . کتبخانه سی  
 و آنتیکه خانه سی حاصلی بوکونده مدنیتک علمی و عملی هر درلو  
 احتیاجنی « قاتانیا » شهری قضا ایده بیلیردیرم . کندی  
 فکریه قالیرسه « قاتانیا » شهری و اطرافی و خصوصاً « اتنا »  
 یانار طاغی ، شویله برایکی کون قدر کزیلوب کوريله بیلیر .  
 اوده بسمله ایله اولمی ! ...

زیرا « اتنا » ولقانی نعوذ بالله آرا ده صر مده پاتلاق ویره رک  
 اورتالغی آلت اوست ایدیور . زلزله بورالرده اک عادی بر حالدر .  
 حتی لاو دیدکاری آتش چامورینک جریانی بطی اولورسه ینه



هیجدر . نسبة حیات اوزرنده تهلیکسی آزدرد . عصی  
اولانلر بورالرده چیلدریورلرایمش . میلادک ۱۸۸۶ سنه سنده  
وقوع بولنان هیجان برکانی بردنبره ظهور ایلمشیدی .  
حکایه سی شوپله در : (۱)

افرنجی مایسک اون سکزنجی کونی زوالدن بر ساعت  
مقدمی « اتنا » یاتار طاغنهک باجا سندن غایتله شدتلی سیاه  
بردومان چیقمنغه باشلار . باجا نک قوه دافعه سنده حصول  
بولان شدت دومانی ماصالارده حکایه اولنان سیاه آذرها  
کبی ایکی بیک مترو ارتفاعنه قدریوکسلتمشیدی . نصف الیلده  
تکمیل « اتنا » طاغنده زلزله باشلار . هر طرف دهشت  
ایچنده قاله رق طاغده بولنان کویلر و اهالی و حیوانات تیریل  
تیریل تیررلر .

« قاتانیا » نک طاغ طرفنده کی منتهاسنده ساکن  
بولنان خلق دهشتلر ایچنده قالیرلر . باجانک اطرافنده « لاو »  
دیدکلری چامور قیپ قیرمزی اوله رق ظهور ایلر . ارتق  
تهلیکه تحقق ایلدیکندن کلن لاو نهینه غرق اولماق ویا

(۱) بو حکایه بی فرانسه آقادمیسی اعضاسندن René Bazi

« رینه بازی » نام ذاتک « Sicile » « سیسل » نام اثرینک ۲۰۷  
نومرولی صحیفه سندن باشلایه رق خلاصه آلیورم .

احاطه ایدلماك ايچون قاچان قاچانه اولور . بو برکان  
چامورينك حرارتی ایکی بیک درجه قیاس ایلمشدر . مثلاً  
برتقنکی دیبجکندن باشی اشاغی طوتهرق قاوالنی بوچاموره  
باتیرسهق درحال اریوب غیب اولدیغنی کوریز . دمیری  
بویله درحال اریتن برحرارتك ارتق درجه سی تخمین  
اولسون .

بو وجه ایله باجه دن درت قول قیرمزی چامور نه ری  
جریان ایلمک باشلار . اوکینه باغ ، باغچه وکوی نه کلیرسه آن  
واحدده یوق ایدر . بوچامور نه لرندن بریسی «سان نیقولو»  
قصبه سی جهته کلکه باشلار . مایك یکر می آتیسنده قصبه  
نك ایکی کیلومترو مسافه سنه قدر کلیر و «آلتارالا» قریه  
سنه ایکی یوز مترو قدر یاقلاشیر . ارتق بتون کویلولر مال  
و حیواناتی قورتامغه چالیشیرلر . بر طرفندن ده پاپاسلر خدمت  
روحانیلریله آتش سیلنك توقیفی بابنده کلیسا لرده «قاتانیا»  
نك حامیسی و پیری عدایدیلن «Sainte Agata» عزیز  
آغاناتك همتی استرحام ایچون حرارتلی دعالر ایدرلر . بویله  
بردهشتلی کونده عزیز آغاناتك هیکلنی ده یوزی «اتنا» برکاننك  
باجا سنه طوغرو اوله رق بر میدانه وضع ایلرلر . بوکی  
روحانیات ، عوامك معنویاتنی تقویه یه یاردیم ایتسه بیله بویله  
برکونده دکل دیرم . عیالی ، مالی علی العجله آرابه سنه

یوکلە بەرک اوکوزیلە برابر تەلەبەدن اوزاقلاشماسی اوقونان  
دعا یە آمین دیمسندن دها خیر لیدر .

کیجە لین آتش چامورینک شەرە طوغرو تقربی پک  
مدەش بر حال ایدی . اورتالق زفیری قارانلق ، برکات  
چامورینک جریانی ایسە ساعتە الی مترو اولوب جەپەسی  
ایسە پک یوکسکدر . طالغەر طالغەر اوستنە ییغلە قیجە  
مال و ملک صاحب لرنک یأسلری دە یأسلر اوزرینە بریکور  
ایدی . آتش چاموری نهری ، آهسته آهسته ایلر ولدکجە اوکینە  
کلن اوکوزلم اوزوم باغلرینی ، میوه اغاجلرینی و کوی طاملرینی  
اون مترو قالینلغندە قابایور ایدی . قاپا مقده اولدینغی خانە  
لرک طاملری ییلە ارتق کوزو کمیور ایدی . زواللی باغلر ،  
باغچلر برکەرە چامورە تصادف ایلدیمی ارتق قیزغین دمیر  
اوزرینە دوشن بر طاملە صوحالی آلەرق آن واحددە بیاض  
برغاز اولوب اوچویریور ایدی . « آتارللا » جەتەنە آقان  
چامور نهری فرداسی صباحلین قصبە نک تمام کینارینە  
طایانمشیدی . ارتق بورا دە دعالر و استرحاملر ایچون توقفە  
وقت قالمامش ایدی . « آتارللا » دە یالکیز اوچ عدد بیوک  
محل معزز موجود اولوب بونلر دە حامی مقدس « عزیز  
نیقولو » یە مخصوص صدرلر . ایام مخصوصە سنده بورا سنە بیکارلە  
زیارتجیلر کلیرودینی آلایلر یاپیلیر و حرکت برکت اولوردی .

رهبان ايسه «عزیز نيقولوايله عزیز آغاتا» نك، مملكتی شبهه سز  
حفظ و كله جك هر درلو بلایي دفعه مقتدر اولدقاری اعتقادینی  
بوش بین کویلیلرک باشنه طولدر مشلردی . هله از قضا برکان  
چاموری کلهرک «آلتارالا» یی ده قاپارسه ارتق او اعزه  
نك وای باشنه کله جکدی . دیرکن آتش دریاسی حانی الآن  
«آلتارالا» نك تمام جوارنده کی چامور نهری بحراسنی  
«Saint-Nicola-L'Arena» «عزیز نيقولا آرینا»  
جهتیه تحویل ایلدی . آرتق «آلتارالا» قورتولدی . خلقده کی  
نی کورملی ایلدی . کرامتله دکل ، معجزه لره حمل ایلدی .  
« نيقولو » دها قوزتولما مشیدی .

مایسک اوتوزنجی کونی «Monte Rossi» «قیزل  
طاغر» ی برکانک برچامور نهری احاطه ایلش ایلدی . بوندن  
صوکره ده سکسان مترو عرضنده اوله رق برچامور دریاسنک  
زوالی نيقولویه طوغرو ایلرولدیکی مشاهده ایلدی .

برکان چاموری نه رلرنده اك زیاده نظر دفته آنه جق  
شیلردن بری ده جریانك اوکنه قویی ویا صهریج کبی صولی  
یرلک تصادف ایتدرلما سیدر . زیرا ۱۸۴۳ تاریخنده وقوع  
بولان هیجان برکانیده جریان ایدن بر آتش چاموری اوکنه  
کلن برقویی یه تصادفله پك بیوك بر انفلاقه سبب اولش



وجوارنده بولنان خلقدن آلمش كيشى نى برآنده بوق  
ايلمش ايمش .

تصور ايدلسون كه اريمش وشدت حرارتدن بم بيض  
بررنك آلمش اولان بردمير درياسى صولى برصهرينج وياقوينى به  
طولار طولماز تكميل صوتبخر ايدرك حجم اصليسندن اون  
يدى بيك كره زياده توسع ايله طبيعى كندى قابى آلت  
اوست پاتلاديور . ارتق « قاتانيا » دن ، « مسينا » دن  
جلب ايديلن درت عدد طولومبا ايله بركونده انجق ايكي  
صهريج تخليه ايدلمشدى . اكثر ناحيه مديرلى كى « نيقولو »  
مديرى ده يك دوربين و درين حسابچيلردن بولنديغندن  
عزيز نيقولوده هركون ايكي صهريج تخليه ايديليرسه انجق  
بش آيده صولرى قوروده جغنى اعلان ايلدى .

بركان چامورى نهرينك ايسه سرعتى بو طرفده ساعته  
اللى مترو قدر بولنديغنى فناً ثابت اولديغندن بركون صوكره  
قصبه نك تكميل تخليه سنى حكومت رسماً امر ايلمشيدى .  
مايسك اوتوز برنجى كوفى وقت ظهرده قصبه تكميل  
تخليه اوله جقدى . وقت موعودى كلدى . آلتى عدد كليسا  
نك چا كلارى چاك چوك ايلمكه باشلاديلر . تكميل خلق قصبه  
نك بيوك ميداننده طويلانمشلردى . « قاتانيا » نك باش  
پسقه وسى دخى تكميل هيئت رهبانيسيله بوراده بولنيورايدى .

قصبه یی تخلیه ایچون دینی بر آلا ی ترتیب ایلمش لر ایدی . پیاده اوله رق سر یسقیپوس او کده بالخلله رهباران ارقه سنده وحضرت مسیح ایله اناسی مریمک هیکلری او موزلرده و خالق درنکی ده اک ارقه ده قصبه یی ترک ایلمش لردر . ارتق اغلایانی ، باغیرانی و یوردینه یواسنه ایکلیهرک وداع ایدنلری کورملی ایدی . پک حزین بر منظره ایدی دیه یازیورلر . اها لیدن صوک نفری چیقنجه ارقه سندن ژاندارمه قره قوللری ده چیقه رق ارتق کیمسه نک قصبه یه عودت ایتماسنه دقت ایدیورلردی . لاونهری « قیزل طاغ » جهتمدن معساد جریانیله کلیور ایدی . قصبه نک تلغرافلری ده قطع اولندی .

کوی وقصبه لرینی ترک ایدن خلق « قاتانیا » و « پدارا » وسائر محللره واصل اوله رق موقه اسکان ایدلایلر . بتون خلقلک کوزی « اتنا » نک باجه سنه باقدیغی کبی قولاقلری ده آتش چاموری نهرینک نره لری قاپامش اولدیغی حوادی ایچون قابارمشیدی .

قصبه تخلیه اولندقدن صوکره چامور نهری سرعتی غیب ایلمکه باشلامشیدی . هیجان برکانی دخی ارتق آهسته آهسته تناقص ایلدیکندن چامور نهری طورمش وقورومشیدی . چامور دریاسی قصبه یه ایکی یوز مترو مسافه تقرب ایلدیکندن

پك چوق اراضى يى قاپامش ويكپاره سياه برقيا حاله قومشيدى . بوسبتون صغومسى ايچون ده موسمنه كوره اك آزدن ايكي ماه لازمدى .

نهایت « نيقولوس » و جوارى اهالىسى هجرتلرندن اون اوچ كون صوكره كلدكلرى نظام اوزره يعنى باش بسقيوس ورهبان و حضرت مریم و اوغلى مسيح هيكللى آلاى والاسيله دار وديارلرينه دوئمشلردى . فقط بودفعه كلدكلرندن دها كور ولتيلي اوله رق عودت ايتمشلردر . عموماً ايتالياده ، خصوصاً سيچيلاده نمايش ودينى آلايلر كې جمعيتله اجرا ايديلن رسمياتك اهميتى ، كورولتيسى درجه سنده ترايد ايدر اولديغنى راي العين مشاهده ايلدم . نه قدر زياده باغيريلير ، چاغيريلير ايسه او قدر اهميتى آرتار ديمكدر .

بوهيجان بركاني چامورى آلتى يوز مترو قطرنده يكي برطاغ وجوده كتورمشدر كه شيمديلرده بو طاغه Monte - gemelaro - جه لاروطاغى « اسمنى ويرمشلردر .

هيجان بركاننك دهشتنى تصور ايتمك ايچون ديرم كه : هيجانه كلش اولان بوولقانك يالكنز بركونده خارجه دفع ايلديكى چامورى اوچ ميليون مكعب حساب ايدلمشدر . اشبو چامورسيلى ايسه اوزمان درت يوز اللى ايكي هكتار اراضى قاپامشدر كه بونك يوزيكرمى ايكي هكتارى ده اوزوم باغلريدر .

عرب کتابلرنده ایسه بو « اتنا » یانار طاغنه دائر خیلی  
 شیر یازلمشدر که : زمانلری اعتباریله ده شایان مواخذه  
 دکلدر . از جمله « ابو بکر الزهری » نك « کتاب الجغرافیه »  
 سنك صقلیه دن بحث ایاین یکر می ایکنجی بابنده دیور که :  
 صقلیه ده « سر قسط » ( سراقوزه دیمك ایستیور ) شهر  
 ندن صوکره « جبل البرکان » واردر که بونك پك جسم اولان  
 آتشی زمان قدیمدیر و یانوب طور یور . بو طاغك تپه سنده کی  
 باجهلری حمام کولخانلری کبیدر . کوندوزلری اورتالغی قابایان  
 دومانلری چیقار و کیجهلری آلاولری کور و نور . بویانار طاغدن  
 هر دفعه سنده یدیشر کون دوام ایتمك اوزره سنه ده اوچ  
 دفعه زفری بر آتش ظهور ایلر . بوزفرلی آتش هوایه  
 قبعلجیمار پوسکورر و یوز آرشوندن زیاده هوایه صعود ایلین  
 بوقیغاجیمار دکره دوکولهرك طوکار و سیاه برطاش اولور .  
 برروایتیه کوره بو طاشلر انسان صورتنده اولورلر ایتمش

المسعودی ده « مروج الذهب » نده دیور که « صقلیه »  
 اطه سنده « الاطمه » « اتنا » اسمنده بر برکان موجود  
 اولوب باجه سندن باشسز انسان وجودی کی آتشی جسملر  
 چیقار . بونلر دکره دوشوب سونهرك طاش اولور که بونکله  
 دفتلردن یا کلیدلری حك ایدرلر . بو طاشلر غایتله ده خفیف  
 اولور . رنگلری ده بیاضدر .



« ابو حامد الغرناطی » نك تحفة الالباب ونخبة الاعجاب  
 نام کتابك سکنزنجی بابنده (۱) ایسه دیرکه : « صقلیه » ده  
 ساحل بحره یقین برطاغ موجود اولوب کیجه بوندن آتش  
 حقیقه رق اون فرسخ قدر مسافه نی تمویر ایلر . بن بوطاغی  
 هجرتك ۵۱۱ سنه سی اسکندریه یه کیدرکن کورمشیدم .  
 بغداد ده « الشیخ الامام العالم ابو القاسم بن الحاکم الصقلی »  
 دن ایشتمشیدم که : بوطاغدن چیقان آتش اون فرسخلك  
 مسافه نی کوندوز کی زیادار ایلر . نه یوللر نه ده او جوار  
 ده کی قریه لرده بشقه ضایه محتاج اولمازلر . بوآتشدن برنوع  
 پموق یوماق لری کبی آتش پارچه لری چیقار که قاره یه  
 دوشرسه آق برطاش اولور . بوطاش اودرجه ده خفیفدر که  
 صویه آتلیرسه باتماز . اکر او آتش پارچه لری دکره دوشرسه  
 سونکر کی دلیکلی وسیاه برطاش اولور . بونکله حاملر ده  
 ایاقلرک آتی حک ایدیلر رک تمیزلیر بو آتش پارچه سی قوم  
 وطاش اوزرینه دوشرسه در حال اشتعال وقوع بوله رق قوم  
 ویاطاش هب کول اولور . نبات . والبسه یی یاقمایوب طاش  
 وحیوانی یاقار . « اعاذنا الله منها ومن عذابها امین »  
 ایشته نظر مطالعه مدن کچن کتب عربیه ده بو وامثالی

---

(۱) بو کتاب آلمانبا ده لا یپزنج شهرنده طبع ایدلمشدر .

حکایه و ماصالار موجود اولوب اوزمانده دها اسباب و احوال  
برکانه نك فنا تحقیق ایدلماش اولدیغنی اثبات ایدر . « اتنا »  
بی زیارت ایتمك ایستینلر ایچون دلیللر و آراهه لر و قاطیر لر  
ویرر ، کوتورور کتیریر هر درلو تسهیلاتی جمع ایلماش شرکتلر  
موجوددر . انجق تشرین اول آیندن اعتبارآ « اتنا » نك تپه  
سنه قدر چیمق مشكل اولیور . اوچ بیک و کسور مترو  
ارتفاعیله برابر قارلرله قاپانمش بر چوق مسافه بولندیغندن  
باجه سنه یقین کیتمك ایستینلر ایچون اك مساعد موسم یاز  
آیلریدر . « قانانیا » اطراف و جوارنده دخی زیادت ایدلمکه  
لابق خیلی کوزلر لر واردر . از جمله « Misterbianco »  
میستریما نقو و « Belpasso » بلپاسسو و « Paterno »  
« پاترنو » و بونلره مثیل بر چوق بیوک کوی و قصبه لر واردر .  
وار ارلمايان برشی وارسه اوده ایکی یوز و کسور سنه اکتمدن  
عر بلرک پک ایشله ک بر ایسکله سی اولان « قطانیه » و جوارنده  
یوق ایدیلن اثار ، مبانی و قبور اسلامدر . شوده بزم بریادکار  
تاریخیمزدر دیه کیدوب کوره جک بر چویمز بیله بو شهرده  
موجود دکلدردر . بوشهرو جوارنده مدفون اولان ارواح اخوان  
دینه فاتحه لر او قودم .

بویله جه درت ساعت شهرده واطرافنده آرابه ایله  
وپیاده کزدکدن وامکان درجه سنده خیلی یرلر وشیلر  
کوردکدن صوکره واپوره عودت ایلدم . « قاتانیا » دن  
« سیراقوزا » یه واپورله درت ساعنده کلنیور.



پالرمو ۱۳ کانون تانی ۱۹۲۱ چهارشنبه

یوگون صباح کز نیمیسی اولمق اوزره لیمانک ریختیمی  
بویلادم . ناپولیدن کلن واپورک یولجیلرینی سیرایلدم . برده  
قایقلرله کله رک ریختیمه چیقان غریب یوزلی و عجیب قیافتلی  
خلق کوردیم . بونلرده کیم اولیورمش دیه یانلرینه یاقلاشدم .  
اسانلری کویایمالیا نجه ایدی . یوزلری عرب دوغمه سی یوزلر دندیر .  
باشلرینه تاقیه کیمشیر و تاقیه لرینک اوزرینه ده یامری یومرو  
کچه شابقه لر طاقشلردی . پانتالونلرینی بللرینه بر قوشاقله  
طوتدیرمشیر و جا کتیرینی صول اوموزلری اوزرینه کلیشی  
کوزل آتمشلردی . قادین وقیزلرینک قباقلری ده پک تحفدر .



على العموم باشلىرى بزم اناطوللىنىڭ طاغ و كويلرىنىڭ اولدىنى  
كېي قالىن بىرىنى ايله اورتولى وچكە لىرى آلتىدىن چىكى  
وباغلىدر .

بوعجايىب خىلقك نىزدىن كلىور اولدقلىرىنى اقشامە قدر  
رىختىم بويىندە طولاشان برهين اوغلى حمالدىن صوردم .  
دىدى كە - بولر سىچىلىيانىڭ اطرافىندە بولغان اطە لردندىر .  
مىوہ كىتورىرلر . پالرمودىن مال آلىرلر . لىكن بزم كېي حمالارە  
بولردىن آلتىك يوقدر . كىندى يوكلىرىنى كىندىلىرى طاشىرلر .  
غوغاجى ، كورولتوجىدرلر . . . . . پىكى ، پىكى ! تشكر ايدىرم  
دىهركە همان صاوشدىم . چونكە طورر وسوزىنە قوللاق  
ويررسە م اطە لى ايتالىانلىك تارىخ تىكونلىرىنە قدر حكايەسىنى  
اوزاتەحق و صو كىندە دىل كىراسى دىه كۈەزە لىكنىڭ اجرتىنى  
دە اىستىمە يوب آله جقدر . هر مملەكتىدىن زىادە ايتالىادە عوام  
ناسە چوق ياقلاشماملىدر . سارى خستە لك كېي يولاشمەسى  
قولاي وقورتولماسى پىك كوجدر .

اولتە عودىمىدە سىچىلىيا يە تابع اطە لىر حقىندە تىبىدە  
بولندىم . نىزدىمدە بولغان يىدى قىطعە دن مركب سىچىلىيا جىزىرە  
سى خرىطە سىندن پالرموىە عائد خرىطە دە بروجە آتى  
جىزىرە لىر موجوددر .

ترجہ سی بیلدیکم عربجہ اسمی ایٹالیا نجہ سی

Isola ustica اوستیکا اطہ سی

« di Levanzo جزیرۃ الراحب » له وانزو

« « Favignana الیابسة » » فاوینانا

« « Formica » فورمیکا

« « Maraoni » ماراونی

« « Marettimo جزیرۃ ملیطمة » مارہ تیمو

« Cefalu » « چفالو » قسمنه عائد بولنان خریطہ

دهایسه یالکز « Alicudi » آلی قودی اطہ سی موجوددر.

Pantelleria — Colyra — جزیرۃ قوصره — پاتمہ لالریا اطہ سی

Linosa « نموشه » لینوزا

Lampadusa « لنبدوشه » لامپہ دوزا

Lampione « لامپیونه »

Stromboli « استرونجلو » استرومبولی

Basiluzzo « بازیلوتزو »

Panaria « پاناریا »

Salina « سالینا »

Filicuri « فیلیقوری »

Lipari « لپاری جزیرۃ لیبر »

Vulcano « البرکان » ولقانو

اشبو اظه لرك جمله سى عصر لرك مسلمان عربلره وطن اولمشيدى. قرون وسلطانك قورى تعصبى ايجادله كيفلر نجه، جاهل خلق اوزرنده دنيا و آخرت حاكمى قالمق ايسئين پاپارك رهبان اردولرى تهيت بواظه لرده اسلاميتك قوقوسنى بيله بيراقامشدر. ايتاليان جغرافيا كتابلرى سيچليا جزيره سنه تابع اظه لرى اداره جهتمده شويله تقسيم ايلور. ديوركه: سيچليانك اك يقين ساحلنه ۴۵ كيلو مترو مسافه بعدنده بولنان « Lipari » « ليپارى » اظه لرى « مسينا » سنجاغنه تابع اولوب مجموعى ده كچوكلى بيوكلى اون يدي اظه در. بونلرك جمله سى بركانى و قياقدن عبارتدر. باشليجه لرى ايسه ۲۲۵ كيلو مترو مسطحنده اولان « ليپارى » اظه سى و ۲۵ كيلو مترو دائره سى بولنان « وولقانو » يانارطاغى اظه سيدر. « سالينا و آليقورى و فيليقورى » اظه لرى دخى بوجمله دنر. « ليپارى » اظه سنك اوزوم وسائر ميوه لرى پك مشهوردر. زيتون ياغى دخى اخراج اولنور. كوكرت اوجاقلرى ده موجوددر. نوشادردخى اخراج اولنور.

« ترپانى — ايله — مارسالا » ليانلرى اراسنه قارشى برطاقم اظه لر ده موجود اولوب بونلرك باشليجه لرى ايسه يوقاريده كى جدولده اسمى كچن « فاوينيانا » « ماره تيمو، له وانزا » اظه لريدر. اشبو اظه لرك مهم مهم قيمت تاريخيه

لری بولنوب سیمچلیا اطه سیله حربده علاقه دار اولانلر دایما بولری عسکرلرینه مرکز اتخاذایدرلر ایش .

پالرمویه تابع و شمالنده ۱۱۰ کیلومترو مسافه بعدنده « اوستیقا » نام اطه بولنیور . بونک اراضیسی پک منبت اولوب حبوباتی و شکر قامیشی و زیتونی و کچیلری پک مشهوردر . صخوری و برکانی بولنان « پاتمه لارییا » اطه سنک دائرهسی ۳۵ کیلومترودر . و « مالطه » اطه سنک جنوب غربیسنده بولنان « لامپا دوزا » و « لامپیونه » و « لینوزا » اطه لری « Girgenti » حیرجینی سنجاغنه تابعدرلر .

« پاتمه لارییا » اطه سنک اسم قدیمی « Cotyra » « قوئیرا » در . عربلرک « قوصره » تسمیه ایلملرینه سبب حقیقی ، زمان استیلالرنده کی « قوئیرا » دیه ایشتمش اولدقلری نام اصلیسیدر . قاموس الاعلامده « قوصره » بحثنده تحریر اولندیغی کی دکلدر . شمدی بواطه ده « Cossura » « قوسسورا » نامیله عربلردن قاله بر قصبه موجوددر . بواطه ایله سیمچلیا یه تابع دیگر اطه لر ، حق شمدیلرده انکیزلرک بولندیغی « مالطه » اطه سی حضرت معاویه زماننده اعتباراً برربر اسلام انه کچمش و اوچنجی عصر هجریده تمکیلی افریقا حکومت اسلامییه سی طرفندن اداره اولمش و اکثر سکانی اسلام اولدیغی کی تمکیلی ده لسان



عربله متکلم بولنیورلایمش و « صقلیه » جزیره سنی نورمانلر  
استیلا ایلدکدن صوکره بالطبع کچوک اطه لرك ده ارتق  
خیری قالماش ایدی . ایکنجی « روجارو » ایسه دونماسنی  
یاپدقن صوکره بواطه لری بربرر آمشدر . « انکیزیسیون »  
نامیله پاپاسلرك ایجاد ایلدکلی تفتیش عقیده جمعی، مرکزینی  
« مالطه » اطه سنده یاپدقن صوکره اشبو اطه لر سکانی  
بولنان مسلمان عربلرك باشنه کتورمدکلی قالماشدر .

مثلا « صقلیه » دونماسی اطه نك بریسنه هجوم ایدیور .  
اهالی مال ، جان و عرضلرینی مدافعه ایچون مقاومت  
ایدرلر سه وای حاللرینه ، وای باشلرینه اولیور . ۶۸۳ هجریده  
صقلیه دونماسی « جربه » اطه سنه هجوم ایلمش ، اهالی مدافعه  
یه تشبث ایلدکلی ایچون چاله ساطور اطه نی آملش  
واسیرنامیله طوپلایوب صقلیه یه سوق ایلدکلی کنج اوغلان  
وکوزل قیزلرك یکونی سکزیکه بالغ اولدیغنی « المبادی الدولة  
الحفصیه » نام کتابک الی برنجی بابنده « ابو العباس احمد »  
یازمشدر . دیپورکه کچوک چوجقلری تکمیل قتل ایلدیور .  
خلقک ماللرینی متاعلرینی یغما ایتدیور . اسیرلری و قوری  
اوزوم وزیتون یاغلرینی هب کیلرینه تحمیل ایدرک مملکتلرینه  
کوتوردیلر .

ابو عمید البکری « المسالك والممالك » نام کتابنده

« قوسره » جزیره سی دیه املاسنی سین ایله یازیور . عبد  
الملک بن مروانک خلافتی زمانده سوق اولنان اسلام دونماسی  
بواطه یی ده آلمشدر دیه حکایه ایلیور .

« شیخ شهاب الدین » ک « معجم البلدان » نده  
« قوسره » و « ابن القطاع » دن نقل ده « قوسری »  
دیه یازیور . حضرت معاویه زمانده فتح اولندیغنی و « عبد  
الملک بن مروان » زمانده خراب ایدلدیکنی نقل ایله  
خوارجدن اولان « الوهیه » قومی سا کندرلر دیور .

« نور الدین علی الاندلسی » نک مختصر جغرافیه سنده  
دخی « جزیره قوسره » تکمیل سکانی مسلمان بولنوب  
اداره جه « صقلیه » فرنک حکومتنه تابعدر و اخراجاتندن  
اینجیری ومسطکی صاقیزی وقطرائی پک مشهوردر دیه  
یازیور .

بوکونده سیچلیا اطه سنه تابع اطه لک اسملری ، سیچلیا  
شهر و کویلرینک اسملری کی اکثریا تغیر ایدلمشدر . سکاتنک  
یوزلری ، کوزلری و اخلاق ، عادتلری هب دونه عرب  
اوغلی عرب اولدقلرینی کوستردیکی حالده قتولک مذهبنده کی  
ظاهری تعصبلرینه نهایت یوقدر . حالبوکه قوام اخلاق اهالی  
وعظ ونصایح رهبانندن زیاده پولیس ومحاکم نظامیه خوفیه  
بقابولمده در . حیاتلری کنه کارلقه کچن جهله خلقلک

آراسنده ييقانق ايچون حمامه كيرر كي ايكي ده بر كنانه چيقارته  
جغم ديه كليساده اعتراف دولانه كيروب چيقانلر آراسنده  
اعترافجي پاپاسك ساعتني ، انفيه قوطوسني آشيرانلر هييجده  
اكسيك دكلدر. نه ياپسون يوقسول كناهدين قورقماز. احتياج  
خفتان عفتي ييرتار ، پارچهلر ديهلم ! . . .



## پالمو ۱۴ کانون ثانی ۱۹۲۱

او — هو . . . ! دون اقشامدنبرو جوار او طه ده کی یکی  
قومشوده هم کولش هم کورش وارا! . . . صایغیسزلق ده اولورسه  
بو قدر اولور . شوایتالیانک صوک زتکیلری کلیساده زواج  
دفترینه برک ره اسملرینی قیدایدرک پاپاس جنابلرینک ده مبارک  
دعاسنی آلدیلرمی ؟ . . . ارتق کلین کویکی قوشه صیچرایه  
« ویللا ایچی آ » مسافر خانه سنه صولوق آلمق ویاصولومق  
ایچون مطلقا مسافر کلیورلر . ایتالیان بال آجیلری نه سوز نه  
نصیحت دیکلمزله ها ! دیرلر که پراوتلده جوار ثده کی او طه ده  
یوکسک سسله کمریشن بال آجیلردن برینه ینه اسکی قاین انالردن  
بریمی آره قیویه اورده رق « به آدملر » بزده بال ای کوردک ،



بزده كمریشدك اما بوقدر كورولتو ایتمك ایدی دیه بردرس  
ادب ویرمك ایستمش ایسه ده کلین کویکی، زواللی قوجه قادینه  
قارشى، حسدکدن و قیصقانچلغىکدن بویله سویلیورسك .  
بزروطه مزده سربستز . اغزىكك صوی آقپورسه مندیلكی  
سیلکی بزى یاپ دیشلردر .

دون اقشام طعامندن صوكره موزیقه سالوننه اینمشیدم .  
رقص ده وارایدی . برقاج کوندنبرو طانیدیغم هولاندالی  
براختیاری زوجه وکریه سیله اوراده بوله رق یانلرنده  
برایسکمله یه اوتوردم . بوذات « لاهی » شهرنده اك ینوك  
برمطبعه جی ایش . اعصابندن خسته لندیکی ایچون اطبا  
کندیسنی پالرمویه کوندرمشلر . مصرک هواسنی صوردی .  
روماتیزمله ر و سکیخ خسته لیکلرینه « اصوان ك قیشین غایتله  
حار، یابس اولان هواسنی توصیه ایلمشیدم . زوجه سی، کبار  
اصناف خاملرینك فوقنده اولدیغنی دعوا ایدور . مراقی  
ایسه هرکون اوتلك مسافر جدولنی مطالعه ایتمك، خدمتجی  
قادینله سفره چیسنندن یکی مسافرلرک نصل قماش اولدقلرینی  
صورمق و کوریشدیکی کیمسه لره بونلردن حوادث ویرمکدر .  
بوکون اوتله چوق یولجی گلش اولدیغنی وایچلرنده بر چیفت  
بال آجی بولندیغنی بکاده سویلیدی . علاوه اوله رق ده بونلرک  
قیلیق و قیافتلری صاحب ثروت اولدقلرینی کوستریور ایسه ده

طور و تکلملرندن اصيل اولمقلری و اغلب احتمالہ کوره  
ایتالیانلرک « کوپک بالیغی » نامنی طاققلری یکی زنکین زاده  
لردن اوله بیله جکارینی خبر ویردی . بن ده بوبال آجیلرک  
بکا قومشو اولدقلرینی و کولاش و کورش سسلرینی بیله  
ایشمدیکی نقل ایلدم . قادینجغز بو حکایه می یکی ونم تعمیرجه  
صوک زنکین زادهلردن اولدقلری دعواسنه قوتلی بروثیقه  
دیه قبول ایلدی .

طعامدن اول اشتها آچمق ، اثنای طعامده اشتها ایله  
ییمک و طعامدن صوکره هضم ایلمک ناملریله معدده لرینه  
درلومسکرات طولدردقلری ایچون آغیرلاشان باشلرک  
صاحبلری ، ساعت اون بره طوغرو موزیقه سالوننی بررایکیشر  
ترک ایلمک باشلادیلر . حققلری ده واردر . زیرا توتسولنی باشک  
قولاغی سازدن زیاده یا صدیقدن خوشلانیر .

بن بوراده رقصلرک انواعنی سیرایلدم . بزم شرقک  
رقصلرینی « قارین ویامعده رقصی » دیه زیاده سیله تعییب  
ایدن اوروپا وامریقا لیلرک شو صوک سنه لرده کی « تانغو »  
وسائر ناملر ویردکلری رقصلرینی ، هله رقصده کیندکلری  
قادین کسوه لرینی کوره کوره کوز آیشملیدر . یوقسه بونلری  
تعریف ایچون انسان سوز بوله ماز . بو کونده اوزوپا ده تیاترو  
ویارقص ایچون طائفهٔ انسانک کسوه نامیله اکتسا ایلمکده

اولد قیزی قاشلردن شرقدہ بر حمام پشمالی حیقہ ماز .  
 بالجلہ رقصار وقادین کسودلری هب رجالک جلب اشتیاقی  
 ایچون ایجاد ایدلمش شیدلردر . حالبوکه اشتیاقی دها زیاده  
 جلب ایده لم دیه ایجاد ده ابتدال ایدلمش ، ابتدال ایسه رغبتی  
 تنقیص ایلدیکندن تزید میل ایچون ده ابتدالک ابتدالی ایجاد  
 ایدیلوب طور مقدهدر . اوروپانک شو مدنیت حاضرہ سہلہ  
 متناسب کیدن جنس لطیفک مودہ دیه سنہ ده اک آزدن ایکی  
 دفعہ طور وشکلنی دیکشدیکی کسودلری شمیدیکی سرعتیلہ  
 کیدرسہ آق نیل ساحلاری سکاننک طبیعی قیلق وقیافتلرینی  
 برقاچہ سنہ صوکرہ اوروپا صالونلرنده سیرایدرز . خرطومدن  
 یوز الی میل صوکرہ آق نیلک ایکی ساحلی بونینجه ساکن  
 بولنان « شولوک و دینقہ » ناملرینی آلان زنجیلرک نسوانی  
 یالکیز ادب یرلرینی سترایدزلر . قیزلری ایسه بوسبتور  
 آچیق کززلر .

کوره کوره کوز آلیشیورده آچیق صاحیق کززمہ نک  
 عیبی مایی قالمایور .

خلاف معتادم کج وقته قدر موزیقہ دیکلہ دم ورقص  
 سیرایدم . رقص ایدرز دیه چیلغینجه صیچرایوب طوران

قومشوم بال آجیلرینه ده دفعاتله کنایه‌لی نظر لر فیرلا تدم .  
لهویاتک تاثیرندن اولمیدرکه : اویقوده رؤیالر کوردم  
یاندیم . صباحیلین اویاندیغمده ده باشمی قازان اولمش بولدم  
وکندی کندی ده مکر دکیمن شاقیلداغی بوشنه کورولتو  
ایتمز ایش دیدم .





## ۱۵ کانون تانی ۱۹۲۱

بوکونیکی تحقیقاتم « سیراقوزه - Siracusa » اوزرینه  
اولدی. بحرآ « قاتانیا » دن قالقان واپورلر اکثریا « سیراقوزا »  
یه اوغرارلر. قره دن دخی دمیریولیه اطه نك هر طرفنه  
باغلیدر. شهرایکی لیمانك آراسنده کچوک بر شبه جزیره در.  
بوراسی قدیمده مقدس عدايدلمشیدی. اسمنه ده « اورتیجیا -  
Ortigia » دیرلر. میلاد عیسا دن تقریبا ۷۴۳ سنه مقدمی  
« سیقولی - Sicoli » قومی طرفندن تأسیس اولمشدر.  
زمانله « سیراقوزه » شهری بیویه رك اطه دن قارشوسنده کی  
اراضی به کچمش و تاریخلرک یازدیغنه کوره قارتاجلیلر زماننده

سکائی بر میلیون قدر اولمش ایتمش. حربلر وسائرہ ایله خراب اولمش وحالاده خراب قالمشدر. قرون وسطاده کی شهر وخانه وسوقاق وجادهلری کورمک آرزوایدنلره شمديکی «سیراقوزا» یی زیارت ایلمکی توصیه ایدرم. بوکونده سکائی ۳۱ ۸۰۶ نفوسه بالغ اولدیغنی صوک احصاءده یازبورلر.

خارجی لیمانی اوزون بر ریختیمله محافظه ایدلمش اولدیغی کبی داخلی لیمانی ده طبیعی بر حالده محافظه لیدرکه: قطری ۳۸۱۰ مترو اولوب مدخلی ایسه ۱۰۵۰ متردر. شهرک ایچ لیمان طرفندن مدخله قدرکن ریختیمی ککیشجه بر جاده حالنه قونه رق اغاجلر دیکلمشدر. سوقاقلری پک طاردر. کیرلی وپاصلیدر. خلقی ده شهرک حالنه اوینغوندر. طیش لیماننک ضاغ جهتمدن کوریلن بر قاچ باجه، کورکورت تصفییه سنه مخصوص فابریقه لر کدر.

معلومات تاریخیه سنی اثار قدیمه خرابه لرینی زیارتله توثیق ایتمک ایستینلر «سیراقوزا» ده خیلی شیلر کوره بیلیرلر. «دیانا معبدی» خرابه سی قدیم شهرک تقریباً مدخلنده در. «مینروا معبدی» ده اطه نک منها سنده اولوب یدنجی عصر میلادیدنبرو کلیسایه تحویل ایدلمشدر. سیراقوزانک باش کلیسای دخی قدیم بر معبددن دونه در. باش کلیسا میدانی جوارنده بولنان بلدییه دائرہ سی ایله «آنتیقه خانه» بنالری دخی

شایان تماشادرلر. « قصر مانیاچی Castello Maniaci »  
 دخی کوريله جک بیوک بنالردندر . بو « مانیاچی » میلادک  
 ۱۰۳۸ تاریخنده عربلری سراقوزا دن اخراج ایلمشدر ديه  
 ایتالیان تاریخلری نخر ایدیورلر . بزم ایچون « سیراقوزا » نك  
 اهمیتی ، زمان فتحده عسا کر اسلامک ایلك محاصره ایلدیکی  
 شهر اولمسیدر .

خراسانی اسد بن الفرات بن سنان که مأمون خلیفه نك  
 عموم افریقا امیری بولمان زیاده الله بن الغلب طرفدن  
 « قیروان » قاضی تعیین ایدلمشیدی . هجرتک ۲۱۲ سنه سی  
 ربیع الاول آینده قاضی اسد بن الفرات صقلیه یه سوق ایدیلن  
 عسا کر اسلامک امیری تعیین اولمشدر . صقلیه یه کملرله ایلك  
 سوق ایدیلن عسا کرک یکونی اون بیک پیاده و طقوزوز  
 سواری بولندیغنده مؤرخین عرب متفقددرلر . هجرتک ۲۱۲  
 سنه سی ماه ربیع الاولنک ابتداسی میلادک ۷۲۸ سنه سی مایس  
 آیدنک اوتوز برینه مصادف جمعه کونیدر .

« تاریخ جزیره صقلیه » نام کتابده عسا کر اسلام ماه  
 تموزک اون بشنده « صقلیه » جزیره سنه کلدیله ديه محرردر .  
 بو حسانجه بر بچوق ماه صوکره جزیره یه وضع قدم ایلمشدر .  
 عسا کر اسلام ایلك اول « میناو » قلعه سی جوارنده روم  
 عسکريله حرب ایلمشدر .

« میناو » قلعه سی اسکی کتابلرده « لنتینی » یه یکر می  
درت میل مسافه بعدنده اولدینغی یازیورلر .

هجرتک ۲۱۳ تاریخنده امیر اسد بن فراتک اردوسی  
سرقوسه نی محاصره ایلمشیدی . اثنای محاصره ده امیر مشار  
ایله یاره لاش و نهایت سکمان یاشنده اولدینغی حالد مجروحاً  
اوراده فوت اولمش و سیراقوزا جوارنده دفن ایدلمشدر .  
مرحوم امیر لکندن زیاده علمیه مشهوردر . فقه وحدیثه  
امام درجه سنده صاحب شهرتدر . فقهدن « الاسدیات »  
ک مؤلفیدر .

« الادریسی » نزهة المشتاقنده دییورکه « سرقوسه »  
سیچلیانک مشهور شهرلرندن بریسیدر . قارهدن ودکیزدن  
بجارت ایچون کلیرلر . شهر هر طرفدن دکزله محاط اولوب  
یالکیزشمال جهتمندن برقیوا یله قرهیه متصلدر . ایکی لیمانی واردر .  
جنوبنده کی لیمانی بیوک اولوب شمالنده کی لیمانی ایسه پک  
مشهوردر . « فواره النبوی » اسمنده بر چشمه سی بولنوب  
بوده تمام دکزکنارنده بولنان بریاردن فوران ایدیور .  
« سرقوسه » ده الک بیوک برشهرده موجود اولان چارشولر ،  
یمکخانهلر ، خانلر ، خانلر ، حماملر وکوزل بنالر واردر .  
اطراف وجوارنده بولنان اراضی پک برکتلیدر . هر درلو  
مزروعاتی واردر .



بورایه کلن کمیلر ییه جک وایچه جک و سائر شیدلرینی سرقوسه  
دن آلیرلر . بوشهرک باغچه ومیوهلری حددن افزوندر «  
کله لم حال حاضرینه : فقرایا تاغی کیرلی پاصلی بریردر دیرم .  
تجارتی بر مقدار کوکورت اخراجا تمندن عبارتدر . حالبوکه  
زمان اسلامده بو راسی اک مشهور بر لیمان ایدی . شعرا ، ادبا  
و علماسی ایله شهرتی وار ایدی . یوقاریده دخی بالمناصبه اسمی  
کیچن شاعر « الشیخ عبد الجبار حمдіس الصقلی » سیراقوزا  
ایدر . بونک روماده طبع ایدلمش مکمل بر دیوانی واردر .  
امرای اسلام آراسنه اختلاف وحسد دوشه رک نهایت  
اهل صلیب اطهیه مستولی اولنجه هجرت ایلین اسلامله برابر  
افریقایه وصوکره اندلسه کیدن بو شاعر ، وطنی حسرتلرله  
مدح ایلیور . کنجاککنده وطننده کیچورمش اولدیغی طاتلی  
کونلرینی صایمقله بیتیره میور . باغچه لر نده کی « ساقیه » دینلن  
صودولا بلرینی تعریف ایلیور . صوباشلرنده سوردکاری  
صفالری یادایلیور .

کوزل راهبه لر دن ده حکایه ایلیور . بن جنتدن چیقارلدم  
ایسه ده ینه اورانک خبرلرینی ویریم دیور .

حسرتلرله ، اکر کوزیا شلرم طوزلی اولمیه ایدی بن کوزلر  
مدن سرقوسه یه نهرلر اجرا ایدر ایدم دیدکدن صوکره ده  
یکرمی یاشمده بن کنج ایکن خندان ایدم وشمدی ده آلمش

باشمده اغلام دیور و خدادن عفو وغفران طلب ایلیور .  
 دین قرنداشمز « حمدیس » ک بزه بیراقمش اولدیغی  
 شو قصیده سندن برقاچ بیتمی یادکار تاریخی اوله رق شورایه  
 قیدایدرم .

|                            |                        |
|----------------------------|------------------------|
| قضت فی الصبا النفس أوطارها | و ابلغها الشیب انذارها |
| وما غرست الدهر فی تربة     | غراساً ولم یجن اثمارها |
| وساقية زررت کفها           | على عنق الظبي ازرارها  |
| کأن لها من نسیج الحبا      | ب شبا کأ یعقل اطيّارها |
| وراهبة أغلقت دیرها         | فکننا مع اللیل زوارها  |
| ذکرت صقلية والاسی          | یهیج للنفس تذکارها     |
| فان کنت أخرجت من جنة       | فانی أحدث أخبارها      |
| ولولا ملوحة ماء البکی      | لحلت دموعی أنهارها     |
| ضحکت ابن عشرين من صبوة     | بکیت ابن ستین أوزارها  |
| فلا تعظمن لديك الذنوب      | إذا کان ربک غفارها     |

حمدیسک دیوانی باشدن اخرینه قدر مطالعه ایلدم .  
 طبع شاعرانه سی پک عالیدر . تصویرینی شعرنده تجسیم ایدیور .  
 صحرانشین شعرای عربدن دکدر . اطه لی اولدیغی و دکز  
 کنارنده اوتوردیغی ، باغلی و باغچه لری . کوزلاری و کوزل  
 قوقولری و تنگی ، ورقصلری هب بیلدیکی شعرنده کورنیور .

بر قصیده سنده دخی اختیار لغی و وطنه اشتیاقی متأسفانه  
و متحسرانه تعریف ایلپور . دیپور که

نفی هم شیبی سرور الشباب      لقد أظلم الشیب لما أضاء  
أأکسو المشیب سواد الخضاب      فأجعل للصبح لیلاً غطاء  
و کیف أرجی وفاء الخضاب      اذا لم أجد لشبابی وفاء  
وطنندن اوزاق بولندیغی ایچون باد صبارله ودها صوکره  
فورتمه لره و بلوتلره خطاب ایدپور . روزکاره دیپور که طوب  
طوب اولان بلوتلری سوریکنز ، یانمه کتورکنز که ایچلرینه  
کوزیا شلریمی طولدره یم . بوکی برخیلی اییاتدن صوکرده  
قوردلرک قوزیلر آراسنده کزمسی کی وطنده بالار کزدی .  
بن بروقت وطن اورمانلرنده ارسلانلره رفاقت و کلیسالرنده  
آهولری زیارت ایتمشیدم . دکنلر ، بنی جانم فدا اوله سی  
وطنمه ملاقاتدن منع ایلپور دیدکن صوکره ده

رکبت الهلال به زورقاً      الی ان اعانق فیها ذکاء  
وطنک کوزل قوقولریله قوجا قلاشمق ایچون آسمانک  
هلال قایغنه بیندم دیه قصیده سنی آمام ایلپور .  
سیراقوزای حمدیس اوزون بر قصیده ایله ده مدح  
ایلپور . نخر به اوله رق ده  
«و نحن بنو النعمان الذین نغورهم      اذا عبست حرب لهم تبسم»

ديه ساحل چوجقلى اولدقلىنى وساحلارنده حرب  
ظهورىنى تبسملرله قارشولايه جقلىنى وبوكامشيل نيجه شاعرانه  
فكرلى نظم ايلامشدر . « رحمه الله رحمة واسعة »

شمديكى سيرا قوزانك هر در لוחلى ، عربلر زماندهكى  
حالندن ده ايلرو اولديغنه ، كرك او قودينغ عربجه كتابلرك  
سرقوسه يى مدح وكرك ايتاليا نجه كتابلرك تعريفلريله راي  
العين مشاهده مى بلمقايسه وجدانم قناعت ايتمشدر .

عجاييمه كيدن برشى وارسه اوده سيرا قوزه ده اسكان  
ويا حكومت ايتمش نه قدر ماتلر وارسه اسلامدن بشقه جمله  
سنگ آزچوق اثرلى محفوظدر . اسلامك ايسه سيرا قوزاده  
بوكونده هيچ بر شيشى قالمامشدر .

اهل صلييك اسلام عليهنه من القديم كينلرى اولديغى  
بيليردم . فقط كينلرى يولنه كتب و آثار اسلاميه يى ومدنيتيه  
خدمتلرى محقق بولنان علما وامراى امت محمدى قربان ايله كمده  
كى ضررى ادراك ايتميه جكلرينى ظن ايلمزد . شو « صقليه »  
سياحتم مراقيله تنبعات تاريخيه نتيجه سى اوله رق يقيناً او كرندم  
كه بوزلر عنادينه متعصدرلر . اسلامى واثارينى يوق ايتمك  
ايچون ، دكل تمدنى تاخير ايتمك حقى كندى تعاليم مسيحيه لرلى  
بيله اياقلى آلتنه آلمشدر .

« ابن الاثير الجزرى » نك « كامل التواريخ » نده



مذکور در که « روجارو » وفاتدن براز مقدمی « فیلیب »  
 اسمنده بر بیوک عسکرک قومانداسی آلتنده بر دونما کوندره  
 رک افریقاده کی « بونه » شهرینی استیلا ویغما ایلملرینی امر  
 ایتمشیدی. دونما شهر مذکور و صولیه عربلرک ده معاونتیله  
 حرب ایلمش و شهره کیرمش ، یغما ایتمش و اسیرلر آلمش  
 ایسه ده علما و صلحادن بر قسمک کویا مال و عیالریله شهردن  
 چیقملرینه کوز یومش ایش . نهایت « فیلیب » دونما ویغما  
 و اسراسیله سیچلیایه عودتنده « سن بعض علما ی اسلامه  
 مرحمت و فرارلرینه مساعدده ایتمشسک » دیه « روجارو » نک  
 امریله یاقه یی پاپاس و سواریلر محکمه سنه تسلیم ایلمش و یونلرده ،  
 علما و صاحبای اسلامه مرحمتی ، خرستیانلغه ایمان سر لغندندر  
 دیه تفسیر ایتمشلر و نهایت حریفی دیری دیری آتسه یاقشلردر  
 قرال « روجارو » اصفاقس شهرینی استیلا سنده صاحبای  
 امتدن « الشیخ ابو الحسن الغریانی » یی رهن آله رق  
 « صقلیه » یه کوتورتمش ایدی . براز صوکره « اصفاقس » ده  
 بولنان اوغلی عمر نقض عهد ایلدی دیه « ابو الحسن » حضر تلرینی  
 صقلیه ده دار اغاجنه چکدر مشدر .

قرون وسطا نک خرستیان تعصبی اسلامی کسمک ،  
 آصق و آتسه یاققله قناعت ایتمیه رک مسلمان اولولرینی بیله  
 قبرلندن چیقاروب آتسه یاقشلردر .

« ۱ » مثلاً صقلیه ده امیر بولنان « عباس بن الفضل بن یعقوب » هجرتك ۲۴۷ سنه سی سیراقوزادن قالقه رق عسکر یله « ۲ » « قر قنه » یه کیمش و حربا کیرمشیدی . بوراده امیر مشار الیه اوچ کون قدر خسته لندکدن صوکره فوت اولمش و « قر قنه » ده دفن اولنمشیدی . برمنه صوکره شرقی رومالیلر بورایه کلدکلرنده امیر عباسك قبرینی آچه رق جسدینی آتسه یاقشلدرد .

مرحوم امیر عباس عسا کر اسلامی « صقلیه » جزیره سندن « قلوریة » دیدکلری « قالا بریا » یه کچیرمش و « طارنت » دیه قید ایلدکلری « تارانتو » ده اسلام اسکانیله برده مسجد بنا ایتدرمشیدی .

برده « ابو عبد الله القیروانی » نك « كتاب المونس فی

« ۱ » . « ابن الاثیر الجزری » نك « كامل التواریخ » نام اثرینك اوتوز بشنجی بابینك ۲۳۵ نومرولی صحیفه سندن خلاصه اقتباس اولندی .

« ۲ » « قر قنه » نك براطه اولدیغنی دیکریر کتابده اوقودم . خریطه ده آرادم . « لی نوزا » نام اطه ده « Carcarella » « قرقه ریللا » دیه بر محل اسمی اوقودم . احتمال که اوزمانده کی اسمیدر .

اخبار افریقیه وتونس « نام اترینك ۵۳۷ نومرو لی صحیفه سنده دییورکه : «عدو الله اولان روجار» صقلیه مسلمانلریله فرنکلردن متشکل عسکرینی وییوک دونماسنی «جربه» اطه سنه کوندردی و بونلر حرباً جریه یی آلهرق رجانی قتل وناسانی اسیرایله «صقلیه» یه کوتوردیلر واوراده اسیرپازارینه سوق ایله صاندیلر .

« صقلیه » نك هانكي شهر و قریه سی اولورسه اولسون ، اهل صلیب عسکری طرفندن استیلا ایدلدی ایسه همان اوراده کی اهالی اسلامیه ، او عالم ومتمدن عربلر بالجمله بای ، کداحشرات مضره حالنده کوريله رك هر درلو افعال جبریه استعمالیه ایچنده طوغوب بیودکلری دارلرندن وایکی یوزاللی سنه دنبرو اتالرینك کمیکارینی کومدکلری دیارلرندن ودرلو میودلی ومیوه سز اشجار و نباتات زرعیله دنیا جنتی حالته کتور دکلری او کوزلم اطه لرندن یا طرد ویا حرق و اعدام ایله آیرمغه چالیشمش واسارتی قبول ایله ایچلرنده قالمغه مضطر اولان قادین ارکک امت محمد ، پاپاسلرک همت و غیرت لریله چاله صوپا تنصیر ایدلمشلر در .

ه ب بو انقراض اسلامه امراسنك یری بزلی اراسنده اختلافی وسفاهته انهما کی سبب اولمشدردیرم . چوبانی اویویان سورویه قوردلر چوبان اولور .

## ۱۶ کانون نانی ۱۹۲۱

انسان اوغلی ، تاربخلرک تعیین ایده مدیکی بر زماندنبرو  
اراده سنی اداره دن عاجز بر مخلوق بولندیغنی تخمین ایلدیکندن  
آسمانی بر اراده نك نفسی اداره ایتمکده اولدیغنه اینانمش ،  
ایمان کتورمشدر . اشبو ایماننده ثابت بولندیغنی اثبات ایچونده  
مقاومت ایده حکم دیه مجهولاتله اوغراشمش طورمشدر .  
مستقبل کی کوردهیم وهر سوزیمی یوروتیم دیه سحر ، جفر ،  
رمل واسقامبل کی احساس بشری تخمیل ایلین خرافاتی  
اویدرمش وکویا بونلرک حکم و تاثیر سیاه سنده ییلدیزلرله  
باریشمغه ، جنلره ، پرلره قاریشمغه یلتمش طورمشدر .  
سودانده جاص جاولاق کزن زنجیلرک سحرله ، بنجورله



غائب علمنه واقف اولدقلری دعواسنی کوردیکده انسان مکر جهلی  
درجه سنده خرافات و خز عبلا ته مفتون اولورمش دیه عقلمجه  
بیله کیجیلکه قالقیشمشیدم . صوکره انکاترده کوردم که :  
آلتون زنبیل ایله کوکدن اینمش انکلیزلر آراسنده دخی  
اساطیرالاولین زیاده سیله منتشردر . هله طائفهٔ انسانی  
تاندیرنامه احکامنه اوامرکتب مذهبیلهری درجه سنده حرمت  
ایدیورلر .

اوروبانک یارس وروما کی مشهور شهرلرنده فالجلیق اک  
رواجلی صنعتلر صره سنده بولندیغنی مشاهده ایلدم . بزم مصرده  
دخی فالجلیق ، رملجیلک ایله معیشت ایلین انسانلر اولدقجه  
چوقدر .

پارموده ایسه بخته باقان اسقامیله جیلرک هر طبقه سی  
موجوددر .

بوگون خبر آلمشیدم که : امیره حضرترلرینه پارموده اک  
مشهور بر فالجی قادین یولندیغنی وبردیدیکنک ایکی اولمیه رق  
حرفی حرفنه طوغرو چیقیدیغنی بیلدر مشلر ، مشار الیهاده  
بر کره کوره لم ، بعض شیلر صورده لم ، باقه لم نه دیه جکدر ؟ دیه  
کتورلمسنی آرزو ایلمشلردر .

حالبو که امیره مزک خدمتکاری بولنان ایتالیان بر تقریب  
اوطمه کلهرک پارمونک او مشهور فالجی قاریسنک «ویلا ایجی آ»

اوتلنه قدر بردفمه گلسی ایچون بیک بش یوز ایتالیان لیراسی  
طلب ایلدیکنی ویشین اوله رق آمادقجه ده بورادن شورایه  
آدینی آتمه جغنی بیلدردیکنی اوزوله بوزوله بکاخر ویردی.  
نه ؟ بر فالجی ویزیتیه سی بیک بش یوز لیرایه اویله می ؟ دیه حریفه  
برقاش چاتممه منه اوطه مدن غائب اولدی کیتدی .

غریب شی ! امیره حضر ترینه وقت کچیرمک ایچون فالجی  
لازمسه اوتلمزده جادیمی اکسیکدر دیه جینغراغه بر کره باش  
پارماغنی باصدم . بزم اوطه لرمزه باقان « ماریا » نام قادین قوممه  
اوره رق کیردی . بن ارتق یاری شاقه بر جدید کله

— قوزوم ! ماریا ! سن دخی کاغد آچماسنی البته بیلیرسک .  
هم ده آغزیک خیره آچمق شرطیله هر دفعه ده سکا یکر می  
ایتالیان لیراسی قازاندره جغم . یو . . ق ! انکار ایتمه . هر  
ایتالیان قاریسی کی سنک ده اوطه کده مطلقا بردسته اسقامبیل  
موجوددر . هایدی باقه لم . اصولجه آلده سالونه کل دیدم .  
یکرمی لیرا قازانه جغنی قولاق لریله ایشیدن ماریا هر شیمئی  
اعترافله کیتدی و شطرنجی فالجی مندیلمنه صاریلی بردسته  
اسقامبیلله سالونه کیردی .

اقشام طعامنده امیره حضر ترلی پک نشاطلی ایدی .  
خدمتکار فالجی قادینک غائبدن ویردیکی خبر لریله اییجه کلندیکنی  
سویلدی . مکر « دوننا ماریا » شطرنجی مندیلمک اوزرینه

آچدیغی اسقامبیلندن غائی برر برر استیخراج ایله قتمرلی  
مژده لری طوس طوغرو خبر ویرمش ایمش ! ...

ارتق « ماریا » صباح لری خدمتچی ، اقشاملری فالجی  
اوله رق یکر میشر لیرانی بوکمکه باشلادی . بن ده هر دفعه سنده  
ایکی اونلق قائمه یی الینه طوتشدر دقجه کوزلرینک ایچنه  
باقار اولدم .

موثوقاً خبر الدیغمه کوره فالجی دجاللرک یوزندن خانه لر  
ویران وفامیلیالر پریشان اولیورمش . فالجیلغک اک عادی ضرری  
افراد اهالی یه اولوب مثلاً برقادینه « سنی زوجک سومیور ،  
کوکلی بشقه برقادینده در ویار قیزه » نشانلکله ازدواجکده  
سعادت یوقدر ، سنی فلانک سومسی ایچون سحر یامق  
لازمدر » کبی ساده دل خلفی اغفال ایله فنا لفه سوق ایدر لر ایمش .  
بزم مصر کویلرینک برنده بر کویلی محصولی صاته رق  
آلدیغی کاغد آچه سنی یاصدیغنک آلتنه صاقلامش وبونی تصادفاً  
بولان زوجه ، افتراقی ایچون زوجنک سحر یاپدرمش اولدیغی  
ظن ایله همان سحر کاغدری دیه حکم ویردیکی بانقوتلری  
اولدیغی کبی اوجاغه آتش ، آتسه یاقش و اوستمه ایلیک صاغلاق  
دیهاوچ کرده اطر افنده تو . تو دیشدر . او زمان بووقعه یی  
بتون مضر غزته لری یازمشیدی .

دیگک که : بر قومک آراسنده دجاللقله تأمین منفعت ایدن

طفیلیلر بولند قجه ساده دلانك متضرر اولماسی محالدر . نشر و تعمیم معارفله منافع عمومیه تأمین اولنور دینلره بوبابده یوزده یوز تعلیم کور مشر دین ملتلر آراسنده کی فالجیلرک وفاله اینانانلرک چیلاق زنجیلرک خرافاته اعتقاد ایدنلرندن آز اولسا دقلرینی معلومات موثوقه مه بناءً خبر ویرزم .

عربلرک « علم الرکة » و ترکلرک « جیقریق ویاتاندرنامه » وعجملرک « کلثوم ننه » لرینه قارشو ایتالیاده درلو درلو طالعنامه لر ، تعبیر نامه لر طبع ایدلمشدر . اخلاق و آداب عمومیه مخالف ایدیلن مطبوعاتی امنیت عمومیه اداره لری انتشاردن منع ایلدیکی حالده نظام جماعته مادی و معنوی مضر بولنان خرافات نامه لری و خصوصاً فالجی و أمثالنی شدید قانونلر وضعیله منع ایتمیشلردر . بونک ایچوندرکه . حالا غرب و شرقده سحر ، جفر ، بخور ، کبی « علوم دجلیه » پایدار اولمش و ساده دلان بشرک کمیتی درجه سنده ده دجاللر درلو قیافتلریله چیقمش و باشمزه قیامتلی قوپار مشلردر . مادام که : حالا ، خیالیات حقایقه غالب و مجهولات معلوماته حاکم بولنیور ، عقائد خرافیه مرضنک ده دواسی یوقدر .

عقول بشر ، اولدی بیتیادی ماده نی براقهرق شکل ایله اوغراشمشدر . دهاده اوغراشه جقدر والسلام ! ...








سچیلیاده برکویلی قیزی





عرض حالجی و مکتوبجی و فرانسیز جه دن ایتالیا نجه به ترجمه  
و موزیقه نوطه لرینی استنساخ ایدر بر میدان کاتبی



## ۲۰. کانون ثانی ۱۹۲۱


اوچ کوندنبرو خفیف بر صغوق آلمشم . یامیور سه مده  
 قیری قلغم وار . امیره حضر تلرینک اصرار یله آلدیغم قناقنا جبرلی  
 وجود مدن حمای منیع ایتدی اما باشمی ده طاوله چویردی .  
 وقت ظهر دن بر ساعت مقدمی ایصینه یم دیه سوقاغه چیقدم .  
 ارا به ایله شهره کلدیم . پوسته خانه جوارنده بر میدان  
 مکتوب بچیسنه راست کلدیم . اقربا و یانشانلیرینه مکتوب کوندره  
 جکلرک خدمت کتاییه لرنده بولیمور ایدی . کله قولاق یرنده  
 وسیلندر شابقه باشنده بر ایرایه قدر اجر تله پک ادبی عاشق  
 و معشوق مکتوبلری بیه یازیور . صوکره دن او کرغشیدم که  
 بویه کیمسه لر مکتوب بچیلقدن بشقه جانبا زلقده ایدر لر ایمش .

زواللی کویلی قیزلری ایسه اک شاعرانه مکتوبلرینی بویله  
کاتبلره یازدریرلر ایمش .

دونه طولاشه « قلعه » جادهسی جوارنده ال ارابه سیله  
قیش قانونی صاتیور بریسنه راست کلدیم . بش لیرایه پک کوزل  
برقاون آلدیم و آرابه ایله اوتله عودت ایلدیم . کاشکه سوقاغه  
حقیقمیه ایمشم .

اوطه مه کلدیگده عادتاً اوشویور ایدیم . اقشامه طوغرو  
یاتاغه کیرمکه مجبور اولدم . اقشام طبیب بنی براییجه معاینه  
ایلدکن صوکره اک آزدن بش کون اوطه ده اوتورمه می توصیه  
ایلدی . کچوک بر اهمال بیوک بر خسته لیکه سبب اوله  
بیلیردیهرک کیتدی .









## پالمو ۲۷ کانون ثانی ۱۹۲۱

### پنجشنبه

ایکی کوندنبروینه عادتیم وجه اوزره ارکنجه قالقه رق  
صبحا کزینتیلری نامیله تازه هوا تنفس ایتمکه باشلادم .  
قادین ، ارکک ایشیجی گروهی صباحلری ایشلرینه کیتدکلری  
اثناده پک چوغی اغیزلری قیالی اوله رق برونلرندن تغنی  
ایدیورلر . بعضلری ده «فلاوطه» تقلیدی ایصلیق چالیورلر .  
«سیچلیا» لیلرک عوامه مخصوص بولنان تغنیلری هم بسته  
لرینک قیصه لغی هم ألحان نهایتلرینک بردنبره قطعی اعتباریله  
عرب تغنیلرینه پک یقیندر . آه ! کوکل ایستردی که : صقلیه ده

او زمانکی متمدن عربلرک تغئیلرینی دیکلکش اوله یدم . « ۱ »  
سیچلیا عوامنک بلدن اشاغی قسمنی صالایه رق بر نوع  
رقصلرینی کوردیکده عرب رقصلرندن پکده فرقنی بوله مدم .  
اندلس عربلرینک رقصلرینی شوپله بویله بوکونده اسپانیول  
رقصلری نامیله سیرایلدیکمه بکزیور .

اوکله طعامندن صوکره ارتق اوطه مدن طیشاری چیقمییه  
جغم دیه هر احتیاجی اوکا کوره ترتیب ایتمش وصیجاق  
کوشه مده کتاب وغزته لرله مطالعه مه طالمشیدم  
اقشامه طوغرو ، زوالی ساعت آلتی یه اون قاله امیره

( ۱ ) « نفح الطیب من غصن الاندلس الرطیب »  
نام کتابک برنجی جلدنده مصر باصمه سی ۱۰۴ نومرولی  
صحیفه سنده محرر درکه « ابن سعید » نام ذاتک ، اندلس  
عربلرینک شکل وقیافتلرینی یازدیغی بر کتابک ایکنجی قسمنده  
« کتاب الاحان المسلمیه فی حلی جزیره صقلیه » دیه سیچلیا  
عربلرینک تغئیلری حقنده پک بیوک بچملر وارايش وبوبچملر  
درلو فصللره دخی آیرلش ایش .

دیرم که : بو و أمثالی کتب نفیسه نک بوکونده نهایت بر  
اسمی قالمشدر . کتابلرک جسمی ایسه اوزمانده کی متعصبین  
مسیحیه نک جهالتلری آتشیله کول اولمش کیتمشدر .

حضرت لرینه بر تلغراف کلمش و بونده « روما » ده بولمان  
 آبالرینک غایت آغیر خسته لندکلی بیلدرلشدیر . پرتلاش  
 مشورت ایدلدی و بزم درحال رومایه حرکم قرارلاشدرلدی .  
 یکریمی دقیقه صوکره اوتوموبیل ایله اوتلی ترک ایلدم .  
 یدیده واپوره راکب اولدم و تمام یدی بچوقده واپورحرکتله  
 « ویلا ایچی آ » اوتلی صول طرفنه آله رق « ناپولی » دیه  
 طالغهرلی یارمغه باشلادی . بن ایسه هوانک سرینلکنه رغماً  
 اوست قاتده یوزمی « پالمو » یه چویر مش وفکریمی تمام  
 بیک سنه اوله ارجاعله « بلم » ویا « المدینه » والخالصه  
 « والبیضاء » ده کی اخوان دینمی بصر بصیرتم اوکنه کتور  
 مش وروحانی ملاقاتلره مشغول اولمشیدم . واپورمز لیماندن  
 چیقوب اطه بی صاغنه آله رق سرعتی آرتیرنجهیه قدر تفکر  
 و تماشای احوال اخوانمده دوام ایلدم . نهایت کوزلرم یاشاردی .  
 « الباقی هو الخالق . الفاتحه » دیهرک « صقلیه » اطه سنده  
 مدفون بولمان میلیون میلیون اخوان دینمزک ارواحنه ازبرمده  
 اولان قرآن کریمدن بر مقدارینی فاتحه شریفه خاتمه سیله تلاوت  
 و ثوابی بخش ایلدم . « الوداع ! ای ارواح شهدای اسلام .  
 ارتحالکزدن بیک سنه صوکره اطه کزه کلدیم . اهل صلیبک  
 باشکزه کتورمش اولدیغی مظالمی تحقیق ایلدم و کتابلریکزدن  
 اوقودم اوکرندم . مبانی وقبرلریکزی ییقمش، یوق ایتمشله،

دیرلرکزه علاوتاً اولولریکیزک کیمکیرینی دخی آتشلره یاقه  
رق کواکزی هوایه صاویر مشلردر. کیدوب قوممه ، قوه مسلحه  
محمدینک بقیة الباقیه سی اولان ترکلره دیلمک دوندیکی قدر  
بونلری سویلیمه جکم . قلممک یازمه ییلدیکی قدر یله ده احوال  
تاریخیه کزی خبرویره جکم . عبرت آلسونلر .

مساجد اللهی خراب ایتمشلر و اکثریسنک یرلرینه کلیسالر  
یامشلردر . بونلرک انتقامنی ده صاحبی اولان تکرری تعالی یه  
حواله ایدرم .

ربم ! بز مسلمان قوللریکک قانلرینی ارتق هدر ایتدیرمه .  
وحدانیتکی تصدیق ایلینلری مشرکالنده یوق ایلیمه .  
تکریم ! بز امت محمدکک حقارینی حقایق . دین محمدینک  
حفظ وحمایه سی ایچون چکمش اولدیغمز قلیجیمزی کسکین  
ایله . بازوی اسلامه قوت ویرکه حق دینسکله له برابر الی قیام  
الساعه قاله لم ، حر و مستقل اوله رق یشایه لم . آمین .



| صوب         | خطا        | سطر | صحیفہ |
|-------------|------------|-----|-------|
| منصبی       | مصبی       | ۷   | ۸۵    |
| بونلردن     | برنلردن    | ۱۳  | ۸۸    |
| اولدیغی کچی | اولدیغی    | ۳   | ۹۶    |
| حنیت        | چیت        | ۵   | ۱۰۲   |
| مدنیت       | مدینت      | ۳   | ۱۱۳   |
| زہہ         | زہہ        | ۱۲  | ۱۱۳   |
| قلعہ و      | قلعہ       | ۱۷  | ۱۱۳   |
| اویدرمش     | ویدرمش     | ۱   | ۱۱۴   |
| صوکرہ       | وکرہ       | ۸   | ۱۲۰   |
| زمانزده     | زمانز      | ۱   | ۱۴۸   |
| باشہ        | باششہ      | ۱۸  | ۱۵۴   |
| آلتی        | یدی عدد    | ۱۸  | ۱۶۴   |
| فورما       | ملزما      | ۷   | ۲۰۰   |
| حک          | جک         | ۱۰  | ۲۰۳   |
| قرق         | قرق درت    | ۱۶  | ۲۰۹   |
| واورادہ     | وارادہ     | ۲   | ۲۱۰   |
| کانون اول   | کانون ثانی | ۹   | ۲۱۱   |
| ازدواجدن    | ازداجدن    | ۲۰  | ۲۱۹   |
| پایتمخنے    | پایتمخنے   | ۶   | ۲۲۰   |

|     |    |     |     |
|-----|----|-----|-----|
| 100 | 1  | 100 | 100 |
| 100 | 2  | 100 | 100 |
| 100 | 3  | 100 | 100 |
| 100 | 4  | 100 | 100 |
| 100 | 5  | 100 | 100 |
| 100 | 6  | 100 | 100 |
| 100 | 7  | 100 | 100 |
| 100 | 8  | 100 | 100 |
| 100 | 9  | 100 | 100 |
| 100 | 10 | 100 | 100 |
| 100 | 11 | 100 | 100 |
| 100 | 12 | 100 | 100 |
| 100 | 13 | 100 | 100 |
| 100 | 14 | 100 | 100 |
| 100 | 15 | 100 | 100 |
| 100 | 16 | 100 | 100 |
| 100 | 17 | 100 | 100 |
| 100 | 18 | 100 | 100 |
| 100 | 19 | 100 | 100 |
| 100 | 20 | 100 | 100 |
| 100 | 21 | 100 | 100 |
| 100 | 22 | 100 | 100 |
| 100 | 23 | 100 | 100 |
| 100 | 24 | 100 | 100 |
| 100 | 25 | 100 | 100 |
| 100 | 26 | 100 | 100 |
| 100 | 27 | 100 | 100 |
| 100 | 28 | 100 | 100 |
| 100 | 29 | 100 | 100 |
| 100 | 30 | 100 | 100 |
| 100 | 31 | 100 | 100 |
| 100 | 32 | 100 | 100 |
| 100 | 33 | 100 | 100 |
| 100 | 34 | 100 | 100 |
| 100 | 35 | 100 | 100 |
| 100 | 36 | 100 | 100 |
| 100 | 37 | 100 | 100 |
| 100 | 38 | 100 | 100 |
| 100 | 39 | 100 | 100 |
| 100 | 40 | 100 | 100 |
| 100 | 41 | 100 | 100 |
| 100 | 42 | 100 | 100 |
| 100 | 43 | 100 | 100 |
| 100 | 44 | 100 | 100 |
| 100 | 45 | 100 | 100 |
| 100 | 46 | 100 | 100 |
| 100 | 47 | 100 | 100 |
| 100 | 48 | 100 | 100 |
| 100 | 49 | 100 | 100 |
| 100 | 50 | 100 | 100 |









فيثاني اون بش غروشدر

---

« اصمعي » نك انار سائر دسي  
مصر ده امين هندية كتابخانه سنده  
بولنور


---











3 1761 08149556 6

DG  
864  
A76  
1922  
c. 1

ROBA